



全宋词

5

中国诗词大全
黄岸电子图书系列

孙惟信

失调名 四十九岁自寿

寿花戴了。山童问、华庚多少。待瞞来、又怕旁人笑。况戒腊、淳熙可考。大衍之用恰恰好。学易后、尚一年小。谢屐唐衣眉山帽。薰风送下蓬岛。

生巧。吕翁昨夜钟离早。又曾参、两个先生道。又也曾偷桃啖枣。百屋堆钱都不要。更不要、衮衣茸纛。但要酒星花星照。鹊笑到老。

风流子

三叠古阳关。轻寒噤、清月满征鞍。记玉荀揽衣，翠囊亲赠，绣巾搵脸，金柳初攀。自回首，燕台云掩冉，凤阁雨阑珊。天有尽头，水无西注，鬢难留黑，带易成宽。

啼妆，东风悄，菱花在，拟倩锦字封还。应想恨蛾凝黛，慵髻堆鬟。奈情逐事迁，心随春老，梦和香冷，欢与花残。闲煞唾茸窗阁，十二屏山。

烛影摇红

一朵鞦韆红，宝钗压髻东风溜。年时也是牡丹时，相见花边酒。初试夹纱半袖。与花枝、盈盈斗秀。对花临景，为景牵情，因花感旧。

题叶无凭，曲沟流水空回首。梦云不入小山屏，真个欢难偶。别后知他安否。软红街、清明还又。絮飞春尽，天远书沈，日长人瘦。

清平乐

秋娘窗户。梦入阳台雨。小别殷勤留不住。恨满飞花落絮。

一天晓月檐西。马嘶风拂罗衣。分付许多风致，送人行下楼儿。

阮郎归

满阶红影月昏黄，玉炉催换香。碧窗娇困懒梳妆。粉沾金缕裳。

鸾髻耸，黛眉长。烛光分两行。许谁骑鹤上维扬。温柔和醉乡。

南乡子

璧月小红楼。听得吹箫忆旧游。霜冷阑

干似水，扬州。薄幸声名总是愁。

尘暗鞞鞬裘。针线曾劳玉指柔。一梦觉
来三十载，休休。空为梅花白了头。

夜合花

风叶敲窗，露蛩吟磬，谢娘庭院秋宵。
凤屏半掩，钗花映烛红摇。润玉暖，腻云娇。
染芳情、香透鲛绡。断魂留梦，烟迷楚驿，
月冷蓝桥。

谁念卖药文箫。望仙城路杳，莺燕迢迢。
罗衫暗摺，兰痕粉迹都销。流水远，乱花飘。
苦相思、宽尽春腰。几时重恁，玉骢过处，
小袖轻招。

昼锦堂

薄袖禁寒。轻妆媚晚，落梅庭院春妍。
映户盈盈，回倩笑整花钿。柳裁云剪腰支小，
凤蟠鸦耸髻鬟偏。东风里，香步翠摇，蓝桥
那日因缘。

婵娟。留慧盼，浑当了、匆匆密爱深怜。
梦过阑干，犹认冷月秋千。杏梢空闹相思眼，
燕翎难系断肠笺。银屏下，争信有人，真个
病也天天。

醉思凡

吹箫跨鸾。香销夜阑。杏花楼上春残。

绣罗衾半闲。

衣宽带宽。千山万山。断肠十二阑干。
更斜阳暮寒。

水龙吟 除夕

小童教写桃符，道人还了常年例。神前
灶下，祓除清净，献花酌水。祷告些儿，也
都不是，求名求利。但吟诗写字，分数上面，
略精进、尽足矣。

饮量添教不醉。好时节、逢场作戏。驱
傩爆竹，软饧酥豆，通宵不睡。四海皆兄弟，
阿鹊也、同添一岁。愿家家户户，和和顺顺，
乐升平世。

望远行 元夕

又还到元宵台榭。记轻衫短帽，酒朋诗
社。烂漫向、罗绮丛中，驰骋风流俊雅。转
头是、三十年话。

量减才慳，自觉是、欢情衰谢。但一点
难忘，酒痕香帕。如今雪鬓霜髭，嬉游不怵
深夜。怕相逢、风前月下。

孙 吴 会

摸鱼儿 题甘露寺多景楼

八窗空、展宽秋影，长江流入尊俎。天围紺碧低群岫，斜日去鸿堪数。沈别浦。但目断、烟芜莽苍连平楚。晨钟暮鼓。算触景多愁，关人底事，倚槛听鸣橹。

英雄恨，赢得名存北府。寄奴今寄何所。西风依旧潮来去，山海颯颯吞吐。霜月古。直耐冷、相随燕我瑶芝圃。掀髯起舞。看獬伏苍苔，龙吟翠葆，天籁奏韶舞。

孙覿

菩萨蛮 落梅

一声羌管吹呜咽。玉溪夜半梅翻雪。江月正茫茫。断桥流水香。

含章春欲暮。落日千山雨。一点著枝酸。吴姬先齿寒。

孙 洙

菩萨蛮

楼头上有三冬鼓。何须抵死催人去。上马苦匆匆。琵琶曲未终。

回头肠断处。却更廉纤雨。漫道玉为堂。玉堂今夜长。

河满子 秋怨

怅望浮生急景，凄凉宝瑟馀音。楚客多情偏怨别，碧山远水登临。目送连天衰草，夜阑几处疏砧。

黄叶无风自落，秋云不雨长阴。天若有情天亦老，摇摇幽恨难禁。惆怅旧欢如梦，觉来无处追寻。

孙恂

点绛唇

烟洗风梳，司花先放江梅吐。竹村沙路。
脉脉摇寒雨。

醉魄吟魂，无著清香处。愁如缕。系春
不住。又折冰枝去。

长相思

云一窝。玉一梭。淡淡春衫薄薄罗。轻
颦双黛蛾。

风声多。雨声和。窗外芭蕉三两窠。夜
长人奈何。

太尉夫人

极相思令

柳烟霁色方春。花露逼金茎。秋千院落，
海棠渐老，才过清明。

嫩玉腕托香脂脸，相傅粉、更与谁情。
秋波绽处，相思泪迸，天阻深诚。

太学士人

临江仙

莫怪钱神容易致，钱神尽是愚夫。为何此鬼却相于。只因频展义，长是泣穷途。

韩氏有文曾饯汝，临行慎莫踌躇。青灯双点照平湖。蕉船从此逝，相共送陶朱。

太学诸生

南乡子

洪迈被拘留。稽首垂哀告彼酋。七日忍饥犹不耐，堪羞。苏武争禁十九秋。厥父既无谋。厥子安能解国忧。万里归来夸舌辨，村牛。好摆头时便摆头。

覃怀高

水调歌头 游武夷

翠蕤插云表，初意隔仙凡。临风据案一见，邂逅似开颜。几欲拏舟九曲，便拟扪参绝顶，直下俯尘寰。聊此税吾驾，赢得片时闲。问仙人，缘底事，去不还。长风浩浩，何许清梦杳难攀。只有苍烟古木，好在清湍白石，依旧画图间。回首武夷路，杳霭没云鬟。

谭 方 平

水调歌头

富贵在何许，五十已平头。人生得失且笑，休遣两眉愁。管甚轮云世变，管甚风波世态，沙渚且盟鸥。止即尽教止，流即尽教流。

田可秫，山可簌，又何求。问天只觅穷健，游戏八千秋。好对梅花如粉，细剪烛花如豆，不改旧时游。翠袖更能舞，骑鹤上扬州。

谭 宣 子

摸鱼儿 怀云崖陈乘车东甫，时游湘潭

掩朱弦、住听金缕。天涯同是羁旅。多情记把香罗袖，残粉半黏荆树。还信否。便忍道、石台暗寂春无主。分明间阻。那睡鸭嘘云，翔鸳溜月，此际更休语。

人间世，谁识緘愁最苦。轻帆重解烟雨。而今翻笑周郎误。挑剔寒缸寻谱。游倦处。果因甚、亭亭瘦影如前度。无由寄与。待谢却梅花，东风为我，吹梦过淮浦。

西窗烛 雨霁江行自度

春江骤涨，晓陌微干，断云如梦相逐。料应怪我频来去，似千里迢迢，伤心极目。为楚腰、惯舞东风，芳草萋萋衬绿。

燕飞独。知是谁家，箫声多事，吹咽寻常怨曲。尽教衿袖香泥浣，君不见、扬州三生杜牧。待泪华、暗落铜盘，甚夜西窗剪烛。

侧犯

素秋渐爽，倚香曲枕情依旧。怀袖。浸

数尺湘漪、篔纹皱。悲欢尽梦里，玉骨从消瘦。空又。思太液芙蓉未央柳。

翔凤何在，乐府传孤奏。人病酒。有鸳鸯双字倩谁绣。拜月西楼，几声滴漏。应恐纨洁，已疏郎手。

春声碎 南浦送别自度腔

津馆贮轻寒，脉脉离情如水。东风不管，垂杨无力，总雨颦烟寐。栏干外。怕春燕掠天，疏鼓叠、春声碎。

刘郎易憔悴。况是恹恹病起。蛮笺漫展，便写就新词，倩谁将寄。当此际。浑似梦峡啼湘，一寸相思千里。

长相思

去路遥。归路遥。灯月光中立小桥。魂萦紫玉箫。

风萧萧。雨萧萧。此夜相思空寂寥。梅花落丽谯。

又

净亭亭。步盈盈。蝉影明绡傅体轻。水边无限情。

翠尊倾。翠鬟倾。归去如何睡得成。西风吹酒醒。

谒金门

银漏滴。午夜平康巷陌。双掩兽环人语

全宋词 谭宣子

寂。馀香无处觅。

回首旧游踪迹。绀碧染衣犹湿。一饷沈吟谁会得。月明春店笛。

又

人病酒。生怕日高催绣。昨夜新翻花样瘦。旋描双蝶凑。

闲凭绣床呵手。却说春愁还又。门外东风吹绽柳。海棠花厮勾。

浣溪沙 过高邮

欲展吴笺咏杜娘。为停楚棹觅秦郎。藕花三十六湖香。

珠颗翠繁饶宿泪，玉痕红褪怯晨妆。小桥风月思凄凉。

玲珑四犯 重过南楼用白石体赋

碧黯塞榆，黄销堤柳，危栏谁料重抚。才情犹未减，指点惊如许。当时共伊东顾。为辞家、怕吟鹦鹉。袞袞波光，悠悠云气，陶写几今古。

生尘每怜微步。渺江空岁晚，知在何处。土花封玉树。恨极山阳赋。吹芰扇底馀欢断，怎忘得、阴移庭午。离别苦。那堪听、敲窗冻雨。

鸣梭 自度

织绡机上度鸣梭。年光容易过。萦萦情

绪，似水烟山雾雨相和。谩道当时何事，流盼动层波。巫影嵯峨。翠屏牵薜萝。

不须微醉自颜酡。如今难恁麽。烛花销艳，但替人、垂泪满铜荷。赋罢西城残梦，犹问夜如何。星耿斜河。候虫声更多。

江城子

嫩黄初染绿初描。倚春娇。索春饶。燕外莺边，想见万丝摇。便作无情终软美，天赋与，眼眉腰。

短长亭外短长桥。驻金镳。系兰桡。可爱风流，年纪可怜宵。办得重来攀折后，烟雨暗，不辞遥。

渔家傲

深意缠绵歌宛转。横波停眼灯前见。最忆来时门半掩。春不暖。梨花落尽成秋苑。

叠鼓收声帆影乱。燕飞又趁东风软。目力漫长心力短。消息断。青山一点和烟远。

谭意歌

极相思令

湘东最是得春先。和气暖如绵。清明过了，残花巷陌，犹见秋千。

对景感时情绪乱，这密意、翠羽空传。风前月下，花时永昼，洒泪何言。

长相思令

旧燕初归，梨花满院，迢迢天气融和。新晴巷陌，是处轻车骏马，楔饮笙歌。旧赏人非，对佳时、一向乐少愁多。远意沈沈，幽闺独自颦蛾。

正消黯、无言自感，凭高远意，空寄烟波。从来美事，因甚天教，两处多磨。开怀强笑，向新来、宽却衣罗。似恁他、人怪憔悴，甘心总为伊呵。

汤 恢

二郎神 用徐干臣韵

琐窗睡起，闲伫立、海棠花影。记翠楫银塘，红牙金缕，杯泛梨花冷。燕子衔来相思字，道玉瘦、不禁春病。应蝶粉半销，鸦云斜坠，暗尘侵镜。

还省。香痕碧唾，春衫都凝。悄一似荼蘼，玉肌翠帔，消得东风唤醒。青杏单衣，杨花小扇，闲却晚春风景。最苦是、蝴蝶盈盈弄晚，一帘风静。

倦寻芳

饧箫吹暖，蜡烛分烟，春思无限。风到楝花，二十四番吹遍。烟湿浓堆杨柳色，昼长闲坠梨花片。悄帘栊，听幽禽对语，分明如翦。

记旧日、西湖行乐，载酒寻春，十里尘软。背后腰肢，仿佛画图曾见。宿粉残香随梦冷，落花流水和天远。但如今，病厌厌、

海棠池馆。

满江红

小院无人，正梅粉、一阶狼藉。疏雨过，溶溶天气，早如寒食。啼鸟惊回芳草梦，峭风吹浅桃花色。漫玉炉、沈水熨春衫，花痕碧。

绿麝水，红香陌。紫桂棹，黄金勒。怅前欢如梦，后游何日。酒醒香消人自瘦，天空海阔春无极。又一林、新月照黄昏，梨花白。

祝英台近

宿醒苏，春梦醒，沈水冷金鸭。落尽桃花，无人扫红雪。渐催煮酒园林，单衣庭院，春又到、断肠时节。

恨离别。长忆人立荼蘼，珠帘卷香月。几度黄昏，琼枝为谁折。都将千里芳心，十年幽梦，分付与、一声啼鴂。

又 中秋

月如冰，天似水，冷浸画阑湿。桂树风前，酿香半狼藉。此翁对此良宵，别无可恨，恨只恨、古人头白。

洞庭窄。谁道临水楼台，清光最先得。

万里乾坤，原无片云隔。不妨彩笔云笺，翠尊冰酝，自管领、一庭秋色。

八声甘州

摘青梅荐酒，甚残寒、犹怯苧萝衣。正柳腴花瘦，绿云冉冉，红雪霏霏。隔屋秦筝依约，谁品春词。回首繁华梦，流水斜晖。

寄隐孤山山下，但一瓢饮水，深掩苔扉。羡青山有思，白鹤忘机。怅年华、不禁搔首，又无涯、弹泪送春归。销魂远，千山啼鸪，十里荼蘼。

失调名

绾燕吟莺。

二郎神

碧崖倒影，浸一片、寒江如练。正岸岸柳花，村村修竹，唤醒春风笔砚。溯水舟轻轻如叶，只消得、溪风一箭。看水部雄文，太师健笔，月寒波卷。

游倦。片云孤鹤，江湖都遍。慨金屋藏妖，绣屏包祸，欲与三郎痛辨。回首前朝，断魂残照，几度山花崖藓。无限都付窠尊，漠漠水天远。

全宋词 汤 恢

八声甘州

想当年、龙舟凤辇，乐宸游、摇曳锦帆
斜。伤心是，御香染处，树树栖鸦。

汤思退

菩萨蛮 游水月寺

画船横绝湖波练。更上雕鞍穷翠巘。霜
橘半垂黄。征衣尽日香。

钟声云外听。金界青松映。何处是华山。
峰峦杳霭间。

唐 庚

诉衷情 旅愁

平生不会敛眉头。诸事等闲休。元来却到愁处，须著与他愁。

残照外，大江流。去悠悠。风悲兰杜，烟淡沧浪，何处扁舟。

唐婉

钗头凤

世情薄。人情恶。雨送黄昏花易落。晓风乾。泪痕残。欲笺心事，独语斜阑。难难难。

人成各。今非昨。病魂尝似秋千索。角声寒。夜阑珊。怕人寻问，咽泪装欢。瞢瞢瞢。

唐艺孙

天香 宛委山房拟赋龙涎香

螺甲磨星 ,犀株杵月 ,蕤英嫩压拖水。海
蜃楼高 ,仙娥钿小 ,缥缈结成心字。麝煤候暖 ,
载一朵、轻云不起。银叶初生薄晕 ,金猊旋翻
纤指。

芳杯恼人渐醉。碾微馨、凤团闲试。满架
舞红都换 ,懒收珠佩。几片菱花镜里 ,更摘索
双鬟伴秋睡。早是新凉 ,重薰翠被。

齐天乐 余闲书院拟赋蝉

柳风微扇闲池阁 ,深林翠阴人静。渐理琴
丝 ,谁调金奏 ,凄咽流空清韵。虹明雨润。正
乍集庭柯 ,凭阑新听。午梦惊回 ,有人娇困酒
初醒。

西轩晚凉又嫩。向枝头占得 ,银露千顷。
蛻翦花轻 ,羽翻纸薄 ,老去易惊秋信。残声送
暝。恨秦树斜阳 ,暗催光景。淡月疏桐 ,半窗
留鬓影。

桂枝香 天柱山房拟赋蟹

收帆渡口。认远岸夜篝，松炬如昼。还见沙痕雪涨，水纹霜后。秦宫梦到无肠断，望明河、月斜疏柳。琐窗相对，茶边犹记，眼波频溜。

渐嫩菊、初筮绿酒。叹风味尊前，潇洒如旧。几度金橙香雾，玉盘纤手。清愁小醉凄凉里，拚今生、容易消瘦。草心春浅，年年相忆，看灯时候。

唐珣

水龙吟 浮翠山房拟赋白莲

淡妆人更婵娟，晚奁净洗铅华腻。泠泠月色，萧萧风度，娇红敛避。太液池空，霓裳舞倦，不堪重记。叹冰魂犹在，翠舆难驻，玉簪为谁轻坠。别有凌空一叶，泛清寒、素波千里。珠房泪湿，明珰恨远，旧游梦里。羽扇生秋，琼楼不夜，尚遗仙意。奈香云易散，绡衣半脱，露凉如水。

摸鱼儿 紫云山房拟赋蕖

渐沧浪、冻痕消尽。琼丝初漾明镜。鲛人夜翦龙髯滑，织就水晶帘冷。鳧叶净。最好似、嫩荷半卷浮晴影。玉流翠凝。早枯豉融香，红盐和雪，醉齿嚼清莹。

功名梦，曾被秋风唤醒。故人应动高兴。悠然世味浑如水，千里旧怀谁省。空对景。奈回首、姑苏台畔愁波暝。烟寒夜静。但只有芳洲，萍花共老，何日泛归艇。

齐天乐 余闲书院拟赋蝉

蜡痕初染仙茎露 ,新声又移凉影。佩玉流空 ,绡衣剪雾 ,几度槐昏柳暝。幽窗睡醒。奈欲断还连 ,不堪重听。怨结齐姬 ,故宫烟树翠阴冷。

当时旧情在否 ,晚妆清镜里 ,犹记娇鬢。乱咽频惊 ,余悲渐杳 ,摇曳风枝未定。秋期话尽。又抱叶凄凄 ,暮寒山静。付与孤蛩 ,苦吟清夜永。

桂枝香 天柱山房拟赋蟹

松江舍北。正水落晚汀 ,霜老枯荻。还见青匡似绣 ,绀螯如戟。西风有恨无肠断 ,恨东流、几番潮汐。夜灯争聚微光 ,挂影误投帘隙。

更喜荐、新筍玉液。正半壳含黄 ,一醉秋色。纤手香橙风味 ,有人相忆。江湖岁晚听飞雪 ,但沙痕、空记行迹。至今茶鼎 ,时时犹认 ,眼波愁碧。

唐致政

感皇恩 原无调名

君欲问予年 ,八十有七。百岁十分尚留
一。世间滋味 ,尝尽酿咸苦涩。时今倒食蔗、
无甜汁。

陶 明 淑

望江南

秋夜永，月影上阑干。客枕梦回燕塞
原讹作寒，据文义改 冷，角声吹彻五更寒。
无语翠眉攒。

天渐晚，把酒泪先弹。塞北江南千万里，
别君容易见君难。何处是长安。

陶上舍

金缕曲

梦觉黄粱熟。怪人间、曲吹别调，棋翻新局。一片残山并剩水，几度英雄争鹿。算到了、谁荣谁辱。白发书生差耐久，向林间、啸傲山间宿。耕绿野、饭黄犊。

市朝迁变成陵谷。问东风、旧家燕子，燕麦兔葵盈目。羊胛光阴容易过，叹浮生、待足何时足。樽有酒，且相属。

陶氏

苏幕遮 闺怨

与君别 情易许。执手相将 永远成鸳侣。
一去音书千万里。望断阳关 泪滴如秋雨。
到如今 成间阻。等候郎来 细把相思诉。
看著梅花花不语。花已成梅 结就心中苦。

滕 甫

蝶恋花 次长汀壁间韵

叶底无风池面静。掬水佳人，拍破青铜镜。残月朦胧花弄影。新梳斜插乌云鬓。
拍索闷怀添酒兴。旋撷园蔬，随分成盘钉。说与翠微休急性。功名富贵皆前定。

又 再和

昼永无人深院静。一枕春醒。犹未忺临镜。帘卷新蟾光射影。速忙掠起蓬松鬓。
对景深吟嗟没兴。薄幸不来，空把杯盘钉。休道妇人多水性。今宵独自言无定。

滕宗谅

临江仙

湖水连天天连水，秋来分外澄清。君山自是小蓬瀛。气蒸云梦泽，波撼岳阳城。

帝子有灵能鼓瑟，凄然依旧伤情。微闻兰芝动芳馨。曲终人不见，江上数峰青。

田为

南柯子 春景

梦怕愁时断，春从醉里回。凄凉怀抱向谁开。些子清明时候、被莺催。柳外都成絮，栏边半是苔。多情帘燕独徘徊。依旧满身花雨、又归来。

又 春思

团玉梅梢重，香罗芰扇低。帘风不动蝶交飞。一样绿阴庭院、锁斜晖。对月怀歌扇，因风念舞衣。何须惆怅惜芳菲。拚却一年憔悴、待春归。

念奴娇

嫩冰未白，被霜风换却，满院秋色。小阁深沈围坐促，初拥红炉宜窄。帘密收香，窗明迟夜，砚冷凝新滴。无人知道，个中多少岑寂。

翻念一枕高唐，当年仙梦觉，难寻消息。睡起微醒衣袖重，不管腰支犹索。旋暖银簧，时添酥字，笋玉寒无力。如今肠断，暮云依

旧凝碧。

探春

小雨分山，断云镂日，丹青难状清晓。柳眼窥晴，梅妆迎暖，林外幽禽啼早。烟径润如酥，正浓淡遥看堤草。望中新景无穷，最是一年春好。

驕馬黃金絡腦。爭探得東君，何處先到。萬盞飛觴，千金倚玉，不肯輕辜年少。桃李怯殘寒，半吐芳心猶小。謾教蜂蝶多情，未應知道。

惜黃花慢

雁空浮碧，印曉月，露洗重陽天氣。望極樓外，淡烟半隔疏林，掩映斷橋流水。黃金籬畔白衣人，更誰會、淵明深意。晚風底。落日亂鴻，飛起無際。

情多對景淒涼，念舊賞，步履登高迢遞。興滿東山，共携素手持杯，勸泛玉漿云蕊。此時霜鬢欲歸心，謾老盡、悲秋情味。向醉里。免得又成憔悴。

江神子慢

玉台挂秋月。鉛素淺，梅花傳香雪。冰姿潔。金蓮襯、小小凌波羅襪。雨初歇。樓外孤鴻聲漸遠，遠山外、行人音信絕。此恨

全宋词 田为

对话犹难，那堪更寄书说。教人红销翠减，
觉衣宽金缕，都为轻别。太情切。销魂处、
画角黄昏时节。声呜咽。落尽庭花春去也，
银蟾迥、无情圆又缺。恨伊不似馀香，惹鸳
鸯结。

失调名

映竹园啼鸟。

田中行

失调名

为谁和泪倚阑干。

风入松

一宵风雨送春归。绿暗红稀。画楼尽日凭阑意，与谁同捻花枝。门外蔷薇开也，枝头梅子酸时。

玉人应是数归期。翠敛愁眉。塞鸿不到双鱼远，恨楼前、流水难西。新恨欲题红叶，东风满院花飞。

铁笔翁

庆长春 寿戴一轩

有酒如渑 ,便开怀痛饮 ,我歌君拍。世事
轮云都莫问 ,只要颜红鬓黑。鹧燕风清 ,鸳鸯
水暖 ,打当生申节。薰风来也 ,几人感戴翁德。

好是驾海胸襟 ,屠龙手段 ,一笑乾坤窄。
门外尘涛三百尺 ,不博剡溪一雪。绿幕红围 ,
妙歌细舞 ,且醉三千客。问翁年纪 ,广成千有
二百。

万某

水调歌头

九日修故事访南山，崖间有前太守所作水调歌头，率尔次韵。

卷尽风和雨，晴日照清秋。南山高处回首、潇洒一扁州。且向飞霞瀹茗，还归云间书院，何幸有从游。随分了公事，同乐与同忧。

少年事，湖海气，百尺楼。萧萧华发、归兴只念故山幽。今日聊修故事，□岁大江东去，应念我穷愁。不但莼鲈口，杜若访芳洲。

万俟咏

蓦山溪 桂花

芳菲叶底。谁会秋江意。深绿护轻黄，怕青女、霜侵憔悴。开分早晚，都占九秋天，花四出，香七里。独步珠宫里。

佳名岩桂。却是因遗子。不自月中来，又那得、萧萧风味。霓裳旧曲，休问广寒人，飞太白，酬仙蕊。香外无香比。

临江仙

寒甚正前三五日，风将腊雪侵寅。彩鸡缕燕已惊春。玉梅飞上苑，金柳动天津。

□□□□□□□，□□□□□□□。
□□□□□□□。春盘共订短，绕坐庆时新。

雪明鹞鹄夜慢

望五云多处春深，开阆苑、别就蓬岛。正梅雪韵清，桂月光皎。凤帐龙帘萦嫩风，御座深、翠金间绕。半天中、香泛千花，灯挂百宝。

圣时观风重腊，有箫鼓沸空，锦绣匝道。
竞呼卢、气贯调欢笑。暗里金钱掷下，来侍
燕、歌太平睿藻。愿年年此际，迎春不老。

凤皇枝令

景龙门，古酸枣门也。自左掖门之东为夹城
南北道。北抵景龙门。自腊月十五日放灯，纵都人
夜游。妇女游者，珠帘下邀住，饮以金瓯酒，有妇
人饮酒毕，辄怀金瓯。左右呼之，妇人曰：妾之夫
性严，今带酒容，何以自明。怀此金瓯为证耳。隔
帘闻笑声曰：与之。其词曰

人间天上。端楼龙凤灯先赏。倾城粉黛
月明中，春思荡。醉金瓯仙酿。一从鸾辂北
向。旧时宝座应蛛网。游人此际客江乡，空
怅望。梦连昌清唱。

南歌子

梅夏暗丝雨，麦秋扇浪风。香芦结黍趁
天中。五日凄凉今古、与谁同。

明月照高楼慢 中秋应制

平分素商。四垂翠幕，斜界银潢。颢气
通建章。正烟澄练色，露洗水光。明映波融
太液，影随帘挂披香。楼观壮丽，附霁云、
耀绀碧相望。

宫妆。三千从赭黄。万年世代，一部笙
簧。夜宴花漏长。乍莺歌断续，燕舞回翔。

全宋词 万俟咏

玉座频燃绛腊，素娥重按霓裳。还是共唱御制词，送御觞。

失调名

昔年曾共黄花酒，一笑新香。

尉迟杯慢

碎云薄。向碧玉枝缀万萼。如将汞粉匀开，疑使柏麝熏却。雪魄未应若。况天赋、标艳仍绰约。当暄风暖日佳处，戏蝶游蜂看著。

重重绣帘珠箔。障秣艳霏霏，异香漠漠。见说徐妃，当年嫁了，信任玉钿零落。无言自啼露萧索。夜深待、月上阑干角。广寒宫、要与嫦娥，素妆一夜相学。

钿带长中腔

簇真香。似风前拆麝囊。嫩紫轻红，间斗异芳。风流富贵，自觉兰蕙荒。独占蕊珠春光。

绣结流苏密致，魂梦悠扬。气融液散满洞房。朝寒料峭，殢娇不易当。著意要得韩郎。

春草碧

又随芳绪生，看翠霁连空，愁遍征路。

东风里，谁望断西塞，恨迷南浦。天涯地角，意不尽、消沈万古。曾是送别长亭下，细绿暗烟雨。

何处。乱红铺绣茵，有醉眠荡子，拾翠游女。王孙远，柳外共残照，断云无语。池塘梦生，谢公后、还能继否。独上画楼，春山暝、雁飞去。

三台 清明应制

见梨花初带夜月，海棠半含朝雨。内苑春、不禁过青门，御沟涨、潜通南浦。东风静、细柳垂金缕。望凤阙、非烟非雾。好时代、朝野多欢，遍九陌、太平箫鼓。

乍莺儿百啭断续，燕子飞来飞去。近绿水、台榭映秋千，斗草聚、双双游女。饧香更、酒冷踏青路。会暗识、天桃朱户。向晚骤、宝马雕鞍，醉襟惹、乱花飞絮。

正轻寒轻暖漏永，半阴半晴云暮。禁火天、已是试新妆，岁华到、三分佳处。清明看、汉宫传蜡炬。散翠烟、飞入槐府。敛兵卫、阊阖门开，住传宣、又还休务。

恋芳春慢 寒食前进

蜂蕊分香，燕泥破润，暂寒天气清新。帝里繁华，昨夜细雨初匀。万品花藏四苑，望一带、柳接重津。寒食近，蹴鞠秋千，又是无限游人。

红妆趁戏，绮罗夹道，青帘卖酒，台榭侵云。处处笙歌，不负治世良辰。共见西城

全宋词 万俟咏

路好，翠花定、将出严宸。谁知道，仁主祈
祥为民，非事行春。

安平乐慢 都门池苑应制

瑞日初迟，绪风乍暖，千花百草争香。
瑶池路稳，阆苑春深，云树水殿相望。柳曲
沙平，看尘随青盖，絮惹红妆。卖酒绿阴傍。
无人不醉春光。

有十里笙歌，万家罗绮，身世疑在仙乡。
行乐知无禁，五侯半隐少年场。舞妙歌妍，
空妒得、莺娇燕忙。念芳菲、都来几日，不
堪风雨疏狂。

卓牌儿 春晚

东风绿杨天，如画出、清明院宇。玉艳
淡泊，梨花带月，胭脂零落，海棠经雨。单
衣怯黄昏，人正在、珠帘笑语。相并戏蹴秋
千，共携手，同倚阑干，暗香时度。

翠窗绣户。路缭绕、潜通幽处。断魂凝
伫。嗟不似飞絮。闲闷闲愁，难消遣、此日
年年意绪。无据。奈酒醒春去。

昭君怨

春到南楼雪尽。惊动灯期花信。小雨一
番寒。倚阑干。

莫把阑干倚。一望几重烟水。何处是京华。暮云遮。

又

一望西山烟雨。目断心飞何处。天外白云城。几多程。

谩记阳关句。衣上粉啼痕污。陇水一分流。此生休。

诉衷情 送春

一鞭清晓喜还家。宿醉困流霞。夜来小雨新霁，双燕舞风斜。

山不尽，水无涯。望中赊。送春滋味，念远情怀，分付杨花。

梅花引 冬怨

晓风酸。晓霜乾。一雁南飞人度关。客衣单。客衣单。千里断魂，空歌行路难。

寒梅惊破前村雪。寒鸡啼破西楼月。酒肠宽。酒肠宽。家在日边，不堪频倚阑。

忆秦娥 别情

千里草。萋萋尽处遥山小。遥山小。行人远似，此山多少。

天若有情天亦老。此情说便说不了。说不了。一声唤起，又惊春晓。

忆少年 陇首山

陇云溶泄，陇山峻秀，陇泉呜咽。行人
暂驻马，已不胜愁绝。

上陇首、凝眸天四阔。更一声、塞雁凄
切。征书待寄远，有知心明月。

长相思 雨

一声声。一更更。窗外芭蕉窗里灯。此
时无限情。

梦难成。恨难平。不道愁人不喜听。空
阶滴到明。

又 山驿

短长亭。古今情。楼外凉蟾一晕生。雨
馀秋更清。

暮云平。暮山横。几叶秋声和雁声。行
人不要听。

木兰花慢

恨莺花渐老，但芳草、绿汀洲。纵岫壁
千寻，榆钱万叠，难买春留。梅花向来始别，
又匆匆、结了满枝头。门外垂杨岸侧，画桥
谁系兰舟。

悠悠。岁月如流。叹水覆、杳难收。凭
画阑，往往抬头举眼，都是春愁。东风晚来
更恶，怕飞红、拍絮入书楼。双燕归来问我，

怎生不上帘钩。

武陵春

燕子飞来花在否，微雨退、掩重门。正满院梨花雪照人。独自个、怯黄昏。轻风淡月总消魂。罗衣暗惹啼痕。谩觑著、秋千腰褪裙。可煞是、不宜春。

快活年近拍

千秋万岁君，五帝三王世。观风重令节，与民乐盛际。蕊宫长春，洞天不老，花艳蝉辉，十里照春珠翠。

闹罗绮。遥望太极，一簇通明里。钧台奏寿，蓬山呈妙戏。六宫人来，五云楼迥，风送歌声，依约睿思圣制。

醉蓬莱

正波泛银汉，漏滴铜壶，上元佳致。绛烛银灯，若繁星连缀。明月逐人，暗尘随马，尽五陵豪贵。鬓惹乌云，裙拖湘水，谁家姝丽。

金阙南边，彩山北面，接地罗绮，沸天歌吹。六曲屏开，拥三千珠翠。帝乐□深，凤炉烟喷，望舜颜瞻礼。太平无事，君臣宴乐，黎民欢醉。

芰荷香

小潇湘。正天影倒碧，波面容光。水仙朝罢，间列绿盖红幢。吹风细雨，荡十顷、浥浥清香。人在水精中央。霜绡雾縠，襟袂收凉。

款放轻舟闹红里，有蜻蜓点水，交颈鸳鸯。翠阴密处，曾觅相并青房。晚霞散绮，泛远净、一叶鸣榔。拟去尽促雕觞。歌云未断，月上飞梁。

别瑶姬慢

可惜香红。又一番骤雨，几阵狂风。霎时留不住，便夜来和月，飞过帘栊。离愁未了，酒病相仍，便堪此恨中。片片随、流水斜阳去，各自西东。

又还是、九十春光，误双飞戏蝶，并采游蜂。人生能几许，细算来何物，得似情浓。沈腰暗减，潘鬓先秋，寸心不易供。望暮云、千里沈沈障翠峰。

忆秦娥

天如洗。金波冷浸冰壶里。冰壶里。一年得似，此宵能几。

等闲莫把阑干倚。马蹄去便三千里。三千里。几重云岫，几重烟水。

万俟绍之

蝶恋花 春风

啼鸠一声云榭晚。好梦惊回，蓬岛疑行遍。无绪东风帘自卷。香苞云压茶蘼院。
似有还无烟色展。絮暖鱼肥，时复吹池面。扇影著花蜂蝶见。药栏春静红尘远。

风入松

一春心事与谁同。绿聚眉峰。小楼彻夜听鸣雨，想西园、锦绣成空。栏漾金鱼池水，钩闲紫燕帘风。

年时忻折海棠红。来比芳容。如今玉减香销似，怕轻寒、懒出房栊。尘满谢娘吟卷，从教飞絮蒙蒙。

贺新郎 秣陵怀古

决眦入飞鸟。正江南、梅雨初晴，乱山浮晓。凤去台空箫声断，惟有疏林鸦噪。但空锁、吴时花草。指点中原青山外，奈征尘、迷望愁云绕。佳丽地，谩凝眺。

清风助我舒长啸。问其中、虚帘曲槛，
阅人多少。风景不殊江山在，况是英雄未老。
且拚与、尊前一笑。欲说前朝兴亡事，唤谪
仙、来共传清醪。归路晚，月明照。

江神子 赠妓寄梦窗

十年心事上眉端。梦惊残。琐窗寒。云
絮随风，千里度关山。琴里知音无觅处，妆
粉淡，钏金宽。

瑶箱吟卷懒重看。忆前欢。泪偷弹。我
已相将，飞棹过长安。为说崔徽憔悴损，须
觅取，锦笺还。

汪 存

步蟾宫

玉京此去春犹浅。正雪絮、马头零乱。
姮娥剪就绿云裳，待来步蟾宫与换。

明年二月桃花岸。棹双桨、浪平烟暖。
扬州十里小红楼，尽卷上珠帘一半。

汪辅之

行香子 记恨

晚绿寒红。芳意匆匆。惜年华、今与谁同。碧云零落，数字宾鸿。看渚莲凋，宫扇旧，怨秋风。

流波坠叶，佳期何在，想天教、离恨无穷。试将前事，闲倚梧桐。有销魂处，明月夜，锦屏空。

汪 梦 斗

南乡子 初入都门漫赋

西北有神州。曾倚斜阳江上楼。目断淮南
山一抹，何由。载泪东风洒汴流。

何事却狂游。直驾驴车渡白沟。自古幽
燕为绝塞，休愁。未是穷荒无尽头。

朝中措 客邸有感

人言楼观似寥阳。巍倚太清傍。便有二
京赋手，也须费力铺张。

客窗梦断，星稀月澹，一枕凄凉。旧日
春风汴水，□□多少垂杨。

人月圆

寻常一样窗前月，人只看中秋。年年今
夜，争寻诗酒，共上高楼。

一奁明镜，能圆几度，白了人头。良辰
美景，赏心乐事，输少年游。

金缕曲

月夕赋首词，书毕，怆然有感，再赋此

满目飞明镜。忆年时、呼朋楼上，畅怀觞咏。圆到今宵依前好，诗酒不成佳兴。身恰在、燕台天近。一段凄凉心中事，被秋光、照破无馀蕴。却不是，诉贫病。

宫庭花草埋幽径。想夜深、女墙还有，过来蟾影。千古词人伤情处，旧说石城形胜。今又说、断桥风韵。客里婵娟都相似，只后朝、不见潮来信。且喜得，四边静。

摸鱼儿 过东平有感

忆旧时、东方□郡，东原尽是佳处。梁都破了寻南渡，几遍狐号鳝舞。君试觑。环一抹荒城，草色今如许。芳华旧地。曾一上飞云，歌台酒馆，落日乱鸦度。

吟情苦。滴尽英雄老泪。凄酸非是儿女。西湖似我西湖否。只怕不如西子。秋欲暮。要一看秋波，又自催归计。休□浪语。待过江说与，高车驷马，今是朝天路。

踏莎行 贺宗人熙甫赴任

选得官归，黄埃满面。难于奏赋明光殿。秋帆落日渡淮来，三杯酒浊凭谁劝。

全宋词 汪梦斗

旧日佳词，自吟一遍。绿袍不是嫦娥翦。
红楼十里古扬州，无人为把珠帘卷。

汪相如

水调歌 寿退休丞相

指点穀江水，遥认作琼醅。介公眉寿，年年倾入紫霞杯。寿与江流无尽，人在壶天不老，谈笑领春回。昨夜瞻南极，列宿拱中台。

补天工，取日手，济时材。不应勇退，归来绿野宴瑶台。天要先生调燮，人要先生休养，虚左待重来。再捧长生篆，依旧面三槐。

汪莘

水调歌头

东坡云：“明月几时有，把酒问青天。”本于太白问月云：“青天有月来几时。”太白云：“今人不见古时月”，本于抱朴子云：今月不及古月之朗。抱朴子所言，非绮语也。深思而得之，诚有此理。嘉定元年中秋日，因赋水调，其夜无月

听说古时月，皎洁胜今时。今人但见今月，也道似琉璃。君看少年眸子，那比婴儿神彩，投老又堪悲。明月不再盛，玉斧亦何为。

约东坡，招太白，试寻思。凭谁斫却，里面桂影数千枝。忆在无怀天上，仍向有虞宫殿，看月到陈隋。别有一轮月，万古没成亏。

乳燕飞 汪子感秋，采楚词，赋此

去郢频回首。正横江、荻桡容与，兰旌悠久。怅望龙门都不见，似把长楸孤负。念往日、佳人为偶。独向芳洲相思处，采苹花、杜若空盈手。乘赤豹，谁来后。

云中眼界穷高厚。览山川、冀州还在，

陶唐何有。木叶纷纷秋风晚，缥缈潇湘左右。见帝子、冰魂厮守。应记薰弦相对日，酌一杯、太乙东皇酒。问此意，君知否。

又 寄刘阆风祭酒

晓趁西湖约。到湖头、烟消日出，波生雨脚。日挈白鱼携碧酒，要与诗人共酌。把楼上、珠帘卷却。坐对荷花三万朵，念西邻、未嫁肌如削。待折与，不堪著。

别来又见秋萧索。恨无由、将余风月，伴君云鹤。想见登山临水处，醉把茱萸槃礴。唱白雪、阳春新作。一自东篱人去后，算人间、黄菊空零落。叹作者，多命薄。

浪淘沙 与外甥吴晋良游落石

天未起凉风。云气匆匆。如今何处有英雄。独佩一壶溪上去，秋水澄空。

绝壁耸云中。倒挂青松。醉歌汉殿与秦宫。日现山西留不住，目送飞鸿。

沁园春 自题方壶

春至伤春，秋至悲秋，谁在华胥。叹谪仙才气，飞扬跋扈，渊明何事，慷慨歔歔。自我少年，如今晚境，行半人间真有馀。都休问，且一觴一咏，吾爱吾庐。

南皋境界何如。舍明月清风谁与居。望蓬山路杳，万株翠桧，方壶门掩，四面红蕖。中有佳人，绰如姑射。一炷清香满太虚。尘

寰外，被鸣鸾报客，飞鹤传书。

满江红 谢孟使君

荆楚岁时，念自古、登临风俗。休更道、桓家车骑，谢家丝竹。不觉吹将头上帽，可来共采篱边菊。叹如今、重九有何人，相追逐。

穷处士，枯如木。贤太守，温如玉。遣厨人馈酒，廩人馈粟。欲寄唐虞无限意，离骚都是相思曲。奈两三、寒蝶尚于飞，秋光促。

又 自赋

万古灰飞，算何用、黄金满屋。吾老矣，几番重九，几杯醺醪。此日登临多恨别，明年强健何由卜。且唤教、儿女逐人来，寻黄菊。

苹已白，枫犹绿。鲈已晚，橙初熟。叹人间何事，稍如吾欲。五柳爱寻王母使，三闾好作湘妃曲。向飘风、冻雨返柴扉，骑黄犊。

浣沙溪

一曲清溪绕舍流。数间茅屋正宜秋。芙蓉灼灼出墙头。

元亮气高还作令，少陵形瘦不封侯。村醪闲饮两三瓯。

念奴娇 寄孟使君

龙山高会，忆当时宾主，风流云散。今日紫阳峰顶上，人望旌旗天半。万叠红蕖，千层黄菊，照耀成飞观。西风浩荡，碧天斜去双雁。

遥想健笔淋漓，龙蛇落纸，妙句高张翰。笼日轻霞横数抹，绿水金波相间。目寄宣平，神追师道，归棹摇星汉。城中万户，烛光香雾交贯。

蓦山溪

金风玉露，洗出乾坤体。乘兴到前村，见一片、清溪无底。竹篱茅舍，鸡犬两三家，寻渔父，问湘灵，拄杖斜阳里。

青春误我，白发令如此。幸自识方壶，有个人、神通游戏。涧边野鹤，岩上忽孤云，倾浊酒，对黄花，又似东篱子。

生查子 忆去秋抱病过冬，因赋此

春来春色佳，秋至秋光好。无计奈春归，又看秋光老。

去年飞雪时，病与梅花道。来岁雪飞时，为把金樽倒。

感皇恩

年少好寻芳，早春时节。飞去飞来似胡蝶。如今老大，懒趁五陵豪侠。梦中时听得，秦箫咽。

割断人间，柳枝桃叶。海上书来恨离别。旧游还在，空锁烟霞万叠。举杯相忆处，青天月。

忆秦娥

村南北。夜来陡觉霜风急。霜风急。征途情绪，塞垣消息。

佳人独倚琵琶泣。一江明月空相忆。空相忆。寒衣未絮，荻花狼藉。

点绛唇

数朵芙蓉，嫣然一笑凌清晓。谢家池沼。秋景偏宜少。

气挟清霜，似把群花小。秋风袅。湘君来了。一曲烟波渺。

菩萨蛮

问言何处秋光好。当年曾过长洲道。一望没遮拦。天宽水亦宽。

也因轻霭扫。也傍斜晖讨。指点与君看。

画他难不难。

桃源忆故人

人间只解留春住。不管秋归去。一阵西窗风雨。秋也归何处。

柴扉半掩闲庭户。黄叶青苔无数。犹把小春分付。梅蕊前村路。

浣沙溪 九日

青女催人两鬓霜。自斲白酒作重阳。方壶老子莫凄凉。

天地两三胡蝶梦，古今多少菊花香。只将破帽送秋光。

点绛唇

晓角霜天，昼帘却是春天气。小园行处。双蝶相随至。

恰向梅边，又向桃边觑。孜孜地。访兰寻蕙。谁会幽人意。

汉宫春

春色平分，甚偏他杨柳，分外风流。夭桃自适其适，一笑还休。可怜仙李，对东风、却少温柔。争奈得、海棠妆点，向人浑不知羞。

谁觉韶华如梦，到酴醾开后，莺语供愁。
天教姚黄晚出，贵与王侔。花中隐者，有春
兰、秋菊俱优。须是到、溪山清冻，江梅香
喷枝头。

菩萨蛮

金梦弼携鱼酒见访云：昨属渔人鱼。渔人言：
白茅潭中，有白鱼一双。今晨果揭其一以来。因赋
此为谢，并致后会之意

渔翁家住寒潭上。晓霜晚日时相向。三
尺白鱼长。一双摇玉光。

前朝来献状。果慰携壶望。水月正商量。
小桥梅欲香。

小重山

居士情怀爱小春。恰如重会面，旧时人。
东君轻笑又轻颦。如道我，春去却伤心。

青鸟下红巾。瑶池春信早，莫因循。柳
丝黄日牡丹晨。相随逐，春浅到春深。

聒龙谣

梦下瑶台，神飞阆苑，自叹尘寰久客。
三入成周，望皇居帝宅。荡兰桨、伊阙波涛，
曳玉杖、洛阳阡陌。独踟躇、武烈文谟，天
垂晚，月生魄。

故人少，别怀多，引壶觞自酌，谁怜衰
白。群仙问我，尚低头方册。共云将、东过

扶摇，遇鸿蒙、顿超玄默。待功成，翳凤骑麟，把蟠桃摘。

水龙吟

当年翦彩垂髻，超然便欲为仙去。世间俗状，人心狡计，不堪同住。每坐空山，独临古涧，神闲意寓。想瀛洲鸡犬，蓬莱猿鹤，应怅望，门前路。

自昔侯王将相，几番成、落花飞絮。仰天醉眼，兴云妙手，年华迟暮。长揖烟尘，静朝日月，谁知幽素。正风清麟背，星垂海角，晓钟初寤。

水调歌头

寄语山阿子，何日出幽篁。兰衣蕙带，为我独立万寻冈。头上青天荡荡，足下白云霭霭，和气自悠扬。一阵东风至，灵雨过南塘。

招山鬼，吊河伯，俟东皇。朱宫紫阙、何事宛在水中央。长望龙辀雷驾，凭仗箫钟交鼓，宾日出扶桑。我乃援北斗，子亦射天狼。

又

谁与玩芳草，公子未西归。天然脱去雕饰，秋水落芙蓉。发轫朝兮东壁，弭节夕兮西极，故国入踌躇。梦里不知路，南斗正扶疏。

鸱不好，凤不利，忆三闾。算来何事，苦道岁晏孰华余。首拜东皇太乙，复次云君司命，高曳九霞裾。山鬼正含睇，慕我欲何如。

又

尧舜去已远，稷契不重来。周流天上地下，我马亦悠哉。君向云中独立，知与何人相俟，孔盖逐风回。长忆目成处，却苦别离催。

被明月，佩宝璐，冠崔嵬。可怜幼好奇服，年老在尘埃。天地与吾同性，日月与吾同命，何事有馀哀。故国空乔木，野鹿上高台。

又 怀吴中诸友

孔孟化尘土，秦汉共丘墟。人间美恶如梦，试看几张书。还是天一地二，做出朝三暮四，堪笑又堪悲。谁忆陶元亮，春酒解饥劬。

老将至，岁既晏，念春归。停云亲友南北，何以慰离居。半郭半村佳处，一竹一花生意，吾亦爱吾庐。时访前村酒，旋买小溪鱼。

又 客有言持志者，未知其用，因赋

志可洞金石，气可塞堪舆。问君所志安在，富贵胜人乎。看取首阳二子，叩住孟津匹马，天讨不枝梧。特立浮云外，大块可齐驱。

铁可折，玉可碎，海可枯。不论穷达生

死，直节贯殊途。立处孤峰万仞，袖里青蛇三尺，用舍付河图。晞汝阳阿上，濯汝洞庭湖。

又 客有言存心者，未得其序，因赋

欲觅存心法，当自尽心求。此心尽处，豁地知性与天侔。行尽武陵溪路，忽见桃源洞口，渔子舍渔舟。输与逃秦侣，绝境几春秋。

举全体，既尽得，要敛收。勿忘勿助之际，玄牝一丝头。君看天高地下，中有鸢飞鱼跃，妙用正周流。可与知者道，莫语俗人休。

满江红

客有索赋梅词者，余应之曰：自林和靖诗出，光前绝后矣。姑以此意赋之可也

唐宋诸公，谁道得、梅花亲切。到和靖、先生诗出，古人俱拙。写照乍分清浅水，传神初付黄昏月。尽后来、作者斗尖新，仍重叠。

离不得，春和腊。少不得，烟和雪。更茅檐低亚，竹篱轻折。何事西邻春得入，还如东阁人伤别。总输他、树下作僧来，离言说。

又 不敢赋梅，赋感梅。

洞府瑶池，多是见、桃红满地。君试问、江海清绝，因何抛弃。仙境常如二三月，此花不受春风醉。被贩儿、俚妇折来看，添憔悴。

悴。

泛雪艇，摇冰柂。溪馆静，村扉闭。须祁寒彻骨，清香透鼻。孤竹赤松真我友，姚黄魏紫非吾契。笑方壶、日日绕南枝，犹多事。

水调歌头 岁暮书怀

草木自成岁，禽鸟已春声。仰观俯察，多少宇宙古今情。遐想炎黄以上，逮至汉唐而下，几个费经营。巢许有真意，无责自身轻。

富与贵，贫与贱，死还生。方壶岁晚，深感梅蕊向人倾。造物元来无物，有物还应自造，人意见曾平。天际识归路，野鹤忽长鸣。

沁园春 忆黄山

三十六峰，三十六溪，长锁清秋。对孤峰绝顶，云烟竞秀，悬崖峭壁，瀑布争流。洞里桃花，仙家芝草，雪后春正取次游。亲曾见，是龙潭白昼，海涌潮头。

当年黄帝浮丘。有玉枕玉床还在不。向天都月夜，遥闻凤管，翠微霜晓，仰盼龙楼。砂穴长红，丹炉已冷，安得灵方闻早修。谁知此，问原头白鹿，水畔青牛。

又

挂黄山图十二轴，恰满一室，觉此身真在黄山

中也，赋此词寄天都峰下王道者

家在柳塘，榜挂方壶，图挂黄山。觉仙峰六六，满堂峭峻，仙溪六六，绕屋潺湲。行到水穷，坐看云起，只在吾庐寻丈间。非人世，但鹤飞深谷，猿啸高岩。

如今老疾蹒跚。向画里嬉游卧里看。甚花开花落，悄无人见，山南山北，谁似余闲。住个庵儿，了些活计，月白风清人倚阑。山中友，类先秦气貌，后晋衣冠。

行香子

腊八日与洪仲简溪行，其夜雪作

野店残冬。绿酒春浓。念如今、此意谁同。溪光不尽，山翠无穷。有几枝梅，几竿竹，几株松。

篮舆乘兴，薄暮疏钟。望孤村、斜日匆匆。夜窗雪阵，晓枕云峰。便拥渔蓑，顶渔笠，作渔翁。

又 雪后闲眺

策杖溪边。倚杖峰前。望琼林、玉树森然。谁家残雪，何处孤烟。向一溪桥，一茅店，一渔船。

别般天地，新样山川。唤家僮、访鹤寻猿。山深寺远，云冷钟残。喜竹间灯，梅间屋，石间泉。

水调歌头

雪中斝酒，恰得三十六壶，乃酌黄山之神，而歌以侑之

酿秫小春月，取酒雪花晨。漏壶插破浮蚁，涌起碧鳞鳞。谁觉东风密至，更带梅香潜入，瓮里净无尘。一见酒之面，便得酒之心。

这番酒，□□□，未及宾。黄山图就，旧日境界喜重新。三十六峰云嶂，三十六溪烟水，三十六壶春。寄语黄山道，我是境中人。

鹊桥仙 书所作词后

柳塘居处，方壶道号，汪姓莘名耕字。欲将丹药点凡花，教都做、水仙无计。

家中安石，村中居易，总是一场游戏。曲终金石满吾庐，争奈少、柳家风味。

又 欲雪

恍来无定，浮生如寄，休说其非真是。道人半睡半醒时，全身在、碧霄宫里。

风师四起，云君六合，茅舍有何准拟。待他雪阵打窗来，旋披起、半床纸被。

沁园春

余自总角好性命之说。其一身之中，自黄庭之所已言，烟萝子之所未备，搜寻剖□，斯已勤矣。闲从人求其法，高者如捕影，卑者不足为。嘉泰二年冬夜，坐一榻，知思所及，随手骇目。尔后凡七载，时时为之，自知非深根固蒂之道，亦可谓世外之妙观矣。太上云笈有四规一镜之方，存形立影之法，十五年前，未知此也。偶自有得，后乃见之。乃叹曰：太上立法，令人造此，余以无法造，顾岂妄想哉。及观楞严宾主离合之义，又知十五年前所谓，正佛之所诃，故并赋之，以示同志，足以知余之不欺也

流水小桥，茅屋竹窗，纸帐蒲团。把坎宫闭了，虎龙吟啸，离宫锁定，日月回环。万点星飞，两轮电转，五色圆光天样宽。□奇处，渐冥冥杳杳，有个鸦翻。

当时筑著机关。后常把空华戏弄看。更有些可笑，寐中清境，有些可怪，镜里清颜。太上留魂，老君炼魄，又被瞿昙都扫残。如何好，只单修见性，双炼还丹。

杏花天 寄天台刘允叔

残雪林塘春意浅。倚碧玉、阑干日晚。天涯五色明如翦。上有新蟾占断。

从别后、水遥山远。倩说与、天台刘阮。方壶只有梅花伴。不似桃花庭院。

又 有感

美人家在江南住。每惆恨、江南日暮。

白苹洲畔花无数。还忆潇湘风度。

幸自是、断肠无处。怎强作、莺声燕语。
东风占断纂箏柱。也逐落花归去。

减字木兰花

诗家清绝。檐外森然苍玉节。学易无思。
一笑窗前白玉妃。

何人共说。山上青松松上雪。更有谁知。
溪在门前月在溪。

西江月 赋红白二梅

红白虽分两色，清香总是梅花。早春风
日野人家。相对伯夷柳下。

爱影拈将灯取，惜香放下帘遮。长安如
梦只堪嗟。乐此应须贤者。

又 赋红梅

曾把江梅入室，门人不敬红梅。清香一
点入灵台。傲雪家风犹在。

状貌妇人孺子，性情烈士奇才。自开自
落有谁来。与汝上林相待。

又

张文潜诗有东海大松，序云：士人相传，三代
时物。徐仲车先生和之。余意古松之散在天地间，
其拄青天而蔽厚地者，可以数计周知。欲合而处之，
不可得也。作问松

天下老松有数。人间不记何年。海心岳
顶寺门前。我欲收成一片。

为向此公传语，却教老子随缘。龙盘虎踞负青天。岂若吾身亲见。

卜算子 立春日赋

夏则饮红泉，冬则餐红术。一片新春入手来，不费些儿力。

春在水无痕，春在山无迹。李白桃红未吐时，好个春消息。

南乡子

茅舍起疏烟。家在寒溪阿那边。修竹当篱梅当户，萧然。问是尧天是葛天。

风雨入新年。惟恐春阴咽管弦。绿酒一樽歌一曲，人传。不属天仙属散仙。

好事近 嘉定二年正月二日大雪

堂上挂黄山，辉映庭前春雪。记得山中雪境，恰一般清绝。

须知天锡与方壶，比似镜湖别。好得镜湖狂客，伴方壶欢伯。

又 雪后金叔润相挽溪行

挽我过溪桥，请与春风权摄。推出雪峰千丈，照碧溪春色。

别来三度见梅花，今日共君说。只这溪山十里，剩几多风月。

生查子 春晴寓兴

天上不知天，洞里休寻洞。洞府天宫在眼前，春日都浮动。

我自觉来看，他在迷时梦。觉则人人总是仙，步步乘鸾凤。

好事近

春有三变，曰：孟、仲、季。天分四象，曰：晓、夕、昼、夜。自是而出，有不可胜言者矣。约而赋之，凡七篇

风日未全春，又是春来风日。不出方壶门户，见东皇消息。

此时春事苦无多，春意最端的。却被草牙引去，向柳梢收得。

又

春早不知春，春晚又还无味，一点日中星鸟，本想尧民如醉。

不寒不暖杏花天，花到半开处。正是太平风景，为人间留住。

又

风雨打黄昏，啼杀满山杜宇。到得人间春去，问英雄何处。

桃红李白竞春光，谁共残妆语。最是梨花一树，照谁家庭户。

又

阆苑梦回时，窗外数声啼鸟。觉我床前

天气，便清明多少。

诗人门户约花开，宿蝶误飞了。一段山青水绿，作洞庭春晓。

又

夹岸隘桃花，花下苍苔如积。蓦地轻寒一阵，上桃花颜色。

东邻西舍绝经过，新月是相识。白玉阑干斜倚，作蓬山春夕。

又

天宇绿无云，迟日江山如绣。是日轻衫团扇，笑折花相授。

南山之北北山南，星鸟尚依旧。谁在松风高卧，作嵩阳春昼。

又

月落画桥西，花影柳阴相亚。把住常娥问道，是谁家亭榭。

天边处士少微星，正在杏花下。斜卓参旗一片，作草堂春夜。

洞仙歌

正月二日大雪，自后雨雪屡作，至三十日甲子，始晴

春王正月，雪阵联翩下。我有春风怎生卖。忽扫残夜雨，推出朝阳，天地里，玉烛一枝无价。

早春虚过了，尚有二分，是处春光好收买。也不违天性，不远人情，杨柳陌、临水

夭桃亭榭。身子外、只要自家人，共酒后羲皇，花前偏霸。

乳燕飞

清明日，携幼为南山之游，适为游人所先。回访落石岩，恰坐定，有石楠红叶，飘下樽俎间，小饮而归，久立碧桃花下，即事赋之

策杖南山去。到南溪、谁家宅院，欺人先渡。羽扇徐麾僮仆退，翠柳白沙西路。帝赐我、阆风玄圃。一片飞来红叶阔，细看来、上有双鸾句。应念我，尘中住。

眼前儿女闲相语。怪人间、禁烟时节，安排樽俎。为道从来寒食好，且莫思量今古。共绿水、春风鸥鹭。望我壶天天未晚，记碧桃、花发闲庭户。归到也，对花舞。

八声甘州

惜馀春、蛺蝶引春来，杜鹃趣春归。算何如桃李，浑无言说，开落忘机。多谢黄鹂旧友，相逐落花飞。芳草连天远，愁杀斜晖。

谁向西湖南畔，问亭台在否，花木应非。看孤山山下，惟说隐君庐。想钱塘、春游依旧，到梨花、寒食隘舟车。寻常事，不须惆怅，暮雨沾衣。

浣沙溪

邦君孟侯坐上论牡丹，以为此花发于春深，稟

气厚，故结花大，且属余赋词。遂以此意赋之。二月初二夜

白日青天蘸水开。落花江上玉鞭回。东君擎出牡丹来。

独占洛阳春气足，遂中天下作花魁。相知深处举离杯。

满庭芳 雨中再赋牡丹

云绕花屏，天横练带，画堂三月初三。斜风细雨，罗幕护轻寒。无数天香国色，枝枝带、洛浦嵩山。烧红烛，吞星□日，光射九霄冠。

仙宫，深几许，黄莺问道，紫燕窥帘。似太真姊妹，半醒微酣。须信生来富贵，何曾在、草舍茅庵。皇州近，扁舟载去，春色冠东南。

谒金门 使君再招饮，牡丹如山，坐上赋此

檐溜滴。都是春归消息。带雨牡丹无气力。黄鹂愁雨湿。

争看洛阳春色。忘却连天草碧。南浦绿波双桨急。沙头人伫立。

玉楼春 赠别孟仓使

一片江南春色晚。牡丹花谢莺声懒。问君离恨几多长，芳草连天犹觉短。

昨夜溪头新溜满。樽前自起喷龙管。明

朝飞棹下钱塘，心共白苹香不断。

江神子 再赠

鹧鸪声里别江东。绿阴中。夕阳红。一点离愁，相对景重重。目断大罗天上客，朝玉帝，把芙蓉。

紫阳山下偶相逢。醉金钟。跨苍龙。归去故山，犹带白云封。洞口桃花如恨我，飘满地，任春风。

满庭芳 寿金黄州

云梦南来，岷嶓东会，楼前天水苍茫。黄州太守，万里作金汤。淮上烟尘初敛，仍安集、耕陇渔乡。须知道，纶巾羽扇，不独数周郎。

生朝，遥想处，雪消赤壁，春动黄冈。有新翻杨柳，细抹丝簧。竹外一枝更好，应回首、清浅池塘。看看也，天边凤诏，归侍赭袍光。

哨 遍

余酷喜王摩诘山中与裴迪书，因櫟括其语为哨遍歌之。其用韵平侧按稼轩词

近腊景和，故山可过，足下听余述。便自往山中，憩精蓝，与僧饭讫。北涉灞川，明月华映郭，夜登华子冈头立。嗟辘水沦涟，与月上下，寒山远火蒙笼。听林外犬类豹声

雄。更村落谁家鸣夜春。疏钟相闻，独坐此时，多思往日。

噫，记与君同。清流仄径玉琤琮。携手赋佳什。往来萝月松风。只待仲春天，春山可望，山中卉木垂萝密。见出水轻儻，点溪白鹭，青皋零露方湿。雉朝飞，麦陇鸣俦匹。念此去非遥莫相失。傥能从我敢相必。天机非子清者，此事非所急。是中有趣殊深，原子无忽。不能一一。偶因馱檝附吾书，是山人王维摩诘。

汪 元 量

满江红 吴江秋夜

一个兰舟，双桂桨、顺流东去。但满目、银光万顷，凄其风露。渔火已归鸿雁汉，棹歌更在鸳鸯浦。渐夜深、芦叶冷飕飕，临平路。

吹铁笛，鸣金鼓。丝玉脍，倾香醕。且浩歌痛饮，藕花深处。秋水长天迷远望，晓风残月空凝伫。问人间、今夕是何年，清如许。

金人捧露盘 越州越王台

越山云，越江水，越王台。个中景、尽可徘徊。凌高放目，使人胸次共崔嵬。黄鹂紫燕报春晚，劝我衔杯。

古时事，今时泪，前人喜，后人哀。正醉里、歌管成灰。新愁旧恨，一时分付与潮回。鹧鸪啼歇夕阳去，满地风埃。

琴调相思引 越上赏花

晓拂菱花巧画眉。猩罗新翦作春衣。恐

全宋词 汪元量

春归去，无处看花枝。

已恨东风成去客，更教飞燕舞些时。惜
花人醉，头上插花归。

长相思 越上寄雪江

吴山深。越山深。空谷佳人金玉音。有
谁知此心。

夜沈沈。漏沈沈。闲却梅花一曲琴。月
高松竹林。

传言玉女 钱塘元夕

一片风流，今夕与谁同乐。月台花馆，
慨尘埃漠漠。豪华荡尽，只有青山如洛。钱
塘依旧，潮生潮落。

万点灯光，羞照舞钿歌箔。玉梅消瘦，
恨东皇命薄。昭君泪流，手捻琵琶弦索。离
愁聊寄，画楼哀角。

好事近 浙江楼闻笛

独倚浙江楼，满耳怨笳哀笛。犹有梨园
声在，念那人天北。

海棠憔悴怯春寒，风雨怎禁得。回首华
清池畔，渺露芜烟荻。

洞仙歌 毗陵赵府兵后僧多占作佛屋

西园春暮。乱草迷行路。风卷残花堕红

雨。念旧巢燕子，飞傍谁家，斜阳外、长笛一声今古。

繁华流水去。舞歇歌沈，忍见遗钿种香土。渐橘树方生，桑枝才长，都付与、沙门为主。便关防、不放贵游来，又突兀梯空，楚王宫宇。

莺啼序 重过金陵

金陵故都最好，有朱楼迢递。嗟倦客、又此凭高，槛外已少佳致。更落尽梨花，飞尽杨花，春也成憔悴。问青山、三国英雄，六朝奇伟。

麦甸葵丘，荒台败垒。鹿豕衔枯荠。正朝打孤城，寂寞斜阳影里。听楼头、哀笳怨角，未把酒、愁心先醉。渐夜深，月满秦淮，烟笼寒水。

凄凄惨惨，冷冷清清，灯火渡头市。慨商女不知兴废。隔江犹唱庭花，余音亹亹。伤心千古，泪痕如洗。乌衣巷口青芜路，认依稀、王谢旧邻里。临春结绮。可怜红粉成灰，萧索白杨风起。

因思畴昔，铁索千寻，谩沈江底。挥羽扇、障西尘，便好角巾私第。清谈到底成何事。回首新亭，风景今如此。楚囚对泣何时已。叹人间、今古真儿戏。东风岁岁还来，吹入钟山，几重苍翠。

六州歌头 江都

绿芜城上，怀古恨依依。淮山碎。江波

逝。昔人非。今人悲。惆怅隋天子。锦帆里。
环朱履。丛香绮。展旌旗。荡涟漪。击鼓挝
金，拥琼璈玉吹。恣意游嬉。斜日晖晖。乱
莺啼。

销魂此际。君臣醉。貔貅弊。事如飞。
山河坠。烟尘起。风凄凄。雨霏霏。草木皆
垂泪。家国弃。竟忘归。笙歌地。欢娱地。
尽荒畦。惟有当时皓月，依然挂、杨柳青枝。
听堤边渔叟，一笛醉中吹。兴废谁知。

水龙吟 淮河舟中夜闻宫人琴声

鼓鞞惊破霓裳，海棠亭北多风雨。歌阑
酒罢，玉啼金泣，此行良苦。驼背模糊，马
头匝匝，朝朝暮暮。自都门燕别，龙艘锦缆。
空载得、春归去。

目断东南半壁，怅长淮、已非吾土。受
降城下，草如霜白，凄凉酸楚。粉阵红围，
夜深人静，谁宾谁主。对渔灯一点，羁愁一
搦，谱琴中语。

望江南 幽州九日

官舍悄，坐到月西斜。永夜角声悲自语，
客心愁破正思家。南北各天涯。

肠断裂，搔首一长嗟。绮席象床寒玉枕，
美人何处醉黄花。和泪捻琵琶。

卜算子 河南送妓移居河西

我向河南来，伊向河西去。客里相逢只

片时，无计留伊住。

去住总由伊，莫把眉头聚。安得并州快剪刀，割断相思路。

满江红 和王昭仪韵

天上人家，醉王母、蟠桃春色。被午夜、漏声催箭，晓光侵阙。花覆千宫鸾阁外，香浮九鼎龙楼侧。恨黑风、吹雨湿霓裳，歌声歇。

人去后，书应绝。肠断处，心难说。更那堪杜宇，满山啼血。事去空流东汴水，愁来不见西湖月。有谁知、海上泣婵娟，菱花缺。

又 吴山

一霎浮云，都掩尽、日无光色。遥望处、浮图对峙，梵王新阙。燕子自飞关北外，杨花闲度楼西侧。慨金鞍、玉勒早朝人，经年歇。

昭君去，空愁绝。文姬去，难言说。想琵琶哀怨，泪流成血。蝴蝶梦中千种恨，杜鹃声里三更月。最无情、鸿雁自南飞，音书缺。

一翦梅 怀旧

十年愁眼泪巴巴。今日思家。明日思家。一团燕月照窗纱。楼上胡笳。塞上胡笳。

玉人劝我酌流霞。急捻琵琶。缓捻琵琶。

全宋词 汪元量

一从别后各天涯。欲寄梅花。莫寄梅花。

惜分飞 歌楼别客

燕子留君君欲去。征马频嘶不住。握手空相觑。泪珠成缕。眉峰聚。

恨入金徽孤凤语。愁得文君更苦。今夜西窗雨。断肠能赋。江南句。

唐多令 吴江中秋

莎草被长洲。吴江拍岸流。忆故家、西北高楼。十载客窗憔悴损，搔短鬓、独悲秋。

人在塞边头。断鸿书寄不。记当年、一片闲愁。舞罢羽衣尘满面，谁伴我、广寒游。

鹧鸪天

潋滟湖光绿正肥。苏堤十里柳丝垂。轻便燕子低低舞，小巧莺儿恰恰啼。

花似锦，酒成池。对花对酒两相宜。水边莫话长安事，且请卿卿吃蛤蜊。

眼儿媚

记得年时赏茶醺。蝴蝶满园飞。一双宝马，两行箫管，月下扶归。

而今寂寞人何处，脉脉泪沾衣。空房独守，风穿帘子，雨隔窗儿。

忆王孙 集句数首，甚婉婉，情至可观

汉家宫阙动高秋。人自伤心水自流。今日
晴明独上楼。恨悠悠。白尽梨园子弟头。

又

吴王此地有楼台。风雨谁知长绿苔。半
醉闲吟独自来。小徘徊。惟见江流去不回。

又

长安不见使人愁。物换星移几度秋。一
自佳人坠玉楼。莫淹留。远别秦城万里游。

又

阵前金甲受降时。园客争偷御果枝。白
发宫娃不解悲。理征衣。一片春帆带雨飞。

又

鹧鸪飞上越王台。烧接黄云惨不开。有
客新从赵地回。转堪哀。岩畔古碑空绿苔。

又

离宫别苑草萋萋。对此如何不泪垂。满
槛山川漾落晖。昔人非。惟有年年秋雁飞。

又

上阳宫里断肠时。春半如秋意转迷。独
坐纱窗刺绣迟。泪沾衣。不见人归见燕归。

又

华清宫树不胜秋。云物凄凉拂曙流。七

全宋词 汪元量

夕何人望斗牛。一登楼。水远山长步步愁。

又

五陵无树起秋风。千里黄云与断蓬。人物萧条市井空。思无穷。惟有青山似洛中。

凤鸾双舞

慈元殿、薰风宝鼎，喷香云飘坠。环立翠羽，双歌丽调，舞腰新束，舞纓新缀。金莲步、轻摇彩凤儿，翩翩作戏。便似月里仙娥谪来，人间天上，一番游戏。

圣人乐意。任乐部、箛韶声沸。众妃欢也，渐调笑微醉。竞奉霞觞，深深愿、圣母寿如松桂。迢递。更万年千岁。

柳梢青 湖上和徐雪江

滟滟平湖，双双画桨，小小船儿。袅袅珠歌，翩翩翠舞，续续弹丝。

山南山北游□，看十里、荷花未归。缓引壶觞，个人未醉，要我吟诗。

暗香

西湖社友有千叶红梅，照水可爱。问之自来，乃旧内有此种。枝如柳梢，开花繁艳，兵后流落人间。对花泫然承脸而赋。

馆娃艳骨。见数枝雪里，争开时节。底事化工，著意阳和暗偷泄。偏把红膏染质，

都点缀、枝头如血。最好是、院落黄昏，压栏照水清绝。

风韵自迥别。谩记省故家，玉手曾折。翠条袅娜，犹学宫妆舞残月。肠断江南倦客，歌未了、琼壶敲缺。更忍见，吹万点、满庭绛雪。

疏影 西湖社友赋红梅，分韵得落字

虬枝茜萼。使轻盈态度，香透帘幕。净洗铅华，浓抹胭脂，风前伴我孤酌。诗翁瘦硬□□□，断不被、春风熔铄。有陇头、折赠殷勤，又恐暮笳吹落。

寂寞。孤山月夜，玉人万里外，空想前约。雁足书沈，马上弦哀，不尽寒阴沙漠。昭君滴滴红冰泪，但顾影、未忺梳掠。等恁时、环佩归来，却慰此况萧索。

天香

迟日侵阶，和风入户，朱弦欲奏还倦。一幅鸾笺，五云飞下，赐予内家琴苑。音随指动，犹仿佛、虞薰再见。妙处谁能解心，和平自无哀怨。

猩罗帕封古洗，有龙涎、渗花千片。骤睹瑶台清品，眼明如电。薰白桐窗竹几，渐缕缕腾腾细成篆。就祝金闺，天长地远。

汪藻

点绛唇

新月娟娟，夜寒江静山衔斗。起来搔首。
梅影横窗瘦。

好个霜天，闲却传杯手。君知否。乱鸦
啼后。归兴浓于酒。

二

高柳蝉嘶，采菱歌断秋风起。晚云如髻。
湖上山横翠。

帘卷西楼，过雨凉生袂。天如水。画楼
十二。有个人同倚。

小重山

月下潮生红蓼汀。浅霞都敛尽，四山青。
柳梢风急堕流萤。随波处，点点乱寒星。

别语寄丁宁。如今能间隔，几长亭。夜
来秋气入银屏。梧桐雨，还恨不同听。

醉落魄

小舟帘隙。佳人半露梅妆额。绿云低映

全宋词 汪藻

花如刻。恰似秋宵，一半银蟾白。

结儿梢朵香红拗。钿蝉隐隐摇金碧。春
山秋水浑无迹。不露墙头，些子真消息。

汪 宗 臣

满江红 春雨

检点春光，阴雨过、三分之一。从头数、元宵灯夕，都无晴日。不碍郊原肥草绿，但漫丘壑沈云黑。那东君、忒煞没纲维，春无力。

燕忙甚，泥浑湿。蜂愁甚，脾无蜜。更两旬又是，梨花寒食。蔫红殷桃吾不较，岂堪浸烂东畴麦。望前村、白鹭衬霞红，探晴色。

蝶恋花 清明前两日闻燕

年去年来来去早。怪底不来，庭院春光老。知过谁家翻别调。家家望断飞踪杳。

千里潇湘烟渺渺。不记雕梁，旧日恩多少。匝近清明檐外叫。故巢犹在朱檐晓。

酹江月 题乌江项羽庙

白蛇宵断，逐鹿人、交趁鬻鱼群起。赤帜雄张军缟素，龙种天生大器。堪鄙猴冠，

自为狼藉，楚帐多尘垒。胆寒垓下，一鞭东
窜休矣。

亭长空舫扁舟，范增群辈，尽涂脂流髓。
望断秦关无限恨，羞面江东山水。购首千金，
若为名利，黯黯斜阳里。石炉灰冷，美人魂
落烟翠。

水调歌头 冬至

候应黄钟动，吹出白葭灰。五云重压头
上，潜蛰地中雷。莫道希声妙寂，嶰竹雄鸣
合凤，九寸律初裁。欲识天心处，请问学颜
回。

冷中温，穷时达，信然哉，彩云山外如
画，送上笔尖来。一气先通关窍，万物旋生
头角，谁合又谁开。官路春光早，箫落数枝
梅。

汪 暉

贺新郎 次韵初夏小集

田舍炉头语。便如何学得、三变美成家数。村酒三杯狂兴发，拔剑偶然起舞。只麽也、迎寒送暑。待草万言书上阙。似忧端、倚柱东邻女。卿相事，未易许。

渔歌且和芙蓉渚。又何须、淫辞媒语，诃风诋雨。劝人生、且随缘分，分外一毫莫取。那富贵、由天付与。身蹈危机犹不觉，如布衣、自在都无阻。空博得，雪千缕。

蝶恋花 秋夜简赵尉借韵

午夜凉生风不住。河汉无声，时见疏星度。佳客伴君知未去。对床只欠潇潇雨。

素月四更山外吐。金鸭慵添，消尽沈烟缕。料想玉楼人念处。归舟日望荷花浦。

念奴娇 清明

谁家野菜饭炊香，正是江南寒食。试问春光今几许，犹有三分之一。枝上花稀，柳

间莺老，是处春狼藉。新来燕子，尚传晋苑消息。

应记往日西湖，万家罗绮，见满城争出。急管繁弦嘈杂处，宝马香车如织。猛省狂游，恍如昨梦，何日重寻觅。杜鹃声里，桂轮挂上空碧。

水调歌头 次韵荷净亭小集

落日水亭静，藕叶胜花香。时贤飞盖，松间喝道挟胡床。暑气林深不受，山色晚来逾好，顿觉酒尊凉。妙语发天籁，幽眇亦张皇。

射者中，弈者胜，兴悠长。佳人雪藕，更调冰水赛寒浆。惊饵游鱼深逝，带箭山禽高举，此话要商量。溪上采菱女，三五傍垂杨。

如梦令 次韵吴郎子信残春

几点弄晴微雨。翳日薄云来去。断送一番春，满径杨花飞絮。无语。无语。还是旧时院宇。

贺新郎 开禧丁卯端午中都借石林韵

帖子传新语。问自来、翰林学士，几多人数。或道江心空铸镜，或道艾人如舞。或更道、冰盘消暑。或道芸香能去蠹，有宫中、

斗草盈盈女。都不管，道何许。

离骚古意盈洲渚。也莫道、龙舟吊屈，浪花吹雨。只有辟兵符子好，少有词人拈取。谁肯向、帖中道与。绝口用兵两个字，是老臣、忠爱知艰阻。写此句，绛纱缕。

又 环谷秋夜独酌

夜对灯花语。且随宜、果盘草草，两三杯数。翠玉环中园五亩，自唱山歌自舞。况今夜、尊前无暑。何用食前须方丈，更后车、何用婣娟女。这闲福，自心许。

蓼花芦叶纷江渚。有沙边、寒蛩吟透，梧桐秋雨。羨甚满堂金玉富，未可学人渔取。怕天也、未曾相与。豹遁蛟藏泉可濯，有鬼神、呵护盘之阻。鲜可食，脍银缕。

鷓鴣词 春愁

伤时怀抱不胜愁。野水粼粼绿遍洲。满地落花春病酒，一帘明月夜登楼。

明眸皓齿人难得，寒食清明事又休。只是鷓鴣三两曲，等闲白了几人头。

念奴娇

汪平叔、王季雄、戴适之环谷夜酌，即席借东坡先生大江东去词韵就钱平叔赴任南陵尉

相逢草草，共吟诗、同醉杯中之物。评论三王讥五霸，谈辩喧哗邻壁。敲缺唾壶，击残如意，妙语飞华雪。无能为也，如何对

此三杰。

看取东野诗成，南昌书就，奈征车催发。
后夜山深何处宿，红豆寒灯明灭。一老堪怜，
两生未起，应念星星发。风传佳话，花村无
犬惊月。

西江月 次韵李明府见寿

千缕柳丝犹嫩，一星榆火初明。载将新
意寿幽人。红袖持杯劝尽。

老鹤自偏野性，沙鸥难比轻身。殷勤多
谢祝长春。一笑东风夜静。

沁园春 次韵李明府劝农

民吾同胞，剖破藩篱，元是大家。故见
之诰诏，视如子弟，谆勤恳切，悃悃无华。
孝悌力田，职当劝相，起早非干为看花。亲
酌酒，老农唯诺，句句仁芽。

晓来犹觉寒些。看雨湿风吹旗□斜。笑
吾生八十，尽谙农事，公筵既彻，更共烹茶。
高唱豳风，敬酬令尹，王道桑麻乐有涯。春
务急，见溪头杨柳，已可藏鸦。

如梦令 属纆遗语

一只船儿没赛。七十六年装载。把舵更
须牢，风饱蒲帆轻快。无碍。无碍。匹似子
猷访戴。

全宋词 汪 暉

江城子 咏木犀

可是东风、当日欠商量。百紫千红春富贵，无半点，似渠香。

王 □ □

汉宫春 九日登丰乐楼

手捻黄花，对西风无语，双鬓萧萧。韶
华暗中过眼，零落心交。登临把酒，更谁伴、
破橘持螯。惟只有，湖边鸥鹭，飞来如受人
招。

往事不禁重省，料绡罗分钿，翠减香销。
空向画桥古树，犹系轻桡。西兴渡口，误归
帆、几信寒潮。伤情处，淡烟残照，倚阑人
共秋高。

王安石

点绛唇

秋气微凉 ,梦回明月穿帘幕。井梧萧索。
正绕南枝鹊。

宝瑟尘生 ,金雁空零落。情无托。鬓云慵
掠。不似君恩薄。

清平乐 春晚

留春不住。费尽莺儿语。满地残红宫锦
污。昨夜南园风雨。

小怜初上琵琶。晓来思绕天涯。不肯画
堂朱户 ,春风自在梨花。

减字木兰花 春情

画桥流水。雨湿落红飞不起。月破黄昏。
帘里馀香马上闻。

徘徊不语。今夜梦魂何处去。不似垂杨。
犹解飞花入洞房。

王安礼

万年欢

雅出群芳。占春前信息，腊后风光。野岸
邮亭，繁似万点轻霜。清浅溪流倒影，更黯淡、
月色笼香。浑疑是、姑射冰姿，寿阳粉面初妆。

多情对景易感，况淮天庾岭，迢递相望。
愁听龙吟凄绝，画角悲凉。念昔因谁醉赏，向
此际、空恼危肠。终须待结实，恁时佳味堪尝。

潇湘忆故人慢

薰风微动，方樱桃弄色，萱草成窠。翠帟
敞轻罗。试冰簟初展，几尺湘波。疏帘广厦，
寄潇洒、一枕南柯。引多少、梦中归绪，洞庭雨
棹烟蓑。

惊回处，闲昼永，但时时，燕雏莺友相过。
正绿影婆娑。况庭有幽花，池有新荷。青梅煮
酒，幸随分、赢得高歌。功名事、到头终在，岁
华忍负清和。

点绛唇

春睡腾腾，觉来鸳被堆香暖。起来慵懒。

全宋词 王安礼

触目情何限。

深院日斜，人静花阴转。柔肠断。凭高不见。芳草连天远。

王安石

桂枝香

登临送目。正故国晚秋，天气初肃。千里澄江似练，翠峰如簇。归帆去棹残阳里，背西风、酒旗斜矗。彩舟云淡，星河鹭起，画图难足。

念往昔、繁华竞逐。叹门外楼头，悲恨相续。千古凭高，对此谩嗟荣辱。六朝旧事随流水，但寒烟、芳草凝绿。至今商女，时时犹唱。后庭遗曲。

甘露歌

折得一枝香在手。人间应未有。疑是经春雪未消。今日是何朝。

又

尽日含毫难比兴。都无色可并。万里晴天何处来。真是屑琼瑰。

又

天寒日暮山谷里。的砾愁成水。池上渐多枝上稀。唯有故人知。

菩萨蛮

数家茅屋闲临水。单衫短帽垂杨里。今日是何朝。看予度石桥。

稍稍新月偃。午醉醒来晚。何物最关情。黄鹂三两声。

渔家傲

灯火已收正月半。山南山北花撩乱。闻说洊亭新水漫。骑款段。穿云入坞寻游伴。

却拂僧床褰素幔。千岩万壑春风暖。一弄松声悲急管。吹梦断。西看窗日犹嫌短。

二

平岸小桥千嶂抱。柔蓝一水萦花草。茅屋数间窗窈窕。尘不到。时时自有春风扫。

午枕觉来闻语鸟。敲眠似听朝鸡早。忽忆故人今总老。贪梦好。茫然忘了邯郸道。

雨霖铃

孜孜矻矻。向无明里、强作窠窟。浮名浮利何济，堪留恋处，轮回仓猝。幸有明空妙觉，可弹指超出。缘底事、抛了全潮，认一浮沤作瀛渤。

本源自性天真佛。只些些、妄想中埋没。贪他眼花阳艳，谁信道、本来无物。一旦茫然，终被阎罗老子相屈。便纵有、千种机筹，

怎免伊唐突。

清平乐

云垂平野。掩映竹篱茅舍。阒寂幽居实潇洒。是处绿娇红冶。

丈夫运用堂堂。且莫五角六张。若有一卮芳酒，逍遥自在无妨。

浣溪沙

百亩中庭半是苔。门前白道水萦回。爱闲能有几人来。

小院回廊春寂寂，山桃溪杏两三栽。为谁零落为谁开。

诉衷情 和俞秀老鹤词

常时黄色见眉间。松桂我同攀。每言天上辛苦，不肯饵金丹。

怜水静，爱云闲。便忘还。高歌一曲，岩谷迢迢，宛似商山。

二

练巾藜杖白云间。有兴即跻攀。追思往昔如梦，华毂也曾丹。

尘自扰，性长闲。更无还。达如周召，穷似丘轲，只个山山。

三

茫然不肯住林间。有处即追攀。将他死

语图度，怎得离真丹。

浆水价，匹如闲。也须还。何如直截，
踢倒军持，赢取汾山。

四

营巢燕子逞翱翔。微志在雕梁。碧云举
翻千里。其奈有鸾皇。

临济处，德山行。果承当。自时降住，
一切天魔，扫地焚香。

五 又和秀老

莫言普化只颠狂。真解作津梁。蓦然打
个筋斗，直跳过羲皇。

临济处，德山行。果承当。将他建立，
认作心诚，也是寻香。

南乡子

嗟见世间人。但有丝毫即是尘。不住旧
时无相貌，沈沦。只为从来认识神。

作么有疏亲。我自降魔转法轮。不是摄
心除亡想，求真。幻化空身即法身。

二

自古帝王州。郁郁葱葱佳气浮。四百年
来成一梦，堪愁。晋代衣冠成古丘。

绕水恣行游。上尽层城更上楼。往事悠
悠君莫问，回头。槛外长江空自流。

浪淘沙令

伊吕两衰翁。历遍穷通。一为钓叟一耕

全宋词 王安石

侷。若使当时身不遇，老了英雄。
汤武偶相逢。风虎云龙。兴王只在笑谈
中。直至如今千载后，谁与争功。

望江南 归依三宝赞

归依众，梵行四威仪。愿我遍游诸佛土，
十万贤圣不相离。永灭世间痴。

二

归依法，法法不思议。愿我六根常寂静，
心如宝月映琉璃。了法更无疑。

三

归依佛，弹指越三祇。愿我速登无上觉，
还如佛坐道场时。能智又能悲。

四

三界里，有取总灾危。普愿众生同我愿，
能于空有善思惟。三宝共住持。

西江月 红梅

梅好惟嫌淡伫，天教薄与胭脂。真妃初
出华清池。酒入琼姬半醉。

东阁诗情易动，高楼玉管休吹。北人浑
作杏花疑。惟有青枝不似。

全宋词 王安石

渔家傲 梦中作

隔岸桃花红未半。枝头已有蜂儿乱。惆怅武陵人不管。清梦断。亭亭伫立春宵短。

清平乐

留春不住。费尽莺儿语。满地残红宫锦污。昨夜南园风雨。

小怜初上琵琶。晓来思绕天涯。不肯画堂朱户，春风自在杨花。

生查子

雨打江南树。一夜花开无数。绿叶渐成阴，下有游人归路。

与君相逢处。不道春将暮。把酒祝东风，且莫恁、匆匆去。

谒金门

春又老。南陌酒香梅小。遍地落花浑不扫。梦回情意悄。

红笺寄与添烦恼。细写相思多少。醉后几行书字小。泪痕都搵了。

菩萨蛮 集句

海棠乱发皆临水。君知此处花何似。凉

全宋词 王安石

月白纷纷。香风隔岸闻。

啜枝黄鸟近。隔岸声相应。随意坐莓苔。
飘零酒一杯。

千秋岁引 秋景

别馆寒砧，孤城画角。一派秋声入寥廓。
东归燕从海上去，南来雁向沙头落。楚台风，
庾楼月，宛如昨。

无奈被些名利缚。无奈被他情担阁。可惜风流总闲却。
当初谩留华表语，而今误我秦楼约。梦阑时，酒醒后，思量著。

王安中

虞美人 雁门作

千山青比妆眉浅。却奈眉峰远。玉人元自不禁秋。更算恼伊深处、月当楼。分携不见凭阑际。只料无红泪。万千应在锦回纹。嘱付断鸿西去、问行云。

浣溪沙 看雪作

慵整金钗缩指尖。晓霁犹自入疏帘。绿窗清冷脸红添。

妒粉尽饶花六六，回风从斗玉纤纤。不成香暖也相兼。

玉楼春

秋鸿只向秦筝住。终寄青楼书不去。手因春梦有携时，眼到花开无著处。泥金小字蛮笺句。泪湿残妆今在否。欲寻巫峡旧时云，问取阳关西去路。

绿头鸭 大名岳宫作

魏都雄，凤皇飞观云间。佩麟符、荀池元老，暂辞西省仙班。憩甘棠、地澄远籁，咏华黍、河卷惊澜。碧草萋迷，丹毫冷落，圜扉铃索镇长闲。绣筵展、三台星近，锵玉韵珊珊。金尊滢、新醕方荐，薄暑初残。

政成时、欢余客散，后园朱户休关。度秋风、画阑枕水，挂夜月、雕槛骑山。锦帐笼香，鸾钗按曲，琵琶双转语绵蛮。劝行□傍眉黄气，先报袞衣还。登庸际，应褒旧德，喜动天颜。

北山移文哨遍

孔德彰作北山移文以讥周彦伦，后之托隐求达，指终南、嵩少为仕宦捷径者，读而羞之，是足为勇退者之鼓吹。阳翟蔡侯原道，恬于仕进。其内吕夫人有林下风。相与营归欤之计而未果，则嘱予以此文度曲，且朝夕使家童歌之，亦可想见泉石之胜。其词曰：]

世有达人，潇洒出尘，招隐青霄际。终始追。游览老山栖。藐千金、轻脱如屣。彼假容江皋，滥巾云岳，纓情好爵欺松桂。观向释谈空，寻真讲道，巢由何足相拟。待诏书来起便驹。席次早焚烈芰荷衣。敲朴诤诤，牒诉匆匆，抗颜自喜。

嗟明月高霞，石径幽绝谁回睇。空怅猿惊处，凄凉孤鹤嘹唳。任列壑争讥。众峰竦

全宋词 王安中

谏，林惭涧愧移星岁。方浪柅神京，腾装魏阙，徘徊经过留憩。致草堂灵怒蒋侯麾。肩岫幌、驱烟勒新移。忍丹崖碧岭重滓。鸣湍声断深谷，逋客归何计。信知一逐浮荣，便丧素守，身成俗士。伯鸾家有孟光妻。岂逡巡、眷恋名利。

菩萨蛮 六军阅罢，犒饮兵将官

中军玉帐旌旗绕。吴钩锦带明霜晓。铁马去追风。弓声惊塞鸿。

分兵闲细柳。金字回飞奏。犒饮上恩浓。燕然思勒功。

御街行 赐衣袄子

清霜飞入蓬莱殿。别进云裘软。却回宸虑念多寒，诏语日边亲遣。冰蚕绵厚，金雕锦好，永夜缝宫线。

红旗绛旆迎星传。喜气欢声远。庙堂勋旧使台贤，领袖坐中争绚。天香馥郁，君恩岁岁，一醉春生面。

鹧鸪天 百官传宣

茜雾红云捧建章。鸣珂星使渡银潢。亲将圣主如丝语，传与陪都振鹭行。香袅袅，佩锵锵。升平歌管趁飞觞。明时玉帐恩相续，清夜钧天梦更长。

蝶恋花 六花冬词

长春花口号

露桃烟杏逐年新。回首东风迹已陈。顷刻开花公莫爱，四时俱好是长春。

词

曲径深丛枝袅袅。晕粉揉绵，破蕊烘清晓。十二番开寒最好。此花不惜春归早。
青女飞来红翠少。特地芳菲，绝艳惊衰草。只殢东风终甚了。久长欲伴姮娥老。

山茶口号

无穷芳草度年华。尚有寒来几种花。好在朱朱兼白白，一天飞雪映山茶。

词

巧剪明霞成片片。欲笑还嗔，金蕊依稀见。拾翠人寒妆易浅。浓香别注唇膏点。
竹雀喧喧烟岫远。夜色溟蒙，六出花飞遍。此际一枝红绿眩。画工谁写银屏面。

蜡梅口号

雪里园林玉作台。侵寒错认暗香回。化工清气先谁得，品格高奇是蜡梅。

词

剪蜡成梅天著意。黄色浓浓，对萼匀装缀。百和薰肌香旖旎。仙裳应渍蔷薇水。
雪径相逢人半醉。手折低枝，拥髻云争翠。嗅蕊捻枝无限思。玉真未洒梨花泪。

红梅口号

千林腊雪缀瑶瑰。晴日南枝暖独回。知有和羹寻鼎实，未春先发看红梅。

词

青玉一枝红类吐。粉颊愁寒，浓与胭脂傅。辨杏猜桃君莫误。天姿不到风尘处。

云破月来花下住。要伴佳人，弄影参差舞。只有暗香穿绣户。昭华一曲惊吹去。

迎春口号

年年节物欲争新。玉颊朱颜一笑频。勾引东风到池馆，春前花发自迎春。

词

雪霁花梢春欲到。饯腊迎春，一夜花开早。青帝回舆云缥缈。鲜鲜金雀来飞绕。

绣阁纱窗人窈窕。翠缕红丝，斗剪幡儿小。戴在花枝争笑道。愿人常共春难老。

小桃口号

鸳瓦铺霜朔吹高。画堂歌管醉香醪。小春特地风光好，艳粉娇红看小桃。

词

秾艳夭桃春信漏。弄粉飘香，枫叶飞丹后。酒入冰肌红欲透。无言不许群芳斗。

楼外何人擅翠袖。剪落金刀，插处浓云覆。肯与刘郎仙去否。武陵回路相思瘦。

又 梁才甫席上次韵

翠袖盘花金捻线。晓炙银簧，劝饮随深

浅。复幕重帘谁得见。余醺微觉红浮面。
别唤清商开绮宴。玉管双横，抹起梁州
遍。白苧歌前寒莫怨。湘梅萼里春那远。

又

千古铜台今莫问。流水浮云，歌舞西陵
近。烟柳有情开不尽。东风约定年年信。
天与麟符行乐分。带缓球纹，雅宴催云
鬓。翠雾萦纤销篆印。箏声恰度秋鸿阵。

又

未帖宜春双彩胜。手点酥山，玉箸人争
莹。节过日长心自准。迟留碧瓦看红影。
楼外尖风吹鬓冷。一望平林，霏霏花相
映。落粉筛云晴未定。朝醒只凭阑干醒。

一落索

梦破池塘杳杳。情随春草。尊前风味不
胜清，赋白雪、幽兰调。

秀句银钩争妙。殷勤东道。蛮笺传与翠
鬟歌，便买断、千金笑。

又

欲访瑶台蓬岛。烟云缥缈。清游却到凤
皇池，听檀板、新声妙。

天上除书催早。人瞻元老。东风烟柳罩
河堤，更何处、深春好。

木兰花 送耿太尉赴阙

尧天雨露承新诏。珂马风生趋急召。玉

全宋词 王安中

符曾将虎牙军，金殿还升龙尾道。征西镇北
功成早。仗钺登坛今未老。樽前休更说燕然，
且听阳关三叠了。

玉蝴蝶 和梁才甫游园作

御水縠纹风皱，画桥横处，沙路晴时。
曲坞藏春，朱户翠竹参差。过墙花、娇无限
思，笼槛柳、低不胜垂。海棠枝。为东君爱，
未敢离披。

迟迟。日华融丽，悠扬丝管，掩冉旌旗。
喜入繁红，坐来开尽不须吹。听莺迁、还思
上苑，约凤浴、应展新池。促归期。燕飞蝶
舞，特地熙熙。

水龙吟 游御河并过压沙寺作

魏台长乐坊西，画桥倒影烟堤远。东风
与梁，揉蓝春水，湾环清浅。浴鹭翘莎，戏
鱼吹絮，落红漂卷。为游人盛踪，兰舟彩舫，
飞轻棹、凌波面。

乐事年来乍见。趁旌旗、谷莺娇啭。追
随况有，疏帘珠袖，浓香绀幘。萧寺高亭，
茂林斜照，且留芳宴。看韶华烂向，尊前放
手，作梨花晚。

临江仙 和梁才甫茶词

六六云从龙戏月，天颜带笑尝新。年年

全宋词 王安中

回首建溪春。香甘先玉食，珍宠在枫宸。

赐品暂醒歌里醉，延和行对台臣。宫瓯浮雪乳花匀。九重清昼永，宣坐议东巡。

小重山 汤

重举金猊多炷香。仙方调绛雪，坐初尝。醉鬟娇捧不成行。颜如玉，玉碗共争光。

飞盖莫催忙。歌檀临阅处，缓何妨。远山横翠为谁长。人归去，余梦绕高唐。

又

椽烛乘珠清漏长。醉痕衫袖湿，有余香。红牙双捧旋排行。将歌处，相向更催妆。

明月映东墙。海棠花径密，迸流光。迟留春笋缓催汤。兰堂静，人已候虚廊。

江神子

韦城道中寄李祖武、翟淳老

荷花遮水水漫溪。柳低垂。乱蝉嘶。舍辔何妨，临水照征衣。一扇香风摇不尽，人念远，意凄迷。

骑鲸仙子已相知。数归期。赋新诗。更想翟公，门外雀罗稀。陶令此襟尘几许，聊欲向，北窗披。

徵招调中腔 天宁节

红云茜雾笼金阙。圣运叶、星虹佳节。

全宋词 王安中

紫禁晓风馥天香，奏九韶、帝心悦。

瑶阶万岁蟠桃结。睿算永、壶天风月。
日观几时六龙来，金缕玉牒告功业。

清平乐 和晁倅

花时微雨。未减春分数。占取帘疏花密处。
把酒听歌金缕。

斜风轻度浓香。闲情正与春长。向晚红灯入坐，
尝新青杏催觞。

又

花枝敲晚。过雨红珠转。欲共东君论缱绻。
繁艳休将风卷。

归来凝思闲窗。寒花莫□微觞。解慢不成幽梦，
燕泥惊落雕梁。

安阳好 九首并口号破子

口号

赋尽三都左太冲。当年偏说邺都雄。如今别唱
安阳好，胜日佳时一醉同。

一

安阳好，形胜魏西州。曼衍山河环故国，
升平歌鼓沸高楼。和气镇飞浮。笼画陌，乔木几春秋。
花外轩窗排远岫，竹间门巷带长流。风物更清幽。

二

安阳好，戟户府居雄。白昼锦衣清宴处，

铁梁丹榭画图中。壁记旧三公。棠讼悄，池馆北园通。夏夜泉声来枕簟，春风花影透帘栊。行乐兴何穷。

三

安阳好，物外占天平。叠叠挹蓝烟岫色，淙淙鸣玉晚溪声。仙路驭风行。松路转，丹碧照飞甍。金界花开常烂熳，云根石秀小峥嵘。幽事不胜清。

四

安阳好，泮水盛儒宫。金字照碑光射斗，芸香书阁势凌空。肃肃采芹风。来劝学，乡衮首文翁。岁岁青衿多振鹭，人人彩笔竞腾虹。九万奋飞同。

五

安阳好，耆旧迹依然。醉白垂杨低掠水，延松高桧老参天。曾映两貂蝉。王谢族，兰玉秀当年。画隼朱轮人继踵，丹台碧落世多贤。簪绂看家传。

六

安阳好，负郭相君园。绿野移春花自老，平泉醒酒石空存。月馆对风轩。人选胜，幽径破苔痕。拥砌翠筠侵坐冷，穿亭玉溜落池喧。归意黯重门。

七

安阳好，曲水似山阴。咽咽清泉岩溜细，弯弯碧甃篆痕深。永昼坐披襟。红袖小，歌扇画泥金。鸭绿波随双叶转，鹅黄酒到十分

斟。重听绕梁音。

八

安阳好，□□又翠飞。拨垆旋栽花密密，
著行重接柳依依。鸳瓦荡晴辉。

池面渺，相望是荣归。两世风流今可见，
一门恩数古来稀。谁与赋缙衣。

九

安阳好，千古邺台都。缙帐歌人春不见，
金楼梦凤夜相呼。辇路旧萦纡。闲引望，漳
水绕城隅。暗有渔樵收故物，谁将宫殿点新
图。平野漫烟芜。

破子清平乐

烟云千里。一抹西山翠。碧瓦红楼山对
起。楼下飞花流水。

锦堂风月依然。后池莲叶田田。缥缈贯
珠歌里，从容倒玉尊前。

小重山 相州荣归池上作

碧藕花风入袖香。涓涓清露浥，玉肌凉。
折花无语傍横塘。随折处，一寸万丝长。

还更擘莲房。莲心真个苦，似离肠。凌
波新恨尽难忘。分携也，触事著思量。

虞美人

星郎才思生雕管。四海声名满。尊前新

唱更新妍。况有玉人相劝、拚酩颜。芙蓉幕下同时客。年少那重得。且寻幽梦赋高唐。莫为浮名容易、却相妨。

又 赠李士美

清商初入昭华琯。宫叶秋声满。草麻初罢月婵娟。想见明朝喜色、动天颜。持杯满劝龙头客。荣遇时方得。词源三峡泻瞿塘。便是醉中宣去、也无妨。

又 和赵承之送权朝美接伴

文昌郎自文无比。风露行千里。试寻天上使星看。却见锦衣白昼、过乡关。边城落照孤鸿外。联璧人相对。应吟红叶送清秋。向我旧题诗处、更重游。

卜算子 往道山道中作

客舍两三花，并脸开清晓。一朵涓涓韵已高，一朵纤纤袅。

谁与插斜红，拥髻争春好。此意遥知梦已传，月落前村悄。

一落索 送王伯绍帅庆

塞柳未传春信。霜花侵鬓。送君西去指秦关，看日近、长安近。

玉帐同时英俊。合离无定。路逢新雁北来归，寄一字、燕山问。

临江仙

贺州刘帅忠家隔帘听琵琶

凤拨鹍弦鸣夜永，直疑人在浔阳。轻云薄雾隔新妆。但闻儿女语，倏忽变轩昂。

且看金泥花那面，指痕微印红桑。几多余暖与真香。移船犹自可，卷箔又何妨。

浣溪沙 柳州作

宫缬慳裁翡翠轻。文犀松串水晶明。颭风新样称娉婷。

带笑缓摇春笋细，障羞斜映远山横。玉肌无汗暗香清。

卜算子 柳州作

燕尾道冠儿，蝉翼生衫子。敲枕看书卧北窗，簟展潇湘水。

团扇弄薰风，皓质添凉意。谁与文君作粉真，只此莲花是。

洞仙歌

深庭夜寂，但凉蟾如昼。鹊起高槐露华透。听曲楼玉管，吹彻伊州，金钏响，轧轧朱扉暗扣。

迎人巧笑道，好个今宵，怎不相寻暂携

手。见淡净晚妆残，对月偏宜，多情更、越饶纤瘦。早促分飞霎时休，便恰似阳台，梦云归后。

失调名

笑时眼迷青意贴，行时鞋露绣旁相。

点绛唇

岷首亭空，劝君休堕羊碑泪。宦游如寄。且伴山翁醉。

说与鲛人，莫解江皋佩。将归思。晕红萦翠。细织回文字。

菩萨蛮 寄赵伯山四首

雨零花昼春杯举。举杯春昼花零雨。诗令酒行迟。迟行酒令诗。

满斟犹换盏。盏换犹斟满。天转月光圆。圆光月转天。

又

绿笺长写新成曲。曲成新写长笺绿。豪句逞才高。高才逞句豪。

美容歌皓齿。齿皓歌容美。香篆小花团。团花小篆香。

又

玉纤传酒浮香菊。菊香浮酒传纤玉。弦

管沸欢筵。筵欢沸管弦。

出帘珠袖蘸。蘸袖珠帘出。眉晕浅山低。
低山浅晕眉。

又

浦烟迷处回莲步。步莲回处迷烟浦。罗
绮媚横波。波横媚绮罗。

细眉双拂翠。翠拂双眉细。歌意任情多。
多情任意歌。

王昂

好事近 催妆词

喜气拥朱门 ,光动绮罗香陌。行到紫薇花
下 ,悟身非凡客。

不须脂粉浣天真 ,嫌怕太红白。留取黛眉
浅处 ,画章台春色。

王 柏

酹江月 题泽翁梅轴后

今岁腊前，苦无多寒色、梅花先白。可惜横斜清浅处，谁访孤山仙客。玉勒寻芳，金尊护冷，定与心期隔。夜阑人悄，可无一段春月。

怕它香已飘零，罗浮梦断，不与东君接。买得鹅湖千幅绢，留取天然标格。树老梢癯，蕊圆须健，不放风骚歇。花光何处，儿孙声价方彻。

王 案

浣溪沙

雪里东风未过江。陇头先折一枝芳。如今疏影照溪塘。

北客乍惊无绿叶，东君应笑不红妆。玉真爱著淡衣裳。

渔家傲

日月无根天不老。浮生总被消磨了。陌上红尘常扰扰。昏复晓。一场大梦谁先觉。

雒水东流山四绕。路傍几个新华表。见说在时官职好。争信道。冷烟寒雨埋荒草。

浣溪沙

扇影轻摇一线香。斜红匀过晚来妆。娇多无事做凄凉。

借问谁教春易老，几时能勾夜何长。旧欢新恨总思量。

又

珠箔随檐一桁垂。绣屏遮枕四边移。春

归人懒日迟迟。

旧事只将云入梦，新欢重借月为期。晚
来花动隔墙枝。

玉楼春

秋闺思入江南远。帘幕低垂闲不卷。玉
珂声断晓屏空，好梦惊回还起懒。

风轻只觉香烟短。阴重不知天色晚。隔
窗人语趁朝归，旋整宿妆匀睡脸。

又

绣屏晓梦鸳鸯侣。可惜夜来欢聚取。几
声低语记曾闻，一段新愁看乍觑。

繁红洗尽胭脂雨。春被杨花勾引去。多
情只有旧时香，衣上经年留得住。

蝶恋花

燕子来时春未老。红蜡团枝，费尽东君
巧。烟雨弄晴芳意恼。雨余特地残妆好。

斜倚青楼临远道。不管傍人，密共东君
笑。都见娇多情不少。丹青传得倾城貌。

又

濯锦江头春欲暮。枝上繁红，着意留春
住。只恐东君嫌面素。新妆剩把胭脂傅。

晓梦惊寒初过雨。寂寞珠帘，问有余花
否。怅望草堂无一语。丹青传得凝情处。

又

秾艳娇春春婉娩。雨惜风饶，学得宫妆

浅。爱把绿眉都不展。无言脉脉情何限。
花下当时红粉面。准拟新年，都向花前
见。争奈武陵人易散。丹青传得闺中怨。

又

镂雪成花檀作蕊。爱伴秋千，摇曳东风
里。翠袖年年寒食泪。为伊牵惹愁无际。
幽艳偏宜春雨细。红粉阑干，有个人相
似。钿合金钗谁与寄。丹青传得凄凉意。

又

晕绿抽芽新叶斗。掩映娇红，脉脉群芳
后。京兆画眉樊素口。风姿别是闺房秀。
新篆题诗霜实就。换得琼琚，心事偏长
久。应是春来初觉有。丹青传得厌厌瘦。

又

花为年年春易改。待放柔条，系取长春
在。宫样妆成还可爱。鬓边斜作拖枝戴。
每到无情风雨大。检点群芳，却是深丛
耐。摇曳绿萝金缕带。丹青传得妖娆态。

王 苍

诉衷情

补成团扇绣残工。并蒂瑞芙蓉。花心欲
就针折，赭玉唾残茸。

寻断绪，怨西风。寂寥中。两般时候，
旧月新霜，晓角昏钟。

王 谌

渔父词

嘉熙戊戌季春一日，画溪吟客王子信为亚愚诗禅上人作渔父词七首

兰芷流来水亦香。满汀鸥鹭动斜阳。声欸乃，间鸣榔。侬家只合岸西旁。

其二

翁姬齐眉妇亦贤。小姑颜貌正笄年。头发乱，髻鬟偏。爱把花枝立柁前。

其三

湘妃泪染竹痕斑。风雨连朝下钓难。春浪急，石矶寒。买得茅柴味亦酸。

其四

满湖飞雪搅长空。急起呼儿上短篷。蓑笠具，画图同。铁笛声长曲未终。

其五

离骚读罢怨声声。曾向江边问屈平。醒还醉，醉还醒。笑指沧浪可濯缨。

其六

白发鬖松不记年。扁舟泊在荻花边。天

全宋词 王 谌

上月，水中天。夜夜烟波得意眠。

其七

只在青山可卜邻。妻儿笑语意全真。休
识字，莫嫌贫。方是安闲第一人。

王从叔

昭君怨

门外春风几度。马上行人何处。休更卷朱帘。草连天。

立尽海棠花月。飞到荼蘼香雪。莫怪梦难成。梦无凭。

阮郎归

风中柳絮水中萍。聚散两无情。斜阳路上短长亭。今朝第几程。

何限事,可怜生。能消几度春。别时言语总伤心。何曾一字真。

南柯子 苦雨

碧树留云湿,青山似笠低。鹧鸪啼罢竹鸡啼。不晓天天何意、要梅肥。

昨日穿新葛,今朝御夹衣。思家怀抱政难为。只恐归来憔悴,却羞归。

全宋词 王从叔

浣溪沙 梅

水月精神玉雪胎。乾坤清气化生来。断桥流水领春回。

昨夜醉眠苔上石，天香冉冉下瑶台。起来窗外见花开。

秋蕊香 用清真韵

薄薄罗衣乍暖，红入酒痕潮面。絮花舞倦带娇眼。昨夜平堤水浅。

故人信断风箏线。误归燕。梦魂不怕山路远。无奈棋声隔院。

王翠鸾

后庭花

无心度岁华。梦魂常到家。不见天边雁，
相侵井底蛙。碧桃花。鬓边斜插。伴人憔悴
杀。

王大简

浣溪沙

拂面凉生酒半醒。廉纤小雨晚初晴。过
云无定月亏盈。

庭户不关春悄悄，阑干倚遍夜深深。几
回风竹误人听。

更漏子

梦期疏，书约误。肠断夜窗风雨。灯晕
冷，漏声遥。酒消愁未消。

想天涯，芳草碧。

人与芳春俱客。凭杜宇，向江城。好啼
三两声。

王大烈

鹊桥仙 寿宗女

银潢流派，嫦娥出世。正是麦秋天气。
荧煌一点寿星明，又恰向、今宵呈瑞。

佳儿龙跳，荣封迤止。试问遐龄知几。
从今旋数一千年，待足了、依前数起。

蓦山溪 寿生女

东风吹物，渐入韶华媚。和气散千门，
更灵鹊、前村报喜。月宫仙子，昨夜下瑶台，
人传道，诞兰房，喜把金盆洗。

中郎传业，此事今如意。遥想画堂中，
有葱葱、云烟滃瑞。休言前日，玉燕不来投，
看释氏，到明年，又送麒麟至。

王道亨

桃源忆故人

刘郎自是桃花主。不许春风闲度。春色易随风去。片片伤春暮。

返魂不用清香炷。却有梅花淡伫。从此镇长相顾。不怨飘残雨。

王 庚

贺新郎 寿蔡久轩参政，癸丑生

满劝黄封酒。是年年、春色长绕，径花宫柳。碧水丹山添清气，岁月兰亭癸丑。看枢极、光腾台斗。细数中书堂壁记，自欧韩、富范题名后，还有似、我公否。

好知天意生贤候，正造化安排，孕出五阳之秀。何物一阴犹踟躅，尽决还公只手。这一著、邦家之寿。宰相时来须教做，算人间、是处鱼羹有。名与节，久轩久。

全宋词 王拱辰

王拱辰

沁园春

华发青云。

王 观

忆黄梅

枝上叶儿未展。已有坠红千片。春意怎生防,怎不怨。被我安排,矮牙床斗帐,和娇艳。移在花丛里面。

请君看。惹清香,偎媚暖。爱香爱暖金杯满。问春怎管。大家拚、便做东风,总吹交零乱。犹肯自、输我鸳鸯一半。

浪淘沙 杨梅

素手水晶盘。垒起仙丸。红绡剪碎却成团。逗得安排金粟遍,何似鸡冠。

味胜玉浆寒。只被宜酸。莫将荔子一般看。色淡香消僝僽损,才到长安。

天 香

霜瓦鸳鸯,风帘翡翠,今年早是寒少。矮钉明窗,侧开朱户,断莫乱教人到。重阴未解,云共雪、商量不了。青帐垂毡要密,红炉收围宜小。

全宋词 王 观

呵梅弄妆试巧。绣罗衣、瑞云芝草。伴我
语时同语，笑时同笑。已被金尊劝倒。又唱个
新词故相恼。尽道穷冬，元来恁好。

卜算子 送鲍浩然之浙东

水是眼波横，山是眉峰聚。欲问行人去那
边，眉眼盈盈处。

才始送春归，又送君归去。若到江东赶上
春，千万和春住。

清平乐 应制

黄金殿里。烛影双龙戏。劝得官家真个
醉。进酒犹呼万岁。

折旋舞彻伊州。君恩与整搔头。一夜御
前宣住，六宫多少人愁。

雨中花令 夏词

百尺清泉声陆续。映潇洒、碧梧翠竹。面
千步回廊，重重帘幕，小枕敲寒玉。

试展鲛绡看画轴。见一片、潇湘凝绿。待
玉漏穿花，银河垂地，月上栏干曲。

庆清朝慢 踏青

调雨为酥，催冰做水，东君分付春还。何
人便将轻暖，点破残寒。结伴踏青去好，平头

全宋词 王 观

鞋子小双鸾。烟郊外 ,望中秀色 ,如有无间。

晴则个 ,阴则个 ,短钉得天气 ,有许多般。
须教镂花拨柳 ,争要先看。不道吴绫绣袜 ,香
泥斜沁几行斑 ,东风巧 ,尽收翠绿 ,吹在眉山。

清平乐 拟太白应制

宜春小苑。处处花开满。学得红妆红要
浅。催上金车要看。

君王曲宴瑶池。小舟掠水如飞。夺得锦
标归去 ,匆匆不惜罗衣。

木兰花令 柳

铜驼陌上新正后。第一风流除是柳。勾
牵春事不如梅 ,断送离人强似酒。

东君有意偏搆就。惯得腰肢真个瘦。阿
谁道你不思量 ,因甚眉头长恁皱。

生查子

关山魂梦长 ,塞雁音书少。两鬓可怜青 ,
一夜相思老。

归傍碧纱窗 ,说与人人道。真个别离难 ,
不似相逢好。

菩萨蛮 归思

单于吹落山头月。漫漫江上沙如雪。谁

唱缕金衣。水寒船舫稀。

芦花枫叶浦。忆抱琵琶语。身未发长沙。
梦魂先到家。

江城梅花引

年年江上见寒梅。暗香来。为谁开，疑是月宫、仙子下瑶台。冷艳一枝春在手，故人远，相思寄与谁。怨极恨极嗅香蕊。念此情，家万里。暮霞散绮。楚天碧、片片轻飞。为我多情，特地点征衣。花易飘零人易老，正心碎，那堪塞管吹。

赵万里云：案明钞本梅苑一引上阙，不注撰人。全芳备祖前集一梅花门引题柳耆卿词、楝亭刻本梅苑从之。检乐章集未载，则非柳词明矣。阳春白雪七引洪皓江城梅花引，题云：“使北时和李汉老”。（即鄱阳集之忆江梅）是此词在宋时又以为李汉老作。兹从花庵词选订正。又案上阙又误入大典本姚燧牧庵集卷三十五。

高阳台

红入桃腮，青回柳眼，韶华已破三分。人不归来，空教草怨王孙。平明几点催花雨，梦半阑、敲枕初闻。问东君，因甚将春，老了闲人。

东郊十里香尘满，旋安排玉勒，整顿雕轮。趁取芳时，共寻岛上红云。朱衣引马黄金带，算到头、总是虚名。莫闲愁，一半悲秋，一半伤春。

减字木兰花 寿女婿

瑞云仙雾。拂晓重重遮绣户。一炷清香。
千尺流霞入寿觞。

家门转好。从此应须长不老。来岁春风。
看拜西枢小令公。

红芍药

人生百岁,七十稀少。更除十年孩童小。
又十年昏老。都来五十载,一半被、睡魔分了。
那二十五载之中,宁无些个烦恼。

仔细思量,好追欢及早。遇酒追朋笑傲。
任玉山摧倒。沈醉且沈醉,人生似、露垂芳草。
幸新来、有酒如渑,结千秋歌笑。

失调名

十三妮子绿窗中。

临江仙 离怀

别岸相逢何草草,扁舟两岸垂杨。绣屏珠箔绮香囊。
酒深歌拍缓,愁入翠眉长。燕子归来人去也,此时无奈昏黄。
桃花应是我心肠。不禁微雨,流泪湿红妆。

王 广 文

金缕歌

辜负东风约。忆曾将、淮南草木，笔端
笼络。后土祠中明月夜，忽有瑶姬跨鹤。迥
不比、水仙低弱。天上人间惟一本，倒千钟、
琼露花前酌。追往事，怎忘却。

移根应费仙家药。漫回头、关山信断，
堡城笳作。问讯而今平安否，莫遣玉箫惊落。
但画卷、依稀描著。白发愧无渡江曲，与吾
家、子敬相酬酢。新旧恨，两交错。

王 圭

奉安真宗皇帝御容于寿星观永崇殿导引歌词

忆玉清景，繁盛极当时。千古事难追。
汉家别庙秋风起，空出奉宸衣。

三山浮海日晖晖。羽盖共云飞。灵宫旧
是栖真处，还望玉舆归。

平调发引

玉宸朝晚，忽掩赭黄衣。愁雾锁金扉。
蓬莱待得仙丹至。人世已成非。

龙轩天仗转西畿。旌旆入云飞。望陵宫
女垂红泪，不见翠舆归。

又

上林春晚，曾是奉宸游。水殿戏龙舟。
玉箫吹断催仙驭，一去隔千秋。

游人重到曲江头。事往涕难收。空馀御
幄传觞处，依旧水东流。

王槐建

水龙吟 送人归武夷

武夷一片闲云 ,被风吹落清原顶。溪梅馥馥、飞来相傍 ,不嫌凄冷。瓦釜争鸣 ,丝桐一曲 ,满城倾听。奈阳春未了 ,骊驹已驾 ,桐阴底、梦魂醒。

何限吟笺赋笔 ,甚乡心、分却清兴。鳌峰胜处 ,遥知风月 ,属谁管领。邂逅何时 ,无穷事业 ,有穷光景。但相期、不负初心 ,此外分、皆前定。

王 淮

满江红 用吴渊吴潜二公韵

踏遍江南，予岂为、解衣推食。谩赢得、烟波短棹，月楼长笛。看剑功名心已死，积薪涕泪今谁滴。想中原、一望一伤情，英雄客。

形势地，还如昔。谈笑里，封侯觅。岂有于前代，无于今日。龙豹莫藏韬略手，犬羊快扫腥膻迹。看诸公、事业卜臬卢，何劳掷。

王娇娘

卜算子

君去有归期 ,千里须回首。休道三年绿叶
阴 ,五载花依旧。
莫怨好音迟 ,两下坚心守。三只骰儿十九
窝 ,没里须教有。

菩萨蛮

夜深偷展纱窗绿。小桃枝上留莺宿。花
嫩不禁揉。春风卒未休。
千金身已破。脉脉愁无那。特地嘱檀郎。
人前口谨防。

一剪梅

豆蔻梢头春意阑。风满前山。雨满前山。
杜鹃啼血五更残。花不禁寒。人不忍寒。
离合悲欢事几般。离有悲欢。合有悲欢。
别时容易见时难。怕唱阳关。莫唱阳关。

一丛花

世间万事转头空。何物似情浓。新欢共把愁眉展，怎知道、新恨重封。媒约无凭，佳期又误，何处问流红。

欲歌先咽意冲冲。从此各西东。愁人最怕到黄昏，窗儿外、疏雨梧桐。仔细思量，不如桃李，犹解嫁东风。

菩萨蛮

郎今去也抛奴去。恨共离舟留不住。扶病别江头。沾襟泪雨流。

路远终须别。一寸肠千结。此会再难逢。相逢只梦中。

减字木兰花

莲闺爱绝。长向碧瑶深处歇。华表来归。风物依然人事非。

月光如水。偏照鸳鸯新塚里。黄鹤催班。此去何时得再还。

永遇乐

极目秋空，塞鸿飞过，有恨谁寄。幽会未终，归期顿阻，忆得轻抛弃。暮雨情疏，□云信断，惟有月明千里。想当初、娇姿□媚。相期

永效连理。

东窗轩外 ,熙春堂畔 ,饱挹茶麝香味。一曲离歌 ,十分别酒 ,阁不住汪汪泪。峨眉蝉鬓 ,知他今后 ,好好为谁梳洗。算此生、姻缘未断 ,再须□你□。

满庭芳

帘影筛金 ,簟波浮水 ,绿阴庭院清幽。夜长人静 ,消得许多愁。常记当时月色 ,小窗外、情语绸缪。因缘浅 ,行云去后 ,杳不见踪由。

殷勤 ,红一叶 ,传来密意 ,佳好新求。奈百端间阻 ,恩爱成休。应是奴家薄命 ,难陪伴、俊雅风流。须想念 ,重寻旧约 ,休忘杜家秋。

再团圆

芳心一点 ,柔肠万转 ,有意偷怜。孜孜守着 ,甚日来、结得恶因缘。

言是心声 ,明神在上 ,说破从前。天还知道 ,不违人愿 ,再与团圆。

眼儿媚

□肠镇日锁眉头。无计可消愁。当初不惯 ,相掬相就 ,合下冤仇。

今番况被两休休。都付水东流。此情谁表 ,试凭红叶 ,道个因由。

全宋词 王娇姿

王娇姿

失调名

兀自未归来。

王居安

满江红

八十归来，方岩下、几竿修竹。柴门外，沙铺软路，水流清玉。栽接新来桃与李，安排旧日松和菊。过小桥、作个看山楼，千峰绿。

收笔砚，藏棋局。酒莫饮，经须读。但平平放下，顿超凡俗。独睡已无年少梦，闲吟不唱他家曲。算人生、万事苦无多，相将足。

沁园春 敬次白真人韵

湖海襟期，烟霞气宇，天下星郎。有灵方时后，年年却老，神锋耳底，夜夜腾光。万卷蟠胸，千钟蘸甲，袞袞词源三峡滂。功成处，见须弥日月，河岳星霜。

兴来引笔千行。看举世何人是智囊。任纵横万变，难瞒道眼，优游自乐，不识愁肠。闹市丛中，密林静处，鼻观常闻三界香。天书到，听笙箫竞奏，幢盖班行。

王克勤

朝中措 寿熊左史

银河无际渺澄空。一点寿光中。此夕谪
仙初度，清歌吉甫，清风。

文章问世，曾亲玉座，屡赐金钟。丹禁
若须鳌便，赤城唤取渔翁。

王 澜

念奴娇 避地溢江，书于新亭

凭高远望，见家乡、只在白云深处。镇日思归归未得，孤负殷勤杜宇。故国伤心，新亭泪眼，更洒潇潇雨。长江万里，难将此恨流去。

遥想江口依然，鸟啼花谢，今日谁为主。燕子归来，雕梁何处，底事呢喃语。最苦金沙，十万户尽，作血流漂杵。横空剑气，要当一洗残虏。

王 琳

平韵满江红 题宜春台

碧蘸江山 , 鹤唳晓、云献画屏。瑶宫敞、舞金翔翠 , 巍枕春城。龙背神瓢飞旱雨 , 虹光花石转阴晴。蔼昼香、飞雾福苍生 , 千古灵。

箫鸾响 , 笙鹤鸣。瑞烟起 , 彩云行。满阑干花影 , 绣扬帘旌。佛界三千笼日月 , 仙楼十二挂星辰。望赭袍、霞佩并云辇 , 游紫清。

木兰花慢 汴京

蕊珠仙驭远 , 横羽葆、簇虬旌。甚鸾月流辉 , 凤云布彩 , 翠绕蓬瀛。舞衣怯环佩冷 , 问梨园、几度沸歌声。梦里芝田八骏 , 禁中花漏三更。

繁华一瞬化飞尘 , 辇路劫灰平。恨碧灭烟销 , 红凋露粉 , 寂寞秋城。兴亡事空陈迹 , 只青山、淡淡夕阳明。懒向沙鸥说得 , 柳风吹上旗亭。

六么令 京中清明

淡烟疏雨 , 香径渺啼鸪。新晴昼帘闲卷 ,

全宋词 王 琳

燕外寒犹力。依约天涯芳草，染得春风碧。人间陈迹？斜阳今古，几缕游丝趁飞蝶。

柳向尊前起舞，又觉春如客。翠袖折取嫣红，笑与簪华发。回首青山一点，檐外寒云叠。梨花淡白，柳花飞絮，梦绕阑干一株雪。

王 迈

水调歌头 寿黄殿讲母

天上一灯满，引起万灯明。不知今夕何夕，平地有蓬瀛。西母瑶池称寿，南守锋车催觐，二美一时并。一点魁星现，长侍老人星。

心事好，天与寿，鬓长青。不将钟鼎为乐，念念在朝廷。此母宜生此子，须有医时良策，寿国福苍生。子自坐黄阁，母自课黄庭。

沁园春

尹和靖，宣政间，不为权臣诘，隐于洛中。及兵起，全家受祸，老先生独以身免。贤者之不出如此。杨龟山屡出，不合又去，未几又出。靖康之变，以谏议大夫从驾入金营。贤者之出，竟如此。谨详二先生出处之节，求质正于西山真先生，遂成此词以呈

人物渺然，蕙兰椒艾，孰臭孰香。昔尹公和靖，与龟山老，虽同名节，却异行藏。尹在当年，深居养道，亲见兵戈兴洛阳。杨虽出，又何畀于蔡，何救于章。

公今为尹为杨。这一著须平心较量。正南洲潢弄，西淮鼎沸，廷绅噤舌，举国如狂。招鹤亭前，居然高卧，许大乾坤谁主张。公须起，要擎天一柱，支架明堂。

贺新郎

呈刘后村，时自桂林被召到莆，又遭烦言

出了罗浮洞。有多情、梅花雪片，殷勤相送。见说恹然琴鹤外，诗压牛腰较重。去管甚、群儿嘲弄。岭海三年持翠节，料无时、不作家山梦。驰玉勒，归金凤。

一门朱紫环昆仲。看阶庭、森森兰玉，慈颜欢动。宰相时来须著做，且舞莱衣侍奉。却不信、大才难用。时事多艰人物少，便中兴、谁辨浯溪颂。为大厦，要梁栋。

又 丁未守邵武，宴同官

此是河清宴。觉朝来、薰风满入，生绡团扇。太守愁眉才一展，且喜街头米贱。且莫管、官租难办。绕砌苔钱无限数，更莲池、雨过珠零乱。尽买得，凌波面。

家山乐事真堪羨。记年时、荔支新熟，荷筒齐劝。底事来寻蕉鹿梦，赢得乾忙似箭。笑富贵、都如邮传。做了丰年还百姓，便莼鲈、归兴催张翰。看卿等，上霄汉。

又 送赵伯泳侍郎守温陵

忆昔同时召。正青山、亲提玉尺，量材廊庙。当日班行比元祐，北玉西珠照耀。一转首、宫商移调。君自乌台登骑省，觉精神、

风采增清峭。数贤者，一不肖。

酒酣耳热惟长啸。便翩翩、辍班荷橐，一麾闽峤。堪笑狂生无用处，垂老云耕月钓。这富贵、非由人要。畴昔评君如玉雪，好翛然、琴鹤风尘表。清献后，又有赵。

又 为后村母夫人寿

瓔珞珠垂缕。看花冠、端容丽服，补陀岩主。只坐尘缘蹉一念，朱紫丛中得度。人世福、夫人兼五。银鹿诸孙来定省，对金屏、绣幕辉云母。人顶礼，柳行路。

朝朝口诵琅函句。觉从来、寿人福善，老天无误。消得天恩封福国，锦诰鸾翔凤舞。听来岁、日边佳语。上殿肩舆帘蹙绣，遣佳儿、扶掖天应许。笑陈媪，三题柱。

摸鱼儿

闽漕王幼学作碧湾丹嶂堂，歌此词，以墨本见寄，依韵和之

昔元城、一生清峭，南都高卧坚壁。留耕便是元城样，何肯枉吾寻尺。曾直笔。说社稷安危，屡叩龙墀额。明时逐客。却惠顾丹山，来持翠节，对此一湾碧。

澄清暇，无奈登临有癖。梅山时访仙迹。神仙偏喜公心事，一见莞然前席。闲不得。有先见蓍龟，消得君王忆。天阍不隔。要济险孤舟，支倾一柱，公外向谁觅。

沁园春 迎方右史德润

首尾四年，台省好官，都做一回。便前

头更有，合当做底，何妨且恁，猛省归来。
甲第新成，开尊行乐，脆管繁弦十二钗。回
头笑，这狂生无用，削尽官阶。

狂生真个狂哉。泼性气年来全未灰。有
龙鳞凤翼，不能攀附，牛衣渔具，早已安排。
烂煮园蔬，熟煨山芋，白发苍颜穷秀才。官
休做、莫狂无处著，送去琼崖。

念奴娇 熙春台宴同官

层台云外，阅古今、多少兴衰成败。老
木千章，若个是、南国甘棠遗爱。群籁号风，
繁阴蔽日，有此清凉界。宾朋在坐，朗然心
目明快。

更向会景亭前，登高吊古，此景何人会。
岁岁春来春又去，独有灵台春在。早稻炊香，
晚禾摇穗，管取三登泰。酿成春酒，把杯行
乐须再。

沁园春 寿史君黄少卿

一笑樽前，数雄甲辰，几位上台。有唐
裴相，徜徉绿野，我朝富老，游戏昆台。淮
蔡功成，惊天动地，似胜单车和虏回。谁知
道，活流民数万，赛过平淮。

君侯初度奇哉。五百岁、三贤前后来。
任朱幡西向，不妨为富，义旗北指，也解为
裴，将相功名，时来便做，且醉红蕖三百杯。
相期处，要千年汗竹，名节崔嵬。

贺新郎 寿右史 正月初七

曾侍螭头立。吐危言、婴鳞编虎，扶持
鳌极。谁炼精金铸刚卯，气节毅然镇国。肯
顾恋、眼前官职。碧水丹山持翠节，这福星、
特为吾闽出。发义廩，无难色。

如今世道难扶植。直还他、温公德量，
魏公风力。此事又关宗社福，仍系苍生休戚。
且称寿、公生人日。炼得内丹成熟后，看河
车、常运方瞳碧。五百岁，作良弼。

瑞鹤仙 寿叶路钤 二月初一

芳菲春二月。正软红尘里，踏青时节。
山川孕人杰。好赤城丹洞，丰姿奇绝。云霄
阔。个精神、清如玉雪。看谈兵议论，风
霆舞剑，刚肠如铁。

闻说。年方英妙，已向城边，飞书驰捷。
誓清击楫。宁久此，淹车辙。对花朝称寿，
朱颜未老，尽有功名事业。便张韩刘岳传名，
何如一叶。

满江红 寿黄殿讲母 正月十四

明日元宵，蔼佳气、清凉金粟。人道是、
史君寿母，宴瑶池曲。九十春来萱草茂，三
千年后蟠桃熟。看鳌头、名字未多时，分符
竹。

熏宝篆，张银烛。佳庆事，人人祝。况平反阴德，在长生篆。最喜芸香怀玉燕，安排锦帐骑银鹿。待雕轩、文駟上堤沙，如天福。

又 寿赵宰 二月初一

轻暖轻寒，正春满、河阳花县。谁报道，金铃声响，百花开遍。天上谪仙人瑞世，佛中有宰官身现。好看承、金母上瑶池，开华宴。

争捧取，金樽劝。更把取，丹砂炼。要朱颜长对，舞裙歌扇。准拟来年称寿日，沈香亭里春生面。有安期、大枣伴蟠桃，年年献。

念奴娇

寿洪运管 五月初五（丙集题作寿漕幕，此从丁集）

见山堂上，画帘卷、犹是清和天气。绿水红莲，雅称得、瑶碧冰壶标致，名在丹台，籍通紫府，游戏人间世。三洪华阀，自应生此人瑞。

好是佳旦称觞，班衣拜舞，有鹓雏相对。后院婵娟争劝酒，端午彩丝双系。管取来年，雪罗风葛，荣被君恩赐。黑头公相，直须眉寿千岁。

水龙吟 寿刘无竞 十月三十

橙黄橘绿佳期，诘朝又报阳来复。笼葱

瑞气，天教蟠绕，名门乔木。上界仙人，来游西塾，骖鸾跨鹤。有如椽彩笔，笺天万字，□呈了、琅玕腹。

不愿班行鸣玉。问君王、再分符竹。棣华辉映，庭萱春好，举杯相属。伯氏乘轺，诸公须又，安排除目。这堆床牙笏，人人道是，太夫人福。

沁园春 孟守美任

臞老今朝，载酒渡江，送孟吉州。遇舟之人士，来前问政，此公官去，莫也宜留。老子曰嘻，我游宦海，几度遭他风打头。君休问，但正因遇坎，行则乘流。

江皋一叶惊秋。雁过也、严明白鹭洲。笑如今休顾，人前堕甑，无心相逐，等是虚舟。啄黍鸡肥，新篘酒熟，且作山中万户侯。林泉好，却输公一著，先我归休。

南歌子 谢送菊花糕

家里逢重九，新篘熟浊醪。弟兄乘兴共登高。右手茱杯、左手笑持螯。

官里逢重九，归心切大刀。美人痛饮读离骚。因感秋英、饷我菊花糕。

沁园春 凤山出二宠姬歌余词

夜来斗庵，左顾绿云，右盼素娥。好态

浓意远，随宜梳洗，轻轻莲步，艳艳秋波。
妒宠争妍，娇痴无际，齐劝诗翁金叵罗。翁
微笑、□一时饮尽，谁少谁多。

月娥，唱后颜酡。莫也怕、浮云妒月麽。
问苏州刺史，旧欢如梦，江州司马，衫湿如
何。翠幕空垂，唾花无迹，忍听樽前飞燕歌。
销凝处，正潇潇烟雨，偏恼东坡。

王 茂 孙

高阳台 春梦

迟日烘晴，轻烟缕昼，琐窗雕户慵开。
人独春闲，金猊暖透兰煤。山屏缓倚珊瑚畔，
任翠阴、移过瑶阶。悄无声，彩翅翩翩，何
处飞来。

片时千里江南路，被东风误引，还近阳
台。膩雨娇云，多情恰喜徘徊。无端枝上啼
鸠唤，便等闲、孤枕惊回。恶情怀，一院杨
花，一径苍苔。

点绛唇 莲房

折断烟痕，翠蓬初离鸳鸯浦。玉纤相妒。
翻被专房误。

乍脱青衣，犹著轻罗护。多情处。芳心
一缕。都为相思苦。

王梦应

摸鱼儿 寿王尉 癸未冬至后五日

问谁歌、暗香疏影，此花堪照人世。起持霜月为花寿，天亦愿花千岁。谁有意。著如此人间，更著花如此。高寒洒洒。看浩荡刚风，跨虬飞佩，玉影乱如水。

行春处，一笑人间紫翠。纷纷窥此天地。寿如川至。□好是、涧翁兹岁喜。荣沾南儒恩例。捧觞更喜郎君美。任夜来归侍。见说生辰，恰逢本命，寿筵且未。听老聃孙子。祝公耆艾，祝公富贵。

锦堂春 寿李仁山

浅帻分秋，凉尊试月，西风未雁犹蝉。看芙蓉影里，绿鬓年年。日上云颿压海，尘清玉马行天。更烟楼凤举，风幙麟游，锦后珠前。

绿阴池馆如画，记晴春药径，雨晓芝田。已办十年笑语，小聚云边。舞称香围艳雪，歌迟酒落红船。早群仙醉去，柳掖花扶，似雾非烟。

念奴娇

欲霜更雨 ,记青云篱落 ,东风前此。帘外
客秋人共老 ,雁与愁飞千里。水郭烟明 ,竹陂
波小 ,万叶寒声起。凭高那更 ,九嶷吹尽云气。

婉娩空复多情 ,年年晋梦 ,花与柴桑是。
谁解意消风日晚 ,短笛孤舟林水。江蟹笼新 ,
露萸斟浅 ,浇得乡关思。平芜天远 ,一痕黄抹
秋霁。

疏影

蓂腾晓被 ,听堕冰屋角 ,晴哢仍未。土湿
烟生 ,庭掩寒青 ,障泥懒为春试。东风旧与花
飞去 ,料记得、年年沙际。忍落梅、万点苔根 ,
化作一窗离思。

犹忆薰红稚绿 ,断桥雪未扫 ,天近春易。
老对荒寒 ,事旧人新 ,雁后不成情味。人间解
有花如海 ,待一片、不教随水。但玉香、酥影玲
珑 ,逐日暖红云里。

醉太平 送人入湘

寒窗月晴。寒梢露明。一痕归影灯青。
又分携短亭。

蘅皋佩云。蒸溪酒春。有谁勤说归程。
是峰头雁声。

王 雱

倦寻芳慢 中吕宫

露晞向晚，帘幕风轻，小院闲昼。翠径莺来，惊下乱红铺绣。倚危墙，登高榭，海棠经雨胭脂透。算韶华，又因循过了，清明时候。

倦游燕、风光满目，好景良辰，谁共携手。恨被榆钱，买断两眉长斗。忆高阳，人散后。落花流水仍依旧。这情怀，对东风、尽成消瘦。

王彭年

人才七泽盛三湘。前辈敢追望。惭愧史君劝驾，杯前重赐篇章。

雷风断送，鱼龙变化，云路蜚骧。德意如何报称，短歌莫写毫芒。

王 平 子

谒金门 春恨

书一纸。小研吴笺香细。读到别来心下事。蹙残眉上翠。

怕落旁人眼底。握向抹胸儿里。针线不忺收拾起。和衣和闷睡。

王齐愈

菩萨蛮 戏成六首

一

玉肌香衬冰丝縠。縠丝冰衬香肌玉。纤
指拂眉尖。尖眉拂指纤。

巧裁罗袜小。小袜罗裁巧。移步看尘飞。
飞尘看步移。

二

吼雷催雨飞沙走。走沙飞雨催雷吼。波
涨泻倾河。河倾泻涨波。

幌纱凉气爽。爽气凉纱幌。幽梦觉仙游。
游仙觉梦幽。

三

兽喷香缕飞长昼。昼长飞缕香喷兽。迎
日喜葵倾。倾葵喜日迎。

卷帘双舞燕。燕舞双帘卷。清簟枕钗横。
横钗枕簟清。

四

远香风递莲湖满。满湖莲递风香远。光

鉴试新妆。妆新试鉴光。

棹穿花处好。好处花穿棹。明月咏歌清。
清歌咏月明。

五

酒中愁说人留久。久留人说愁中酒。归
梦要迟迟。迟迟要梦归。

旧衣香染袖。袖染香衣旧。封短托飞鸿。
鸿飞托短封。

六

老人愁叹惊年早。早年惊叹愁人老。霜
点鬓苍苍。苍苍鬓点霜。

酒杯停欲久。久欲停杯酒。杯酒唤眉开。
开眉唤酒杯。

又 初夏

暑烦人困初时午。午时初困人烦暑。新
诗得酒因。因酒得诗新。

缕金歌眉举。举眉歌金缕。人妒月圆频。
频圆月妒人。

虞美人 寄情

黄金柳嫩摇丝软。永日堂堂掩。卷帘飞
燕未归来。客去醉眠敲枕、殢残杯。

眉山浅拂青螺黛。整整垂双带。水沈香
熨窄衫轻。莹玉碧溪春溜、眼波横。

王齐叟

望江南

居下位，常恐被人谗。只是曾填青玉案，
何曾敢作望江南。请问马都监。

失调名

蹙绣圈金，槃囊密约，未赴意先警。欲
罢还休，临行又怯，倚定画栏凝等。帘风渐
冷。先自虑、春宵不永。更那堪、斗转星移，
尚在有无之境。

绿云满压螭蛴领。惭愧也、满怀香拥。
此际有谁知证。但楼前明月，窗间花影。

王 琪

定风波

把酒花前欲问天。春来秋去苦茫然。风
雨满枝花满地。何事。却教纤草占流年。

试把钿筝重促柱。无绪。酒阑清泪滴朱
弦。赖有玉人相顾好。轻笑。却疑春色在婵
娟。

祝英台

可堪妒柳羞花，下床都懒，便瘦也教春
知道。

望江南柳

江南柳，烟穗拂人轻。愁黛空长描不似，
舞腰虽瘦学难成。天意与风情。

攀折处，离恨几时平。已纵柔条萦客棹，
更飞狂絮扑旗亭。三月乱莺声。

二

江南酒，何处味偏浓。醉卧春风深巷里，

晓寻香旆小桥东。竹叶满金钟。

檀板醉，人面粉生红。青杏黄梅朱阁上，
鲙鱼苦笋玉盘中。酩酊任愁攻。

三

江南燕，轻扬绣帘风。二月池塘新社过，
六朝宫殿旧巢空。颀颀恣西东。

王谢宅，曾入绮堂中。烟径掠花飞远远，
晓窗惊梦语匆匆。偏占杏园红。

四

江南竹，清润绝纤埃。深径欲留双凤宿，
后庭偏映小桃开。风月影徘徊。

寒玉瘦，霜霰信相催。粉泪空流妆点在，
羊车曾傍翠枝来。龙笛莫轻裁。

五

江南草，如种复如描。深映落花莺舌乱，
绿迷南浦客魂销。日日斗青袍。

风欲转，柔态不胜娇。远翠天涯经夜雨，
冷痕沙上带昏潮。谁梦与兰苕。

六 江景

江南雨，风送满长川。碧瓦烟昏沈柳岸，
红绡香润入梅天。飘洒正潇然。

朝与暮，长在楚峰前。寒夜愁敲金带枕，
暮江深闭木兰船。烟浪远相连。

七

江南水，江路转平沙。雨霁高烟收素练，
风晴细浪吐寒花。迢递送星槎。

名利客，飘泊未还家。西塞山前渔唱远，

洞庭波上雁行斜。征棹宿天涯。

八 江乡

江南岸，云树半晴阴。帆去帆来天亦老，
潮生潮落日还沈。南北别离心。

兴废事，千古一沾襟。山下孤烟渔市晓，
柳边疏雨酒家深。行客莫登临。

九

江南月，清夜满西楼。云落开时冰吐鉴，
浪花深处玉沈钩。圆缺几时休。

星汉迥，风露入新秋。丹桂不知摇落恨，
素娥应信别离愁。天上共悠悠。

十

江南雪，轻素剪云端。琼树忽惊春意早，
梅花偏觉晓香寒。冷影漉清欢。

蟾玉迥，清夜好重看。谢女联诗衾翠幕，
子猷乘兴泛平澜。空惜舞英残。

失调名

金斗熨秋江。

斗百花 江行

一叶扁舟前去。经过乱峰无数。渔村返
照斜阳，鸟道高悬疏雨。危坐中流，堆起雪
浪如山，尽被橛头冲破，胸次廓千古。

雁阵惊寒，乱落平沙深处。投至十里芦

全宋词 王 琪

花，暂时修羽。低问篙师，萧萧江上何声，
风触两边红树。

王千秋

千秋字锡老，东平人。有审斋词一卷。

贺新郎 石城吊古

吊古城头去。正高秋、霜晴木落，路通州渚。欲问紫髯分鼎事，只有荒祠烟树。巫覡去、久无箫鼓。霸业荒凉遗堞坠，但苍崖、日阅征帆渡。兴与废，几今古。

夕阳细草空凝伫。试追思、当时子敬，用心良误。要约刘郎铜雀醉，底事遽争荆楚。遂但见、吴蜀烽举。致使五官伸脚睡，唤诸儿、昼取长陵土。遗此恨，欲谁语。

沁园春 晁共道侍郎生日

豆蔻娇春，烟花羞暖，物华渐嘉。也不须莺怨，桃封绛萼，也不须蜂恨，兰郁金芽。料是东君，都将和气，分付清丰诗礼家。充闾庆，有青毡事业，丹凤才华。乘槎。早上云霞。侍祠甘泉瞻羽车。试笑凭熊轼，嘉禾合穗，进思鱼钥，菡萏骈花。萧寇勋名，龚黄模样，入拜行趋堤上沙。今宵里，且觥船满棹，醉帽欹斜。

风流子

夜久烛花暗,仙翁醉、丰颊缕红霞。正三行钿袖,一声金缕,卷茵停舞,侧火分茶。笑盈盈,溅汤温翠碗,折印启缃纱。玉笋缓摇,云头初起,竹龙停战,雨脚微斜。

清风生两腋,尘埃尽,留白雪、长黄芽。解使芝眉长秀,潘鬓休华。想竹宫异日,袞衣寒夜,小团分赐,新样金花。还记玉麟春色,曾在仙家。

醉蓬莱 送汤

正歌尘惊夜,斗乳回甘,暂醒还醉。再煮银瓶,试长松风味。玉手磨香,镂金檀舞,在寿星光里。翠袖微揎,冰瓷对捧,神仙标致。

记得拈时,吉祥曾许,一饮须教,百年千岁。况有阴功在,遍江东桃李。紫府春长,凤池天近,看提携云耳。积善堂前,年年笑语,玉簪珠履。

西江月

心事几多白发,客情无数青山。廉纤细雨褪馀寒。正是花期酒限。

一自〔瓶〕饼簪信杳,空留钿带香残。我今多病寄江干。瘦似东阳也惯。

又

老去频惊节物,乱来依旧江山。清明雨过

杏花寒。红紫芳菲何限。

春病无人消遣，芳心有酒摧残。此情拍手问阑干。为甚多愁我惯。

南歌子 寿广文

鹊起惊红雨，潮生涨碧澜。水晶城馆月方圆。谁唤骑鲸仙伯、下三山。笔势翔鸾媚，词锋射斗寒。向来文价重贤关。便合批风支月、紫薇间。

虞美人 寄李公定

流苏斗帐泥金额。我亦花前客。谪仙标韵胜琼枝。一咏一觴、常是得追随。自从风借云帆便。冷落青楼宴。石桥风月也应猜。过尽中秋、不见晚归来。

念奴娇 荷叶浦雪中作

扁舟东下，正岁华将晚，江湖清艳。万点寒鸦高下舞，凝住一天云叶。映筱渔村，衡茅酒舍，浙沥鸣飞雪。壮怀兴感，悔将钗凤轻别。

遥望杰阁层楼，明眸秾艳，许把同心结。东吠西倾浑未定，终恐前盟虚设。爇兽炉温，分霞酒满，此夕欢应狎。多情言语，又还知共谁说。

青玉案 送人赴黄冈令

雪堂不远临皋路。怅仙伯、骑鲸去。燕麦桃花更几度。横桥虽在，种松无有，谁是关心处。

解鞍君到冬虽暮。传语无忘晒蓑句。起手栽花花定许。艺香披翠，灌红疏绿，趁取清明雨。

水调歌头

迟日江山好，老去倦遨游。好天良夜，自恨无地可销忧。岂意绮窗朱户，深锁双双玉树，桃扇避风流。未暇泛沧海，直欲老温柔。

解檀槽，敲玉钏，泛清讴。画楼十二，梁尘惊坠彩云留。座上骑鲸仙友，笑我胸中磊砢，取酒为浇愁。一举千觞尽，来日判扶头。

减字木兰花

阴檐雪在。小雨廉纤寒又噉。莫上危楼。楼迥空低雁更愁。

一杯浊酒。万事世间无不有。待早归田。欲买田无使鬼钱。

风流子

同云垂六幕，啼乌静、风御玉妃寒。渐声

入钓蓑 ,色侵书幌 ,似花如絮 结阵成团。倦游
客 ,一番诗思苦 ,无算酒肠宽。黄竹调悲 ,绮衾
人马岂堪梅蕊 ,索笑巡檐。

一杯知谁劝 ,空搔首、还是忆旧青毡。问
素娥早晚 ,光射江干。待醉披鹤氅 ,高吟冰柱 ,
剡溪何妨 ,乘兴空还。只恐橹声咿轧 ,栖鸟难
安。

忆秦娥

云破碧。作霜天气西风急。西风急。一
行征雁 ,数声横笛。

挑灯试问今何夕。柔肠底事愁如织。愁
如织。紫苔庭院 ,悄无人迹。

又

云叶舞。寒林浅淡围烟雨。围烟雨。三
三两两 ,雁投沙渚。

征帆暂落知何所。短篷静听舟人语。舟
人语。夜寒如许 ,客能眠否。

清平乐

吹花何处。桃叶江头路。碧锦障泥冲暮
雨。一霎峭寒如许。

归来索酒浇春。潮红秋水增明。却自不
禁春恼 ,佯人低度歌声。

贺新郎

短艇横烟渚。梦惊回、凄凉尚记 ,绿蓑鸣

雨。拍塞愁怀人不解，只有黄鹂能语。复拟待、乘槎重去。无奈东君刚留客，张碧油、缓按香红舞。生怕我，顿遐举。

故溪冉冉春光度。想晚来、杨花云际，白苹无数。竹里樵青应是怪，目断鸣榔去路。料为我、羞烦鳞羽。好趁小蛮针线在，按纶巾、归唤松江渡。重系缆，醉眠处。

好事近 和李清宇

六幕冻云凝，谁剪玉花为雪。寒入竹窗茅舍，听琴弦声绝。

从他拂面去寻梅，香吐是时节。归晚楚天不夜，抹墙腰横日。

又

明日发骊驹，共起为传杯绿。十岁女儿娇小，倚琵琶翻曲。

绝怜啄木欲飞时，弦响颤鸣玉。虽是未知离恨，亦晴峰微蹙。

虞美人

琵琶弦畔春风面。曾向尊前见。彩云初散燕空楼。萧寺相逢各认、两眉愁。旧时曲谱曾翻否。好在曹纲手。老来心绪怯么弦。出塞移船莫遣、到愁边。

水调歌头 九日

壮日遇重九，跃马□欢游。如今何事多

全宋词 王千秋

感 双鬓不禁秋。目断五陵台路 ,无复临高千
骑 鼓吹簇轻裘。霜露下南国 ,淮汉绕神州。

钓松鲈 斟郢酒 听吴讴。壮心铄尽 ,今夕
重见紫茱羞。月落笳鸣沙碛 ,烽静人耕榆塞 ,
此志恐悠悠。拟欲堕清泪 ,生怕菊花愁。

菩萨蛮 茶蘼

流莺不许青春住。催得春归花亦去。何
物慰侬怀。茶蘼最后开。

青衫冰雪面。细雨斜桥见。莫浪送香来。
等闲蜂蝶猜。

蓦山溪 海棠

清明池馆。侧卧帘初卷。还是海棠开 ,睡
未足、馀醒满面。低头不语 ,浑似怨东风 ,心始
吐 ,又惊飞 ,交现垂杨眼。

少陵情浅。花草题评遍。赋得恶因缘 ,没
一字、聊通缱绻。黄昏时候 ,凝伫怯春寒 ,笼翠
袖 ,减丰肌 ,脉脉情何限。

渔家傲 简张德共

黄栗留鸣春已暮。西园无著清阴处。昨
日骤寒风又雨。花良苦。信缘吹落谁家去。

病起日长无意绪。等闲还与春相负。魏
紫姚黄无恙否。栽培取。开时我欲听金缕。

念奴娇 水仙

开花借水 ,信天姿高胜 ,都无俗格。玉陇娟娟黄点小 ,依约西湖清魄。绿带垂腰 ,碧簪簪髻 ,索句撩元白。西清微笑 ,为渠模写香色。

常记月底风前 ,水沈肌骨 ,瘦不禁怜惜。生怕因循纷委地 ,仙去难寻踪迹。缥槛深栽 ,彤帏密护 ,不肯轻抛释。等差休问 ,未容梅品悬隔。

生查子

枝垂云碧长 ,心展鹅黄嫩。无力倚阑时 ,扫尽漫山杏。

玲珑影结阴 ,蕴藉香成阵。谁为祝东风 ,更莫催花信。

又

花飞锦绣香 ,茗碾枪旗嫩。是处绿连云 ,又摘斑斑杏。

愁来苦酒肠 ,老去闲花阵。燕子不知人 ,尚说行云信。

又

莺声恰恰娇 ,草色纤纤嫩。诗鬓已惊霜 ,镜叶慵拈杏。

因何积恨山 ,著底攻愁阵。春事到荼蘼 ,还是无音信。

又

睡起髻云松 ,枕印香腮嫩。愁思到眉尖 ,

齿软尝新杏。

都无鱼雁书 ,又过莺花阵。宽尽缕金衣 ,
说与伊争信。

又

春江波面浑 ,春岸芦芽嫩。不见木兰舟 ,
羞带骀枝杏。

轻绡搵泪痕 ,急雨冲花阵。暗祷紫姑神 ,
觅个巴陵信。

又

雄姿画麒麟 ,朽骨分蝼蚁。争似及生前 ,
常为莺花醉。

云山静有情 ,天地宽无际。且放两眉开 ,
万事非人意。

又

功名竹上鱼 ,富贵槐根蚁。三万六千场 ,
排日扶头醉。

高怀隘世间 ,壮气横天际。常是惜春残 ,
不会东君意。

解佩令 木犀

花儿不大 ,叶儿不美。只一段、风流标致。
淡淡梳妆 ,已赛过、骚人兰芷。古龙涎、怎敢□
气。

开时无奈 ,风斜雨细。坏得来、零零碎碎。
著意收拾 ,安顿在、胆瓶儿里。且图教梦魂旖
旎。

清平乐

唤云且住。莫作龙池舞。五月人间须好雨。为扫无边烦暑。

畦秧针绿重生。壶天表里俱清。林外桔槔闲挂，省渠多少心情。

忆秦娥

阑干侧。当时我亦凝香客。而今老大，鬓苍头白。

扬州梦觉浑无迹。旧游英俊今南北。今南北。断鸿沈鲤，更无消息。

西江月

梦幻影泡有限，风花雪月无涯。莫分粗俗与精华。日醉石间松下。

菜尽邻家解与，杯空稚子能赊。通幽即步尽横斜。不问墩犹姓谢。

临江仙

者也之乎真太错，甘心吞棘吞蓬。有无俱尽见真空。炉锥难自荐，关捩只心通。

野鹤孤云元自在，刚论隐豹冥鸿。此身今在幻人宫。要将驴佛我，分付马牛风。

浣溪沙

殢玉偎香倚翠屏。当年常唤在凝春。岂知云雨散逡巡。

不止恨伊唯准拟 ,也先伤我太因循。而今头过总休论。

又

亲染柔毛擘彩笺。自怜探得恶因缘。一尊重许笑凭肩。

往事已同花屡褪 ,新欢闻似月常圆。休休休更苦萦牵。

瑞鹤仙

征鸿翻塞影。怅悲秋人老 ,浑无佳兴。鸣蛩问酒病。更堆积愁肠 ,摧残诗鬓。起寻芳径。菊羞人、依丛半隐。又岂知、虚度重阳 ,浪阔渺无归恨。

无定。登高人远 ,戏马台闲 ,怨歌谁听。香肩醉凭。镇常是、笑得醒。到如今何在 ,西风凝伫 ,冠也无人为正。看他门、对插茱萸 ,恨长怨永。

又 韩南涧生日

红消梅雨润。正榴花照眼 ,荷香成阵。炉薰炷芳烬。记于门今日 ,长庚占庆。文摛艳锦。笑班扬、用字未稳。果青云、快上黄扉 ,地□誉高英俊。

名盛。都期持橐 ,却借乘轺 ,布宣宽政。
除书已进。归宠异 ,侍严近。且金船满酌 ,云
翘低祝 ,□比椿龄更永。任月斜、未放笙歌 ,翠
桐转影。

满江红 和诸公赏心亭待月

楼压层城 ,斜阳敛、帆收南浦。最好是、长
江澄练 ,远山新雨。□□留连邀皓月 ,一堂高
敞祛隆暑。问从来、佳赏有谁同 ,应难数。

舟横渡 ,车阗路。催酒进 ,麾灯去。放姮
娥照座 ,不烦帘阻。已见天清无屏翳 ,更须潮
上喧阗鼓。看波光、撩乱上檣竿 ,龙蛇舞。

感皇恩

天气过烧灯 ,初闲人倦。晓色瞳胧绣帘
卷。聚星歌扇 ,一簇雪香琼软。寿杯争要把 ,
从他满。

低低笑祝 ,年龄遐远。息驾无由遂公愿。
东风吹喜 ,又做眉黄一点。便参鹓鹭入 ,常朝
殿。

青玉案

鸣鼙欲引鱼龙戏。先自作、长江擂。头管
一声天外起。群仙俱上 ,有人殊丽。认得分明
是。

欲相问劳来无计。但隔炉烟屡凝睇。掷

全宋词 王千秋

我胸前方寸纸。拥翹欲去。蟬蛾还住。不尽徘徊意。

醉落魄

惊鸥扑菼。萧萧卧听鸣幽屋。窗明怪得鸡啼速。墙角烂斑，一半露松绿。

歌楼管竹谁翻曲。丹唇冰面喷馀馥。遗珠满地无人掬。归著红靴，踏碎一街玉。

桃源忆故人

移灯背月穿金缕。合色鞋儿初做。却被阿谁将去。鸚鵡能言语。

朝来半作凌波步。可惜孤鸾□侣。若念玉纤辛苦。早与成双取。

水调歌头 赵可大生日

披锦泛江客，横槊赋诗人。气吞宇宙，当拥千骑静胡尘。何事折腰执版，久在泛莲幕府，深觉负平生。踉跄众人底，欲语复吞声。

庆垂弧，期赐杖，酒深倾。愿君大耐，碧眸丹颊百千龄。用即经纶天下，不用归谋三径，一笑友渊明。出处两俱得，鸛鷖亦鸚鵡。

鷓鴣天 圆子

翠杓银锅飧夜游。万灯初上月当楼。溶

溶琥珀流匙滑 ,璨璨螟珠著面浮。香入手 ,煖生瓯。依然京国旧风流。翠娥且放杯行缓 ,甘味虽浓欲少留。

又 蒸茧

比屋烧灯作好春。先须歌舞赛蚕神。便将簇上如霜样 ,来饷尊前似玉人。丝馅细 ,粉肌匀。从它犀箸破花纹。殷勤又作梅羹送 ,酒力消除笑语新。

浣溪沙 焦油

买市宣和预赏时。流苏垂盖宝灯围。小钲烹玉鼓声随。

金弹玲珑今夕是 ,鳌山缥缈昔游非。马行遗老想沾衣。

又 科斗

灯火阑珊欲晓时。夜游人倦总思归。更须冰蛹替捩丝。

玉篆古文光璨烂 ,花垂零露影参差。月寒烟淡最相宜。

好事近 寿黄仲符

人物又无双 ,馀事锦机闲织。□就两都新赋 ,笑一生联缉。

来年秋色起鹏程 ,一举上晴碧。须洗玉荷为寿 ,助穿杨飞的。

喜迁莺

春前腊尾。问谁会开解 ,幽人心里。映竹精神 ,凌风标致 ,姑射昔闻今是。试妆竞看吹面 ,寄驿胜传緘纸。迥潇洒 ,更香来林表 ,枝横溪底。

谁为。停征骑。评蕙品兰 ,俱恐非同里。天意深怜 ,花神偏巧 ,持为剪冰裁水。拟唤绿衣来舞 ,只许苍官相倚。醉眠稳 ,尽参横月落 ,留连行李。

又

玉龙垂尾。望阙角峒峒 ,如侵云里 ,明壁榱题 ,白银阶陛 ,平日世间无是。静久声鸣槛竹 ,夜半色侵窗纸。最奇处 ,尽巧妆枝上 ,低飞檐底。

当为 ,呼游骑。嗾犬擎苍 ,腰箭随邻里。藉草烹鲜 ,枯枝煎茗 ,点化玉花为水。未挹瑶台风露 ,且借琼林栖倚。眩银海 ,待斜披鹤氅 ,骑鲸寻李。

满庭芳 二色梅

蕊小雕琼 ,花明镕蜡 ,天交一旦俱芳。丰臞虽异 ,皆熨水沉香。应笑纷红堕紫 ,初未识、调粉涂黄。凭肩处 ,金钿玉珥 ,不数寿阳妆。

思量。谁比似 ,酥裁笋指 ,蜜剪蜂房。又何须酩酒 ,重暖瑶觞。且放侧堆金缕 ,骊山冷、来浴温汤。谁题品 ,青枝绿萼 ,俱未许升堂。

全宋词 王千秋

诉衷情 登雨华台

二分浓绿一分红。春事若为穷。醉袖罥香沾粉，公挽我、我扶公。

敲短帽，吐长虹。拟凌风。布金堆里，叠翠屏中，云月轻笼。

临江仙

柳巷莺啼春未晓，画堂环佩珊珊。薰炉烘暖鹧鸪斑。寿杯须斗酌，舞袖正弓弯。

未说珥貂横玉事。勋名且勒燕然。归来方卜五湖闲。年年花月夜，沈醉绮罗间。

浣溪沙 白纻衫子

叠雪裁霜越纻匀。美人亲剪称腰身。暑天宁数越罗春。

两臂轻笼燕玉膩，一胸斜露塞酥温。不教香汗湿歌尘。

西江月 小鹿鸣

四俊乡书荐鹗，一夔漕府登贤。明年春晚柳如烟。看取牖传金殿。

册府牙签昼阅，词垣紫诰宵传。青楼买酒定无缘。且放金杯潋滟。

醉落魄

能歌善谑。精神堆下人难学。疏帘清

虞美人 和姚伯和

风花南北知何据。常是将春负。海棠开尽野棠开。匹马崎岖、还入乱山来。尊前人物胜前度。谁记桃花句。老来情事不禁浓。玉佩行云、切莫易丁东。

又 代简督伯和借战国策

要津去去无由据。已分平生负。拟将怀抱向谁开。万水千山、聊为借书来。玄都昼永闲难度。欲正书中句。黄琮丹璧已磨浓。发篋烦君、早送过桥东。

谒金门 次李圣予月中韵

春漠漠。闲尽绮窗云幕。悔不车轮生四角。却成缘分薄。

想画鸦儿方学。小蹙恨人无托。不道月明谁共酌。这般情味恶。

又 诸公要予出郊

春漠漠。何处养花张幕。佩冷香残天一角。忍看罗袖薄。

两两鸳鸯难学。六六锦鳞空托。趁有馀妍须细酌。东风情性恶。

点绛唇 刘公宝生日

玉立霞升 ,纵谈刘尹高支许。待为霖雨。
小驻红莲府。

鹤健松坚 ,鸿宝初非误。玄都路。桃花栽
取。来看千千度。

又 春日

何处春来 ,试烦君向垂杨看。万条轻线。
已借鹅黄染。

弄日摇风 ,按舞知谁见。阳关远。一杯休
劝。且放修眉展。

又

何处春来 ,试烦君向梅梢看。寿阳妆面。
漏泄春何限。

冷蕊疏枝 ,似恨春犹浅。收羌管。莫惊香
散。留副□和愿。

又

何处春来 ,试烦君向钗头看。舞翻飞燕。
已拂春风面。

白玉圆细 ,酌酒殷勤劝。深深愿。愿长□
健。岁与春相见。

又

何处春来 ,试烦君向盘中看。韭黄犹短。
玉指呵寒翦犀箸调匀 ,更为双双卷。情何限。
怕寒须暖。先酌黄金盏。

水调歌头 席上呈梁次张

笔力卷鲸海 ,人物冠麟台。向来朱邱千字 ,不省有惊雷。人似曲江风韵 ,刚要重来持节 ,不道玉堂开。草诏坐扛鼎 ,琐屑扫尊罍。

金错落 ,貂掩映 ,玉崔嵬。看公谈笑、长河千里静氛埃。散马昼闲榆塞 ,辫发春趋瑶陛 ,都出济川才。老子尚顽健 ,东阁亦时来。

瑞鹤仙 张四益生日

夷吾在江左。罄毡裘俱誓 ,笑清边琐。遗民冀巾裹。个规模欲继 ,外人谁可。一花两果。晚占熊、材能更伙。试颁春、便有欢谣 ,声接月鞍烟柂。

駉娑。已传丹诏 ,催上文石 ,□论炙轂。橐弓□笥。□九域 ,措安妥。待緇衣重咏 ,履封光继 ,绿野从教昼锁。问黑头、当日三公 ,可能似我。

满江红

水满方塘 ,三日雨、晓来方足。阑干外、锦棚初脱 ,新篁森玉。沃叶未乾鸠妇去 ,馀花时坠蜂儿逐。认去年、乳燕又双双 ,飞华屋。

红豆恨 ,归谁促。青鸾梦 ,惊难续。想多情犹记 ,碧笺新曲。白发欺人虽已老 ,短襟搵黛存馀馥。且如今、一笑总休论 ,杯行速。

全宋词 王千秋

西江月

璀璨雕笼洒笔 联翩荐鹗飞书。翻阶红药
试妆梳。管取不言温树。

容我一杯为寿 看君九万鹏图。髻鬟人小
串珠玑。岁岁绿窗朱户。

王 清 观

太常引 题洞宾醉桃源像

邯郸梦里武陵溪。春色醉冥迷。花压帽檐敲，谩赢得、红尘满衣。

青蛇飞起，黄龙喝住，才是酒醒时。和露饮刀圭。待月满、长空鹤归。

王 清 惠

满江红

太液芙蓉，浑不似、旧时颜色。曾记得、
春风雨露，玉楼金阙。名播兰簪妃后里，
晕潮莲脸君王侧。忽一声、鼙鼓揭天来，
繁华歇。

龙虎散，风云灭。千古恨，凭谁说。
对山河百二，泪盈襟血。客馆夜惊尘土梦，
宫车晓碾关山月。问嫦娥、于我肯从容，
同圆缺。

王去疾

菩萨蛮 蠓矶

吴波深处波声急。阑干下瞰鱼龙宅。江北与江南。斜阳山外山。

十洲三岛地。梦里身曾至。今日醉危亭。神仙邀我盟。

王赏

眼儿媚

凌寒低亚出墙枝。孤瘦雪霜姿。岁华已晚，暗香幽艳，自与时违。化工放出江头路，沙水冷相宜。东风自此，别开红紫，是处芳菲。

王绍

菩萨蛮 侄寿伯

天正朔旦开新历。吾家伯父长生日。兰
玉傍庭阶。称觴特地来。

后年逢七十。今岁瞻南极。南极寿星宫。
分明矍铄翁。

王 诜

鹧鸪天

才子阴风度远关。清愁曾向画图看。山
衔斗柄三星没 ,雪共月明千里寒。

新路陌 ,旧江干。崎岖谁叹客程难。临风
更听昭华笛 ,簌簌梅花满地残。

花心动 蜡梅

春欲来时 ,看雪里、新梅品流珍绝。气韵
楚江 ,颜色中央 ,数朵巧熔香蜡。嫩苞珠泪圆
金烛 ,娇腮润、蜂房微缺。画栏悄 ,佳人道妆 ,
醉吟风月。

淡白轻红谩说。算何事、东君用心偏别。
赋与异姿 ,添与清香 ,堪向苦寒时节。但教开
后金尊满 ,休惆怅、落时歌阕。断肠也 ,繁枝为
谁赠折。

落梅花

寿阳妆晚 ,慵匀素脸 ,经宵醉痕堪惜。前
村雪里 ,几枝初绽 ,□冰姿仙格。忍被东风 ,乱

飘满地 ,残英堆积。 可堪江上起离愁 ,凭谁说
寄 ,肠断未归客。

流恨声传羌笛。 感行人、水亭山驿。 越溪
信阻 ,仙乡路杳 ,但风流尘迹。 香艳浓时 ,东君
吟赏 ,已成轻掷。 愿身长健 ,且凭阑 ,明年还放
春消息。

黄莺儿

多情春意忆时节。 北圃人来 ,传道江梅 ,
依稀芳姿 ,数枝新发。 夸嫩脸著胭脂 ,腻滑凝
香雪。 问伊还记年时 ,正好相看 ,因甚轻别。

情切。 往事散浮云 ,旧恨成华发。 算知空
对 ,绮槛雕栏 ,孜孜望人攀折。 愁未见苦思量 ,
待见重端叠。 愿与永仿高堂 ,云雨芳菲月。

踏青游

金勒狝鞍 ,西城嫩寒春晓。 路渐入、垂杨
芳草。 过平堤 ,穿绿径 ,几声啼鸟。 是处里 ,谁
家杏花临水 ,依约靓妆窥照。

极目高原 ,东风露桃烟岛。 望十里、红围
绿绕。 更相将、乘酒兴 ,幽情多少。 待向晚、从
头记将归去 ,说与凤楼人道。

忆故人

烛影摇红向夜阑 ,乍酒醒、心情懒。 尊前
谁为唱阳关 ,离恨天涯远。

全宋词 王 诜

无奈云沈雨散。凭阑干、东风泪眼。海棠开后，燕子来时，黄昏庭院。

行香子

金井先秋，梧叶飘黄。几回惊觉梦初长。雨微烟淡。疏雨池塘。渐蓼花明，菱花冷，藕花凉。

幽人已惯，枕单衾冷，任商飚、催换年光。问谁相伴，终日清狂。有竹间风，尊中酒，水边床。

蝶恋花

钟送黄昏鸡报晓。昏晓相催，世事何时了。万恨千愁人自老。春来依旧生芳草。

忙处人多闲处少。闲处光阴，几个人知道。独上高楼云渺渺。天涯一点青山小。

玉楼春 海棠

锦城春色花无数。排比笙歌留客住。轻寒轻暖夹衣天，乍雨乍晴寒食路。花虽不语莺能语。莫放韶光容易去。海棠开后月明前，纵有千金无买处。

花发沁园春

帝里春归，早先妆点，皇家池馆园林。雏

莺未迁 ,燕子乍归 ,时节戏弄晴阴。琼楼珠阁 ,
恰正在、柳曲花心。翠袖艳、衣凭阑干 ,惯闻弦
管新音。

此际相携宴赏 ,纵行乐随处 ,芳树遥岑。
桃腮杏脸 ,嫩英万叶 ,千枝绿浅红深。轻风终日 ,
泛暗香、长满衣襟。洞户醉 ,归访笙歌 ,晚
来云海沈沈。

人月圆 元夜

小桃枝上春来早 ,初试薄罗衣。年年此
夜 ,华灯盛照 ,人月圆时。

禁街箫鼓 ,寒轻夜永 ,纤手同携。更阑人
静。千门笑语 ,声在帘帏。

换遍歌头

雪霁轻尘敛 ,好风初报柳。春寒浅、当三
五。是处鳌山耸 ,金鞮宝乘 ,游赏遍蓬壶。向
黄昏时候。对双龙阙门前 ,皓月华灯射 ,变清
昼。

彩凤低衔天语。承宣诏传呼。飞上层霄 ,
共陪霞觞频举。更渐阑 ,正回路。遥拥车佩珊
珊 ,笼纱满香衢。指凤楼、相将醉归去。

失调名

合彩丝、对缠玉腕。

又

偷闲结个艾虎儿 ,要插在、秋蝉鬓畔。

又 九日

带了黄花 ,强饮茱萸酒。

画堂春令

画堂霜重晓寒消 ,南枝红雪妆成。卷帘疑是弄妆人。粉面带着醒。

最爱北江临岸 ,含娇浅淡精神。微风不动水纹平。倒影斗轻盈。

撼庭竹

绰略青梅弄春色。真艳态堪惜。经年费尽东君力。有情先到探春客。无语泣寒香 ,时暗度瑶席。

月下风前空怅望 ,思携手同摘。画栏倚遍无消息。佳辰乐事再难得。还是夕阳天 ,空暮云凝碧。

蝶恋花

小雨初晴回晚照。金翠楼台 ,倒影芙蓉沼。杨柳垂垂风袅袅。嫩荷无数青钿小。

似此园林无限好。流落归来 ,到了心情少。坐到黄昏人悄悄。更应添得朱颜老。

王 师 锡

如梦令

竹上一楼岚翠。竹下一渠春水。中有隐
人居，破屋数间而已。无事。无事。静夜月
明千里。

王十朋

二郎神

深深院。夜雨过，帘栊高卷。正满槛、海棠开欲半。仍朵朵、红深红浅。遥认三千宫女面。匀点点、胭脂未遍。更微带、春醪宿醉，袅娜香肌娇艳。

日暖。芳心暗吐，含羞轻颤。笑繁杏夭桃争烂漫。爱容易、出墙临岸。子美当年游蜀苑。又岂是、无心眷恋。都只为、天然体态，难把诗工裁剪。

点绛唇 酴醾

野态芳姿，枝头占得春长久。怕钩衣袖。不放攀花手。

试问东山，花似当时否。还依旧。谪仙去后。风月今谁有。

又 咏十八香异香牡丹

庭院深深，异香一片来天上。傲春迟放。百卉皆推让。

忆昔西都，姚魏声名旺。堪惆怅。醉翁何

往。谁与花标榜。

又 温香芍药

近侍盈盈 ,向人自笑还无语。牡丹飘雨。
开作群芳主。

柔美温香 ,剪染劳天女。青春去。花间歌
舞。学个狂韩愈。

又 国香兰

芳友依依 ,结根遥向深林外。国香风递。
始见殊萧艾。

雅操幽姿 ,不怕无人采。堪纫佩。灵均千
载。九畹遗芳在。

又 天香桂

仙友苍苍 ,西风吹散天香好。暗飘龙脑。
金粟枝头小。

谁种丹霄 ,造化玄功妙。真堪笑。学仙疏
谬。有似西河老。

又 暗香梅

雪径深深 ,北枝贪睡南枝醒。暗香疏影。
孤压群芳顶。

玉艳冰姿 ,妆点园林景。凭阑咏。月明溪
静。忆昔林和靖。

又 冷香菊

霜蕊鲜鲜 ,野人开径新栽植。冷香佳色。
趁得重阳摘。

预约比邻 ,有酒须相觅。东篱侧。为花辞
职。古有陶彭泽。

又 韵香荼蘼

羽盖垂垂 ,玉英乱簇春光满。韵香清远。
暖日烘庭院。

露浥琼枝 ,脸透何郎晕。凝余恨。古人不
见。谁与花公论。

又 妙香簪卜

毗舍遥遥 ,异香一炷驰名久。妙香稀有。
鼻观深参透。

问讯东来 ,知□谁先后。称仙友。十花为
偶。近有江西守。

又 雪香梨

春色融融 ,东风吹散花千树。雪香飘处。
寒食江村暮。

左掖看花 ,多少词人赋。花无语。一枝春
雨。惟有香山句。

又 细香竹

秀色娟娟 ,最宜雨沐风梳际。径幽香细。
草滴青襟袂。

一日才无 ,便觉生尘态。轩窗外。数竿相
对。不减王猷爱。

又 嘉香海棠

丝蕊垂垂 ,嫣然一笑新妆就。锦亭前后。
燕子来时候。

谁恨无香 ,试把花枝嗅。风微透。细熏锦
袖。不止嘉州有。

又 清香莲

十里西湖 ,淡妆浓抹如西子。藕花簪水。

清净香无比。

记得曾游 ,短棹红云里。聊相拟。一盆池水。十里西湖似。

又 艳香茉莉

畏日炎炎 ,梵香一炷薰亭院。鼻根充满。好利心殊浅。

贝叶书名 ,名义谁能辨。西风远。胜鬘不见。喜见琼花面。

又 南香含笑

南国名花 ,向人无语长含笑。缘香囊小。不肯全开了。

花笑何人 ,鹤相诗词好。须知道。一经品藻。又压前诗倒。

又 奇香蜡梅

蜡换梅姿 ,天然香韵初非俗。蝶驰蜂逐。蜜在花梢熟。

岩壑深藏 ,几载甘幽独。因坡谷。一标题目。高价掀兰菊。

又 寒香水仙

清夜沈沈 ,携来深院柔枝小。俪兰开巧。雪里乘风袅。

温室寒祛 ,旖旎仙姿早。看成好。花仙欢笑。不管年华老。

又 素香丁香

落木萧萧 ,琉璃叶下琼葩吐。素香柔树。雅称幽人趣。

无意争先 ,梅蕊休相妒。含春雨。结愁千

绪。似忆江南主。

又 瑞香

阑槛阴沈 ,紫云呈瑞余寒凛。卷帘敲枕。
香逼幽人寝。

入梦何年 ,庐阜闻名稔。风流甚。阿谁题
品。唤作熏笼锦。

南州春色

清溪曲 ,一株梅。无修采 ,独立古墙隈。
莫恨东风吹不到 ,著意挽春回。一任天寒地
冻 ,南枝香动 ,花傍一阳开。

更待明年首夏 ,酸心结子 ,天自栽培。金
鼎调羹 ,仁心犹在 ,还种取、无限根荑。管取南
州春色 ,都自此中来。

王识

水调歌头 观星

一雨洗空阁 ,象纬迫人清。披襟台上 ,坐看北斗正旋衡。知是南宫列宿 ,初出极星未远 ,龙角正分明。河汉余千里 ,风露已三更。

坐未久 ,书帙散 ,酒壶倾。凉生殿阁、泠然邀我御风行。拟欲乘槎一问 ,但得天孙领略 ,安用访君平。莫笑儒生事 ,造化掌中生。

王 氏

菩萨蛮 西湖曲

横湖十顷琉璃碧。画桥百步通南北。沙
暖睡鸳鸯。春风花草香。

闲来撑小艇。划破楼台影。四面望青山。
浑如蓬莱间。

王氏

望江南

公孙恨，端木笔俱收。枉念歌馆经数载，
寻思徒记万余秋。拓拔泪交流。村仆固，闷独
驾孤舟。不望手勾龙虎榜，慕容颜老一齐休。
甘分守闾丘。

南柯子

鹊喜噪晨树，灯开半夜花。果然音信到天
涯。报道玉郎登第、出京华。旧恨消眉黛，新
欢上脸霞。从前都是误疑他。将谓经年狂荡、
不归家。

王氏

秋波媚

流水东回忆故秋。疏雨滴更愁。雁来楚峡，风凄江渚，瘦损轻柔。

娇姿绝世偏风韵，斜倚向妆楼。慵窥宝镜，泪悬情眼，恨锁眉头。

王庭圭

谒金门 梅

溪风紧。溪上官梅整整。万木寒痴吹不醒。一枝先破冷。

梦断香云耿耿。月淡梨花清影。长笛倚楼谁共听。调高成绝品。

凤栖梧 王克恭生日

琼海无边银浪卷。画戟朱楼，缥缈云间见。当日使君曾拥传。海霞光里时开宴。

翠辇红鳞吹酒面。莫谓今朝，人在天涯远。彩凤衔书应不晚。愿公难老身长健。

醉桃源

朱门映柳画帘垂。门前闻马嘶。主人新著绿袍归。天恩下玉墀。

凭翠袖，捻花枝。劝教人醉时。请君听唱碧云词。倒倾金屈卮。

临江仙

家住天门阊阖外，别来几度花开。近传消息到江淮。玉京知好在，金阙尚崔嵬。

流落江南山尽处。雨余苍翠成堆。暂同溪馆醉尊罍。恐随丹诏动，且任玉山颓。

又 梅

问道春来相识否，岭头昨夜开花。水村烟坞寄生涯。月寒疏影淡，整整复斜斜。

素面玉妃嫌粉污，晨妆洗尽铅华。香肌应只饭胡麻。年年如许瘦，知是阿谁家。

又

寂寞久无红袖饮，忽逢皓齿轻讴。坐令孤客洗穷愁。谁知沅水上，却似洛城游。

闻道辰溪贤令长，深房别锁明眸。多年铅鼎养青虬。不应携妓女，骑鹤上扬州。

又

帘外东风吹断梦，卷帘人探春还。一枝疏影动檐间。鸳鸯□瓦冷，霜月堕栏干。

闻道寿阳如许好，晨妆洗尽微殷。可怜玉骨瘦孱孱。谁家长笛□，吹彻玉楼寒。

殢人娇

小院桃花，烟锁几重珠箔。更深后、海棠睡著。东风吹去，落谁家墙角。平白地教人，为他情恶。

全宋词 王庭圭

花若有情，情应不薄。也须悔从前事错。
而今夜雨，念玉颜飘泊。知那里人家，怎生
顿著。

忆秦娥

梅花发。夜寒吹笛千山月，千山月。此
时愁听，龙吟幽噎。

数枝飞尽南枝雪。风光又作年时别。年
时别。江头心绪，乱丝千结。

念奴娇 上元

少年时节，见皇州灯火，衣冠朝市。天
汉桥边瞻凤辇，帘幕千家垂地。人似神仙，
身游佛国，谪堕红尘里。如今憔悴，渐无往
岁欢味。

此夜帝里喧传，太平祥瑞，有街头人醉。
更值端门新又起，楼阙千兵严卫。朝野多欢，
边庭初静，歌舞方腾沸。良宵好景，异时多
少遗事。

点绛唇

花外红楼，当时青鬓颜如玉。淡烟残烛。
醉入花间宿。

白发相逢，犹唱当时曲。当时曲。断弦
难续。且尽杯中醪。

又

上元鼓子词并口号

全宋词 王庭圭

铁锁星桥，已彻通宵之禁；银鞍金勒，共追良夜之游。况逢千载一时，如在十洲三岛。有劳诸子，慢动三挝。对此芳辰，先呈口号。

万家帘幕卷青烟。火炬银花耀碧天。留得江南春不夜，为传新唱落尊前。

玉漏春迟，铁关金锁星桥夜。暗尘随马。明月应无价。

天半朱楼，银汉星光射。更深也。翠娥如画。犹在凉蟾下。

又

春入西园，数重花外红楼起。倚阑金翠。人在非烟里。

风月佳时，蓬岛开平地。笙歌沸。画桥灯市。一夜惊桃李。

西江月

一拂退黄衫子，几团嗅蕊蜂儿。西风吹下月中枝。种在寒岩影里。

人道蜡梅相似，又传菊满东篱。饶伊颜色入时宜。安得香传九里。

江城子

吴贡道班师置酒

锦袍绣帽跃金鞍。卷旗幡。整师还。轻骑穷追，湘尾鼓声寒。千里尘清高会处，张翠幕，万人看。

藕丝衫袖捧雕盘。玉〔頰〕夜将阑。幸遇休兵，且尽玉壶宽。未用汉军频出塞，徒

生事，斩楼兰。

又 步月新桥呈任子严

渡头犹唱棹歌声。雨初晴。月初生。忽见飞虹，天矫挂寒汀。两岸小儿齐拍手，今夜里，放人行。

朱栏画鹢照江亭。客来登。眼初明，如泛银河，天上跨长鲸。君是济川舟楫手，将许事，笑谈成。

又 辰川上元

夜郎江上看元宵。斗回杓。雪初消。灯火银花，何处是星桥。哄得满城春不夜，三妓女，五溪谣。

此时回首忆行朝。太平楼。倚层霄。红蜡光中，买酒听吹箫。且就天涯聊一醉，歌一曲，望京谣。

又 再和呈马守

天回北斗欲中宵。屡移杓。客魂消。记得皇州，灯火虹成桥。异俗西南开万里，冠带尽，百蛮谣。

卢溪太守未还朝。起朱楼。接丛霄。翠幕红妆，歌管玉为箫。民乐丰登无一事，看下诏，采风谣。

又

楼头钟鼓变新声。晚霞晴。水云生。何处归帆，争泊蓼花汀。遥望虹桥如画里，鳌背上，著人行。

夜阑风定见危亭。却重登。景方明。影落波心，疑是海中鲸。愿借吸川沧海量，为

公寿，落桥成。

蝶恋花

月落灯残人散后。忽到尊前，但觉眉儿皱。数日不来如许瘦。裙腰减尽君知否。

公子风流应自有。占断春光，肯落谁人手。已是许多时做就。重教舞彻双罗袖。

又

罨画楼中人已醉。别院微闻，笑语帘垂地。催唤倾城香雾起。翠帷双卷春风里。

妆样尖新歌妙丽，满酌金尊，不信人憔悴。饥客眼寒谁管你。主人见惯浑闲事。

又 赠丁爽、丁旦及第

桂树新生都几许。兄弟骑龙，双入蟾宫去。一日两枝同折处。姮娥拍手都分与。

杨柳江头春色暮。白马青衫，两郡文章主。只恐远方难久住。高宗梦觉思霖雨。

满庭芳

颓玉成山，倾江作酒，醉来莫问升沈。少年狂怪，应笑老婆心。也会东涂西抹，行穿过、柳陌花阴。诚何用，腰龟左顾，犹待铸黄金。

如今。回首处，青楼缥缈，朱箔重深。叹江海飘零，离恨难禁。好在铜梁玉垒将车骑、他日重临。归来看，文君未老，相对抚

鸣琴。

又 戊辰上元黄子余席上，时未有月

宿雨初收，晚风微度，万家帘卷青烟。
暗尘随马，人物似神仙。试问天公借月，天
须放、明月教圆。应移下，广寒宫殿，灯火
接星躔。

卢川。元古郡，当时太守，宾从俱贤。
到如今井邑，歌吹喧阗。花下红妆卖酒，时
相遇、曲水桥边。谁知道，山城父老，重见
中兴年。

又 梅

东阁官梅，玉栏朱槛，未如山馆疏篱。
水边竹外，斜出两三枝。最好西湖月下，林
处士、著意吟时。何须说，扬州旧日，何逊
更能诗。

谁知，深雪里，玉妃粲粲，初下瑶池。
笑人间春色，只在桃蹊。紫燕黄鹂解语，来
时但、青实离离。争知道，调羹附鼎，终得
近丹墀。

柳梢青 和张元晖清明

兰亭丝竹。高会群贤，其人如玉。曲水
流觞，灯前细雨，檐花蔌蔌。

舞雩初试春衣，听咏歌、童子五六、泽
畔行吟，沙汀拾翠，满江新绿。

菩萨蛮

绍兴十九年，谪夜郎。州学诸职事，邀就孔

全宋词 王庭圭

志行家圃宴集。时初至贬所，见人物风景之美，夜久方归，恍然莫知为何所。酒醒，作此词以记之

武陵西上沅陵渡。扁舟忘了来时路。花外有人烟。相逢疑是仙。

清尊留夜语。醉倒知何处。归去客心惊。金鸡嘲晰鸣。

浣溪沙

薄薄春衫簇绮霞。画檐晨起见栖鸦。宿妆仍拾落梅花。

回首高楼闻笑语，倚栏红袖卷轻纱。玉肌微减旧时些。

又 次韵向芑林

九里香风动地来。寻香空绕百千回。错惊秋色上崔嵬。

谁识芑林三昧手，能令花落又花开。返魂元学岭头梅。

虞美人 辰州上元

城东楼阁连云起。冠绝辰州市。莲灯初发万枝红。也似江南风景、半天中。

花衢柳陌年时静。划地今年盛。棚前箫鼓闹如雷。添个辰溪女子、舞三台。

桃源忆故人 辰州泛舟送郭景文、周子康赴行在

催花一霎清明雨。留得东风且住。两岸

柳汀烟坞。未放行人去。

人如双鹄云间举。明夜扁舟何处。只向武陵南渡。便是长安路。

醉花阴

红尘紫陌春来早。晚市烟光好。灯发万枝莲，华月光中，天净开蓬岛。

老人旧日曾年少。年少还须老。今夕在天涯，烛影星桥，也似长安道。

又 梅并鼓子词

人在花阴醉未归。玉楼丝管咽春辉。请君暂听花阴曲，为惜梅花笛里吹。

玉妃谪堕烟村远。犹似瑶池见。缺月挂寒梢，时有幽香，飞到朱帘畔。春风岭上淮南岸。曾为谁魂断。依旧瘦棱棱，天若有情，天也应须管。

又

月娥昨夜江头过。把素衫揉破。冷逐晓云归，留与东风，吹作千千朵。云残香瘦春犹可。玉笛愁无那。倚著画楼人，且莫教他，吹动些几个。

雨霖铃 雪

琼楼玉宇。满人寰似、海边洲渚。蓬莱又还水浅，鲸涛静见，银宫如许。紫极鸣笳声断，望霓舟何处。待夜深、重倚层霄，认

得瑶池广寒路。

郢中旧曲谁能度。恨歌声、响入青云去。西湖近时绝唱，总不道、月梅盐絮。暗想当年宾从，毫端有惊人句。谩说枚叟邹生，共作梁园赋。

鹊桥仙

云静天高，山明水阔。一年待个中秋月。十分魄少一分圆，今宵已觉蟾光别。

且尽金尊，遥瞻玉阙。更深江水沙如雪。来宵风雨不相关，重须买酒追佳节。

感皇恩

飞雪满貂裘，马蹄轻骤。笔下文章焕星斗。凌云才调，尽是夺标高手。况闻场屋里，知名久。

金榜篆云，银鞍披绣。归去天香满衣袖。莫辞今夕，且尽一尊芳酒。为君歌一曲，为君寿。

又

羸马怯征鞍，骎骎欲骤。昨夜文星动南斗。广寒宫近，欲上烟霄携手。素娥不奈冷，凄凉久。

知是谪仙，肝肠锦绣。天半清风动襟袖。而今西笑，且饮新丰美酒。悠然还独酌，谁为寿。

又

一叶下西风，寒生南浦。椎鼓鸣桡送君去。长亭把酒，却倩阿谁留住。尊前人似玉，能留否。

醉中暂听，离歌几许。听不能终泪如雨。无情江水，断送扁舟何处。归时烟浪卷，朱帘暮。

寰海清 上元

画鼓轰天。暗尘随宝马，人似神仙。天恁不教昼短，明月长圆。天应未知道，天天。须肯放、三夜如年。

流酥拥上香辇。为个甚、晚妆特地鲜妍。花下清阴乍合，曲水桥边。高人到此也乘兴，任横街，一一须穿。莫言无国艳，有朱门、锁婵娟。

浪淘沙

翠袖卷轻纱。玉腕慵遮。蕊珠宫殿倚彤霞。不恨江南梅信早，争下香车。

月露洗凝华。艳压群葩。暗传春信到天涯。试问东风谁第一，先到人家。

好事近 茶

宴罢莫匆匆，聊驻玉鞍金勒，闻道建溪新焙，尽龙蟠苍壁。

全宋词 王庭圭

黄金碾入碧花瓿，瓿翻素涛色。今夜酒醒归去，觉风生两腋。

解佩令 本意

湘江停瑟。洛川回雪。是耶非、相逢飘瞥。云鬓风裳，照心事、娟娟山月。翦烟花、带梦同结。

留环盟切。贻珠情彻。解携时、玉声愁绝。罗袜尘生，早波面、春痕欲灭。送人行、水声凄咽。

王 同 祖

阮郎归

一帘疏雨细于尘。春寒愁杀人。桐花庭院近清明。新烟浮旧城。

寻蝶梦，怯莺声。柳丝如妾情。丙丁帖子画教成。妆台求晚晴。

摸鱼儿

记年时、荔枝香里，深红一片成阵。迎风浴露精神爽，谁似阿娇丰韵。黄昏近。望翠幕玳席，粉面云鬟映。娇波微瞬。向烛影交相，歌声闲绕，私语画阑并。

佳期事，好处天还慳吝。莺啼燕语无定。一输明月人千里，空梦云温雨润。萧郎病。恨天阔鸿稀，杳杳沈芳讯。日长人静。但时把好山，学他媚妩，偷就眉峰印。

西江月

往事星移物换，旧游雨冷云沈。真娘墓草几回青。问著寒潮不应。

全宋词 王同祖

何处芙蓉别馆，依前杨柳离亭。东风吹
泪入重扃。为唤香魂教醒。

王 万 之

踏莎行

柳外寒轻，水边亭小。昨朝燕子归来了。
天涯无数旧愁恨，东风种得成芳草。

亭畔秋千，当时欢笑。香肌不满和衣抱。
那堪别后更思量，春来瘦得知多少。

王 洵

糖多令

庆曹松庐侍郎，与秋壑只争二日，曹新除两浙
漕 八月初十

雁荡接台山。秋来最好看。寿星明、高
现云端。八月初弦三日里，□二老、福人间。
玉节近天颜。东西两路安。祝苍松、节劲根
蟠。相汉元勋萧第一，留次位、著曹参。

王武子

朝中措

画眉人去掩兰房。金鸭懒薰香。有恨只弹珠泪，无人与说衷肠。

玉颜云鬓，春花夜月，辜负韶光。闲看枕屏风上，不如画底鸳鸯。

玉楼春 闻笛

红楼十二春寒恻。楼角何人吹玉笛。天津桥上旧曾听，三十六宫秋草碧。

昭华人去无消息。江上青山空晚色。一声落尽短亭花，无数行人归未得。

王 学 文

摸鱼儿 送汪水云之湘

记当年、舞衫零乱，霖铃忍按新阕。杜鹃枝上东风晚，点点泪痕凝血。芳信歇。念初试琵琶，曾识关山月。悲弦易绝。奈笑罢顰生，曲终愁在，谁解寸肠结。

浮云事，又作南柯梦彻。一簪聊寄华发。乾坤桑海无穷事，才历昆明初劫。谁共说。都付与焦桐。写入梅花叠。黄花送客。休更问湘魂，独醒何在，沈醉浩歌发。

王 奕

摸鱼儿

肯堂欲惠书不果，借萧彦和梅花韵见意

问梅花、几人邀咏，平生见外骚楚。相思一夜罗浮远，姑射仙姿何处。情未吐。□□□、雄蜂雌蝶空相遇。岁年孰与。叹皓首相看，冰心独抱，谩作广平赋。

黄昏暮。半点酸辛谁诉。寿阳眉恨妖妩。南来北使无明眼，细认杏花真谱。私自语。道消息、孤根还有春风主。启明未举。听画角吹残，马头摇梦，人已山阳路。

水调歌头

舟过桃源，适逢初度，和欧阳楚翁韵

吾玄终不白，拗出老扬雄。近日青衿绿发，转盼忽成翁。缩首杞天坠地，极力虞渊取日，直欲入冯宫。迂阔有如此，谁不笑王公。

十年后，数椽屋，隐琊峰。人叹乾坤许大，醢瓮老山中。于是泛淮航泗，于是沿邹过鲁，千古慕雩风。造物既生我，斯道岂终

穷。

沁园春 和赵莲澳提举遣怀

耳目肺肠，不由我乎，更由乎谁。也不必君平，不消詹尹，不疑何卜，不卜何疑。三径归来，一时有见，岂为黄初与义熙。天下事，但行其可，自合乎宜。

大哉用易乘时。纵乌喙那能食子皮。叹失若塞翁，失为得本，赢如刘毅，赢乃输基。大黠小痴，有余不足，谁必彭殇早与迟。眼前物，纵铜山金屋，一暝全非。

南乡子 和谢潜庵蒋山

搔首倚薰风。一幅画图尘土中。鹤怨猿惊人去也，潜龙。谁绞香车起蛰松。

岁月去熙丰。世味人情自淡浓。春去春来墩不竞，匆匆。蜀水吴山血又红。

霜天晓角 和韩南涧采石蛾眉亭

天无四壁。底用年量江尺。徒把乾坤分裂，谁与帝、扶民阨。

几樊圃缺。耳风腔转笛。此日双蛾空蹙，依然也，暮山碧。

贺新郎

仆过鲁，自葛水买舟，至维扬，又自扬州买舟，

至孔林，登泰山，复还淮楚，往复六千里，共赋此词，括尽山川所历之妙，真所谓兹行冠平生者也。

有客过东鲁。自葛水、泛舟西下，帆开三楚。万里湖光磨水镜，际五老、落星烟渚。又飞过、二姑门户。彭泽柳青新旧色。望九华、依约池阳路。风雨庙，乌江羽。

蛾眉牛渚皆如故。问缘何、鲁港汀洲，江声无语。采石书生勋业在，吊锦袍、公子魂何处。流恨下、秦淮商女。多景楼头吟北固，笑平山堂里谁为主。且烂饮，琼花露。

又

醉醒琼花露。买扁舟、邵伯津头，向秦邮去。流水孤村鸦万点，忆少游、回首斜阳树。又访著、山阳酒侣。细剔留城碑藓看，上歌舞、一啸江东主。望鳧峰，过邹鲁。

孔林百拜瞻茔墓。历四阜、少皞之墟，大庭之库。竟涉汶河登泰岱，候清光，夜半开玄圃。迤邐问、东平归路。蚩家黄花吟笑罢，下新州，醉白楼头赋。复淮楚，寻故步。

又

舟下匡庐，因感己未岁侍谢虚舟游山，江空岁晚，物换星移，如之何而不感。遂赋此呈燕五峰。

帆卸西湾侧。望康庐、老峰面目，旧曾相识。岁岁滔滔江浪远，回首暮云空碧。今想见、发痕全白。眠鹿矶头茅屋烂，问草堂、谁管真泉石。还更有，青牛迹。

老峰点首如招客。道十年、玉斗窗间，两成疏觜。赢得老夫谙阅世，不作少年太息。看雨余、依旧青山色。汶上归来重过我，最

峰头、新长芝堪摘。分半席、共横笛。

沁园春 过彭泽发明靖节归来之本心

八十日官，浩然归去，知心者希。谓诗有招魂，姑言其概，注其述酒，亦特其微。不事小儿，惟书甲子，皆是先生杜德机。看时运，与夫荣木，始识真归。

黄唐邈不可追。慨四十无闻昨已非。故怀彼仙师，策夫名骥，志夫童冠，寤寐交挥。人表何时，谁生过鲁，愿企高风慕浴沂。兹行也，尚庶几短葛，不负公衣。

八声甘州

李太白大雅一赋，发少陵之所未发，惜豪狂诗酒，一死疑之。过采石赋此。千载醉魂，招之不醒，吾不信也。

诵公诗、大雅久不闻，吾衰竟谁陈。自晋宋以来，隋唐而下，旁若无人。光焰文章万丈，肯媚永王璘。卓有汾阳老，抱丈人贞。

不是沈香亭上，谩题飞燕，蹴起靴尘。安得锦袍西下，明月堕江滨。青山冢、知几番风雨，雷霆走精神。因过鲁，携一尊吊古，疑是前身。

水调歌头

过鲁港丁家洲，乃德祐渡江之地，有感。

长江衣带水，历代鼎彝功。服定衣冠礼

乐，聊尔就江东。追忆金戈铁马，保以油幢玉垒，烽燧几秋风。更有当头著，全局倚元戎。

攒万舸，开一棹，散无踪。到了书生死节，蜂蚁愧诸公。上有皇天白日，下有人心青史，未必竟朦胧。停棹抚遗迹，往恨逐冥鸿。

贺新郎

金陵怀古。金陵流峙，依约洛阳，惜中兴柄国者巽，皆入床下，遂使金瓯甑堕，惜哉

决眦斜阳里。品江山、洛阳第一，金陵第二。休论六朝兴废梦，且说南浮之始。合就此、衣冠故址。底事轻抛形胜地，把笙歌、恋定西湖水。百年内，苟而已。

纵然成败由天理。叹石城、潮落潮生，朝昏知几。可笑诸公俱铸错，回首金瓯瞥徙。漫漉了、紫云青史。老媚幽花栖断础，睇故宫、空拊英雄髀。身世蝶，侯王蚁。

酹江月 和辛稼轩金陵赏心亭

英雄老矣，对江山、莫遗泪珠成斛。一箠西风休掩面，白浪黄尘迷目。凤去台空，鹭飞洲冷，几度斜阳木。欲书往事，南山应恨无竹。

宁是商女当年，后来腔调，拍手铜鞮曲。偃蹇老松虽拗□，犹□一枰残局。乌巷垂杨，雀桥野草，今为谁家绿。赏心何处，浩歌归

卧梅屋。

法典献仙音 和朱静翁青溪词

九曲青溪，千年陈迹，往事不堪依据。
老我重来，海干石烂，那复断碑残础。应讶
野王当日，三弄罢、乍无语。

□□□。高牙大纛船如屋，又少甚笙歌，
翠云箫鼓。流恨入寒箏，离合君臣良苦。花
落几春□，无此一番风雨。是何人、尚秦淮
门馆，柳桥荷浦。

贺新郎 秦淮观斗舟有感，追和思远楼

惆怅秦淮路。慨当年、商女谁家，几多
年数。死去方知亡国恨，尚激起、浪花如语，
应不为、黍峰蒲缕。花隔青溪胭井湿，又谁
省、此时情绪。云盖拥，翠阴午。

汨罗无复灵均楚。到如今、荃蕙椒兰，
尽成禾黍。疑是虬龙穿王气，遗恨六朝作古。
□留与、浮歌载醕。天外长江浑不管，也无
春无夏无晴雨。流岁月、滔滔去。

木兰花慢 和赵莲澳金陵怀古

翠微亭上醉，搔短发、舞缤纷。问六朝
五姓，王姬帝胄，今有谁存。何似乌衣故垒，
尚年年、生长儿孙。今古兴亡无据，好将往
史俱焚。

招魂。何处觅东山，箜泪落清樽。怅石城暗浪，秦淮旧月，东去西奔。休说清谈误国，有清谈，还有斯文。遥睇新亭一笑，漫漫天际江痕。

南乡子 和辛稼轩多景楼

豪杰说中州。及此见题多景楼。曹石当年徒浪耳，悠悠。岁月滔滔江自流。

风雪老兜鍪。不混关河事不休。浪舞桃花颠又蹶，嬴刘。莫与武陵仙客谋。

水调歌头 和陆放翁多景楼

迢迢蟠冢水，直泻到东州。不拣秦淮吴楚，明月一家楼，何代非卿非相，底事柴桑老子，偏恁不推刘。半体鹿皮服，千古晋貔貅。

过东鲁，登北固，感春秋。抵掌嫣然一笑，莫枉少陵愁。说甚萧锅曹石，古矣苏吟米画，黑白满盘收。对水注杯酒，为我向东流。

八声甘州 题维扬摘星楼

问苍天、苍天阍无言，浩歌摘星楼。这茫茫禹迹，南来第一，是古扬州。当日双龙未渡，风月一家秋。中分胡越后，横断江流。

□百年间春梦，笑槐柯蚁穴，多少王侯。

谩平山堂里，棋局几边筹。是谁教、海干仙去，天地付浮沤。书生老，对琼花一笑，白发苍洲。

临江仙 和元遗山题扬州平山堂

二十四桥明月好，暮年方到扬州。鹤飞仙去总成休。襄阳风笛急，何事付悠悠。

几阁平山堂上酒，夕阳还照边楼。不堪风景事回头。淮南新枣熟，应不说防秋。

沁园春 题新州醉白楼

唐李太白，访贺知章，浩歌此楼。想斗酒百篇，眼花落井，一时豪杰，千古风流。白骨青山，美人黄土，醉魄吟魂安在否。江南客，因来游胜践，稽首前修。

悠悠。往事俱休，更莫遣兴亡狂白头。也莫论高皇、莫论项羽，谁为黄帝，谁为蚩尤。撈破愁城，吸干酒海，袖拂安梁舞暮秋。题未了，又笑骑白鹤，飞下扬州。

婆罗门引 忆叠山翁

佳人鬓发，几回涂抹共婵娟。又何止三千。拟待盈盈宝鉴，多少绮罗筵。恨妖蟆怪事，长夜中天。

中河影圆。清泪落尊前。舞罢霓裳初服，肯为人妍。□□□□，算惟有、蕊宫天上仙。

缙山鹤，亦欲踰跼。

贺新郎 题扬州琼花观

试问司花女。是何年、培植琼葩，分来何谱。禁苑岂无新雨露，底事刚移不去，偏恋定、鹤城抔土。却怕杏花生眼觑。先廿年、和影无寻处。遗草木，悴风雨。

看花老我成迟暮。绕阑干、追忆沈吟，欲言难赋。根本已非枝叶异，谁把麝苗裨补。但认得、唐人旧句。明月楼前无水部。扣之梅、梅又全无语。询古柏，过东鲁。

沁园春 客山阳偕诸公游杜康庄刘伶台醉吟

醉面挟风，携杜康酒，酌刘伶台。问漂母矶头。韩侯安在，钵山池下，乔鹊曾回。孝说仲车，忠传祖逖，忠孝如今亦可哀。清河口，但潮生潮落，帆去帆来。

休咎。且饮三杯。莫枉教、东乌西兔催。更谁可百年，脱身不化，谁能五日，笑口长开。痛饮高歌，胡涂乱抹，快活斗山王秀才。今天下，曰利而已，何以平哉。

唐多令 登淮安倚天楼

直上倚天楼。怀哉古楚州。黄河水、依旧东流。千古兴亡多少事，分付与、白头鸥。祖逖与留侯。二公今在不。眉尖上、莫

带星愁。笑拍危阑歌短阕，翁醉矣，且归休。

沁园春 见王肯堂

吾祖文中，曾于夫子，受罔极恩。有宇宙以来，春秋而后，三纲所系，万古常存。列国何时，东吴何地，十哲之中尚有言。况今也、与圣贤邦域，同一乾坤。

卑飞难傍天阍。但勃窣衔香拜圣门。要水看黄河，山登岱岳，鲁求君子，学究中原。虽有他人，不如同姓，仰止文星出禁垣。又安得，借蒙庄大瓢，酌泗水之源。

西河 和周美成金陵怀古

江左地。兴亡旧恨谁记。腥风不搅洛山云，怒涛怎起。泪眶历落滋新亭，碑趺犹卧江际。

古今事，天莫倚。废兴元有时系。女墙月色自荒荒，尽平寸垒。舞台歌榭草痕深，青溪弥望烟水。

马蹄杂遝锦绣市。认乌衣六朝，东巷西里。景物已非人世。但长干铁塔，岿然相对。檐铃嘈啾薰风里。

王炎

菩萨蛮 江干

远风江急潮来晚。晚来潮急江风远。横
岸断山青。青山断岸横。

寄书无雁系。系雁无书寄。归梦只江西。
西江只梦归。

梅花引

裁征衣。寄征衣。万里征人音信稀。朝
相思。暮相思。滴尽真珠，如今无泪垂。

闺中幼妇红颜少。应是玉关人更老。几
时归。几时归。开尽牡丹，看看到荼蘼。

王 炎

蝶恋花 崇阳县圃夜饮

纤手行杯红玉润。满眼花枝，雨过胭脂嫩。新月一眉生浅晕。酒阑无奈添春困。
唤起醉魂君不问。憔悴颜容，羞与花相近。人自无情花有韵。风光易老何须恨。

又

柳暗西湖春欲暮。无数青丝，不系行人住。一点心情千万绪。落花寂寂风吹雨。
唤起声中人独睡。千里明驼，不踏山间路。谩道遣愁除是醉。醉还易醒愁难去。

点绛唇 崇阳野次

雨湿东风，谁家燕子穿庭户。孤村薄暮。花落春归去。

浪走天涯，归思萦心绪。家何处。乱山无数。不记来时路。

水调歌头 夜泛湘江

江月冷如水，江水碧于空。晚来一霎过

雨，为我洗秋容。悄悄四山人静，凛凛三更露下，天阔叫孤鸿。唤醒蓬窗梦，身在水晶宫。

揖湘妃，招月娣，御清风。素琴韵远，不觉醉眼杏花红。禹穴骑鲸仙去，东海钓鳌人远，此意与谁同。倚柁一长啸，出壑舞鱼龙。

又 登石鼓合江亭

千里倦游客，老眼厌尘烟。蒸湘平远，他处无此好江山。把酒一听欸乃，过了黄花时节，水国倍生寒。输与沧浪叟，长伴白鸥闲。

傍江亭，穷杳霭，踞巉岩。水深石冷，闻道别有洞中天。待倩灵妃调曲，唤起冯夷短舞，从此问群仙。云海渺无际，波涌缓移船。

念奴娇 菊

小妆朱槛，护秋英千点，金钿如簇。黄叶白苹朝露冷，只有孤芳幽馥。华发苍头，宦情羁思，来伴花幽独。巡檐无语，清愁何啻千斛。

因念爱酒渊明，东篱雅意，千载无人续。身在花边须一醉，小覆杯中醺醖。过了重阳，捻枝嗅蕊，休叹年华速。明年春到，陈根更有新绿。

鹧鸪天 梅

淡淡疏疏不惹尘。暗香一点静中闻。人

间怪有晴时雪，天上偷回腊里春。

疑浅笑，又轻颦。虽然无语意相亲。老
来尚可花边饮，惆怅相携失玉人。

阮郎归

落花时节近清明。南园芳草青。东风料
峭雨难晴。那堪中宿醒。

回首处，自销凝。谁知人瘦生。倚阑无
语不禁情。杜鹃啼数声。

青玉案

深红数点吹花絮。又燕子、飞来语。远
水平芜春欲暮。年年长是，清明时候，故遣
人憔悴。

竹鸡啼罢山村雨。正寥落、无情绪。猛
省从前多少事。绿杨堤上，楼台如画，此景
今何处。

浪淘沙令 开禧丙寅在大坂作

流水绕孤村。杨柳当门。昔年此地往来
频。认得绿杨携手处，笑语如存。

往事不堪论。强对清尊。梅花香里月黄
昏。白首重来谁是伴，独自销魂。

木兰花慢

绡桃花树下，记罗袜、昔经行。至今日

重来，人惟独自，花亦凋零。青鸟杳无信息，
遍人间、何处觅云骈。红锦织残旧字，玉箫
吹断余声。

销凝。衣故几时更。又谁复卿卿。念镜
里琴中，离鸾有恨，别鹄无情。齐眉处同笑
语，但有时、梦见似平生。愁封婵娟三五，
素光暂缺还盈。

清平乐 越上作

呢喃燕语。共诉春归去。春去从他留不
住。落尽枝头红雨。

老翁袖手优游。闲愁不到眉头。过了麦
黄椹紫，归期只在新秋。

又

儿曹耳语。借问何处去。家在翠微深处
住。生计一犁春雨。

客中且恁浮游。莫将事挂心头。纵使人
生满百，算来更几春秋。

浪淘沙 辛未中秋与文尉达可饮

月色十分圆。风露娟娟。木犀香里凭阑
干。河汉横斜天似水，玉鉴光寒。

草草具杯盘。相对苍颜。素娥莫惜少留
连。秋气平分蟾兔满，动是经年。

卜算子 嘉定癸酉二月雨后到双溪

渡口唤扁舟，雨后青绡皱。轻暖相重护

病躯，料峭还寒透。

老大自伤春，非为花枝瘦。那得心情似少年，双燕归时候。

又

散策问芳菲，春半花犹未。蓓蕾枝头怯苦寒，恰似人憔悴。

人莫恨花迟，天自催寒去。雨意才收日气浓，玉靥红如醉。

江城子 癸酉春社

清波渺渺日晖晖。柳依依。草离离。老大逢春，情绪有谁知。帘箔四垂庭院静，人独处，燕双飞。

怯寒未敢试春衣。踏青时。懒追随。野蔌山肴，村酿可从宜。不向花边拚一醉，花不语，笑人痴。

虞美人 甲戌正月望后燕来

镜中失画双青鬓。懒更占花信。小梅半谢雨垂垂。未许轻红破蕾、缀桃枝。

社前归燕穿帘语。似说人憔悴。自缘老去少欢惊。不是春寒料峭、怯东风。

南乡子 甲戌正月

云淡日朧明。久雨潺潺乍得晴。社近东皋农务急。催耕。又见菖蒲出水清。

全宋词 王 炎

池面縠纹平。掠水迎风燕羽轻。试出访
寻春色看，相迎。巧笑花枝似有情。

忆秦娥 甲戌赏春

胭脂点。海棠落尽青春晚。青春晚。少
年游乐，而今慵懒。

春光不可无人管。花边酌酒随深浅。随
深浅。牡丹红透，荼蘼香远。

临江仙 吴宰生日

欲近上元人意好，月如人意团圆。暖风
催趣养花天。三山来鹤驾，万户识凫仙。

手种河阳桃李树，暂时来看春妍。彩衣
一笑棹觥船。明年当此日，人到凤池边。

好事近 同前

时节近元宵，天意人情都好。烟柳露桃
枝上，觉今年春早。

遏云一曲凤将雏，疑是在蓬岛。玉笋扶
杯潋滟，愿黑头难老。

水调歌头 留宰生日

爱日护轻暖，酝造小春时。桃溪云敛，
一点郎星吐青辉。炼玉容颜难老，点漆精神
如旧，不用摘霜髭。厌薄蓬莱景，戏踏两凫

飞。

潘花底，陶柳外，细民肥。万家喜色，融瑞气拥牙绯。凭仗春葱洗玉，贪图朱樱度曲，引满又何辞。只待琴歌毕，安步上丹墀。

念奴娇 海棠时过江潭

晓来雨过，正海棠枝上，胭脂如滴。桃杏不堪来比似，信是倾城倾国。藏韵收香，谁能描貌，阁尽诗人笔。从教睡去，为留银烛终夕。

不待过了清明，绿阴结子，无处寻春色。簌簌轻红飞一片，便觉临风凄恻。莫道无情，嫣然一笑，也似曾相识。惜花无主，自怜身是行客。

浪淘沙令 菊

秋色满东篱。露滴风吹。凭谁折取泛芳卮。长是年年重九日，苦恨开迟。

因记得当时。共捻纤枝。而今寂寞凤孤飞。不似旧来心绪好，惟有花知。

采桑子 秋日丁香

一番飞次春风巧，细看工夫。点缀红酥。此际多应别处无。

玉人不与花为主，辜负芳菲。香透帘帏。谁向钗头插一枝。

全宋词 王 炎

好事近 早梅

玉颊映红绡，搀报东风消息。虽则清臞如许，有生香真色。

相看动是隔年期，忍不饮涓滴。莫待轻飞一片，却说花堪惜。

临江仙 落梅

雪片幻成肌骨，月华借与精神。一声羌笛怨黄昏。吹香飘缟袂，脱迹委红裙。

枝上青青结子，子中白白藏仁。那时别是一家春。劈泥尝煮酒，拂席卧清阴。

卜算子

腻玉染深红，艳丽难常好。已是人间袂褰时，花亦随春老。

唤起曲生来，醉赏惟宜早。此去阴晴十日间，点点黏芳草。

木兰花慢 暮春时在分宁

博山香雾冷，新雨过、怯单衣。正飞絮蒙蒙，平芜杳杳，家在天涯。春难住、人易老，又等闲过了踏青时。枝上红稀绿暗，杜鹃刚向人啼。

依依。谩叹歌生弹铗，尘满弦徽。想北

山猿鹤，南溪鸥鹭，怪我归迟。青云事、今已晚，倚小窗、谁与话襟期。对酒有愁可解，[擘]笺无怨休题。

小重山

至后一日，长兴赵宰到郡，并招归安、乌程二宰及项广文同饭

日脚才添一线长。葭灰吹玉管，转新阳。老来添得鬓边霜。年华换，归思满沧浪。

唤客对凝香。公庭凫鹭散，缓行觞。何须红袖立成行。清淡好，胜似听丝簧。

阮郎归 雪川作

几回幽梦绕家山。怯闻梅弄残。潇潇黄落客毡寒。不禁衣带宽。

身外事，意阑珊。人间行路难。寻思百计不如闲。休贪朱两幡。

临江仙

莫子章郎中买妾佐酒，魏倅以词戏之，次韵

试问休官林下去，何人得似高年。壶中不记岁时迁。吹箫新有伴，餐玉共求仙。

有客尊前曾得见，月眉云鬓娟娟。断肠刺史独无眠。谁能闻一曲，偷向笛中传。

又

思忆故园花又发，等闲过了流年。休论

升擢与平迁。拂衣归去好，无事即神仙。

况是老人头雪白，羞看红粉婵娟。鸾孤凤只且随缘。莫将桃叶曲，留与世人传。

水调歌头 送魏倅

新涨鸭头绿，春满白苹洲。小停画鹢，
莫便折柳话离愁。缥缈觚棱在望，不用东风借便，一瞬到皇州。别酒十分酌，何惜覆瑶舟。

从此去，上华顶，入清流。人门如许，
自合唾手复公侯。老我而今衰谢，梦绕故园松菊，底事更迟留。早晚挂冠去，江上狎浮鸥。

南柯子

天末家何许，津头客未归。柳梢绿暗早莺啼。蝴蝶不知春去、绕园飞。选胜多游冶，当垆有丽姝。青翰载酒泛晴晖。不忍十分寥落、负花时。

好事近

闲日似年长，又在他乡春暮。柳外一声鶗鴂，怨落花飞絮。

苜罗只似旧时村，佳人在何处。试问鸱夷因甚，载轻颿同去。

朝中措

杜鹃声断日曛曛。过雨湿残红。老色菱花影里，客愁蕉叶香中。

柳梢飞絮，桃梢结子，断送春风。莫恨春无觅处，明年还在芳丛。

南柯子

秀叔娶妇不令人知，以小词为贺，因戏之

对镜鸾休舞，求凰凤自飞。珠钿翠珥密封题。中有鸾笺细字、没人知。

环佩灯前结，辘辘月下归。笑他织女夜鸣机。空与牛郎相望、不相随。

朝中措 九月末水仙开

蔷薇露染玉肌肤。欲试缕金衣。一种出尘态度，偏宜月伴风随。

初疑邂逅，湘妃洛女，似是还非。只恐乘云轻举，翩然飞度瑶池。

西江月

用荼蘼酿酒饮尽，因成此，谩呈继韩

蔌蔌落红都尽，依然见此清姝。水沈为骨玉为肤。留得春光少住。

鸳帐巧藏翠幔，燕钗斜亸纤枝。休将往

全宋词 王 炎

事更寻思。且为浓香一醉。

柳梢青 郑宰母生日

葭管风微。莱衣香软，歌凤将雏。笑酌
流露，问人何处，别有瑶池。

相将月佩霞裾。领凫舄、归朝玉墀。管
取长年，进封大国，稳住清都。

踏莎行

木落天寒，年华又暮。老来多病须调护。
诗编酒榼总无缘，闲中赢得瞢腾睡。

尘暗犀梳，香消翠被。悄无音信来青羽。
新愁正上自眉峰，黄昏庭院潇潇雨。

清平乐 嘉定壬申除夜

一杯椒醑。惜饮难成醉。爆竹声中人未
睡。共道今宵守岁。

不如且就衾裯。谁能细数更筹。三百六
旬过了，明朝却是年头。

南柯子

山冥云阴重，天寒雨意浓。数枝幽艳湿
啼红。莫为惜花惆怅、对东风。

蓑笠朝朝出，沟塍处处通。人间辛苦是
三农。要得一犁水足、望年丰。

夜行船 贺将使叔成宝相寮

淡饭粗衣随分过。新成就、庵寮一个。
静处藏身，十分自在，只恁麽、有何不可。

过眼空花都看破。红尘外、独行独坐。
也没筹量，也没系绊，更觅甚、三乘四果。

临江仙 和将使许过双溪

鸚鵡一声春事了，不知苦劝谁归。花梢
香露染蔷薇。小梅酸著齿，酒榼正堪携。

鸭绿一篙新雨过，远山半出修眉。仙翁
理棹欲来时。绕檐乌鹊喜，报与主人知。

暮山溪 巢安寮毕工

莺啼花谢，断送春归去。雨后听鹃声，
恰似诉、留春不住。韶光易迈，暗被老相催，
无个事，没些愁，方是安身处。

栽松种菊，相对为宾主。终日掩柴扉，
但只有、清风时度。不炊把酒，又不喜观书，
饥时饭，饱时茶，困即齁齁睡。

忆秦娥

头如雪。尘缘滚滚无休歇。无休歇。买
田筑屋，是何时节。

从今事事都休说。巢安寮里藏疏拙。藏

疏拙。许谁为伴，溪山风月。

满江红 至日和黄伯威

宦海浮沈，名与字、不能彰彻。青云上、诸公衮衮，难登狭劣。结绶弹冠成底事，解颐折角皆虚说。待黄梁、梦觉始归来，非明哲。

易消释，空中雪。多亏缺，天边月。算人生必有，衰羸时节。恁是一阳来复后，梅花柳眼先春发。料明年、又老似今年，当休歇。

玉楼春 丙子十月生

往年糊口谋升斗。朱墨尘埃黏两袖。黄梁梦断始归来，依旧琴书当左右。

而今藏取持螯手。林下独居闲散又。问之何以得长年，寡欲少思安老朽。

又

大都四绪阴晴半。天上油云舒又卷。若还心也似云间，老色何由来上面。

生平辛苦今潇散。得丧荣枯皆历遍。人言不死是神仙，我但耳闻非眼见。

王炎午

沁园春

又是年时 ,杏红欲脸 ,柳绿初芽。奈寻春步远 ,马嘶湖曲 ,卖花声过 ,人唱窗纱。暖日晴烟 ,轻衣罗扇 ,看遍王孙七宝车。谁知道 ,十年魂梦 ,风雨天涯。

休休何必伤嗟。谩赢得、青青两鬓华。且不知门外 ,桃花何代 ,不知江左 ,燕子谁家。世事无情 ,天公有意 ,岁岁东风岁岁花。拚一笑 ,且醒来杯酒 ,醉后杯茶。

王 野

西 河

天下事。问天怎忍如此。陵图谁把献君王，结愁未已。少豪气概总成尘，空余白骨黄苇。

千古恨，吾老矣。东游曾吊淮水。绣春台上一回登，一回搵泪。醉归抚剑倚西风，江涛犹壮人意。

只今袖手野色里。望长淮、犹二千里。纵有英心谁寄。近新来，又报胡尘起。绝域张骞归来未。

六州歌头

龙蟠虎踞，今古帝王州。水如淮，山似洛，凤来游。五云浮。宇宙无终极，千载恨，六朝事，同一梦休。更莫问闲愁。风景悠悠。得似青溪曲，著我扁舟。对残烟衰草，满目是清秋。白鹭汀洲。夕阳收。

黄旗紫盖，中兴运，钟王气，护金瓯。驻游跸，开行殿，夹朱楼。送华辀。万里长江险，集鸿雁，列貔貅。扫关河，清海岱，

志应酬。机会何常，鹤唳风声处，天意人谋。
臣今虽老，未遣壮心体。击楫中流。

沁园春 子寿母

月地云阶，碧山丹水，春满北园。正慈
闱初度，酡颜绿发，黄堂称寿，画戟朱幡。
戏彩斓斑，安舆游衍，未数当时莱与潘。今
朝好，把一家和气，散在千门。

潜藩。误玷君恩。人尚说、淳熙前状元。
幸物情如旧，亲年未老，且开玉帐，共祝金
樽。罗绮飘香，管弦度曲，晚岁欢娱谁与论。
亭峰宴，似仙家大姥，尽见曾孙。

王 沂 孙

天香 龙涎香

孤峤蟠烟，层涛蜕月，骊宫夜采铅水。讯远槎风，梦深薇露，化作断魂心字。红瓷候火，还乍识、冰环玉指。一缕萦帘翠影，依稀海天云气。

几回殢娇半醉。翦春灯、夜寒花碎。更好故溪飞雪，小窗深闭。荀令如今顿老，总忘却、樽前旧风味。谩惜余熏，空篝素被。

花犯 苔梅

古婵娟，苍鬟素靥，盈盈瞰流水。断魂十里。叹绀缕飘零，难系离思。故山岁晚谁堪寄。琅玕聊自倚。谩记我、绿蓑冲雪，孤舟寒浪里。

三花两蕊破蒙茸，依依似有恨，明珠轻委。云卧稳，蓝衣正、护春憔悴。罗浮梦、半蟾挂晓，么凤冷、山中人乍起。又唤取、玉奴归去，余香空翠被。

露华 碧桃

绀葩乍坼。笑烂漫娇红，不是春色。换了素妆，重把青螺轻拂。旧歌共渡烟江，却占玉奴标格。风霜峭、瑶台种时，付与仙骨。

闲门昼掩凄恻。似淡月梨花，重化清魄。尚带唾痕香凝，怎忍攀摘。嫩绿渐满溪阴，菼菼粉云飞。芳艳冷、刘郎未应认得。

又

晚寒伫立，记铅轻黛浅，初认冰魂。绀罗衬玉，犹凝茸唾香痕。净洗妒春颜色，胜小红、临水湔裙。烟渡远，应怜旧曲，换叶移根。

山中去年人到，怪月悄风轻，闲掩重门。琼肌瘦损，那堪燕子黄昏。几片故溪浮玉，似夜归、深雪前村。芳梦冷，双禽误宿粉云。

南浦 春水

柳下碧粼粼，认曲尘乍生，色嫩如染。清溜满银塘，东风细、参差縠纹初遍。别君南浦，翠眉曾照波痕浅。再来涨绿迷旧处，添却残红几片。

葡萄过雨新痕，正拍拍轻鸥，翩翩小燕。帘影蘸楼阴，芳流去，应有泪珠千点。沧浪一舸，断魂重唱苹花怨。采香幽径鸳鸯睡，谁道湔裙人远。

又 前题

柳外碧连天，漾翠纹渐平，低蘸云影。应是雪初消，巴山路、蛾眉乍窥清镜。绿痕无际，几番漂荡江南恨。弄波素袜知甚处，空把落红流尽。

何时橘里莼乡，泛一舸翩翩，东风归兴。孤梦绕沧浪，苹花岸、漠漠雨昏烟暝。连筒接缕，故溪深掩柴门静。只愁双燕衔芳去，拂破蓝光千顷。

声声慢 催雪

风声从臾，云意商量，连朝滕六迟疑。茸帽貂裘，兔园准拟吟诗。红炉旋添兽炭，办金船、羔酒熔脂。问翦水，恁工夫犹未，还待何时。

休被梅花争白，好夸奇斗巧，早遍琼枝。彩索金铃，佳人等塑狮儿。怕寒绣帏慵起，梦梨云、说与春知。莫误了，约王猷、船过剡溪。

高阳台 纸被

霜楮剥皮，冰花擘茧，满腔絮湿湘帘。抱瓮工夫，何须待吐吴蚕。水香玉色难裁剪，更绣针、茸线休拈。伴梅花，暗卷春风，斗帐孤眠。

篝熏鹊锦熊毡。任粉融脂涴，犹怯痴寒。我睡方浓，笑他欠此清缘。揉来细软烘烘暖，

全宋词 王沂孙

尽何妨、挟纩装绵。酒魂醒，半榻梨云，起坐诗禅。

疏影 咏梅影

琼妃卧月。任素裳瘦损，罗带重结。石径春寒，碧藓参差，相思曾步芳屐。离魂分破东风恨，又梦入、水孤云阔。算如今，也厌娉婷，带了一痕残雪。

犹记冰奁半掩，冷枝画未就，归棹轻折。几度黄昏，忽到窗前，重想故人初别。苍虬欲卷涟漪去，慢蜕却、连环香骨。早又是，翠荫蒙茸，不似一枝清绝。

无闷 雪意

阴积龙荒，寒度雁门，西北高楼独倚。怅短景无多，乱山如此。欲唤飞琼起舞，怕搅碎、纷纷银河水。冻云一片，藏花护玉，未教轻坠。

清致。悄无似。有照水一枝，已搀春意。误几度凭栏，莫愁凝睇。应是梨花梦好，未肯放、东风来人世。待翠管、吹破苍茫，看取玉壶天地。

眉妩 新月

渐新痕悬柳，澹彩穿花，依约破初暝。便有团圆意，深深拜，相逢谁在香径。画眉

未稳，料素娥、犹带离恨。最堪爱、一曲银钩小，宝帘挂秋冷。

千古盈亏休问。叹慢磨玉斧，难补金镜。太液池犹在，凄凉处、何人重赋清景。故山夜永。试待他、窥户端正。看云外山河，还老尽、桂花影。

水龙吟 牡丹

晓寒慵揭珠帘，牡丹院落花开未。玉栏干畔，柳丝一把，和风半倚。国色微酣，天香乍染，扶春不起。自真妃舞罢，谪仙赋后，繁华梦、如流水。

池馆家家芳事。记当时、买栽无地。争如一朵，幽人独对，水边竹际。把酒花前，剩拚醉了，醒来还醉。怕洛中、春色匆匆，又入杜鹃声里。

又 海棠

世间无此娉婷，玉环未破东风睡。将开半敛，似红还白，余花怎比。偏占年华，禁烟才过，夹衣初试。叹黄州一梦，燕宫绝笔，无人解、看花意。

犹记花阴同醉。小阑干、月高人起。千枝媚色，一庭芳景，清寒似水。银烛延娇，绿房留艳，夜深花底。怕明朝、小雨濛濛，便化作燕支泪。

又 落叶

晓霜初著青林，望中故国凄凉早。萧萧渐积，纷纷犹坠，门荒径悄。渭水风生，洞庭

庭波起，几番秋杪。想重崖半没，千峰尽出，
山中路、无人到。

前度题红杳杳。溯宫沟、暗流空绕。啼
螿未歇，飞鸿欲过，此时怀抱。乱影翻窗，
碎声敲砌，愁人多少。望吾庐甚处，只应今
夜，满庭谁扫。

又 白莲

淡妆不扫蛾眉，为谁伫立羞明镜。真妃
解语，西施净洗，娉婷顾影。薄露初匀，纤
尘不染，移根玉井。想飘然一叶，飕飕短发，
中流卧、浮烟艇。

可惜瑶台路迥。抱凄凉、月中难认。相
逢还是，冰壶浴罢，牙床酒醒。步袜空留，
舞裳微褪，粉残香冷。望海山依约，时时梦
想，素波千顷。

又 前题

翠云遥拥环妃，夜深按彻霓裳舞。铅华
净洗，涓涓出浴，盈盈解语。太液荒寒，海
山依约，断魂何许。甚人间、别有冰肌雪艳，
娇无奈、频相顾。

三十六陂烟雨。旧凄凉、向谁堪诉。如
今谩说，仙姿自洁，芳心更苦。罗袜初停，
玉珰还解，早凌波去。试乘风一叶，重来月
底，与修花谱。

绮罗香 秋思

屋角疏星，庭阴暗水，犹记藏鸦新树。
试折梨花，行入小阑深处。听粉片、簌簌飘

阶，有人在、夜窗无语。料如今，门掩孤灯，画屏尘满断肠句。

佳期浑似流水，还见梧桐几叶，轻敲朱户。一片秋声，应做两边愁绪。江路远、归雁无凭，写绣笺、倩谁将去。谩无聊，犹掩芳樽，醉听深夜雨。

又 红叶

玉杵余丹，金刀剩彩，重染吴江孤树。几点朱铅，几度怨啼秋暮。惊旧梦、绿鬓轻凋，诉新恨、绛唇微注。最堪怜，同拂新霜，绣蓉一镜晚妆妒。

千林摇落渐少，何事西风老色，争妍如许。二月残花，空误小车山路。重认取，流水荒沟，怕犹有、寄情芳语。但凄凉、秋苑斜阳，冷枝留醉舞。

又 前题

夜滴研朱，晨妆试酒，寒树偷分春艳。赋冷吴江，一片试霜犹浅。惊汉殿、绛点初凝，认隋苑、彩枝重翦。问仙丹，炼熟何迟，少年色换已秋晚。

疏枝频撼暮雨，消得西风几度，舞衣吹断。绿水荒沟，终是赋情人远。空一似、零落桃花，又等闲、误他刘阮。且留取，闲写幽情，石阑三四片。

齐天乐 萤

碧痕初化池塘草，荧荧野光相趁。扇薄星流，盘明露滴，零落秋原飞燐。练裳暗近。

记穿柳生凉，度荷分暝。误我残编，翠囊空叹梦无准。

楼阴时过数点，倚阑人未睡，曾赋幽恨。汉苑飘苔，秦陵坠叶，千古凄凉不尽。何人为省。但隔水余晖，傍林残影。已觉萧疏，更堪秋夜永。

又 蝉

绿槐千树西窗悄，厌厌昼眠惊起。饮露身轻，吟风翅薄，半翦冰笺谁寄、凄凉倦耳。漫重拂琴丝，怕寻冠珥。短梦深宫，向人犹自诉憔悴。

残虹收尽过雨，晚来频断续，都是秋意。病叶难留，纤柯易老，空忆斜阳身世。窗明月碎。甚已绝余音，尚遗枯蜕。鬢影参差，断魂青镜里。

又 前题

一襟余恨宫魂断，年年翠阴庭树。乍咽凉柯，还移暗叶，重把离愁深诉。西窗过雨。怪瑶佩流空，玉笋调柱。镜暗妆残，为谁娇鬢尚如许。

铜仙铅泪似洗，叹携盘去远，难贮零露。病翼惊秋，枯形阅世，消得斜阳几度。余音更苦。甚独抱清高，顿成凄楚。谩想薰风，柳丝千万缕。

又 赠秋崖道人西归

冷烟残水山阴道，家家拥门黄叶。故里鱼肥，初寒雁落，孤艇将归时节。江南恨切。问还与何人，共歌新阙。换尽秋芳，想渠西

子更愁绝。

当时无限旧事，叹繁华似梦，如今休说。短褐临流，幽怀倚石，山色重逢都别。江云冻结。算只有梅花，尚堪攀折。寄取相思，一枝和夜雪。

又 四明别友

十洲三岛曾行处，离情几番凄惋。坠叶重题，枯条旧折，萧飒那逢秋半。登临顿懒。更葵箠难留，苙衣将换。试语孤怀，岂无人与共幽怨。

迟迟终是也别，算何如趁取，凉生江满。挂月催程，收风借泊，休忆征帆已远。山阴路畔。纵鸣壁犹蛩，过楼初雁。政恐黄花，笑人归较晚。

一萼红 石屋探梅

思飘飘。拥仙姝独步，明月照苍翘。花候犹迟，庭阴不扫，门掩山意萧条。抱芳恨、佳人分薄，似未许、芳魄化春娇。雨涩风慳，雾轻波细，湘梦迢迢。

谁伴碧樽雕俎，笑琼肌皎皎，绿鬓萧萧。青凤啼空，玉龙舞夜，遥睇河汉光摇。未须赋、疏香淡影，且同倚、枯藓听吹箫。听久余香欲绝，寒透蛟绡。

又 丙午春赤城山中题花光卷

玉婵娟。甚春余雪尽，犹未跨青鸾。疏萼无香，柔条独秀，应恨流落人间。记曾照、黄昏淡月，渐瘦影、移上小栏干。一点清魂，

半枝空色，芳意班班。

重省嫩寒清晓，过断桥流水，问信孤山。冰粟微销，尘衣不浣，相见还误轻攀。未须讶、东南倦客，掩铅泪、看了又重看。故国吴天树老，雨过风残。

又 红梅

占芳菲。趁东风妩媚，重拂淡燕支。青凤衔丹，琼奴试酒，惊换玉质冰姿。甚春色、江南太早，有人怪、和雪杏花飞。藓佩萧疏，茜裙零乱，山意霏霏。

空惹别愁无数，照珊瑚海影，冷月枯枝。吴艳离魂，蜀妖浥泪，孤负多少心期。岁寒事、无人共省，破丹雾、应有鹤归时。可惜鲛绡碎翦，不寄相思。

又 前题

翦丹云。怕江皋路冷，千叠护清芬。弹泪绡单，凝妆枕重，惊认消瘦冰魂。为谁趁、东风换色，任绛雪、飞满绿罗裙。吴苑双身，蜀城高髻，忽到柴门。

欲寄故人千里，恨燕支太薄，寂寞春痕。玉管难留，金樽易泣，几度残醉纷纷。谩重记、罗浮梦觉，步芳影、如宿杏花村。一树珊瑚淡月，独照黄昏。

又 初春怀旧

小庭深。有苍苔老树，风物似山林。侵户清寒，捎池急雨，时听飞过啼禽。扫荒径、残梅似雪，甚过了、人日更多阴。压酒人家，试灯天气，相次登临。

犹记旧游亭馆，正垂杨引缕，嫩草抽簪。
罗带同心，泥金半臂，花畔低唱轻斟。又争
信、风流一别，念前事、空惹恨沈沈。野服
山筇醉赏，不似如今。

解连环 橄榄

万珠悬碧。想炎荒树密，□□□□。恨
绛娣、先整吴帆，政鬟翠逞娇，故林难别。
岁晚相逢，荐青子、独夸冰颊。点红盐乱落，
最是夜寒，酒醒时节。

霜槎蝟芒冻裂。把孤花细嚼，时咽芳冽。
断味惜、回涩余甘、似重省家山，旧游风月。
崖蜜重尝，到了输他清绝。更留人、绀丸半
颗，素瓿泛雪。

三姝媚 次周公谨故京送别韵

兰缸花半绽。正西窗凄凄，断萤新雁。
别久逢稀，谩相看华发，共成销黯。总是飘
零，更休赋、梨花秋苑。何况如今，离思难
禁，俊才都减。

今夜山高江浅。又月落帆空，酒醒人远。
彩袖乌纱，解愁人、惟有断歌幽婉。一信东
风，再约看、红腮青眼。只恐扁舟西去，苹
花弄晚。

又 樱桃

红缨悬翠葆。渐金铃枝深，瑶阶花少。
万颗燕支，赠旧情、争奈弄珠人老。扇底清

全宋词 王沂孙

歌，还记得、樊姬娇小。几度相思，红豆都销，碧丝空袅。

芳意茶 开早。正夜色瑛盘，素蟾低照。荐笋同时，叹故园春事，已无多了。赠满筠笼，偏暗触、天涯怀抱。谩想青衣初见，花阴梦好。

庆清朝 榴花

玉局歌残，金陵句绝，年年负却薰风。西邻窈窕，独怜入户飞红。前度绿阴载酒，枝头色比舞裙同。何须拟，蜡珠作蒂，缃彩成丛。

谁在旧家殿阁，自太真仙去，扫地春空。朱幡护取，如今应误花工。颠倒绛英满径，想无车马到山中。西风后，尚余数点，还胜春浓。

庆宫春 水仙花

明玉擎金，纤罗飘带，为君起舞回雪。柔影参差，幽芳零乱，翠围腰瘦一捻。岁华相误，记前度、湘皋怨别。哀弦重听，都是凄凉，未须弹彻。

国香到此谁怜，烟冷沙昏，顿成愁绝。花恼难禁，酒销欲尽，门外冰澌初结。试招仙魄，怕今夜、瑶簪冻折。携盘独出，空想咸阳，故宫落月。

高阳台

残萼梅酸，新沟水绿，初晴节序暄妍。独立雕栏，谁怜枉度华年。朝朝准拟清明近，料燕翎、须寄银笺。又争知、一字相思，不到吟边。

双蛾不拂青鸾冷，任花阴寂寂，掩户闲眠。屡卜佳期，无凭却恨金钱。何人寄与天涯信，趁东风、急整归船。纵飘零，满院杨花，犹是春前。

又

陈君衡远游未还，周公谨有怀人之赋，倚歌和之。驼褐轻装，狔鞞小队，冰河夜渡流澌。朔雪平沙，飞花乱拂蛾眉。琵琶已是凄凉调，更赋情、不比当时。想如今，人在龙庭，初劝金卮。

一枝芳信应难寄，向山边水际，独抱相思。江雁孤回，天涯人自归迟。归来依旧秦淮碧，问此愁、还有谁知。对东风，空似垂杨，零乱千丝。

又 和周草窗寄越中诸友韵

残雪庭阴，轻寒帘影，霏霏玉管春葭。小帖金泥，不知春在谁家。相思一夜窗前梦，奈个人、水隔天遮。但凄然，满树幽香，满地横斜。

江南自是离愁苦，况游骢古道，归雁平沙。怎得银笺，殷勤与说年华。如今处处生芳草，纵凭高、不见天涯。更消他，几度东

风，几度飞花。

扫花游 秋声

商飈乍发，淅淅淅初闻，萧萧还住。顿惊倦旅。背青灯吊影，起吟愁赋。断续无凭，试立荒庭听取。在何许。但落叶满阶，惟有高树。

迢递归梦阻。正老耳难禁，病怀凄楚。故山院宇。想边鸿孤唳，砌蛩私语。数点相和，更著芭蕉细雨。避无处。这闲愁、夜深尤苦。

又 绿阴

小庭荫碧，遇骤雨疏风，剩红如扫。翠交径小。问攀条弄蕊，有谁重到。谩说青青，比似花时更好。怎知道。□一别汉南，遗恨多少。

清昼人悄悄。任密护帘寒，暗迷窗晓。旧盟误了。又新枝嫩子，总随春老。渐隔相思，极目长亭路杳。搅怀抱。听蒙茸、数声啼鸟。

又 前题

卷帘翠湿，过几阵残寒，几番风雨。问春住否。但匆匆暗里，换将花去。乱碧迷人，总是江南旧树。谩凝伫。念昔日采香，今更何许。

芳径携酒处。又荫得青青，嫩苔无数。故林晚步。想参差渐满，野塘山路。倦枕闲床，正好微曛院宇。送凄楚。怕凉声、又催

秋暮。

又 前题

满庭嫩碧，渐密叶迷窗，乱枝交路。断红甚处。但匆匆换得，翠痕无数。暗影沈沈，静锁清和院宇。试凝伫。怕一点旧香，犹在幽树。

浓阴知几许。且拂簟清眠，引筇闲步。杜郎老去。算寻芳较晚，倦怀难赋。纵胜花时，到了愁风怨雨。短亭暮。谩青青、怎遮春去。

锁窗寒 春思

趁酒梨花，催诗柳絮，一窗春怨。疏疏过雨，洗尽满阶芳片。数东风、二十四番，几番误了西园宴。认小帘朱户，不如飞去，旧巢双燕。

曾见。双蛾浅。自别后，多应黛痕不展。扑蝶花阴，怕看题诗团扇。试凭他、流水寄情，溯红不到春更远。但无聊、病酒厌厌，夜月茶院。

又 春寒

料峭东风，廉纤细雨，落梅飞尽。单衣恻恻，再整金猊香烬。误千红、试妆较迟，故园不似清明近。但满庭柳色，柔丝羞舞，淡黄犹凝。

芳景，还重省。向薄晓窥帘，嫩阴玳枕。桐花渐老，已做一番风信。又看看、绿遍西湖，早催塞北归雁影。等归时、为带将归，

并带江南恨。

又

出谷莺迟，踏沙雁少，殢阴庭宇。东风似水，尚掩沈香双户。恁莓阶、雪痕乍铺，那回已趁飞梅去。奈柳边占得，一庭新暝，又还留住。

前度。西园路。记半袖争持，斗娇眉妩。琼肌暗怯，醉立千红深处。问如今、山馆水村，共谁翠幄熏蕙炷。最难禁、向晚凄凉，化作梨花雨。

应天长

疏帘蝶粉，幽径燕泥，花间小雨初足。又是禁城寒食，轻舟泛晴渌。寻芳地，来去熟。尚仿佛、大堤南北。望杨柳、一片阴阴，摇曳新绿。

重访艳歌人，听取春声，犹是杜郎曲。荡漾去年春色，深深杏花屋。东风曾共宿。记小刻、近窗新竹。旧游远，沈醉归来，满院银烛。

八六子

扫芳林。几番风雨，匆匆老尽春禽。渐薄润侵衣不断，嫩凉随扇初生。晚窗自吟。

沈沈。幽径芳寻。唼唼霭苔香帘净，萧疏竹影庭深。谩淡却蛾眉，晨妆慵扫，宝钗虫散，绣屏莺破，当时暗水和云泛酒，空山

留月听琴。料如今。门前数重翠阴。

摸鱼儿

洗芳林、夜来风雨。匆匆还送春去。方才送得春归了。那又送君南浦。君听取。怕此际、春归也过吴中路。君行到处。便快折湖边，千条翠柳，为我系春住。

春还住。休索吟春伴侣，残花今已尘土。姑苏台下烟波远，西子近来何许。能唤否。又恐怕、残春到了无凭据。烦君妙语。更为我将春，连花带柳，写入翠笺句。

又 蕤

玉帘寒、翠痕微断，浮空清影零碎。碧芽也抱春洲怨，双卷小绒芳字。还又似。系罗带相思，几点青钿缀。吴中旧事。怅酪乳争奇，鲈鱼谩好，谁与共秋醉。

江湖兴，昨夜西风又起。年年轻误归计。如今不怕归无准，却怕故人千里。何况是。正落日垂虹，怎赋登临意。沧浪梦里。纵一舸重游，孤怀暗老，余恨渺烟水。

声声慢

啼螿门静，落叶阶深，秋声又入吾庐。一枕新凉，西窗晚雨疏疏。旧香旧色换却，但满川、残柳荒蒲。茂陵远，任岁华苒苒，老尽相如。

昨夜西风初起，想蕤边呼棹，橘后思书。

短景凄然，残歌空叩铜壶。当时送行共约，雁归时、人赋归欤。雁归也，问人归、如雁也无。

又

高寒户牖，虚白尊罍，千山尽入孤光。玉影如空，天葩暗落清香。平生此兴不浅，记当年、独据胡床。怎知道，是岁华换却，处处堪伤。

已是南楼曲断，纵疏花淡月，也只凄凉。冷雨斜风，何况独掩西窗。天涯故人总老，谩相思、永夜相望。断梦远，趁秋声、一片渡江。

又

迎门高髻，倚扇清吭，娉婷未数西州。浅拂朱铅，春风二月梢头。相逢靓妆俊语，有旧家、京洛风流。断肠句，试重拈彩笔，与赋闲愁。

犹记凌波欲去，问明珰罗袜，却为谁留。枉梦相思，几回南浦行舟。莫辞玉樽起舞，怕重来、燕子空楼。谩惆怅，抱琵琶、闲过此秋。

金盏子

雨叶吟蝉，露草流萤，岁华将晚。对静夜无眠，稀星散、时度绛河清浅。甚处画角凄凉，引轻寒催燕。西楼外，斜月未沈，风急雁行吹断。

此际怎消遣。要相见、除非待梦见。盈

全宋词 王沂孙

盈洞房泪眼，看人似、冷落过秋纨扇。痛惜
小院桐阴，空啼鸦零乱。厌厌地，终日为伊，
香愁粉怨。

更漏子

日衔山，山带雪。笛弄晚风残月。湘梦
断，楚魂迷。金河秋雁飞。

别离心，思忆泪。锦带已伤憔悴。蛩韵
急，杵声寒。征衣不用宽。

锦堂春 七夕

桂嫩传香，榆高送影，轻罗小扇凉生。
正鸳机梭静，凤渚桥成。穿线人来月底，曝
衣花入风庭。看星残靛碎，露滴珠融，笑掩
云扃。

彩盘凝望仙子，但三星隐隐，一水盈盈。
暗想凭肩私语，鬓乱钗横。蛛网飘丝罥恨，
玉签传点催明。算人间待巧，似恁匆匆，有
甚心情。

青房并蒂莲

醉凝眸。是楚天秋晓，湘岸云收。草绿
兰红，浅浅小汀洲。芰荷香里鸳鸯浦，恨菱
歌、惊起眠鸥。望去帆，一片孤光，棹声伊
轧橹声柔。

愁窥汴堤翠柳，曾舞送当时，锦缆龙舟。

全宋词 王沂孙

拥倾国、纤腰皓齿，笑倚迷楼。空令五湖夜月，也羞照、三十六宫秋。正朗吟，不觉回桡，水花枫叶两悠悠。

锦堂春 中秋

露掌秋深，花签漏永，那堪此夕新晴。正纤尘飞尽，万籁无声。金镜开奁弄影，玉壶盛水侵棱。纵帘斜树隔，烛暗花残，不碍虚明。

美人凝恨歌黛，念经年间阻，只恐云生。早是宫鞋鸳小，翠鬓蝉轻。蟾润妆煤夜发，桂熏仙骨香清。看姮娥此际，多情又似无情。

如梦令

妾似春蚕抽缕。君似箏弦移柱。无语结同心，满地落花飞絮。归去。归去。遥指乱云遮处。

醉蓬莱 归故山

扫西风门径，黄叶凋零，白云萧散。柳换枯阴，赋归来何晚。爽气霏霏，翠蛾眉妩，聊慰登临眼。故国如尘，故人如梦，登高还懒。

数点寒英，为谁零落，楚魄难招，暮寒堪揽。步屧荒篱，谁念幽芳远。一室秋灯，一庭秋雨，更一声秋雁。试引芳樽，不知消

得，几多依黯。

法曲献仙音 聚景亭梅次草窗韵

层绿峨峨，纤琼皎皎，倒压波痕清浅。
过眼年华，动人幽意，相逢几番春换。记唤
酒寻芳处，盈盈褪妆晚。

已销黯。况凄凉、近来离思，应忘却、
明月夜深归鞞。荏苒一枝春，恨东风、人似
天远。纵有残花，洒征衣、铅泪都满。但殷
勤折取，自遣一襟幽怨。

淡黄柳

甲戌冬，别周公谨丈于孤山中。次冬，公谨游
会稽，相会一月。又次冬，公谨自剡还，执手聚别，
且复别去。怅然于怀，敬赋此解

花边短笛。初结孤山约。雨悄风轻寒漠
漠。翠镜秦鬟钗别，同折幽芳怨摇落。

素裳薄。重拈旧红萼。叹携手、转离索。
料青禽、一梦春无几，后夜相思，素蟾低照，
谁扫花阴共酌。

长亭怨 重过中庵故园

泛孤艇、东皋过遍。尚记当日，绿阴门
掩。屐齿莓阶，酒痕罗袖事何限。欲寻前迹，
空惆怅、成秋苑。自约赏花人，别后总、风
流云散。

水远。怎知流水外，却是乱山尤远。天

全宋词 王沂孙

涯梦短。想忘了、绮疏雕槛。望不尽、苒苒斜阳，抚乔木、年华将晚。但数点红英，犹识西园凄婉。

西江月 为赵元父赋雪梅图

褪粉轻盈琼靥，护香重叠冰绡。数枝谁带玉痕描。夜夜东风不扫。

溪上横斜影淡，梦中落莫魂销。峭寒未肯放春娇。素被独眠清晓。

踏莎行 题草窗词卷

白石飞仙，紫霞凄调。断歌人听知音少。几番幽梦欲回时，旧家池馆生青草。

风月交游，山川怀抱。凭谁说与春知道。空留离恨满江南，相思一夜苹花老。

醉落魄

小窗银烛。轻鬟半拥钗横玉。数声春调清真曲。拂拂朱帘，残影情乱红扑。

垂杨学画蛾眉绿。年年芳草迷金谷。如今休把佳期卜。一掬春怀，斜月杏花屋。

又

揉碎花心，吟碎淡黄雪。

全宋词 王沂孙

霜天晓角

翠簟一池秋水，半床露、半床月。

谒金门

恰似断魂江上柳，越春深越瘦。

失调名

挑云研雪。

王以宁

水调歌头 裴公亭怀古

岁晚橘州上 ,老叶舞愁红。西山光翠 ,依旧影落酒杯中。人在子亭高处 ,下望长沙城郭 ,猎猎酒帘风。远水湛寒碧 ,独钓绿蓑翁。

怀往事 ,追昨梦 ,转头空。孙郎前日 ,豪健颐指五都雄。起拥奇才剑客 ,十万银戈赤帟 ,歌鼓壮军容。何似裴相国 ,谈道老圭峰。

又 呈汉阳使君

大别我知友 ,突兀起西州。十年重见 ,依旧秀色照清眸。常记鲒碕狂客 ,邀我登楼雪霁 ,杖策拥羊裘。山吐月千仞 ,残夜水明楼。

黄梁梦 ,未觉枕 ,几经秋。与君邂逅 ,相逐飞步碧山头。举酒一觞今古 ,叹息英雄骨冷 ,清泪不能收。鸚鵡更谁赋 ,遗恨满芳洲。

满座芳

山耸方壶 ,潮通碧海 ,江东自昔名家。玉真仙子 ,珥佩粲朝霞。一种天香胜味 ,笑杨梅、不数枇杷。难模写 ,牟尼妙质 ,光透紫丹砂。

咨嗟。如此辈 ,不知何为 ,留滞天涯。料甘心远引 ,无意纷华。一任姚黄魏紫 ,供吟赏、银烛笼纱。南游士 ,日餐千颗 ,不愿九霞车。

又 邓州席上

千古南阳 ,刘郎乡国 ,依约楚俗秦风。英姿豪气 ,耆旧笑谈中。珥珥来从帝所 ,许洲花、潭菊从容。霜秋晓 ,凉生日观 ,极目送飞鸿。

主公。天下士 ,挥毫万字 ,一饮千钟。醉高歌起舞 ,唤醒人龙。我自人间漫浪 ,平生事、南北西东。辞公去 ,寒眸激电 ,曾识小安丰。

又 陈觉叟雪中见过

五十七年 ,侵寻老矣 ,小庵初筑林垆。故人相过 ,喜雪舞祥霏。遍野跳珠溅玉 ,纵儿童、收满金瓶。明年待 ,洗光银海 ,袖手看升平。

先生。齐物久 ,蚁丘罢战 ,蜗角休征。趁尊前身健 ,有酒须倾。随分村歌社舞 ,何须问、武宿文星。忘怀矣 ,未能忘酒 ,相与醉忘形。

又 重午登霞楼

千古黄州 ,雪堂奇胜 ,名与赤壁齐高。竹楼千字 ,笔势压江涛。笑问江头皓月 ,应曾照、今古英豪。菖蒲酒 ,窠尊无恙 ,聊共访临皋。

陶陶。谁晤对 ,粲花吐论 ,宫锦绉袍。借银涛雪浪 ,一洗尘劳。好在江山如画 ,人易老、双鬓难茝。升平代 ,凭高望远 ,当赋反离骚。

蓦山溪 和虞彦恭寄钱逊叔

平山堂上 ,侧盏歌南浦。醉望五州山 ,渺

千里、银涛东注。钱郎英远，满腹贮精神，窥素壁，墨栖鸦，历历题诗处。

风裘雪帽，踏遍荆湘路。回首古扬州，沁天外、残霞一缕。德星光次，何日照长沙，渔父曲，竹枝词，万古歌来暮。

又 游南山

雕弓绣帽。戏马秦淮道。风入马蹄轻，曾踏遍、淮堤芳草。飞英点点，春事已阑珊，风雨横，别离多，断送英雄老。

功名终在，休惜芳尊倒。谈笑下燕云，看千里、风驱电扫。男儿此事，莫待鬓丝棼，汉都护，万年觞，玉殿春风早。

念奴娇 淮上雪

天工何意，碎琼瑯玉佩，书空千尺。箬笠蓑衫扁舟下，淮口烟林如织。飞观嶙峋，子亭突兀，影浸澄淮碧。纶巾鹤氅，是谁独笑携策。

遥想易水燕山，有人方醉赏，六花如席。云重天低酣歌罢，胆壮乾坤犹窄。射雉归来，铁鳞十万，踏碎千山白。紫箫声断，唤回春满南陌。

又

云收天碧。渐风高露冷，群喧初寂。远浦归舟荒渡口，褰篷横棹堤侧。一带澄江，十分蟾影，千里寒光白。襟怀迎爽，有人独步携策。

遥想帘卷琼楼，凭阑凝望，此意知何极。声断秦箫双凤驾，凌厉飞仙同籍。问汉乘槎，采珠临海，往事空踪迹。莫辞吟赏，终宵清景。

难得。

又

晚烟凝碧。渐渔村山市，人归寂寂。有客
飞舟还顾访，应讶纶巾敲侧。得意忘年，推诚
投分，高论追元白。英标逸气，笑予穷抱真策。

兴尽又复言归，秋风分袂，浩荡思无极。
咫尺昭山明翠壁，那知中隐咸籍。说梦难听，
闭门寻梦，肯念栖萍迹。浪吟狂醉，几时还共
重得。

鹧鸪天 寿刘方明

昔有书生荐寿杯。清词妙绝贺方回。黄
花也欲为君寿，先向重阳六日开。

跻楚俗，上春台。政成归去位三台。明年
寿酒君王劝，知有传宣敕使来。

又 寿杜士美

帝乙何年骑玉龙。武夷仙伯笑相从。长
庚瑞应游仙梦，碧藕花开解愠风。

歌既醉，乐元丰。明良相悦寿无穷。野人
更有深深祝，笑指三台十八公。

又 寿张猷

桃李纷纷春事催。桐花风定牡丹开。天
麟下作人间瑞，玉燕清宵入梦来。

红玉酌，紫霞杯。五云深处望三台。君家
况有庭前柏，好个擎天八柱材。

临江仙 和子安

眼看西园红与紫 ,年来几度芳菲。 吾生四十渐知非。 祇思青箬笠 ,江上雨霏霏。

饮酒但知寻夏季 ,不须远慕安期。 丹成仙去是何时。 龟藏何必学 ,春日正迟迟。

又

此理循环如引锯 ,春来百草菲菲。 道人一笑悟前非。 功名真长物 ,夕霭与朝霏。

梦褥清孙今禄隐 ,漫郎自许风期。 江楼景物得旬时。 平芜三百里 ,天阔夕阳迟。

又 与刘拐

闻道洛阳花正好 ,家家遮户春风。 道人饮处百壶空。 年年花下醉 ,看尽几番红。

此拐又从何处去 ,飘蓬一任西东。 语声虽异笑声同。 一轮清夜月 ,何处不相逢。

浣溪沙 舫舟洪江步下

起看船头蜀锦张。 沙汀红叶舞斜阳。 杖拿惊起睡鸳鸯。

木落群山雕玉□ ,霜和冷月浸澄江。 疏篷今夜梦潇湘。

又 寿赵倅

艾胜迎薰寿缕长。 碧筩酒泛绿蒲香。 万家喜气在都梁。

小阁幽轩新料理 ,舞衫歌扇且传觞。 看君

飞步上明光。

又 张金志洗儿

招福宫中第几真。餐花辟谷小夫人。天翁新与玉麒麟。

我识外家西府相，玉壶冰雪照青春。小郎风骨已凌云。

踏莎行

梦褥光宗，河东右族。向来到耳声华熟。游从两世记金兰，风流二阮居南北。

今夕何辰，相亲灯烛。一廛我愿依韦曲。长君未可赋骅骝，山人莫为蒲轮促。

又

我自山中，渔樵冷族。一丘一壑平生熟。揭来江海寄余生，心兵语阱频奔北。

九里灵河，十分光烛。分辉借润须邻曲。柳家兄弟莫瞋人，狂奴小户元低促。

又

位正三槐，光生九族。人间一梦黄粱熟。迩来荆楚地行仙，卜居深在延原北。

笑问从前，谁调玉烛。当筵鲍老那能曲。山中饮酒是生涯，欲归未果成烦促。

感皇恩 和才仲西山子

千古洞庭湖，百川争注。雪浪银涛正如许。骑鲸诗客，浩气决云飞雾。背人歌欸乃，

凌空去。

我欲从公 ,翩然鹄举。未愿人间相君雨。
 筇簪短棹 ,是我平生真语。个中烟景好 ,烦公
 句。

庆双椿 汪周佐夫妇五月六日同生

问政山头景气嘉。仙家绿酒荐菖芽。仙
 郎玉女共乘槎。

学士文章舒锦绣 ,夫人冠帔烂云霞。寿香
 来是道家。

渔家傲

往事闲思人共怕。十年塞上烟尘亚。百
 万铁衣驰铁马。都弄罢。八风断送归莲社。

卖药得钱休教化。归来醉卧蜗牛舍。一
 颗明珠元不夜。非待借。神光穿透诸天下。

好事近

诗客少微家 ,世有斗南人杰。一段素襟清
 韵 ,似玉壶冰雪。

怀中卿相饱经纶 ,况是好时节。我有太平
 歌颂 ,待形容贤业。

又

白石读书房 ,世有斗南人杰。一段素襟清
 韵 ,似玉壶冰雪。

仙家赤酒荐交梨 ,道眼况超越。来往十洲

三岛 跨一轮新月。

虞美人 宿龟山夜登秋汉亭

归来峰下霜如水。明月三千里。幽人独立瞰长淮。谁棹扁舟一叶、趁潮来。

洞庭湖上银涛观。忆我烟蓑伴。此身天地一浮萍。去国十年华发、欲星星。

浣溪沙 张国泰生日

快雨疏风六月凉。貂蝉人著彩衣裳。肃然心拜玉炉香。

相国趣还调鼎鼐，潘舆指日下潇湘。秋来江上接归航。

南歌子 李左司生日

未折江南柳，先开陇上梅。绿情红意到根荄。昨夜春随和气、已归来。忠力扶昌运，冲和保圣胎。阳功阴德好栽培。他日骑鲸仙路、指蓬莱。

鹧鸪天 刘运判生日

瑞雪当空舞素英。玳筵收得满金瓶。洗教双眼明如镜，看取黄河几度清。

龟畀寿，鹤为形。年年长愿见仪刑。他年林下逢彭祖，唤作谁家小后生。

王易简

齐天乐 客长安赋

宫烟晓散春如雾。参差护晴窗户。柳色初分, 飏香未冷, 正是清明百五。临流笑语。映十二阑干, 翠嚙红妒。短帽轻鞍, 倦游曾遍断桥路。

东风为谁媚妩。岁华顿感慨, 双鬓何许。前度刘郎, 三生杜牧, 赢得征衫尘土。心期暗数。总寂寞当年, 酒筹花谱。付与春愁, 小楼今夜雨。

酹江月

暗帘吹雨, 怪西风梧井, 凄凉何早。一寸柔情千万缕, 临镜霜痕惊老。雁影关山, 蛩声院宇, 做就新怀抱。湘皋遗佩, 故人空寄瑶草。

已是摇落堪悲, 飘零多感, 那更长安道。衰草寒芜吟未尽, 无那平烟残照。千古闲愁, 百年往事, 不了黄花笑。渔樵深处, 满庭红叶休扫。

庆宫春 谢草窗惠词卷

庭草春迟 ,汀苹香老 ,数声佩悄苍玉。年
晚江空 ,天寒日暮 ,壮怀聊寄幽独。倦游多感 ,
更西北、高楼送目。佳人不见 ,慷慨悲歌 ,夕阳
乔木。

紫霞洞窅云深 ,袅袅余香 ,凤箫谁续。桃
花赋在 ,竹枝词远 ,此恨年年相触。翠榭芳宇 ,
谩重省、当时顾曲。因君凝伫 ,依约吴山 ,半痕
蛾绿。

天香 宛委山房拟赋龙涎香

烟峤收痕 ,云沙拥沫 ,孤槎万里春聚。蜡
杵冰尘 ,水研花片 ,带得海山风露。纤痕透晓 ,
银镂小、初浮一缕。重剪纱窗暗烛 ,深垂绣帘
微雨。

余馨恼人最苦。染罗衣、少年情绪。谩省
佩珠曾解 ,蕙羞兰妒。好是芳钿翠妩。恨素被
浓熏梦无据。待剪秋云 ,殷勤寄与。

水龙吟 浮翠山房拟赋白莲

翠裳微护冰肌 ,夜深暗泣瑶台露。芳容淡
泞 ,风神萧散 ,凌波晚步。西子残妆 ,环儿初
起 ,未须匀注。看明珰素袜 ,相逢憔悴 ,当应
被、西风误。

十里云愁雪妒。抱凄凉、盼娇无语。当时

全宋词 王易简

姊妹 朱颜褪酒 红衣按舞。别浦重寻 旧盟唯有 一行鸥鹭。伴玉颜月晓 盈盈冷艳 洗人间暑。

摸鱼儿 紫云山房拟赋蕤

怪蛟宫、水晶帘卷 冰痕初断香缕。澄波荡桨人初到 三十六陂烟雨。春又去。伴点点荷钱 隐约吴中路。相思日暮。恨洛浦娉婷 芳钿翠剪 奁影照凄楚。

功名梦 消得西风一度。高人今在何许。鲈香菰冷斜阳里 多少天涯意绪。谁记取。但枯豉红盐 溜玉凝秋箸。尊前起舞。算唯有渊明 黄花岁晚 此兴共千古。

齐天乐 余闲书院拟赋蝉

翠云深锁齐姬恨 纤柯暗翻冰羽。锦瑟重调 绡衣乍著 聊饮人间风露。相逢甚处。记槐影初凉 柳阴新雨。听尽残声 为谁惊起又飞去。

商量秋信最早。晚来吟未彻 却是凄楚。断韵还连 余悲似咽 欲和愁边佳句。幽期谁语。怕寒叶凋零 蛻痕尘土。古木斜晖 向人怀抱苦。

王 亿 之

高阳台

双桨敲冰，低篷护冷，扁舟晓渡西泠。
回首吴山，微茫遥带重城。堤边几树垂杨柳，
早嫩黄、摇动春情。问孤鸿，何处飞来，共
唤飘零。

轻帆初落沙洲暝，渐潮痕雨渍，面色风
皴。旅思羁愁，偏能老大行人。姮娥不管征
途苦，甚夜深、尽照孤衾。想玉楼，犹凭阑
干，为我销凝。

王 义 山

千年调 游葛岭归有感

胜地独湖山，满堂贮风月。歌舞太平气象，雪回云遏。红鞋朱帽，隔岸唤船，芙蓉万叠。人稀到，这清绝。

因思旧事，庄敞平泉宅。莫与他人树石，对儿孙说。难全晚节，不如一丘壑。住茅屋三间，任穷达。

水调歌头 寿湖南胡太初

沆瀣金茎露，清洁玉壶冰。分明昨夜，光见南极老人星。山甫秀钟崧岳，传说上符箕尾，造物为时生。一代词科伯，飞上到蓬瀛。

紫薇天，丹禁地，掌丝纶。盘洲益国，个样人物只三人。辞却翰林风月，故就湖湘霖雨，天下共为春。试看玉堂□，太半秉洪钧。

临江仙 寿章丞相

明日中元生上相，真上相上元生。满城

全宋词 王义山

灯火昼三更。台星呈瑞处，一点寿星明。

和气薰蒸开泰运，湖山万里光荣。愿推天地发生仁。八荒开寿域，一气转洪钧。

满庭芳 寿余节使

线柳迎风，锦棠媚日，十分春色豪奢。青烟宫烛，飞入侍臣家。瑞霭深笼画戟，寿星照、曲薰高牙。因知是、崧高华旦，玳宴醉琼花。翻鸦。新诏墨，闻枢庭召入，已办宣麻。比汾阳福寿，公更穹华。伫看稠青叠紫，书香蔼、桂子兰芽。鸣珂处，西湖路上，接武筑堤沙。

水调歌头 乙亥春永嘉归舟

宇宙邮亭耳，游子问舟归。滩上滩下，转舵欲速□□迟。安得泛河一叶，寻见江南归处，多只是旬余。此身无地著，惊浪湿征衣。

独张翰，见风起，早知机。谁把乘舟，偏重良策济明时。夷岛人烟相接，恰在永嘉上浦，猛忆浩然诗。乡闾万余里，失路一相悲。

贺新郎 乙亥春题雁荡山

雅有登山癖。觉老来、尚可跻攀，浪游蹊屐。险怪巉峣称雁荡，争秀群山第一。更

耸出、穹崖千尺。景物深藏长谷里，最上龛，
水凿时冲激。砗磲处，钜□石。

地生天作谁能识。睹江山如故，恨无一
时人物。灵运当年为太守，佳处都曾游历。
独不见、此山脚迹。风月直须人管领，怎不
移、石壁题岩壁。今且著，老夫笔。

念奴娇

题临湖阁。阁在东阳，向巨源所创，洪容斋作
记，旧赘漕幕居其下

南昌奇观，最东湖、好景重重叠叠。谁
瞰湖光新佳阁，横挹翠峰巖巖。十里芙蓉，
海神捧出，一镜何明彻。鸢鱼飞跃，活机触
处泼泼。

容斋巨笔如椽，迎来一记，赢得芳名独。
猛忆泛莲前日事，诗社杯盘频设。倚看斜阳，
檐头燕子，如把兴亡说。谁迎谁送，一川无
限风月。

瑞龙吟 寿京尹曾留远

晨光曙。遥见□灼文奎，照天心处。峨眉
眉棱上西飞，北魁南极，腾辉灿丽。

神皋地。争看碧幢旗戟，蔼然佳气。深
深有美堂中，绣帟□幕，笙歌不住。

知是元戎初度，玉觥频举，云堤烟市。
时听笑声，都人相贺相语。人人说是，活佛
生今世。襟怀内、严霜莹月，春风秋水。文
肃貂蝉贵。南丰学问，文昭节义。若问庄椿

岁。堪谁比，清源曾公寿齿。郎君宥府，充衣荣侍。

贺新郎 自贺生孙。丙戌四月

自笑斟醪醑。作皤然一老，逍遥东湖湖曲。好事爆然来子舍，报道生孙新浴。算天也、从人所欲。万事足虽缘有子，见孙时、万事方为足。诗礼脉，今有续。

吾家本是山阴族。见生来、风神稍秀，足娱吾目。吾子吾孙同此月，日月才争五六。喜听得、欢声满目。愚鲁聪明天所赋，只无灾无难为多福。且愿汝，书勤读。

乐 语

寿崇节致语 隆兴府

万年介寿，星辰拱文母之尊；四海蒙恩，雨露宠周臣之宴。颂声交作，协气横流。与天同心，为民立命。以圣子承承继继，九州悉臣；奉太后怡怡愉愉，亿载永久。宝册加徽称于汉典，彩衣绚瑞色于舜庭。捧金炉香，胥庆寿崇之旦；□玉卮酒，永延长乐之春。躬稟聪明，性纯爱敬。晋福介王母，三千年之桃晕新红；华封祝圣人，八九叶之蓂开并绿。耳凤韶之雅奏，身鱼藻之深仁。臣等幸囿明时，忻逢盛事。遥瞻禁卫，蔼播衢谣：东极承颜肃紫宸。恩醲湛露宴群臣。香传禁柳鸣球瑟，影颤宫花蔼缙绅。璀璨神光三殿晓，怡愉和气万年春。明朝又纪流虹瑞，更效封人祝圣人。

对厅致语

怡愉奉太后，称觴盛长乐之仪；普率皆王臣，会□（库本作“宴”）接镐京之饮。欢浮鱼藻，光射斗牛。恭惟特进大观文大丞相国公四海儒宗，两朝元老。巨川舟楫，旱岁霖雨；不有其功，清时钟鼓，胜事园林，自乐以道。暂游洛社，更筑沙堤。宫使端明相公吟遍玉堂，来寻绿野。听星辰履，久联紫殿之清；依日月光，已觉黄扉之近。宫使阁学尚书为国喉舌，同姓腹心。寄兴西山，虽喜林泉萧散；召还北阙，要推社稷经纶。观使提刑户部曾策驹骖，肯盟鸥鹭。入直天上，尚记青藜；趣起山中，便持紫橐。提刑诏使提刑部洒人寒露，厉古清风。衡岳云开，会见郎官列宿；甘泉地近，即依天子九重。观使提刑判府监丞玉节犹香，幅巾自适。胸中宇宙，素存开济之心；足下风云，直峻清华之武。观使判府刑部老成器局，光霁襟怀。赞白云之司，早培朝望；翔紫霄之表，简在帝心。众位判府郎卿金石春鸣，琳琅映照。吟万柳阴中之句，香入诏芝；接五花影里之班，望高玉笋。及梓里满前之材俊，皆兰台向上之磁基。我知府、运使、华文、国史、秘监、侍郎，渠观联辉，节麾叠组。不知昼锦为邦家之光、闾里之荣；但喜阳春在天庭之间、湖山之外。嘉与十一郡黎献之众，载歌万亿载慈祥之诗。寿崇方庆于坤闾，既醉共分于天禄。合星垣之宾佐，偕月乘之儒流。蓉府材能，柳营韬略。客坐联杏坛之秀，男邦藁花县之英。笾豆肆陈，笙簧迭奏。福介于王母，幸永瞻慈极之尊；河清生圣人，更同效华封之祝。□（库本作“某”）等敷陈俚词，扬厉休期。八叶薰香夏气清。坤闾有庆佛同生。枫宸称寿云霄迥，莘野沾恩雨露深。祚永万年齐晋福，孝濡九有乐升平。电枢又报祥光绕，虎拜扬休天子明。

唱

金阙深深，正夏日初长禁柳青。祥烟纷簇，红云一朵，飞度彤庭。千妃随步处，觉薰风、微拂觚棱。天颜喜，向东朝长乐，献九霞觥。

分明。西昆王母，来从光碧驾飞辇。为言今日，金仙新浴，共庆长生。捧桃上寿，天一笑、赐宴蓬瀛。沸欢声。道明朝前殿，又祝椿龄。

勾问队心

妾闻舜殿重华，薰风初奏；唐宫兴庆，寿日新逢。远方称赞效微诚，女队踟蹰呈妙舞。腰翻翠柳，步趁金莲。岂无皓齿之歌，可表丹心之祝。相携纤手，共蹑华裾。

唱柘枝令

西山元是神仙境，瑞气郁森森。彩鸾飞下五云深。急管递繁音。

碧鬟□斜花欲颤，轻盈莲步移金。紫檀催拍莫沈吟。传入柘枝心。

花心唱

慈元宫殿五云开。寿献九霞杯。步随王

母共徘徊。仙子下瑶台。

红袖引翻鸾镜媚，婆娑雪□风回。繁弦脆管莫相催。齐唱柘枝来。

四角唱

风吹仙袂飘飘举，底事下蓬莱。东朝遥祝万年杯。玉液泻金罍。

天上蟠桃又熟，晕酡颜、红染芳腮。年年摘取献天阶。齐舞柘枝来。

遣队

铜壶漏转，屡惊花影之移；桂棹风轻，已觉蓬莱之近。覆衲已蹙，雪鼓重催。歌舞既周，好去好去。

勾队

瞻寿星于南极，瑞启东朝；移仙驭于西山，望倾北阙。式歌且舞，共祝无疆。

吴仙诗

一曲清歌艳彩鸾。金炉香拥气如兰。西山高与南山接，剩有当时却老丹。

唱

千年紫极锁烟萝。艳质含羞敛翠蛾。远

全宋词 王义山

睇慈元称寿处，不妨连臂，大家重与，楚舞更吴歌。

谶仙诗

冉冉飞霜缀绮裳。遥知谶母下丹阳。黄金炼就三山药，来采蒲花献寿觞。

唱

秘传玉诀自灵修。家在仙山最上头。更有仙茅香馥郁，年年今日，薰风时候，掇取献龙楼。

鹤山诗

饮马池边号浴仙。仙姿化鹤古今传。金经尤有延年诀，未数庄椿寿八千。

唱

自在云间白鹤飞。晴川浴罢不胜衣。旋裁五色冰蚕锦，千花覆处，三呼声里，惹得御香归。

龙仙诗

楚尾吴头风乍薰。沧波深拥小龙君。愿朝帝母龙楼晚，来曳霞裾驾五云。

唱

闲云潭影日悠悠。暮倚朱帘更少留。龙
寿本齐箕与翼，□从今日，一年一度，东极
庆千秋。

柏仙诗

古柏林间小剑仙。云鬟低绾躡轻蝉。愿
持天上长生篆，来祝东朝亿万年。

唱

新吴曾遇许旌阳。宝气横空一剑长。愿
祝慈闱长不老，天长地久，有如此柏，万古
镇苍苍。

遣队

花朝日转，睹妙舞之初停；莲步云生，学飞仙
之难驻。遥瞻翠闼，已启金扃。待拟重来，不妨好
去。

王母祝语

长乐宫中，永壶天之日月；蓬莱岛上，曳洞府
之烟霞。不辞弱水之遥，来祝南山之寿。恭惟体坤
至静，与佛同生。德比周任，知文王之所以圣；尊

为太后，喜唐帝之孝于亲。和藹一堂，庆流万宇。昆圃五城宅，幸居至治之朝；云璈九霞觞，因献长生之筭。恭惟丕丞慈训，克绍洪休。八九叶蓂开，接虹流于华渚；三千年桃熟，侑宴饮于瑶池。薰风迭奏于虞弦，湛露载沾于周泽。臣□（库本作“等”）喜游化国，适际昌辰。密依天阙之光，好诵仙家之句。

壶峤天低乐圣时。南薰初试度兰池。影飞霞佩朝金殿，曲奏云和献玉卮。稽首万年尧历永，承颜五色舜衣垂。仙家更有蟠桃在，明日重来谒帝墀。

唱

龙楼日永，鹤禁风薰，拂晓寿星光现。无限霞裾，欣传帝母，与佛同生华旦。佳气慈闱，看龙颜欢动，玉卮亲劝。捧祝殷勤，对萱草青鬆，菖蒲翠软。奇香喷，阶前芍药，频繁红深紫浅。

遥望千官鹭序，晓仗初齐，趋观慈元宫殿。更喜明朝，虹流佳节，同听嵩山呼万。湛露重重，燕庆两宫，盛事如今亲见。齐祝愿、西昆凝碧，南山增绿，与天齐算。身长好，年年拜舞宫花颤。

勾队

万岁山前，三呼祝寿；千花海里，一□□□。从来无日不春，况是薰风初夏。蔷薇□□，芍药翻阶。葵欲向阳，榴将喷火。正好共寻奇卉，来献芳筵。对仙李之盘根，今朝一转；庆蟠桃之结实，明日重来。上侑清欢，千花入队。

万年枝诗

百子池边景最奇。无人识是万年枝。细花密叶青青子，常得披香雨露滋。东风向晚薰风早。禁路飞花沾寿草。年年圣主寿慈闱，先献此花名字好。

唱

先献此花名字好。密叶长青，翠羽仙葆。紫禁风薰惊夏到。花飞细□香堪扫。

拂晓宫娃争报道。无限琼妃，缥缈来蓬岛。来向慈闱勤颂祷。万年枝□同难老。

长春花诗

东风不与世情同。多付春光向此中。叶里尽藏云外绿，枝头剩带日边红。百花能占春多少。何似春颜长自好。清和时候卷红绡，端的长春春不老。

唱

端的长春春不老。玉颊微红，酒晕精神好。多谢天工相懊恼。花间不问春迟早。

风外新篁摇翠葆。长乐宫边，绿荫笼驰道。此际称觞非草草。绛仙亲下蓬莱岛。

菖蒲花诗

昔年有母见花轮。富贵长年不记春。今报紫茸

全宋词 王义山

依碧节，献来慈极寿庄椿。汉家天子嵩山路。又见蒲仙相与语。而今帝母两怡愉，莫忘九疑山上侣。

唱

莫忘九疑山上侣。住在山中，白石清泉处。好与长年沾雨露。灵根下遣蟠虬护。
青青九节长如许。早晚成花，教见薰风度。十二节添须记取。千年一节从头数。

萱草花诗

当年子建可诗章。绿叶丹花有晔光。为道宜男仍永世，福齐太姒炽而昌。犹记夏侯曾与赋。灼灼朱华入嘉句。紫微右极是慈闱，岁岁丹霞天近处。

唱

岁岁丹霞天近处。借问殷勤，何以逢兰杜。碧砌玉阑春不去。清香长逐薰风度。
况是恩光新雨露。绿叶青青，葱翠长如许。端的萱花仙伴侣。年年今日阶前舞。

石榴花诗

待阙南风欲上场。阴阴稚绿绕丹墙。石榴已著乾红蕾，无尽春光尽更强。不因博望来西域。安得名花出安石，朝元阁上旧风光，犹是太真亲手植。

唱

犹是太真亲手植。猩染鲜葩，岁岁如曾拭。绛节青旌光耀日。分明是个神仙匹。

引领金扉红的的。下有仙妃，纤手轻轻摘。为道朱颜常似得。今朝摘取呈慈极。

梔子花诗

当年曾记晋华林。望气红黄梔子深。有敕诸官勤守护，花开如玉子如金。此花端的名薺卜。千佛林中清更洁。从知帝母佛同生，移向慈元供寿佛。

唱

移向慈元供寿佛。压倒群花，端的成清绝。青萼玉包全未拆。薰风微处留香雪。

未拆香包香已冽。沈水龙涎，不用金炉爇。花露轻轻和玉屑。金仙付与长生诀。

蔷薇花诗

碎剪红绡间绿丛。风流疑在列仙宫。朝真更欲薰香去，争掷霓衣上宝笼。忽惊锦浪洗春色。又似宫娃逞妆饰。会当一遣移花根，还比蒲桃天上植。

唱

还比蒲桃天上植。稚柳阴中，蜀锦开如

全宋词 王义山

织。万岁藤边娇五色。宜春馆里香寻觅。
七十二行鲜的的。岁岁如今，早趁薰风
摘。金掌露浓堪爱惜。龙涎华润凝光碧。

芍药花诗

倚竹佳人翠袖长。阿姨天上舞霓裳。娇红凝脸
西施醉，青玉阑干说叠香。晚春早夏扬州路。浓妆
初试鹅红妒。何如御伞掖垣中，日日传宣金掌露。

唱

日日传宣金掌露。当殿芳菲，似约春长
驻。微紫深红浑漫与。淡妆偏趁泥金缕。
拂早薰风花里度。吹送香尘，东殿称觞
处。歌罢花仙归洞府。彩鸾驾雾来南浦。

宫柳花诗

御墙侧畔绿垂垂。接夏连春花点衣。好似雪茵
胡旋舞，楼台帘幕燕初飞。薰风日永龙墀晓。宫妃
簇仗呈千巧。就中妙舞最工奇，戏袞玉球添一笑。

唱

戏袞玉球添一笑。笑道轻狂，似恁人间
少。偏倚龙池依凤沼。随风得得低回绕。
掠面点衣夸百巧。似雪飞花，点束梁园
好。惹住金虬香篆袅。上林不放春光老。

蟠桃花诗

蕊珠仙子驾红云。来说瑶池□□（库本作“分外”）春。道是当年和露种，三千花实又从新。红云元透西昆路。青鸟衔枝花□□（库本作“颤舞”）。薰风初动子成初，消息一年传一度。

唱

消息一年传一度。万岁枝香，总是留春处。曾倚东风娇不语。玉阶霞袂飘飘举。
蓬莱清浅红云路。结子新成，要荐金盘去。一实三千须记取。东朝宴罢回青羽。

众唱

十样仙葩天也爱。留住春光，一一娇相赛。万里莺花开世界。园林点检随时采。
□□□眉仙体态。天与司花，舞彻歌还再。献与千官头上戴。年年万岁声中拜。

王 益

诉衷情

烧残绛蜡泪成痕。街鼓报黄昏。碧云又
阻来信，廊上月侵门。

愁永夜，拂香裯。待谁温。梦兰憔悴，
掷果凄凉，两处销魂。

王益柔

喜长新

秋云朔吹晓徘徊。雪照楼台。梁王宴召
有邹枚。相如独逞雄才。

明烛薰炉香暖，深劝金杯。庭前粉艳有
寒梅。一枝昨夜先开。

王 泳 祖

风流子

东风长是客，帘栊静、燕子一双飞。看
花坞日高，翠阴护晓，柳塘风细，绿涨浮漪。
肠断处，渭城春树远，江国暮云低。芳径听
莺，暗惊心事，画檐闻鹊，试卜归期。

小楼凝伫地，疏窗小，几度对说相思。
记得菱花交照，素手曾携。有新恨两眉，向
谁说破，芳心一点，惟我偏知。休为多情瘦
却，重有来时。

全宋词 王幼玉

王幼玉

失调名

粉面羞搽泪满腮。

王岍

祝英台近

柳烟浓 ,花露重 ,合是醉时候。楼倚花梢 ,
长记小垂手。谁教钗燕轻分 ,镜鸾慵舞 ,是孤
负、几番春昼。

自别后。闻道花底花前 ,多是两眉皱。又
说新来 ,比似旧时瘦。须知两意长存 ,相逢终
有。莫漫被、春光倏愆。

夜行船

曲水溅裙三月二。马如龙、钿车如水。风
扬游丝 ,日烘晴昼 ,人共海棠俱醉。客里光阴
难可意。扫芳尘、旧游谁记。午梦醒来 ,小窗
人静 ,春在卖花声里。

王禹偁

点绛唇 感兴

雨恨云愁，江南依旧称佳丽。水村渔市。
一缕孤烟细。

天际征鸿，遥认行如缀。平生事。此时
凝睇。谁会凭栏意。

王 玉

朝中措

杨花绕昼暖风多。晴云点池波。戏数翠萍几靥，零星未碍圆荷。

软人天气，半如溽暑，半似清和。说与香篝缦火，酒痕梅却衣罗。

王 月 山

齐天乐

夜来疏雨鸣金井，一叶舞空红浅。莲渚收香，兰皋浮爽，凉思顿欺班扇。秋光苒苒。任老却芦花，西风不管。清兴难磨，几回有句到诗卷。

长安故人别后，料征鸿声里，画阑凭偏。横竹吹商，疏砧点月，好梦又随云远。闲愁似线。甚系损柔肠，不堪裁剪。听著鸣蛩，一声声是怨。

王 云 焕

沁园春

四十君王，三百载间，兴亡一家。叹幕府峰高，生涯社燕，胭脂井暗，富贵飞花。山骨呈羞，江声带恨，磨尽英雄岁月赊。君知否，是枋头灞上，著数全差。

倚空长剑吁嗟。奈争战年来似乱麻。但苍陵古冢，白杨啼鸩，荒园废沼，青草鸣蛙。旗盖东南，风涛天堑，难比兴亡隙地些。休凝伫，望长安路杳，夕阳愁鸦。

王 澡

霜天晓角 梅

疏明瘦直。不受东皇识。留与伴春终肯，
千红底、怎著得。

夜色。何处笛。晓寒无奈力。若在寿阳
宫院，一点点、有人惜。

祝英台近 别词

玉东西，歌宛转。未做苦离调。著上征
衫，字字是愁抱。月寒鬓影刁萧，舵楼开缆，
记柳暗、乳鸦啼晓。

短亭草。还是绿与春归，罗屏梦空好。
燕语难凭，憔悴未渠了。可能妒柳羞花，起
来浑懒，便瘦也、教春知道。

王之道

庆清朝 追和郑毅夫及第后作

晓日彤墀 ,春风黄伞 ,天颜咫尺清光。恩袍初赐 ,一时玉质金相。济济满廷鹓鹭 ,月卿映、日尹星郎。鸣鞘绕 ,锦鞞归路 ,醉舞醒狂。

追随宝津琼苑 ,看穿花帽侧 ,拂柳鞭长。临流夹径 ,参差绿荫红芳。宴罢西城向晚 ,歌呼笑语溢平康。休相恼 ,争揭疏帘 ,半出新妆。

谒金门 追和冯延巳

春睡起。金鸭暖消沈水。笑比梅花鸾鉴里。嗅香还嚼蕊。

琼户倚来重倚。又见夕阳西坠。门外马嘶郎且至。失惊心暗喜。

蝶恋花 和张文伯魏园行春

春入花梢红欲半。水外绿杨 ,掩映笙歌院。霁日迟迟风扇暖。天光上下青浮岸。

归去画楼烟暝晓。步拾梅英 ,点缀宫妆面。美目碧长眉翠浅。消魂正值回头看。

又 和张文伯上巳雨

檐溜潺潺朝复暮。燕子衔泥,穿幕来还去。素锦青袍知有处。花光草色迷汀渚。
春不负人人自负。君看流觞,只恁良宵度。厌浥小桃如泣诉。东风莫漫飘红雨。

又

城上春旗催日暮。柳絮沾泥,花蕊随流去。记得前时行乐处。小桥水绿初平渚。
玉子纹楸谁胜负。不道光阴,暗向闲中度。天若有情容我诉。春来底事多阴雨。

又 和王冲之木犀

庭院雨余秋意晚。一阵风来,到处清香遍。把酒对花情不浅。花前敢避金杯满。
苍卜醪醑虽惯见。常恨揜先,不是君徒伴。莫把龙涎轻斗远。流芳肯逐炉烟断。

又 和张文伯海棠

碧雾暗消香篆半。花影穿帘,厌浥苍苔院。鸂鶒一双塘水暖。浮沈时近垂杨岸。
雨过不知春事晚。但怪朱唇,得酒红潮面。野蔌山肴三四盞。携尊更向花前看。

又 和鲁如晦围棋

玉子纹楸频较路。胜负等闲,休冶黄金注。黑白斑斑乌间鹭。明窗净见谁知处。
逼剥声中人不语。见可知难,步武来还去。何日挂冠官一亩。相从识取棋中趣。

又 和鲁如晦梅花二首

曾向水边云外见。争似霜蕤,照映苍苔

全宋词 王之道

院。檀口半开金袅线。端相消得纶巾岸。
点缀南枝红旋旋。准似杯盘,日向花前
宴。飞雪飘飘云不卷。何人览镜凭阑看。

又

杏靛桃腮俱有腴。常避孤芳,独斗红深
浅。犯雪凌霜芳意展。玉容似带春寒怨。
分得数枝来小院。依倚铜瓶,标致能清
远。淡月帘栊疏影转。骚人为尔柔肠断。

又 追和东坡,时留滞富池

寒雨霏霏江上路。不见书邮,病目空凝
注。沙觜尽头飞白鹭。篙师指似人来处。
自笑自怜还自语。钝滞如君,只合归田
去。竹屋数间环畝亩。个中自有无穷趣。

宴山亭 海棠

微雨斑斑,晕湿海棠,渐觉燕脂红褪。迟
日短垣,娇怯和风,摇曳一成春困。玉软酴酥,
扶不起、晚妆慵整。愁恨。对佳时媚景,可堪
重省。

曾约小桃新燕,有蜂媒蝶使,为传芳信。
西蜀杜郎,东坡苏老,道也道应难尽。一朵风
流,雅称且、凤翘云鬓。相映。眉拂黛、梅腮弄
粉。

风流子 和桐城魏宰

扁舟南浦岸,分携处、鸣佩忆珊珊。见十

全宋词 王之道

里长堤 ,数声啼鸪 ,至今清泪 ,襟袖斓斑。谁信道 ,沈腰成瘦减 ,潘鬓就衰残。漫把酒临风 ,看花对月 ,不言拄笏 ,无绪凭阑。

相逢复相感 ,但凝情秋水 ,送恨春山。应念马催行色 ,泥溅征衫。况芳菲将过 ,红英婉娩 ,追随正乐 ,黄鸟间关。争得此心无著 ,浑似云闲。

玉连环 题载安僧舍

流水细通何处。柳溪新雨。清风十里送篮舆 ,行不尽、山无数。

一簇楼台翠堵。老僧常住。悬知俗客不曾来 ,门外苍苔如许。

江城子 和彦时兄

新篁初上箨龙陂。绿阴稀。绿阴稀。墙外石榴 ,花放两三枝。裙褶绛纱还半皱 ,追往事 ,惜佳期。

流莺娇婉燕双飞。雨晴时。雨晴时。卢橘攒金 ,梅子更红肥。浊酒一杯从径醉 ,家纵远 ,梦中归。

又 追和东坡雪

寒光凌乱六花纤。巧穿帘。不鸣檐。十里黄垆 ,遥望辨青帘。玉树参差何处觅 ,吟雪曲 ,捻霜髯。

坐来令我看无厌。拟名盐。试尝甜。飞入深潭 ,应照老蛟潜。三白频占来岁稔 ,良可

喜,更何嫌。

水调歌头 赵帅圣用生日

颢气遍寰宇,风露逼衣裘。中秋昨夜,明月千里满西楼。人道当年今日,海上骑鲸仙客,乘兴下瀛州。雅志在扶世,来佐紫宸游。

庙堂上,须早计,要嘉谋。牙床锦帐,三岁江北叹淹留。好在蟹螯如臂,判取兵厨百斛,与客醉瑶舟。待得蟠桃熟,相约访浮丘。

又 追和东坡

湖上有佳色,黄菊傲霜秋。一尊相属,谈咏彼此得无愁。何处鲈鱼初荐,错俎金齑点鲙,令我忆东州。双鹭带斜日,飞下白苹洲。

晚风劲,吹残酒,袭破裘。故人俱在,江左底事独淹留。归去草堂侵夜,一点青荧灯火,得句可忘忧。欲识无穷意,终日倚城楼。

又 和张文伯对月词

斜阳明薄暮,晴雨霁凉秋。弱云狼藉,晚来风起,席卷更无留。天外老蟾高挂,皎皎寒光照水,金璧共沈浮。宾主一时杰,倾动庾公楼。

渡银汉,转玉露,势欲流。不妨吟赏,坐拥红袖舞还讴。暗祝今宵素魄,助我清才逸气,稳步上瀛洲。欲识瀛洲路,雄据六鳌头。

又 张文伯生日

琼树挂初日,珠箔卷清霜。夜来溪上微雨,佳节过重阳。共庆当年此际,曾见天麟协

梦 ,华阙挂蓬桑。人作鲁侯祝 ,俾尔寿而臧。
保疲瘵 ,旌德善 ,致吉祥。会看报政 ,朝夕
芝检趣徵黄。不藉灵丹九转 ,不用蟠桃三窃 ,
源远流流长。愿借沧溟富 ,斟酌荐瑶觞。

又 用王冲之韵赠僧定渊

败屋拥破衲 ,惊飙漫飏飏。不离当处人
见 ,操慧上蓝游。弹指九州四海 ,浪说其来云
聚 ,其去等风休。莫作袈裟看 ,吾道惯聃丘。
齐死生 ,同宠辱 ,混春秋。高名厚利 ,眇若
天地一蜉蝣。闲举前人公案 ,试问把锄空手 ,
何似步骑牛。会得个中语 ,净土在阎浮。

又 秦寿之生日

暑雨湿修竹 ,凉吹入高檐。鹭洲钟阜如
画 ,霁色为秬纤。槛外藕花无数 ,妆点休祥嘉
应 ,不觉有秋炎。谪仙堕人世 ,香雾郁重帘。
富才艺 ,强记览 ,三万签。须信公侯有种 ,
道义自相渐。此去腰金佩玉 ,回视依莲泛水 ,
岁月亦何淹。称觞还戏彩 ,无惜醉厌厌。

青玉案 对雪追和谢幼盘

金尊照坐红裙绕。怪一饷、歌声悄。乱扑
珠帘风絮晓。香薰笑语 ,酒烘颜色 ,莫逐流年
老。

诗涛入笔悬河倒。快万里云天为君扫。
检点春容何处早。柳条青眼 ,梅梢粉面 ,得恁
于人好。

又 送无为守张文伯还朝

逢人借问钱塘路。我亦欲、西湖去。目送

兰桡知几度。鳌峰浮玉，鲸波飞雪，正是潮来处。

海棠花下春将暮。缓唱新词味佳句。见说东君曾梦许。柏台冠豸，金銮视草，便作商岩雨。

又 有怀轩车山旧隐

半年不踏轩车路。仿佛过、长桥去。贴水行云风送度。两行高柳，一坡修竹，是我尝游处。

黄鹂休叹青春暮。出谷迁乔旧家句。天意从人还许诉。凝寒和气，沈阴霁色，大旱滂沱雨。

风箫吟 和彦时兄重九

雨溟蒙。年年今日，农夫共卜新丰。登高随处好，银瓶突兀，南峙对三公。真珠溥露菊，更芙蓉、照水匀红。但华发衰颜，不堪频鉴青铜。

相逢。行藏休借问，且徘徊、目送飞鸿。十年湖海，千里云山，几番残照凄风。蟹螯粗似臂，金英碎、琥珀香浓。请细读离骚，为君一饮千钟。

卜算子 和兴国守周少隐饯别万山堂

拄颊看西湖，屡对纶巾岸。江上相从醉万山，六见年华换。

君唱我当酬，我醉君休管。明日醒时小艇

乐 莫负传书雁。

又

堂下水浮天 ,人指山为岸。水落寒沙只见山 ,暗被天偷换。

堂上老诗翁 ,客至劳相管。风喘西头客自东 ,目送云中雁。

又

今日富川滨 ,后夜湓江岸。千里西湖指顾间 ,未怕新年换。

再见复何时 ,此意凭吟管。应有新诗当尺书 ,日望南来雁。

丑奴儿 对雪和彦逢弟

青腰似谄天公富 ,奔走风云。银界无痕。委巷穷山草木春。

五楼不怕歌茵湿 ,笑语纷纷。须放他们。醉里冰姿光照人。

桃源忆故人 追和东坡韵呈曾倅子修三首

逢人借问春归处。遥指芜城烟树。收尽柳梢残雨。月闯西南户。

游丝不解留伊住。漫惹闲愁无数。燕子为谁来去。似说江头路。

又

不知春色归何处。但见茂林芳树。庭巷落花如雨。斗乱穿窗户。

全宋词 王之道

晚行溪上东风住。荷点青钱无数。蛺蝶飞来还去。错认花间路。

又

南园最是花多处。门掩绿杨千树。别后几番风雨。碧藓侵苔户。

侬家旧在郊西住。门外远山无数。谁道不如归去。咫尺长安路。

又 和张文伯送春二首

依依杨柳青青草。梦断画桥春晓。风里落花如扫。莫厌寻芳草。

醪醑芍药看来好。恰似江湖遗老。锦段荷□传到。愧乏琼瑶报。

又

望中风絮迷烟草。愁结几番昏晓。花径有时亲扫。载酒应须早。

人情曷似春山好。山色不随春老。旧隐何当重到。迎得平安报。

沁园春 和彦时兄

城郭萧条 ,风雨霏微 ,酝酿春愁。况鸷群雕鹗 ,未谐荐祚 ,棘栖鸾凤 ,犹叹栖仇。世路如棋 ,人情似纸 ,厚薄高低何日休。逢殷浩。会披云对月 ,同赋南楼。

堪嗟日月如流。甚首夏赜来今半秋。纵荻花枫叶 ,强撩归思 ,有莼羹菰饭 ,归更何忧。三板松舟 ,一篙秋水 ,百里淮山无暂留。何须问 ,蘧蘧栩栩 ,孰是庄周。

惜奴娇

不厮知名 ,怎奈向、前缘注定。一封书、便成媒娉。千里相从 ,恰似寻盟合姓。泥泞。尚隔个、轿儿难近。

薄薄纱厨 ,小驿夜凉人静。红一点、暗通犀晕。花月多情 ,摇碎半窗清影。安稳。悄不知、人痛损。

又

甚么因缘 ,恰得一年相聚。和闰月、更无剩数。说著分飞 ,背面偷弹玉箸。好去。记取许时言语。

旧爱新人 ,后夜一时分付。从前事、不堪回顾。怎奈冤家 ,抵死牵肠惹肚。愁苦。梦断五更风雨。

南乡子 陈南仲生日

遗爱满南州。千骑曾为万里游。琳馆归来 ,无责更无忧。坐听笙歌醉玉舟。香雾郁金香。春入梅花助献酬。请祝遐年 ,长笑挹浮丘。何止莘君一百筹。

又 寄和潘教授元宾喜晴

天际彩虹垂。风起痴云快一吹。原隰啍啍 ,春水更漪漪。布谷期从野鸟知。初霁卷帘时。巷陌泥融燕子飞。午醉醒来 ,红日欲平西。一碗新茶乳面肥。

又 和张元助通判赋雪

出户绣帘垂。拂面从他细细吹。乘兴有谁招访戴，难为。暖帐薰炉醉不知。闲看逐风时。欲著梅花又却飞。雅兴佳人回舞袂，相宜。试比冰肌可煞肥。

又 用韵赋杨花

春霁柳花垂。娇软轻狂不待吹。圆欲成球还复碎，谁为。习习和风即旧知。深院日长时。乱扑珠帘入坐飞。试问荻芽生也未，偏宜。出网河豚美更肥。

又 追和东坡重九

风急断虹收。孤鹭摇摇下荻洲。醉帽尽从吹落去，飏飏。幸有黄花插满头。君唱我当酬。千里湖山照眼秋。不见故人思故国，休休。一阕清歌听解愁。

又 赠何彦道侍儿

翠袖熨沈香。黛拂修蛾淡淡妆。消得多情钟傅粉，何郎。风动珠帘月半床。素手捧瑶觞。谁念苏州已断肠。夜雨不随歌扇歇，浪浪。归去无心赋海棠。

减字木兰花 和鲁如晦立春

彩幡金胜。一笑酬春聊适性。驷女痴儿。半挽梅花半柳枝。

追欢何计。幸对绿尊环皂髻。欲舞还羞。美盼娇回碧水秋。

又 和张文伯对雪四首

诗成呵手。欲写已输君赋就。寒粟生肤。
一盞浇肠可得无。

回风弄巧。比似婆娑尤敏妙。似个人人。
嗅认梅花孰是真。

又

尊前放手。铜钵声穷诗已就。姑射肌肤。
舞罢缠头怎得无。

青腰更巧。搓粉团酥来斗妙。不敢方人。
容色依稀似太真。

又

玉奴招手。来看前山琼琢就。透骨侵肤。
似恁清寒更有无。

春工纵巧。只许梅花称独妙。花底逢人。
逐马银杯误认真。

又

鳌头龟手。孤坐书生能意就。暖体温肤。
绣被春寒想见无。

雪词工巧。高压君房天下妙。白发欺人。
甚矣吾衰懒是真。

又 赠孙兴宗侍儿四首

修眉山远。娇抹乌云秋水畔。酒里花前。
坐拥斯人怎得寒。

醪醑浮满。须索空缸仍覆盖。正恐相妨。
归去如闻笑语香。

又

江梅清远。潇洒一枝尊俎畔。雪里风前。

照水窥檐巧耐寒。

多情美满。共饮自应渠盏。醉赏何妨。
倾国天教抵死香。

又

笑中声远。走向曲房花树畔。拥在尊前。
顿觉春温却夜寒。

愿酬心满。只得教伊频劝盏。缓唱何妨。
贴体衫儿扑扑香。

又

仙姿凝远。半出新妆琼户畔。缓步来前。
正值东风料峭寒。

钗头花满。舞罢梅英飞入盏。一醺何妨。
花与佳人巧斗香。

又 和孔纯老别

离筵暂住。君在龙舒曾是主。今作行人。
卧辙何妨借寇恂。

清歌妙舞。断送吟鞭乘醉去。一醺休辞。
捧爵佳人玉箸垂。

又 和孔纯老送郑深道移守严州

金尊频倒。照坐梅花清更好。春到长杨。
宠拜三公入郑庄。

月城两载。千里生灵蒙惠爱。舞彻歌词。
并立新妆绿带垂。

又 和董令升正月五日会客

蛾眉螭首。舞雪娇回开冻候。尽道今年。
千里风光萃绮筵。

坐来新月。照我苍颜并白发。酒到休辞。

自有黄芽介寿祺。

阮郎归 和广济王宰二首

玉绳低转斗阑干。欠温春酒寒。夜长风劲怯衣单。有人哦二山。

蟾欲满 雁初还。桃花微破颜。枕痕犹带断红残。无言心自闲。

又

长杨风软弄腰肢。日长蝴蝶飞。雨余新绿细通池。玉钩是妓衣。

鸿雁远 子规啼。此情谁得知。一尊聊与故人持。醉来悲别离。

长相思 相山集题作恨别

雨蒙蒙。日珑珑。洗出远山三四重。分明眉黛浓。

野桥西 官路东。小驿夜凉风入松。梦魂谁与同。

又

花一枝。酒一卮。举酒对花君莫辞。人生多别离。

行相随。坐相随。更有何人得似伊。春融蝴蝶飞。

又

天四垂。山四围。山色天容入坐帷。清风吹我衣。

湖水东 江水西。东去西来无尽期。不如君共伊。

又

吴江枫。吴江风。索索秋声飞乱红。晚来归兴浓。

淮山西 淮山东。明月今宵何处同。相寻魂梦中。

又

风淅淅。雨霏霏。风雨夜寒人别离。梦回还自疑。

蛩声悲。漏声迟。一点青灯明更微。照人双泪垂。

又 相山集题作美人

桃花春。杏花春。桃杏妖娆如个人。歌声清遏云。

酒醺醺。烛荧荧。眼尾微红无限情。相逢堪断魂。

满庭芳 伯父仲球生日

紫角初繁 ,青裳正好 ,充闾清露飘香。悬弧何早 ,乌轡上扶桑。试问椿龄几许 ,逾万计、才满三章。佳辰乐 ,林塘增气 ,菡萏拥红妆。

称觴。人共庆 ,盘中白李 ,来自华阳。倩壶中日月 ,特地舒长。定见霜毫换绿 ,天荐祉、家庆延昌。情千万 ,辞慳思窘 ,聊献满庭芳。

又 代人上高太尉 ,时在太学

蔡水西来 ,于门南峙 ,天波拥入华楹。芝

兰争秀 , 难弟遇难兄。欲说随龙雨露 , 庆千载、
河海初清。良辰好 , 榴花照眼 , 绿柳隐啼莺。

君恩 , 隆横赐 , 冰桃火枣 , 来自蓬瀛。正雾
横玉篆 , 泉泻金鲸。四座香和酒泛 , 对妙舞、弦
索铿锵。椿难老 , 年年今日 , 论报祝长生。

又 和王常令双莲堂

翠盖千重 , 青钱万叠 , 雨余绿涨银塘。藕
花无数 , 高下斗芬芳。浑似华清赐浴 , 温泉滑、
洗出真香。何妨更 , 合欢连理 , 高压万芝祥。

风流 , 贤太守 , 当年奏瑞 , 盛事名堂。好是
琉璃池上 , 一片宫妆。况有薰风解愠 , 流霞泛、
丝竹成行。依莲暇 , 联珠唱玉 , 应不愧金相。

又 立春日呈刘春卿

天驷呈祥 , 土牛颁政 , 欢呼万井春来。雕
轮丹毂 , 杂遝展轻雷。风动珠帘不卷 , 香散处、
半露梅腮。东郊好 , 波澜浸绿 , 萌蘖上条枚。

徘徊。应共怪 , 十年豹隐 , 一旦鸾台。问
康时术业 , 混俗情怀。过雪湖山清丽 , 笙歌沸、
舞袖萦回。兵厨富 , 酒肠似海 , 莫惜醉金杯。

又 和同漕彦约送秦寿之

雪霁风温 , 霜消日暖 , 一时笑语烘春。草
堂何幸 , 四座德星邻。聊借红妆侑爵 , 兰膏膩、
高髻盘云。清歌妙 , 贯珠余韵 , 犹振画梁尘。

熙朝 , 卿相种 , 扁舟东去 , 入侍严宸。忆当
年擢桂 , 连见三秦。休说参军俊逸 , 应难过、开
府清新。从今去 , 八州都督 , 端不困无津。

又 和元发弟秋日对酒

露溢金茎 , 风翔玉宇 , 嫩凉初霁秋容。山

肴野蔌 聊快一尊同。正值大田多稼 临邛隘、
酒客憧憧。追随处 杯盘狼藉。野草荫长松。

新词 何所似 金声应铎 玉气腾虹。时来
终宦达 休怨苍穹。顾我蹉跎老矣 飘素发、衰
态龙钟。心犹壮 会看文度 独步大江东。

又 和王冲之西城郊行

麦野青深 桃溪红暗 浪游何处芳园。清
明初过 门巷霭晴烟。柳外池塘绿遍 溪流细、
终日溅溅。东风软 谁家儿女 墙里送秋千。

花前。从醉倒 吾当尽量 君盍忘年。纵
杯盘草草 随分开筵。自有高谈雄辩 何须问、
急管繁弦。身长健 少陵如在 应赋饮中仙。

又 和富宪公权饯别

歌彻骊驹 酒斟醺醑 帆樯高映城楼。绣
衣携具 开宴话离愁。两岸橙黄橘绿 一行雁、
几点沙鸥。情千万 相看无语 送我上孤舟。

悠悠。冬向晚 梅花潜暖 随处香浮。奈
长亭饮散 无计淹留。归路淮山百舍 空梦想、
连岁清游。烦双鲤 频将尺素 来往寄江流。

醉蓬莱 追和东坡重九呈彦时兄

对黄芦卧雨 苍雁横秋 江天重九。千载
渊明 信风流称首。吟绕东篱 白衣何处 谁复
当年偶。蓝水清游 龙山胜集 恍然依旧。

萸实嫩红 菊团余馥 付与佳人 比妍争
嗅。一曲婆娑 看舞腰萦柳。举世纷纷名利
逐 罕遇笑来开口。慰我寂寥 酬君酩酊 不容
无酒。

又 代人上高御带 时在太学

正薰风解愠 ,萱草忘忧 ,黄梅新霁。缥缈歌台 ,半金衣公子。丹桂香中 ,碧梧枝上 ,两两飞还止。似说当年 ,而今时候 ,长庚诞贵。

恩厚随龙 ,官崇御带 ,二十横金 ,玉阶寸地。须信骅骝 ,一日能千里。况遇王良伯乐 ,算九万、何劳睥睨。磊落金盘 ,华阳白李 ,休辞沈醉。

浣溪沙 和陈德公酴醾

一样檀心半卷舒。淡黄衫子衬冰肤。细看全似那人姝。

枕里芳蕤薰绣被 ,酒中余馥溢金壶。不须频嗅惹罗裾。

又 和张文伯木犀

晓日晖晖玉露光。枝头一样斗宫妆。可怜娇额半涂黄。

衣与酴醾新借色 ,肌同薺卜更薰香。风流荀令雅相当。

又 和张文伯海棠

过雨花容杂笑啼。淡妆深注半开时。娇娆情态自天姿。

新浴太真增艳丽 ,微风新燕斗清奇。绿窗朱户雅相宜。

又 赋春雪追和东坡韵四首

阳气初升土脉苏。东郊人散欲回车。一

时春雪十年无。

鱼枕蕉深浮酒蚁，鹿胎冠子粲歌珠。题诗
不觉烛然须。

又

体粟须烦鼎力苏。流涎正值曲盈车。坐
来兽炭拨还无。

一阁可能酬一绝，双银端不换双珠。松毛
粉白老翁须。

又

春到衡门病滞苏。力强犹可驾柴车。少
年狂望一时无。

清坐不堪肌起粟，高谈还喜唾成珠。红裙
痴笑雪如须。

又

冻卧袁安已复苏。闭门那患出无车。似
渠人物到今无。

可笑昆山夸片玉，须怜沧海叹遗珠。时来
应许捋君须。

又 阻风铜陵 追和东坡游泗州南山韵

残雪笼晴作沍寒。北风吹浪过前滩。远
山云气尚漫漫。

睡起阳乌窥破牖，坐怜香雾蔼雕盘。一尊
聊佐旅中欢。

又 代人作

玉骨冰肌软更香。一枝丹棘映青裳。相
逢归去未须忙。

曲里春山情不浅，尊前秋水意何长。酒醺

颜色粉生光。

又 和张文伯长至

寒透珠帘怯晓霜。灰飞缙室验回阳。坐看红日上修廊。

泉泻龙头深泛酒，烟凝象口暖吹香。及时歌舞意何长。

又 春日

水外山光淡欲无。堤边草色翠如铺。绿杨风软鸟相呼。

牛蒨叶齐罗翠扇，鹿黎花小隘真珠。一声何处叫提壶。

东风第一枝 梅

玉骨冰肌，绛趺檀口，玲珑亚竹当户。嫣然照雪精神，消得东君眷与。群芳退舍，顾凡下、非伊朋侣。却自有、苍卜醅醑，次第效颦追步。

寓心赏、还须吟醉，赴目成、便依歌舞。情钟束素无华，意在含情不语。纷纷桃李，亦何用、轻猜轻妒。觅一枝、欲寄相思，伴取个人书去。

西江月 和张文伯谢曾子修送酒

黄菊正怀彭泽，白衣俄致江州。登高余醉快扶头。此赋义兼情厚。

痛饮还须酒对，清吟况值诗流。轻投无惜

万金酬。木李旧先琼玖。

又 和张文伯腊日席上

北陆藏冰欲竟，东风解冻非遥。一时芳意
巧相撩。入眼绿娇红小。

柳色轻摇弱线，梅英纷缀枯梢。觥筹醉里
赖君饶。归去斜阳尚早。

又 和董令升燕宴分茶

磨急锯霏琼屑，汤鸣车转羊肠。一杯聊解
水仙浆。七日狂醒顿爽。

指点红裙劝坐，招呼岩桂分香。看花不觉
酒浮觞。醉倒宁辞鼠量。

又 赏梅

雪后千林尚冻，城边一径微通。柳梢摇曳
转东风。来看梅花应梦。

酒面初潮蚁绿，歌唇半启樱红。冰肌绰约
月朦胧。仿佛暗香浮动。

又 春归

春色荒荒别浦，春潮滟滟长堤。绿杨风喘
客帆迟。肠断江南双鲤。

短梦当年楚雨，扁舟后夜秦溪。一声啼鸟
怨春归。人在酴醾花底。

又 相山集题作别思

一霎轻云过雨，半篙新绿横舟。梅花池馆
暗香浮。酒入朱唇红透。

有恨尤怜别恨，多愁不惯春愁。舞余何惜
更迟留。肠断断肠更后。

又

一别清风北牖，几番明月西楼。断肠千里致书邮。借问近来安否。

归路淮山过雨，归舟江水澄秋。佳人应已数程头。准拟到家时候。

归朝欢 对雪追和东坡词

透隙敲窗风撼撼。坐见广庭飞缟白。长安道上正骑驴，蔡州城里谁坚壁。表表风尘物。瑶林琼宇三豪客。对分毫、连珠唱玉，竞把诗笺掷。

草草杯盘还促席。痛饮狂歌话胸臆。前村昨夜访梅花，东邻休更夸容色。清欢那易得。明朝乌轡升南极。带随车、黄垆咫尺，莫作山河隔。

宴春台 追和张子野韵赠陈德甫侍儿

翠竹扶疏，丹葵隐映，绿窗朱户萦回。帘卷虾须，清风时自南来。题舆好客筵开。俨新妆、深出云街。歌珠累贯，一时倾坐，全胜腰雷。

金猊袅碧，玉兕浮红，令传三杏，情寄双梅。楼头漏促，笼纱暗落花煤。锦里遗音，忆当年、曾赋春台。醉蓬莱。归欤无寐，想余韵徘徊。

朝中措 和张文伯元夕

江城春霁雪初融。楼观瑞烟中。向晚金莲无数，一时开遍东风。

多情太守，行携红袖，坐引金钟。时出阳春绝唱，才名不减诗翁。

又 和张文伯寒食日雨

从来寒食半阴晴。花底听歌声。昨夜满城风雨，惜花还系心情。

海棠枝上，朱唇翠袖，欲斗轻盈。须藉嫣然一笑，醉吟同过清明。

又 和张文伯清明日开霁

朝阳淡淡宿云轻。风入管弦声。十里碧芜幽步，一枝丹杏柔情。

佳人何处，酒红沁眼，秋水盈盈。诗曲羡君三绝，湖山增我双明。

又 和张文伯芍药

老穷无赖事成丛。短发自鬢松。坐想帝城当日，万花绣出天宫。

几时临赋，深浮绿蚁，缓唱黄钟。莫获追陪胜赏，虚烦恼乱衰翁。

又 和张文伯海棠

暖风迟日透香肌。春到柳边枝。曾见酒红潮颊，玉人初出罗帏。

东坡何处，朱唇翠袖，空想芳姿。争似濡须太守，看花仍赋佳词。

又 董令升待制生日

天庭丹熟在何时。铅汞适投机。四海方思霖雨，未容驾鹤先飞。

当年今日，谪仙初降，庭露泚泚。愿对良辰好景，称觞为醉芳菲。

又 魏倅定甫生日

州间庠序少追随。俯仰鬓成丝。仕宦孰逾君达，恩施遍及庭芝。

溪头春日，欢声和气，如见生时。好对高堂寿母，献酬同醉金卮。

又 王守正仲生日

满庭岩桂蔼香风。人在画堂中。欲验鲁侯难老，欢声千里攸同。

台分金石，源钟淮水，流庆无穷。好继汉朝循吏，从兹入拜三公。

又 和孔倅郡斋新栽竹

君心节直更心虚。移植并庭除。好在红蕖相映，卷帘如见吴姝。

清风明月，君无我弃，我不君疏。况有骚人墨客，时来同醉兵厨。

又 和张文伯远亭

晴烟漠漠日晖晖。天际远山低。槛外碧芜千里，坐来目送鸥飞。

诗笺谈麈，珠盘落落，玉屑霏霏。更把登临余兴，翻成白雪歌词。

玉楼春 和令升正月五日会客

年来六十增三岁。却忆去年趋盛会。风流人物胜斜川，灼灼有同前日事。不知弦管催新水。但见飘飘萦舞袂。主人情厚酒行频，酩酊莫辞今夕醉。

又 和李宜仲

少年心性消磨尽。三斗烂肠浑是闷。看书聊复强寻行，属句不妨闲趁韵。此生自断天休问。富贵时来还有分。一卮芳酒送清歌，楼下玉人相去近。

石州慢 和董令升岁除

磔攘送寒，燔烈兴岁，又颁尧历。青霭烧痕，绿浮风皱，暖回春色。地天交泰，时当倾否，五鬼休相厄。何妨笑倚东风，一饮杯三百。

长忆。苻坚入寇，功高晋室，无如安石。义概雄心，辄莫等闲抛掷。盖壤声名，鼎彝勋业。朋溪虽好，未放终闲逸。啾啾黄鸟，更看壶中春日。

鹊桥仙

霜风擢霁，云涛涨晚，更觉我心弥壮。一尊谁与醉西风，辄莫负、高吟胜赏。致君才术，康时事业，到底不容闲放。十年湖海哄樵歌，何幸出、阳春绝唱。

又 七夕

断虹霁雨，余霞送日，帘卷西楼月上。银河风静夜无波，天亦为、云辇相访。蛛丝有恨，鹊桥何处，回首又成惆怅。长江滚滚向东流，写不尽、别离情状。

菩萨蛮 和赵见独佳人睡起

香鬟倭堕兰膏腻。睡起搔头红玉坠。秋水不胜情。盈盈横沁人。

朱阑频徙倚。笑与花争媚。眉黛索重添。春醒意未忺。

又

绿杨低映深深院。春风不动珠帘卷。乳燕引雏飞。流苏尽日垂。

绮窗开小宴。娅姹莺声啭。一饷不闻声。罗衣香汗轻。

又

小庭过雨莓苔滑。碧波滟滟池光阔。睡起□雕阑。不言神思闲。

晚来调瑟罢。笑语秋千下。高枕绿杨风。隔帘花映红。

又

晴窗睡起炉烟直。香云堕髻娇无力。溪水碧涵空。拒霜深浅红。

坠鞭还驻马。缥缈珠帘下。自是意中人。临风休障尘。

千秋岁 伯母刘氏生日

薰风散雾。帘幕清无暑。萱草径 ,荷花
坞。幽香浮几席 ,秀色侵庭庑。微雨过 ,绿杨
枝上珠成缕。

双燕飞还语。似庆良辰遇。酬美酒 ,烹肥
豕。何妨饮且醉 ,共作斑衣舞。人竞报 ,蟠桃
已实君知否。

又 癸亥重九舟次吴江

斜风横雨。咫尺高城路。红蓼岸 ,苍葭
浦。滞留春色晚 ,栖泊邮亭暮。信杳杳 ,鹊声
近有无凭据。

肠断家何处。又见重阳度。多少恨 ,从谁
诉。黄鸡斟白酒 ,自促供搜句。归去好 ,人生
莫被浮名误。

又 彦时教授兄生日

金风玉宇。庭院新经雨。香有露 ,清无
暑。溪光摇几席 ,岚翠横尊俎。烘笑语 ,佳时
聊复乡人聚。

门外荷花浦。秋到花无数。红鲙鲤。青
浮醕。何妨文字饮 ,更得江山助。从此去。蒲
轮入佐中兴主。

又 追和秦少游

山前湖外。初日浮云退。荷气馥 ,槐阴
碎。葵花红障锦 ,萱草青垂带。谁得似 ,黄鹂
求友新成对。

忆昔东门会。千古同倾盖。人已远 ,歌如

在。银钩虽可漫 ,琬琰终难改。愁浩荡 ,临风令我思淮海。

又 张文伯生日

晓霜初肃。秋色团芳菊。榴转紫 ,柑犹绿。昨朝吹帽会 ,未快登临目。须信道 ,兵厨准拟三千斛。

采采香盈掬。泛泛纷浮玉。红袖捧 ,清歌逐。何妨倾坐客 ,共献长生祝。归去好 ,北门夜引金莲烛。

又 郑帅清卿生日

熙熙台上。秋色增清壮。和气溢 ,祥烟扬。淮山供杂俎 ,湖水浮新酿。人共仰 ,貔貅坐拥诗书将。

箫鼓声嘹亮。珠翠环相向。回妙舞 ,迟妍唱。竞斟长命斝 ,同试沧溟量。锋车往 ,东归遂继华原相。

胜胜慢 冬至日 ,用刘春卿韵 ,送彦逢弟赴官西兴

鲁云书瑞 ,周日迎长 ,晓占缊室飞灰。玉勒朝天 ,千门禁钥齐开。帘卷扇分雉尾 ,香风远、人到蓬莱。霞觞满 ,□万年献祝 ,宫殿昭回。

况有金瓯名姓 ,一任名园萧散 ,元自徘徊。门外锋车 ,又连凤沼相催。酒到莫辞频举 ,听清歌、一阕倾杯。功成日 ,渺五湖烟月 ,堪赋归来。

又 和刘春卿有怀金溪

凌云气节 ,贯日精忠 ,艰难未许心灰。芳

酒一尊 ,对君聊为君开。要识治安非晚 ,乐得贤、新赋台莱。愁似雪 ,喜青天万里 ,晓霁春回。

须信赤绳系足 ,朱衣点额终在 ,休叹淹徊。梅实槐花 ,看看便是相催。座上觥筹交错 ,玉山峙、莫遣停杯。濡须好 ,倘他时富贵 ,犹冀重来。

又 和张文伯木犀

菊团封绿 ,莲萼凋红 ,萧然独见芳姿。短墙高树 ,疏筠怪石偏宜。香遍秋风到处 ,微雨过、清露零时。花阴下 ,称笺毫唱和 ,杖履追随。

易似江头竹外 ,凌霜犯雪 ,岁晚争奇。夕赏朝吟 ,劝秋莫放离披。细看石栴玉茗 ,叶纵似、风韵输伊。最好处 ,拥新妆、临鉴碧溪。

宴桃源 和张文伯雪

飞雪舞稀还骤。高阁下临群岫。独立遂移时 ,归去黄昏前后。知否。知否。落笔骚人赋就。

又

风急柳花飞骤。白尽千林万岫。樵担晚来归 ,正在栖鸦啼后。知否。知否。语到谢娘诗就。

又 乌江路中二首

黄叶声迟风歇。龕火夜寒明灭。残月却多情 ,来照先生归辙。清绝。清绝。透隙飞霜

似雪。

又

遥指汤泉西路。隐约碧云天暮。宿鸟择深枝，两两相呼如语。凝伫。凝伫。今夜梦魂何处。

又 海棠

水外漫山桃李。那得个中风味。一种最怜渠，酒著佳人半醉。还似。还似。惊起午窗春睡。

折丹桂 送蘧、著、迈三子庚辰年省试

照人何处双瞳碧。欲去江城北。过江风顺莫迟留，快雁序、飞联翼。

西湖花柳传消息。知是东君客。家书须办写泥金，报科名、题淡墨。

又 用前韵送彦开弟省试

风漪欲皱春江碧。予寄江城北。子今东去赴春官，挽不住、抟风翼。

修程应过天池息。何处堪留客。预知仙籍桂香浮，语祝史、休占墨。

又 用前韵送赵彦翔省试

雪晴山色分遥碧。辉映江南北。子今东去步蟾宫，看少展、垂天翼。

晚来江上西风息。算不是新丰客。明年三月见君时，庆章绶、纡铜墨。

八声甘州 和张漕进彦

叹关河在眼、孰雌雄，兴废古犹今。问中原何处，黄尘千里，远水平林。闻说讴谣思汉，人有望霓心。想垂髻戴白，泣涕盈襟。

流水高山还会，意不烦挥按，如见虞琴。
□透迟周道，四牡骤駸駸。尽谏谋询度归来，聊缓辔、岁晚雪霜深。西湖好，光风迟日，同快吴吟。

渔家傲 和余子美对雪

风揭珠帘寒乍透。青娥不住添香兽。火暖画檐鸣线溜。人醉后。锦堂丝竹烘残昼。

势合湖山增地厚。孤高但觉修篁瘦。回策如萦今在手。骄马骤。吾家金埒新编就。

又 和孔纯老三首

岩电晶荧君未老。看看门外锋车到。一点眉间黄色好。人尽道。从今次第登三少。

左右青娥来巧笑。注唇涂额新妆了。斜插梅花仍斗妙。歌窈窕。醉来容我相嘲傲。

又

岁月漂流人易老。东郊又报春来到。梅靥柳眉还斗好。君信道。衰颜得酒重年少。

对酒邀宾同燕笑。莫教虚过芳菲了。欬唾珠玑夸笔妙。人窈窕。新声倾坐渔家傲。

又

灯火熙熙来稚老。喜逢灯夕都齐到。花

市绮楼随处好。人竞道。今年天气常年少。

五马行游还坐笑。公堂帘卷东风了。箫鼓喧闾歌舞妙。人窈窕。也应引动南窗傲。

又 和董舍人令升三首

系国安危还故老。鹤书赴陇行当到。多谢不遗敦雅好。应信道。年高德劭如公少。

尊酒论文聊一笑。肯将苦语夸危了。落笔君房天下妙。环窈窕。清歌一曲渔家傲。

又

海岱惟青遗一老。禁垣清切亲曾到。独直固劳非所好。谁信道。才如权相从来少。

把酒自歌还自笑。醉中万事都齐了。绝唱清歌仍敏妙。声窈窕。行云初遏渔家傲。

又

爵齿俱尊惟此老。诗词笔力谁能到。奇字古文仍笃好。须信道。如公宁复忧才少。

剩费黄金应买笑。穷通得丧都忘了。坐对瑶觞看舞妙。携窈窕。南窗聊得渊明傲。

又 太后庆八十,诏书到,再和孔纯老

老老恩波今及老。诏华前日新颁到。视膳慈宁先嗜好。隆孝道。慕逾五十前王少。

想见天颜温色笑。东朝上寿称觞了。易俗功深神且妙。来窈窕。德齐任姒消骄傲。

浪淘沙 和鲁如晦

高髻堕香鬟。遗恨眉山。老年花似梦中

看。厌浥一枝沍晓露 , 珠泪阑干。

卮酒发酡颜。休更留残。满城风雨麦秋寒。余馥尚能消酒恶 , 谁敢包弹。

忆东坡 追和黄鲁直

雪霁柳舒容 , 日薄梅摇影。新岁换符来 , 天上初见颁桃梗。试问我酬君唱 , 何如博塞欢娱 , 百万呼卢胜。投珠报玉 , 须放骚人遣春兴。

诗成谈笑 , 写出无穷景。不妨时作颠草 , 驰骋张芝圣。谁念杜陵野老 , 心同流水必东 , 与物初无竞。公侯应有种哉 , 倾否由天命。

又

虚堂响应声 , 皎月形和影。春到也须还 , 长红多紫啼条梗。况有光风丽日 , 能消积雪繁霜 , 青女休言胜。扶摇借便 , 请看天池发鹏兴。

人言强汉 , 治道夸文景。谁能尧舜其君 , 远继阿衡圣。富贵吾所自有 , 宰相时来则为 , 自不烦趋竞。欲寻文会诗盟 , 得酒且相命。

六州歌头 和张安国舍人韵呈进彦

燧城勋业 , 何取望西平。观当日 , 清大憝 , 震天声。绩其凝。追配汾阳郭 , 临淮李 , 扫妖孽 , 植颠仆 , 复疆宇 , 洗膻腥。堪叹中原久矣 , 长淮隔、胡骑纵横。问何时 , 风驱电扫 , 重见文明。宾雁宵鸣。梦初惊。

念吾君复古 , 修攘两尽 , 早晚功成。岁云暮 , 冰腹壮 , 雪花零。怅神京。谁信汉家陵阙 ,

呵护有神兵。罄寰海,重回首,镇关情。想见皇华咨度,望淮北、心曲摇旌。愿变夷用夏,荆狄是惩膺。补弊支倾。

好事近 阿希渊生日

春色到梅梢,人在东风清嚏。曾见少微初降,蔼龙泉佳气。

功名富贵属多才,如子已无几。造物恰同予意,放骅骝千里。

又 程继诚生日

霞影入瑶觞,酒与余霞同色。人共昌朝方永,过觥筹三百。

一枝红皱石榴裙,帘卷篆烟碧。约我他年湖上,看九华终日。

又 彦逢弟生日

秋色到东篱,金散菊团香馥。预借浮觞高会,为作长年祝。

蟹螯如臂酒如渑,橙橘半黄绿。唱我新词一釂,听尊前丝竹。

又 王昭美生日

花影到酴醾,风过玉卮摇碧。坐上酒豪诗敌,尽骑鲸仙客。

主人名姓在金瓯,归去定前席。要见碧桃千岁,看壶中春日。

又 董令升生日

春色到酴醾,人在酴醾花底。花扑尊罍香

透 远胜烧沈水。

一杯聊复对东风 ,为祝千千岁。作楫和羹事了 ,归去骑箕尾。

木兰花慢 追和晁次膺

对春光淡沲 ,烟冉冉、日迟迟。渐红入桃溪 ,青回柳陌 ,莺刷金衣。差池。竟求友去 ,恼佳人、幽恨上蛾眉。应念年时追逐 ,妆余为带交枝。

芳菲。谁共赏游嬉。何处马如飞。□不道新来 ,牵肠惹肚 ,暗减腰肢。须知。乍寒乍暖 ,褪朱唇、又过海棠时。已约姚黄魏紫 ,留花等待伊归。

感皇恩 彦逢弟生日

宿雾霁晨霜 ,江山明秀。照眼黄花乱晴昼。当年今日 ,正是悬弧时候。一杯聊献祝 ,同亲旧。

莫问穷通 ,休论贫富。且趁良辰醉醇酎。扬珠捣玉 ,况值西成多收。饱餐歌至治 ,天垂祐。

石州慢 和赵见独书事 ,见独善鼓琴

天迥楼高 ,日长院静 ,琴声幽咽。昵昵恩情 ,切切言语 ,似伤离别。子期何处 ,漫高山流水 ,又逐新声彻。仿佛江上移舟 ,听琵琶凄切。

休说。春寒料峭，夜来花柳，弄风摇雪。
大错因谁，算不翅六州铁。波下双鱼，云中乘雁，
嗣音无计，空叹初谋拙。但愿相逢，同心再
绾重结。

一剪梅 和董令升赠魏定甫侍儿

风揭珠帘夜气清。香扑尊罍，初见云英。
蓝桥何处旧知名。今夕相逢，此恨消停。
劝酒嫣然一笑倾。细意端相，无限娉婷。
曲终犹带绕梁声。莫辞沈醉，为覆金觥。

汉宫春雪

欢动江城，快风声震地，云势颓山。半年
不雨，玉霰来溉冬乾。飘飘弱絮，杂檐花、飞上
宾筵。疏林表，数行征雁，翱翔欲下清湾。
何处梅梢点白，弄横斜疏影，竹外溪边。
天寒日暮，含香脉脉无言。朱唇玉颊，映碧梧、
峙鹄停鸾。最好是，携壶挈榼，相期同醉霜天。

点绛唇 和鲁如晦酴醾二首

一撮檀心，春来还对东君吐。莫随春去。
我欲花间住。

燕子衔泥，似向吾人诉。烦相语。九龄风
度。流落今何处。

又

珠幌霜蕤，晚来芬馥清香吐。流莺飞去。

应上花梢住。

一曲阳春 聊对东风诉。无多语。韶光暗度。恨到分携处。

又 和张文伯

宿雨朝寒 ,芳时又过酴醿了。舞环歌绕。应恨金杯小。

零乱霜蕤 ,点缀青青草。花间道。曾遭花恼。把酒呼晴昊。

又 和朱希真

短棹西来 ,追随不及桃花宴。薰风庭院。明月裁纨扇。

睡起娇慵 ,想见云鬟乱。双鱼远。欲凭春唤。一觥韦娘面。

又 和张文伯除夜雪

透幕穿帘 ,回风舞态能轻妙。不须相恼。江上春来了。

一阕清歌 ,唱彻琼楼晓。春工巧。柳颦梅笑。点缀芳菲早。

又 和张文伯

竹外梅花 ,檀心玉颊春初透。一池风皱。妙语天生就。

有个人人 ,袅娜灵和柳。君知否。目成心授。何日同携手。

又 社日雨

春意催花 ,片云又作朝来雨。淡匀深注。红紫纷无数。

社日人家 ,准拟行春去。痴儿女。倚门凝

伫。借问东郊路。

又 冬日江上

古屋衰杨 ,淡烟疏雨江南岸。几家村疃。
酒旆还相唤。

短棹扁舟 ,风横河频转。柔肠断。寒鸦噪
晚。天共蒹葭远。

虞美人 和孔侔郡斋莲花

酪浆冷浸金盘粉。玉友浮新酝。如君真
是酒中仙。一斗百篇、吟到小池莲。清风拂拂
来纨素。独擅江南步。红裙无用妒芳姿。且
把绿罗、争学画长眉。

又 和孔纯老送郑深道守严州

郑侯美政推仁厚。何独高淮右。分携令
我预颦眉。只恐桐庐民望、怪来迟。一尊聊罄
金蕉叶。更语半时霎。青娥罗列竞消凝。阁
定眼边珠泪、做红冰。

小重山 詹德秀生日

要识长生辈赤松。朱颜和绿发 ,正丰茸。
当年今日堕仙宫。佳气郁 ,香霭菊花风。

一醉拚千钟。小槽新酿美 ,玉泉浓。酒酣
诗思浩无穷。云烟烂 ,题破锦笺红。

又 彦逢弟生日

花艳嫣然照坐红。池光高下见 ,木芙蓉。
相从款款莫匆匆。新酿熟 ,浮瓮碧香浓。

全宋词 王之道

倚槛送飞鸿。登高时节近 ,菊披风。笑谈
今喜一杯同。揉金蕊 和露入杯中。

秦楼月 和张文伯雪

云不卷。浇愁莫放金杯浅。金杯浅。新
词丽句 ,要人裁剪。

酒酣思致天同远。临风捉笔纶巾岸。纶
巾岸。诗成归去 ,寒光照晚。

满江红 和张守仲及送孔纯老守历阳

竹马来迎 ,留不住、寸心如结。□历湖、须
坞相望 ,近同吴越。阙里风流今未减 ,此行报
政看期月。已验康沂富国 ,千古曾无别。

多谢润沾枯辙。令我神思清发。□新命
欢浹 ,两邦情惬。明日西风帆卷席。高檣到处
旌麾列。忽相思 ,吾当往 ,谁谓三整隔。

望海潮 重九和彦时兄

宝山烟霁 ,金湖波渺 ,珠帘高卷清霜。枫
叶露痕 ,荻花风色 ,人言今日重阳。芳菊袅秋
香。更榴房斗紫 ,柑实传黄。观阁凌空 ,杯盘
照坐独醒狂。

良辰乐事难忘。正少年游冶 ,人在任庄。
铜钵探题 ,金钗当酒 ,一时绿鬓红妆。故国黯
凄凉。漫情随水远 ,兴与云长。要是致君尧
舜 ,千古继垂裳。

如梦令 和张文伯芍药

绰约一枝红怨。疏雨淡烟池馆。梅子欲黄时，日倚朱阑几遍。争看。争看。人在沈香亭畔。

又 和张文伯木犀

叶底芳蕤如缀。坐对广庭忘味。娇骏最怜伊，乱糝舞余风袂。贪喜。贪喜。不觉宝钗斜坠。

又 江上对雨

一饷凝情无语。手捻梅花何处。倚竹不胜愁，暗想江头归路。东去。东去。短艇淡烟疏雨。

临江仙 和陈德公

红楼缥缈光风里，熙熙和气欢声。遏云余韵最关情。春山闲淡淡，秋水醉盈盈。

老去自怜心尚在，相逢殊慰劳生。纹楸聊复戏同枰。试烦歌一曲，须借酒三行。

又 追和东坡 送李公恕入浙韵

鼓棹正逢江雪霁，是行应快吴吟。透云寒日半晴阴。烟岚凝翠重，霜树溅红深。

案上文书闲展读，圣贤踪迹重寻。不堪华发故骎骎。三旌还有分，万事付无心。

又 和刘南伯

怪得举头闻鹊喜，果然都骑相过。柳阴乘

月倒金荷。疏星明耿耿，银汉静无波。

总角追随今老矣，相逢无惜婆娑。夜阑余兴到狂歌。长鲸方正渴，应不厌倾河。

南歌子 戊午重九

朱实盈盈露，黄花细细风。龙出胜集古今同。断送一年秋色、酒杯中。鸭脚供柔白，鸡头荐嫩红。量吞云梦正能容。试问具区何处、浙江东。

又 和陈勉仲

老懒诗才退，春融醉眼昏。青山终日对柴门。柳外断桥流水、几家村。桃李添新意，池塘失旧痕。一尊聊复为君温。倾倒年来酬唱、细论文。

又 赵叔全生日

扇里薰风细，壶中化日长。榴花高下照红妆。花外飞云馥郁、水沈香。新竹轻储粉，流莺巧弄簧。不知何处是华阳。应有千年白李、荐霞觞。

又 安丰守章彦辅生日

玉露澄天宇，金风净月华。满庭秋色木犀花。记得谪仙初下、五云车。才业追前辈，人门属当家。寿觞无惜醉流霞。闻说姓名潜护、有笼纱。

又 端午二首

角簾横龟枕，兰房挂艾人。一尊菖歎泛清

醇。好在佳人如玉、映长春。冰彻杯盘莹，香和笑语薰。莲花衫子入时新。挂起南窗一榻、晚风清。

又

玉斝浮菖虎，金盘馈鯨鱼。研丹聊作厌兵符。何必城头一女、当千夫。雨过山如洗，风来草似梳。佳人不惯手谈输。却道如今重赌、选官图。

又 书所见

露竹舒新绿，风荷递暗香。谁家池馆睡鸳鸯。还有玉人相对、坐传觞。角簟清冰滑，纱厨薄雾凉。晚来行雨过巫阳。强整罗衣临镜、学宫妆。

念奴娇 和鲁如晦中秋

碧天无际，乍雨清烟霭，风开云月。人在南楼，剧谈胜咏，拥碧油旌节。银阙腾辉，冰轮驾彩，颢气资高洁。大星不见，更容萤火明灭。须烦翠杓琼杯，华笺象管，与我酬清绝。谁使琵琶声到耳，轻赋荻花枫叶。露脚斜飞，河阴低转，香篆环三杰。莫辞终日，舞腰重看回雪。

又 和张文伯重阳前雨

黄花照眼，对西风庭槛，为渠凝伫。准拟登高酬一醉，底事晚来微雨。蟋蟀声中，芭蕉叶上，怎得争如许。龙山何处，无言暗想烟树。须知天意随人，重阳晴未晚，不须频诉。幸有兵厨三万斛，足助赏心欢趣。千里江山，

全宋词 王之道

两行珠翠 ,端为骚人付。层楼飞观 ,应容老子
追步。

贺新郎 送郑宗承

又是春残去。倚东风、寒云淡日 ,堕红飘
絮。燕社鸿秋人不问 ,尽管吴笙越鼓。但短
发、星星无数。万事惟消彭泽醉 ,也何妨、袖卷
长沙舞。身与世 ,只如许。

阑干拍手闲情绪。便明朝、苍烟白鹭 ,北
山南浦。笑指午桥桥畔路 ,帘幕深深院宇。尚
趁得、柳烟花雾。我亦故山猿鹤怨 ,问何时、归
棹双溪渚。歌一曲 ,恨千缕。

菩萨蛮 采莲女

藕丝衫剪轻红窄。衫轻不碍琼肤白。缦
鬓小横波。花楼东是家。

上湖闲荡桨。粉艳芙蓉榜。湖水亦多情。
照妆天底清。

王之望

菩萨蛮 和钱处和上元

华灯的烁明金碧。玳筵剧饮杯馀湿。珠翠隔房栊。微闻笑语通。

蓬瀛知已近。青鸟仍传信。应为整云鬟。教侬倒玉山。

好事近 和侯监丞

五载复相逢，俱被一官驱役。惊我雪髯霜鬓，只声香相识。

翠帷珍重出笙歌，醉迟迟春日。亲到鹊桥津畔，见天机停织。

又

彩舰载娉婷，宛在玉楼琼宇。人欲御风仙去，觉衣裳飘举。

玉京咫尺是蓝桥，一见已心许。梦解汉皋珠佩，但茫茫烟浦。

又 和荣大监

缓带抚雄边，一面灭烽休役。歌舞后堂高宴，喜倾城初识。

全宋词 王之望

红绡小研写新词 ,佳句丽星日。从此锦城
机杼 ,把回文休织。

又

清唱动梁尘 ,窈窕夜深庭宇。一笑满斟芳
酒 ,看霞觞争举。

弓靴三寸坐中倾 ,惊叹小如许。子建向来
能赋 ,过凌波仙浦。

又 成都赏山茶 ,用路漕韵

萧寺两株红 ,欲共晓霞争色。独占岁寒天
气 ,正群芳休息。

坐中清唱并阳春 ,写物妙诗格。霜鬓自羞
簪帽 ,叹如何抛得。

减字木兰花 代人戏赠

珠帘乍见。云雨无踪空有怨。锦字新词。
青鸟衔来恼暗期。

桃溪得路。直到仙家留客处。今日东邻。
远忆当年窥宋人。

又 恭人生日

糟糠相乐。早共梁鸿同隐约。著籍天门。
隔品新封感帝恩。

满堂儿女。妇捧金杯孙屡舞。白发卿卿。
与尔尊前作寿星。

丑奴儿 寄齐尧佐

蒙泉秋色登临处 ,愁送将归。一梦经时。

肠断佳人、犹唱渭城词。

春来重醉分携地 ,人在天涯。别后应知。
两鬓萧萧、多半已成丝。

又 寄李德志

去年池馆同君醉 ,正是花时。隔院韶辉。
桃李欣欣、如与故人期。

相望两地今千里 ,还对芳菲。春色分谁。
雨惨风愁、依旧可怜枝。

惜分飞 别妓

要眇新声生宝柱。弹到离肠断处。细落
檐花雨。夜阑清唱行云住。

洞府春长还易暮。凡客暂来终去。不忍
回头觑。乱山流水桃溪路。

醉花阴 生日

弧门此日犹能记。叹居诸难系。弹指片
声中 ,不觉流年 ,五十还加二。儿童寿酒邀翁
醉。笑欣欣相戏。休画老人星 ,白发苍髯 ,怎
解如翁似。

鹧鸪天

台州倚江亭即席和李举之 ,时曹功显、贺子忱同
坐

撩乱江云雪欲飞。小轩幽会酒行时。佳
人喜得鸳鸯侣 ,豪客争题鹦鹉词。歌舞地 ,喜

追随。歙州端恨外迁迟。谪仙狂监从来识，七步初看子建诗。

虞美人 石光锡会上即席和李举之韵

鸳鸯碧瓦寒留雪。玉树先春发。小楼歌舞夜流连。月落参横、一梦绕梅边。尊前酒量谁能惜。都是高阳客。十分莫厌羽觞传。半醉娉婷、云鬓弹金钿。

小重山 成都上元席上用权帅许觉民韵

幂幂轻云护晓霜。银花千万朵，烂韶光。宝山金字屡更张。笙箫远，帘幕闷重廊。车马暗尘香。一邦如蜡日，尽豪狂。游人归路笑声长。长歌里，击壤咏陶唐。

临江仙 赠妓

十二峰前朝复暮，忽愁望断行云。梦回江浦晓风清。远山思翠黛，蔓草记罗裙。锦字织成千万恨，翻成第入新声。幽期谁为反离魂。主人无浪语，狂客最钟情。

又 赠贺子忱二侍妾二首

霓作衣裳冰作面，铅华不涴天真。临风几待逐行云。自从留得住，不肯系仙裙。对客挥毫惊满座，银钩蚕尾争新。数行草圣妙如神。从今王逸少，不学卫夫人。

又

家在蓬莱山下住 ,乘风时到尘寰。双凫偶
堕网罗间。惊容凝粉泪 ,愁鬓乱云鬟。

人世风波难久驻 ,云霞终反仙关。虚无仙
路拥归鸾。却随烟雾去 ,长向洞天闲。

洞仙歌 范丞相夫人生日

玉楼玄圃 ,旧是神仙伴。鸣佩时朝紫皇
殿。种蟠桃成树 ,碧柰开花 ,著子满 ,金母盘中
屡献。

飘然乘彩凤 ,东望蓬莱 ,曾共扁舟五湖泛。
正珈笄未老 ,兰玉盈前 ,春欲转、喜对芳辰开
宴。愿绿发朱颜镇长新 ,教岁岁年年 ,寿觞深
劝。

满庭芳 前题

海国寒轻 ,江南春早 ,小梅已漏芳妍。岁
前冬后 ,和气欲回旋。此际瑶台阆苑 ,仙人下、
白玉云辇。人间世 ,风帆月棹 ,同泛五湖船。

当年。参谒地 ,鱼轩象服 ,锵佩朝天。向
闽邦开国 ,福地真传。今日华筵寿筵 ,儿孙拥、
兰玉相鲜。休辞□ ,蓬莱清浅 ,看取变桑田。

又 赐茶

犀隐雕龙 ,蟾将威凤 ,建溪初贡新芽。九
天春色 ,先到列仙家。今日磨圭碎璧 ,天香动、
风入窗纱。清泉嫩 ,江南锡乳 ,一脉贯天涯。

芳华。瑶辅宴 ,群真飞佩 ,同引流霞。醉
琼筵红绿 ,眼乱繁花。一碗分云饮露 ,尘凡尽、
牛斗何赊。归途稳 ,清飙两腋 ,不用泛灵槎。

念奴娇 坐上和何司户

堂堂七尺 ,懔一时人物 ,孤映三蜀。闲雅
风流豪醉后 ,犹有临邛遗俗。十载虞庠 ,一官
楚塞 ,雅操凌寒玉。江山千里 ,惠然来慰幽独。

落笔妙语如神 ,两章入手 ,不觉珠盈掬。
从此西归荣耀处 ,宁假华旌高纛。乐府新声 ,
郢都馀唱 ,应纪阳春曲。老夫一醉 ,故人高义
堪服。

又 荆门军宋签判、陶教授许尉同坐

蒙泉岁晚 ,偶扁舟、同泛一池寒渌。四者
难并谁信道 ,草草幽欢能足。美景良辰 ,赏心
乐事 ,更有人如玉。今宵此会 ,陋邦惊破衰俗。

豪俊傅粉诸孙 ,几年分袂 ,一笑还相逐。
痛饮厌厌清夜永 ,那管更深催促。宋玉词章 ,
陶潜风概 ,况继前贤躅。故人未至 ,座中仍对
梅福。

又 别妓

柳花飞絮 ,又还是、清明寂寞时节。洞府
人间嗟素手 ,今日匆匆分拆。巧笑难成 ,含情
谁解 ,顾影无颜色。风流满面 ,却成春恨凄恻。

云鬓从弹金蝉 ,纷纷红泪 ,千点胭脂湿。
聚调轻盈离调惨 ,声入低空愁碧。祖帐将收 ,
骊驹欲驾 ,去也劳相忆。伤心南浦 ,断肠芳草
如积。

永遇乐 和钱处和上元

元夜风光 ,上都灯火 ,辉映春色。鳌冠仙山 ,龙衔瑞烛 ,银阙凌空碧。紫烟深拥 ,黄云孤起 ,人喜乍瞻天日。□云里 ,□□□□ ,侍臣□□鹤立。

雾收霞卷 ,珠帘开遍 ,翠幕娉婷争出。倾国丛中 ,钧天合处 ,忽听鸣清跸。貂裘小帽 ,随车信马 ,犹忆少年豪逸。如今对 ,山城皓月 ,但馀叹息。

风流子 范觉民生日

江国东风早 ,芳菲又、迤迤报寒梅。正元气孕和 ,小春归候 ,数丁千载 ,喜动三台。向此际 ,上天开景运 ,王国产英材。想崇岳洞天 ,暗书苔藓 ,海山烟雨 ,空锁楼台。

煌煌天人表 ,琼林与瑶树 ,照映庭槐。中有丽天星斗 ,惊世风雷。况朱颜绿发 ,年光鼎盛 ,绣裳华袞 ,人望归来。好对玳筵满举 ,眉寿觥罍。

王质

相见欢 薄霜

霜花零落全稀。不成飞。寒水溶溶漾漾、软琉璃。

红未涌，青已露，白都晞。□□□□沙暖、戏凫鹭。

长相思 暮春

红疏疏。紫疏疏。可惜飘零著地铺。春残心转孤。

莺相呼。燕相呼。楼下垂杨遮得乌。倚阑人已无。

又 渔父

山青青。水青青。两岸萧萧芦荻林。水深村又深。

风泠泠。露泠泠。一叶扁舟深处横。垂杨鸥不惊。

生查子 见梅花

见汝小溪湾，修竹连疏影。林杪动风声，

惊下毵毵粉。

见汝大江郊，高浪摇枯本。飞雪密封枝，直到斜阳醒。

杨柳枝 淡月

惯得娇云赶不开。去还来。淡光无可照楼台。且停杯。

薄雨疏疏时几点，洒浮埃。卖花未上担儿抬。听他催。

浣溪沙 和王通一韵简虞祖予

何药能医肠九回。榴莲不似蜀当归。却簪征帽解戎衣。

泪下猿声巴峡里，眼荒鸥碛楚江涯。梦魂只傍故人飞。

又

梦到江南梦却回。梦归何处得身归。故溪淥净看凫衣。

下到瞿唐春欲杪，桃花香浪渺无涯。三台回望五云飞。

又

征雁年来得几回。春风无雁带书归。故应春瘦减春衣。

花柳伤心经岁月，江湖无梦失津涯。到家无树不红飞。

又 有感

细雨萧萧变作秋。晚风杨柳冷飕飕。无

言有泪洒西楼。

眼共云山昏惨惨，心随烟水去悠悠。一蓑一笠任孤舟。

清平乐 感怀

江沙带湿。莎露和烟泣。落日欲低红未入。悄悄暮峰凝立。

疏林秀色荒寒。频频驻骑回看。应是梧桐影下，秋风蹙碎眉山。

又

断桥流水。香满扶疏里。忽见一枝明眼底。人在山腰水尾。

梨花应梦纷纷。征鸿叫断行云。不见绿毛么凤，一方明月中庭。

又 梅影

从来清瘦。更被春僝僽。瘦得花身无可有。莫放隔帘风透。

一枝相映孤灯。灯明不似花明。细看横斜影下，如闻溪水泠泠。

眼儿媚 送别

雨润梨花雪未乾。犹自有春寒。不如且住，清明寒食，数日之间。

想君行尽嘉陵水，我已下江南。相看万里，时须片纸，各报平安。

西江月 借江梅蜡梅为意寿董守

月斧修成膩玉，风斤琢碎轻冰。主人无那
寿杯深。倩取花来唤醒。

舞罢绣裯凤蹙，饮阑画阁香凝。试将花蕊
数层层。犹比长年不尽。

又

轻蜡细凝蜂密，薄罗深压鹅黄。玉容纵不
似何郎。也在百花头上。

试看眉间一点，全如瓶里孤芳。明年此日
趁鹓行。记取今朝胜赏。

又 和王道一韵促画屏

蹙蹙红中烟润，稍稍翠尾风斜。闲轩幽树
少啼鸦。此处最宜君画。

望眼不知天阔，归心常恨山遮。见君江浦
到芦花。意在琵琶亭下。

又 感怀

璧水桥边此客，金銮坡上何人。沙场老马
事无成。泪湿青莹夹镜。

袖手烟霏小景。回头石岭空城。乾坤遗
恨渺难平。目断塞鸿孤影。

滴滴金 晚眺

阴阴湿雾霜无汁。江气逼、树声滴。荒林
只见夕阳入。谁唤晚烟集。

渔翁犹把钓竿执。蓑共笠、时时葺。风刚

全宋词 王质

浪猛早收拾。天外暮云黑。

燕归梁 送别

拂拂春风入马蹄。□驻绿杨堤。绿杨堤上乳莺啼。声声怨、怨春归。

而今一似花流水，踪迹任东西。利成名遂在何时。早赢得、两分飞。

青门引 寻梅

寻遍江南麓。只有斑斑野菊。梅花不遇我心悲，一枝得见，便是一年足。微香来自横冈竹。飞度寒溪曲。落路寻人借问，谢他指向深深谷。

鹧鸪天 山行

空响萧萧似见呼。溪昏树暗觉神孤。微茫山路才通足，行到山深路亦无。

寻草浅，拣林蔬。虽疏无奈野藤粗。春衫不管藤擗碎，可惜教花著地铺。

又 咏渔父

一只船儿任意飞。眼前不管是和非。鱼儿得了浑闲事，未得鱼儿未肯归。

全似懒，又如痴。这些快活有谁知。华堂只见灯花好，不见波平月上时。

一斛珠

十一月十日知郡宴吴府判坐中赋海棠

风流太守。未春先试回春手。天寒修竹斜阳后。翠袖中间，忽有人红袖。天香国色浓如酒。且教青女休僝僽。梅花元是群花首。细细商量，只怕梅花瘦。

又 桃园赏雪

寒江凝碧。是谁翦作梨花出。花心犹带江痕湿。轻注香腮，却是桃花色。飞来飞去何曾密。疏疏全似新相识。横吹小弄梅花笛。看你飘零，不似江南客。

又 有寄

平塘玉立。薄罗飞起层层碧。人心不似花心密。待要相逢，未必相逢得。袜尘不动何曾湿。芙蓉桥上曾相识。橹声摇去江声急。西北高楼，回首浮云隔。

怨春郎 宿池口

芦花已老。蓼花已老。江腹冲风，山头残照。暮烟不辨栖鸥。识归舟。归舟照顾新洲阁。惊波恶。别拣深湾泊。南津北泆，水村总没人家。莽平沙。

虞美人 即事

绿阴夹岸人家住。桥上人来去。行舟远

远唤相应。全似孤烟斜日、出阊门。浪花拂拂
侵沙觜。直到垂杨底。吴江虽有晚潮回。未
比合江亭下、水如飞。

又 李敷文席上

翠阴融尽毵毵雪。惨淡花明灭。嫩沙拂
拂涨痕添。想见故溪、绿到草堂前。夕阳红透
樱桃粒。掩映深沈碧。成都事事似江南。只
是香衾、两处受春寒。

临江仙 和徐守圣可

缥缈青霄云一握 ,太清群玉光中。钧天声
里拂香风。紫皇低接手 ,稳步上层空。

雀扇徐开鸾影转 ,日高舞动蛟龙。双瞻御
座立昭容。回班趋复道 ,环佩响丁东。

又

千顷翠围遮绿净 ,菱花影落波中。看看红
锦漾清风。此时催入覲 ,烟浪拍云空。

伫见觚棱栖宝爵 ,旌旗全仗飞龙。赭黄一
点现真容。御麻宣未毕 ,云镜上天东。

又 宴向守簇

曲水流觞修禊事 ,袪除洗净春愁。举尊再
拜寿君侯。只今虚鼎足 ,好去作班头。

自古相门还出相 ,春旗小驻南州。云孙将
绍祖风流。他时如见忆 ,江汉一渔舟。

又 南楼席上寿张守

八字山头来较晚 ,彩云未散南楼。夕阳千

丈映帘钩。君侯如欲者，江水莫教流。

扇底清歌尘不动，胡床明月清秋。天浆为浪玉为舟。酒阑君便起，归去立班头。

定风波 夜赏海棠

曲曲阑干曲曲池。万红缭绕锦相围。花到黄昏思欲睡。休睡。眼前都是好相知。

银烛转添花转好，人在花深深处更相宜。似此好花须爱惜。休惜。鬓边消得两三枝。

又 赠将

问讯山东窦长卿。苍苍云外且垂纶。流水落花都莫问，等取，榆林沙月静边尘。

江面不如杯面阔，卷起，五湖烟浪入清尊。醉倒投床君且睡，却怕，挑灯看剑忽伤神。

又

白璧黄金爵上卿。紫宸殿下拜丝纶。才出龙门开虎帐，但看，甲光如水夜无尘。

古古今今男子事，摇动，芙蓉旗影入金尊。到得关河公事了，早去，白云堆里养精神

苏幕遮 守倅移厨

孟夏上浣，使君通守不以荒寒肯临。老杜所谓“尽日淹留佳客坐、百年粗糲腐儒餐”者也。两辞极道湖山云月之趣，因以记相与之意云。

水风轻，吹不皱。上下浮光，两镜光相就。云锦摇香吹散酒。细听清谈，玉屑津津嗽。

明月前，斜阳后。竹露秋声，拂拂寒生袖。

掇取湖山聊入手。紫阁黄扉 到了终须有。

又 送张删定赴召

驿尘飞 ,天意紧。香雪芝封 ,犹带吴泥润。
昨夜宝奁开玉镜。一点西风 ,便觉寒秋近。

白苹洲 红蓼径。风露凄清 ,快促黄金镫。
叠叠重重听好信。擲了碧油幢 ,更擲双堂印。

□□□ 闻鹊啼

眼将穿 肠欲裂。声声似向春风说。春色
飘零 ,自是人间客。

不成泪 都成血。朝朝暮暮何曾歇。叫彻
斜阳 ,又见空山月。

又

夜茫茫 春寂寂。寒烟叫裂空山石。吸尽
东风 ,化作垂红滴。

漏将阑 情转极。月明绕树声声急。无数
闲花 尽染啼痕湿。

青玉案 木樨

中央自有仙风度。散入千林去。万点秋
芳洒飞露。舜裳赭色 ,尧眉黄彩 ,化作花无数。

层层翠葆鸾旗舞 ,吹下天香遍瑶宇。万岁
千秋奉明主。桂华月苑 ,蕊珠宝殿 ,长听黄金
缕。

又 池亭

浮萍不碍鱼行路。细数鱼来去。静倚溪

阴深觅句。碧鲜清润 ,影摇香度。易觉阑干暮。

皂雏深傍苹根住。浴罢红衣褪残缕。一寸江湖无可付。渚兰汀草 ,卧烟敲雨 ,荒了垂纶处。

江城子 席上赋

细风微揭碧鳞鳞。绣帟深。不闻声。时见推帘 ,笼袖玉轻轻。不似绮楼高卷幔 ,相指点 ,总分明。

斜湾丛柳暗阴阴。且消停。莫催行。只恨夕阳 ,虽好近黄昏。得到钗梁容略住 ,无分做 ,小蜻蜓。

又

细风吹起翠田田。雨和烟。入梅天。鲜润繁阴 ,悄悄转清圆。十顷葡萄深贮碧 ,鸥共鹭 ,各翩翩。

影摇香度小婵娟。竹林贤。总神仙。滴露飞霜 ,雪壑注冰泉。伴了芙蓉城里客 ,无一事 ,北窗眠。

又 宴守倅

柳梢无雪受风吹。绿垂垂。乳鸦啼。直下蒲萄 ,春水未平堤。却似今年春气早 ,白团扇 ,已相宜。

红巾当日鸟衔飞。曲江湄。暮春时 ,孔雀麒麟 ,交蹙绣罗衣。何似野堂陪胜客 ,花影外 ,竹阴移。

蓦山溪 咏茶

枯林荒陌 ,矮树敷鲜叶。不见雅风标 ,十二分 ,山容野色。因何嫩茁 ,舞动小旗枪 ,梅花后 ,杏花前 ,色味香三绝。

含光隐耀 ,尘土埋豪杰。试看大粗疏 ,争知变、寒云飞雪。休说休说 ,世只两名花 ,芍药相 ,牡丹王 ,未尽人间舌。

满江红 幕府诸公郊外同集以病不去。

方丈维摩 ,蒙纳被、都齐不省。空怅望、锦裘绣帽 ,玉珂金镫。十月小春逢此日 ,一时胜事输公等。问短衣、匹马射南山 ,何人肯。

山暮紫 ,峰如笋。江寒碧 ,沙如粉。望塞鸿杳杳 ,水遥天永。饮罢不妨瓶屡卧 ,归来自有风吹醒。试断桥、流水月明边 ,寻疏影。

又 庆寿

整顿乾坤 ,恨舞袖、回旋不足。须付与、腰金叠赤 ,面槐参绿。功业岂无人可了 ,英豪自有心相伏。自孤窗、寒烛听经纶 ,常三复。

举大白 ,倾醪醕。为公起 ,歌此曲。曲中意惟有 ,斯贤堪属。萱草喜除烦恼障 ,莲花妙享清凉福。愿年年、团扇弄生绡 ,长如玉。

又 春日

惨淡轻阴 ,都养就、朱朱白白。最好是、梨花带雨 ,海棠映日。暖雾烘成芳草色 ,娇风分

与垂杨力。听红边、翠杪啖清圆，曾相识。

春绪乱，还如织。春梦断，还堪觅。看青梅下有，游人啧啧。爱酒正香须满泛，怜花太嫩休轻摘。把领巾、收聚众香浓。凭风立。

又

生穀平铺，吹不起、轻风无力。西江上、斗牛相射，水天一色。二妙风流今代少，一时光价何时息。更绛霄、白日下云軿，芙蓉客。

整飞驭，成得得。寻前约，宽忆忆。正云飞雨卷，旧红新碧。茁茁抽长荷柄绿，毵毵吐净杨花白。渐衣篝、香润入梅天，红绡湿。

又 渔父

莽莽云平，都不辨、近山远水。尽徘徊、尚留波面，未归湾尾。浪猛深深鸥抱稳，波寒缩缩鱼沈底。恐狂风、颠雨岸多摧，舟难舣。

船篷重，拖不起。蓑衣湿，森如洗。想杖头未足，杯中无计。渔网吹翻无把捉，钓竿冻断成抛弃。到高歌、风静月明时，谁如你。

又 牧童

落尽斜阳，尚有些、断霞残影。甚弯环、东溪西巷，南岩北岭。行熟更教羊引著，睡浓却被鸦惊醒。渐孤村、树暗颤山敲，霜风冷。

人世里，嫌他蠢。牛背上，输他稳。但芒鞋一纳，蓑衣一领。五脏荒陂蔬荐口，双髭幽庵花漫顶。虽云乌、月黑路蒙笼，何曾窘。

又 听琴

纸帐梅花，有丛桂、又有修竹。是何声、雪飘远渚，泉鸣幽谷。红蓼白苹须拂袖，余音尚

带清香馥。挽素娥青女、问飞琼、谁家曲。

韩退之、欧永叔。惚兮恍、恍兮惚。试侧耳、山常似黛、水常如玉。颜子操中何足怨、醉翁徽外无人续。正青天、明月上东南、芳时足。

水调歌头 京口

江水去无极、无地有青天。怒涛汹涌、卷浪成雪蔽长川。一望扬州苍莽、隐见烟竿双矗、何处卷珠帘。落日瓜洲渡、鸿鹭满风前。

古战场、皆白草、更苍烟。清平犹有遗恨、久矣在江边。北固山前三杰、遥想当年意气、亹亹昵中原。上马促归去、风堕接鬣翩。

又 中秋饮南楼呈范宣抚

细数十年梦、十处过中秋。今年清梦、还在黄鹤旧楼头。老子个中不浅、此会天教重见、今古一南楼。星汉淡无色、玉锦倚空浮。

带秦烟、萦楚雾、熨江流。关河离合南北、依旧照清愁。想见姮娥冷笑、笑我归来霜鬓、空敝黑貂裘。把酒问清影、肯去伴沧洲。

又

游银山寺和壁间张安国作

晚嶂倚斜日、秋树战悲风。一泓绀紫澄碧、中有睡蛟龙。散作清溪明玉、激上长松流水、雨电乱寒空。抛却红尘袂、飞入妙光宫。

佛国大、天溥博、地含洪。空岩乱壑递响，珠影动金容。万古碧潭空界，一点青霄明月，滂漉总无功。云散殿突兀、风动铎丁东。

又

草蔓已多露 ,松竹总含风。群山左顾右盼 ,如虎更如龙。时见渔灯三两 ,知在谁家浦溆 ,星斗烂垂空。万有付一扫 ,人世等天宫。

秋萧瑟 林脱叶 水归洪。江湖飘泊鸿雁 ,洲渚肯相容。要使群生安堵 ,不听三更吠犬 ,此则是奇功。一任画麟阁 ,吾自老墙东。

又 九日

云巘在空碧 ,天宇共高明。重阳易得风雨 ,今日不胜晴。天为两朝元老 ,付与四时佳节 ,不动一丝尘。香霭洗金戟 ,飞雾洒霓旌。

山鸣叶 江动石 总欢声。剑关玉垒千载 ,谁见此升平。细看尊前万蕊 ,相映眉间一点 ,黄气郁骎骎。江汉下淮海 ,都赖一长城。

又 饶风岭上见梅

花上插苍碧 ,花下走清湍。浓霜深覆残雪 ,更有月相参。似我竹溪茅屋 ,欲晓未明天气 ,扶杖绕篱看。秦楚五千里 ,何处是江南。

饶风下 人不断 马相连。颇尝见有此客 ,相属意惓惓。欲为横吹出塞 ,无处可寻羌管 ,短策叩征鞍。策断征鞍裂 ,惊堕玉毵毵。

又 寿查郎中

淮海一星出 ,分野到梁州。玉京群帝朝斗 ,公在列仙流。尽扫欃枪格泽 ,高拱紫微太乙 ,霞佩拂红裾。非雾非烟里 ,永侍绀云裘。

日南至 月既望 寿君侯。梅花满眼 ,一朵聊当一千秋。半夜玉堂承诏 ,翼旦路朝宣册 ,归去作班头。风净瞿唐峡 ,安稳放行舟。

又 庆寿

河汉湛秋碧,玉露暖瑶空。太清仙子,飘飘渺渺飞佩响玲珑。暂双青鸾紫凤,来玩十洲三岛,旌旆卷芙蓉。身在大江表,名系绛霄宫。

两仙客,歌驻月,舞回风。宝薰轻度帘幕,香雾结重重。已觉长安近日,会看此星朝斗,千载庆云龙。翠鬣彤烟里,长侍袞衣红。

八声甘州 怀张安国

海茫茫、天北与天南,吾友定安归。闻濡须江上,皖公山下,驾白云飞。莽苍空郊虚野,古路立斜晖。颜跖皆尘土。苦泪休挥。

一代锦肠绣肺,想英魂皎皎,健口霏霏。望寒空明月,无路寄相思。叹千古、兴亡成败,满乾坤、遗恨有谁知。今何在,一川烟惨,万壑风悲。

又 读周公瑾传

事茫茫、赤壁半帆风,四海忽三分。想苍烟金虎,碧云铜爵,恨满乾坤。郁郁秣陵王气,传到第三孙。风虎云龙会,自有其人。

朱颜二十有四,正锦帙秋梦,玉帐春声。望吴江楚汉,明月伴英魂。滟滟小桥红浪湿,抚虚弦、何处得郎闻。雪堂老,千年一瞬,再击空明。

又 读诸葛武侯传

过隆中、桑柘倚斜阳,禾黍战悲风。世若无徐庶,更无废统,沈了英雄。本计东荆西益,

观变取奇功。转尽青天粟,无路能通。

他日杂耕渭上,忽一星飞堕,万事成空。
使一曹三马,云雨动蛟龙。看璀璨、出师一表,
照乾坤、牛斗气常冲。千年后,锦城相吊,遇草
堂翁。

又 读谢安石传

气佳哉、烟紫石头城,云碧雨花台。想东
山前后,望春树绿,看晚潮回,自古英雄豪杰,
无不待时来。拥鼻微吟处,山静花开。

商皓亦尝如此,羨苍生皆有,瞻望之怀。
但淝河洛涧,此事偶然谐。疑是彼、八公草木,
得神明、相亮不相猜。西州泪,千年犹湿,回望
兴衰。

倦寻芳 试墨

冰壶秋月,去了潘郎,传到梁老。骑马乘
船,麾斥五湖三岛。任捎云,兼拂日,拽蛟龙、
鳞鬣都推倒。向尘中,分付高人胜士,把云烟
扫。

乾坤巧。自苍筠无汗,乌锥无刃,此为至
宝。第一君门通表。书囊谏草。第二文章扬
事业,第三编简摠怀抱。千百般,终久被他磨
了。

又 渡口酒家

断崖树老,侧岸槎枯,倒倚斜插。脚面浅
溪,掌样平洲重叠。著芒鞋,携竹杖,遇乱莎幽
涧,萦纡涉。那人家,有竹篱瓦缶。颇颇清冽。

曾微呷。正斜阳淡淡,暮霭昏昏,晚风猎

全宋词 王质

猎。转眼已成陈迹。不堪追蹑。试问旧醅还好在，暂停归影留时霎。待重来，细拈弄、水花山叶。

万年欢 有感

一轮明月，古人心万年，更寸心存。沧海化为黄土，心不成尘。杳杳兴亡成败，满乾坤、未见知音。抚阑干、欲唤英魂，沈沈又没人应。

无聊敲枕搔首，梦庐中坛上，一似平生。共挽长江为酒，相对同倾。不觉霜风敲竹，睡觉来、海与愁深。拂袖去，塞北河西，红尘陌上寻人。

真珠帘 栽竹

翠虬夭矫拿苍玉。飞来到、吾庐溪湾山麓。一笑忽相逢，更解包投宿。北池之畔西墙曲，与主人、呼青吸绿。恨我，无天寒翠袖，共倚修竹。

每遇飞雪萧萧，更惊风撼撼，清标可掬。更与月同来。无半点尘俗。冬有寒梅闲相伴，春亦有、幽兰相逐。香足。才露下霜飞，又有秋菊。

沁园春 闲居

二百年间，十二时中，悲欢往来。但盖头一把，容身方丈，无多缘饰，莫遣尘埃。屈曲成

幽 萧条生净 野草闲花都妙哉。家无力 ,虽然
咫尺 ,强作萦回。

竹斋。向背松斋。须次第、春兰秋菊开。
在竹篱虚处 ,密栽柑橘 ,荆桥斜畔 ,疏种香梅。
山芋茺羹 ,地黄酿粥 ,冬后春前皆可栽。门通
水 ,荷汀蓼渚 ,足可徘徊。

红窗怨 送邵倅

欲寄意 ,都无有。且须折赠、市桥官柳。
看君著上征衣 ,也寻思、榜舟楚江口。此会未
知何时又。恨男儿、不长相守。苟富贵、毋相
忘 ,若相忘、有如此酒。

又 即事

帘不卷。人难见。缥缈歌声 ,暗随香转 ,
记与三五少年 ,在杭州、曾听得几遍。唱到生
绡白团扇。晚凉初、桐阴满院。待要图入丹
青 ,奈无缘识如花面。

凤时春 见残梅

标格风流前辈。才瞥见春风 ,萧然无对。
只有月娥心不退。依旧断桥 横在流水。

我亦共、月娥同意 ,肯将情移在 ,粗红俗
翠 ,除丁香蔷薇酴醾外。便做花王 ,不是此辈。

泛兰舟 谯天授画像

萧萧乌帽黄衫。烟水拍云岩。风清月白 ,

一双碧眼莹秋潭。四海九州，茫茫东北，渺渺西南。松霜杉露毵毵。

龙门隔如参井。青城佳气与天参。蔽山充野，牡丹红外茯苓甘。鹤顶凝丹，隙驹蹀躞，尽百年间。乾坤云海风帆。

无月不登楼 种花

池塘生春草，梦中共、水仙相识。细拨冰绡，低沈玉骨，搅动一池寒碧。吹尽杨花，糝毡消白。却有青钱，点点如积。渐成翠、亭亭如立。

汉女江妃入窅室。擘破靓妆拥出。夜月明前，夕阳敲后，清妙世间标格。中贮琼瑶汁。才嚼破、露飞霜泣。何益。未转眼，度秋风，成陈迹。

别素质 请浙江僧嗣宗住庵

一个茅庵，三间七架。两畔更添两厦。倒坐双亭平分，扶阑两下。门前数十丘稷粳。塍外更百十株桑柘。一溪活水长流，余波及、蔬畦菜把。

便是招提与兰若。时钞疏乡园，看经村社。随分斗米相酬，环钱相谢。便阙少亦堪借借。常收些、笋乾蕨鲈。好年岁，更无兵无火，快活杀也。

笛家弄 水际闲行

凌乱败荷，既似沙莞，又如淝水。颠倒旌

旗都靡。余花敬谢 ,又似乌江 ,骓兮不逝。虞兮奈尔。凋柳萧骚 ,又如轺道 ,故老何颜对。因缘断。时节转。自然如彼。自然如此。

水边沙际。芦花摇曳。唤往行人 ,蓼花妩媚。引翻游子。又似江都酣夜延秋 ,建业望仙结绮。月下心飞 ,风前骨醉。共苹花得意。今看昔、后看今未。一回头 ,已百弹指。

王 重

蝶恋花

去岁花前曾记有。坐醉嬉游，花下携纤手。粉面与花相间斗。星眸一转晴波溜。
一见新花还感旧。泪眼逢春，忍更看花柳。春恨厌厌如永昼。□□寂寞黄昏后。

烛影摇红

烟雨江城，望中绿暗花枝少。惜春长待醉东风，却恨春归早。
纵有幽情欢会，奈如今、风情渐老。凤楼何处，画阑愁倚，天涯芳草。

王仲甫

清平乐

黄金殿里。烛影双龙戏。劝得官家真个醉，进酒犹呼万岁。

锦裯舞彻凉州，君恩与整搔头。一夜御前宣唤，六宫多少人愁。

满朝欢

（案此首调名满朝欢，疑是鹊桥仙之误）

忆得延州，旧曾相见，东城近东下住。被若著意引归家，放十分、以上抬举。

小样罗衫，淡红拂过，风流万般做处。怕伊蓦地忆人时，梦中来、不要迷路。

丑奴儿

牡丹不好长春好，有个因依。一两枝儿。但是风光总属伊。

当初只为嫦娥种，月正明时。教恁芳菲。伴著团圆十二回。

永遇乐

风折新英 ,雨肥繁实 ,又还如豆。玉核初成 ,红腮尚浅 ,齿软酸透。粉墙低亚 ,佳人惊见 ,不管露沾襟袖。一枝钗子未插 ,应把手揜频嗅。

相思病酒 ,只因思此 ,免使文君眉皱。入鼎调羹 ,攀林止渴 ,功业还依旧。看看飞燕 ,衔将春去 ,又将欲、黄昏时候。争如向、金盘满捧 ,共君王对酒。

浪淘沙

素手水晶盘。垒起仙丸。红绡碾碎却成团。逗得安排金粟遍 ,何似鸡冠。

味胜玉浆寒。只被宜酸。莫将荔子一般看。色淡香消偏恹损 ,才到长安。

醉落魄

醉醒醒醉。凭君会取皆滋味。浓斟琥珀香浮蚁。一入愁肠 ,便有阳春意。

须将席幕为天地。歌前起舞花前睡。从他兀兀陶陶里。犹胜醒醒 ,惹得闲憔悴。

蓦山溪

挂冠神武 ,来作烟花主。千里好江山 ,都

尽是、君恩赐与。风勾月引，催上泛宅时，酒倾
玉 鲙堆雪，总道神仙侣。

蓑衣箬笠，更著些儿雨。横笛两三声，晚
云中、惊鸥来去。欲烦妙手，写入散人图，蜗角
名，蝇头利，著甚来由顾。

王灼

水调歌头

长江二友令狐公才、桑仲文相继徂逝。七月壬午，予送客登妙高台绝顶，望明月山二十里许，有怀美人，归作此词。山附县郭，仲文居其下，公才居亦近之。贾浪仙诗云：“长江飞鸟外，主簿跨驴归。”又云：“长江频雨后，明月众星中。”予故取其语

长江飞鸟外，明月众星中。今来古往如此，人事几秋风。又对团团红树，独跨蹇驴归去，山水澹丰容。远色动愁思，不见两诗翁。

酒如渑，谈如绮，气如虹。当时痛饮狂醉，只许赏心同。响绝光沈休问，俯仰之间陈迹，我亦老飘蓬。望久碧云晚，一雁度寒空。

渔家傲 次韵赠载时行

漠漠郊原荒宿草。黄花趁得秋风早。万里岷峨归梦到。东篱好。未应花似行人老。

古往今来成一笑。为君醉里销沈了。不用登临敲短帽。愁绝□。吴霜点鬓教谁扫。

醉花阴 送夏立夫

平生五色江淹笔。合占金闺籍。桃李满城春，恨□屏□，只作三年客。画船暂系河桥侧。一醉分南北。惆怅酒醒时，雨笠风蓑，似旧无人识。

清平乐 填太白应制词

东风归早。已绿瀛洲草。紫殿红楼春正好。杨柳半和烟袅。

玉舆遍绕花行。初闻百啭新莺。历历因风传去，千门万户春声。

又 妓诉状立厅下

坠红飘絮。收拾春归去。长恨春归无觅处。心事顾谁分付。

卢家小苑回塘。于飞多少鸳鸯。纵使东墙隔断，莫愁应念王昌。

点绛唇 赋登楼

休惜馀春，试来把酒留春住。问春无语。帘卷西山雨。

一掬愁心，强欲登高赋。山无数。烟波

无数。不放春归去。

浣溪沙

一样婵娟别样清。眼明初识董双成。香风随步过帘旌。

笑捧玉觞频劝客，浣溪沙里转新声。花间侧听有流莺。

虞美人

别来杨柳团轻絮。摆撼春风去。小园桃李却依依。犹自留花不发、待郎归。

枝头便觉层层好。信是花相恼。觥船一棹百分空。拚了如今醉倒、闹香中。

又

姚黄真是花中主。个个寻芳去。春光能有几多时。莫遣无花空折、断肠枝。

蜂媒蝶使争撩乱。应妒传觞缓。问花端的为谁开。拟作移春小槛、载归来。

菩萨蛮 和令狐公子

风柔日薄江村路。一鞭又逐春光去。胡蝶作团飞。竹间桃李枝。

醉魂招不得。一半随春色。桃李□无多。其如风日何。

好事近

小研碧霞笺，不见近来消息。玉骨瘦无一把，又不成空忆。

炉熏歇尽烛花残，佳梦了难得。二十五声秋点，最知人端的。

长相思

来匆匆。去匆匆。短梦无凭春又空。难随郎马踪。

山重重。水重重。飞絮流云西复东。音书何处通。

酒泉子 送诣夫成都作。重九

锦水花林，前度刘郎行乐处，当时桃李卧莓苔。又重来。

今年菊蕊为君开。赖有诗情浑似旧，西风斜日上高台。醉千回。

恨来迟

柳暗汀洲，最春深处，小宴初开。似泛宅浮家，水平风软，咫尺蓬莱。

更劝君、吸尽紫霞杯。醉看鸾凤徘徊。正洞里桃花，盈盈一笑，依旧怜才。

春光好

和醉梦，上峥嵘。忆娉婷。回首锦江烟一色，不分明。

翻为离别牵情。娇啼外、没句丁宁。紫陌绿窗多少恨，两难平。

南歌子 早春感怀

命嗙无人嗙，含娇何处娇。江南烟水太迢迢。璧月琼枝空想、夜和朝。

目断肠随断，魂销骨更销。琐窗风雨不相饶。犹似西湖一枕、听寒潮。

画堂春 春思

暖风和雨暗楼台。馀寒巧作愁媒。半春怀抱向谁开。忍泪千回。

断梦已随烟篆，醉魂空殢琼杯。小窗瞥见一枝梅。疑误君来。

七娘子

花明雾暗非花雾。似春屏、短梦无凭据。夜月将来，晓灯催去。半衾馀暖空留住。

情柔意密愁千缕。想一声、鸡唱东城路。暂作行云，暂为行雨。阳台望极人何处。

减字木兰花 政和癸丑

飞霞半缕。收尽一天风和雨。可惜黄昏。
残角疏钟要断魂。

双鱼传信。只道横塘消息近。心事悠悠。
同向春风各自愁。

一落索

昨夜封枝寒雪。暗堆残叶。佳人醉里插
钗梁，更不问、眠时节。

绣被重重夜彻。烛光明灭。枕旁争听落
檐声，更不问、醒时节。

丑奴儿

东风已有归来信，先返梅魂。雪斗纷纷。
更引蟾光过壁门。

绿衣小凤枝头语，我有嘉宾。急泛清尊。
莫待江南烂漫春。

王自中

念奴娇 题钓台

扁舟夜泛 ,向子陵台下 ,偃帆收橹。水阔
风摇舟不定 ,依约月华新吐。细酌清泉 ,痛浇
尘臆 ,唤起先生语。当年纶钓 ,为谁高卧烟渚。

还念古往今来 ,功名可共 ,能几人光武。
一旦星文惊四海 ,从此故人何许。到底轩裳 ,
不如蓑笠 ,久矣心相与。天低云淡 ,浩然吾欲
高举。

王 恹

望江南 寿张仪真

三杰后，福寿两天涯。食乳相君功未既，
妖眉京兆眷方兹。富贵莫推辞。

门两戟，却棹一纶丝。莼菜秋风鲈鲙美、
桃花春水鳜鱼肥。笑傲雪溪湄。

危昞霄

眼儿媚 题九里桥

晴云十丈跨杉溪。偏称夜凉时。我来正值，一滩月朗，万木霜飞。

谪仙不住人间世，此恨有谁知。何人画我，倚阑得句，听水忘归。

危复之

永遇乐

早叶初莺 ,晚风孤蝶 ,幽思何限。檐角萦云 ,阶痕积雨 ,一夜苔生遍。玉窗闲掩 ,瑶琴慵理 ,寂寞水沈烟断。悄无言、春归无觅处 ,卷帘见双飞燕。

风亭泉石 ,烟林薇蕨 ,梦绕旧时曾见。江上闲鸥 ,心盟犹在 ,分得眠沙半。引觞浮月 ,飞谈卷雾 ,莫管愁深欢浅。起来倚阑干 ,拾得残红一片。

危 西 麓

风流子 郭县尹美任

西风吹锦水、朝天路、冉冉两凫飞。看父老袅花，苦遮去辙，儿童骑竹，争问归期。帐簇马前纷蔽日，实绩纪行碑。冰饮三年，从容官事，棠阴百里，悠久民思。

圣明矜遐远，关山道，应是来骖华丝。画绣过家，莱庭彩舞斑衣。便稳奉安舆，江南向暖，早传言语，樵曲先知。重约旧临，倪耄迎候杭西。

危 稹

水龙吟 庆齐年诸丈

洛阳九老图中，当时司马年犹小。争如今夕，举杯相劝，十人齐寿。已幸同庚，何分雌甲，本无多少。但有头可白，无愁可解，只如此、都赢了。

庆礼十年还又，更十年、依前难老。尽教百岁，做人高祖，见孙白首。却要从今，探梅脚健，看山眼好。赖天公，顿得东园长在，陪歌陪酒。

渔家傲 和晏虞卿咏侍儿弹箜篌

老去诸馀情味浅。诗词不上闲钗钏。宝幌有人红两靥。帘间见。紫云元在梨花院。

十四条弦音调远。柳丝不隔芙蓉面。秋入西窗风露晚。归去懒。酒酣一任乌巾岸。

沁园春 寿许贰车

籍甚声名，门阑相种，文章世科。算当年瑞世，正当夏五，仙家毓德，全是春和。

底事屏星，著之海峤，奈此腾骧足何。君
知否，看飞来丹诏，径上鸾坡。

殷勤携酒相过。要滟滟浮君金叵罗。叹
同心相契，古来难觅，二年同处，意总无它。
如此平分，更教添个，也自清风明月多。拚
沈醉，任光浮绿鬓，笑满红涡。

韦居安

摸鱼儿

绕苔城、水平坡渺，双明遥睇无际。就中惟有鱼湾好，占得西关佳致。杨柳外、羨泛宅浮家，当日元真子。溪山信美。叹陈迹犹存，前贤已往，谁会景中意。

萧闲甚，筑屋三间近水。汀洲香泛兰芷。清风明月知多少，肯滞软红尘里。垂钓饵。这春水生时，胜有桃花鳜。烦襟净洗。待办取轻蓑，来分半席，相对弄清泚。

韦能谦

虞美人

风清日晚溪桥路。绿暗摇残雨。闲亭小立望溪山。画出明湖深秀、水云间。漫郎疏懒非真束。欲去无深计。功名英隽满凌烟。省事应须速上、五湖船。

韦 骧

减字木兰花 惜春词

人生可意。祇说功名贪富贵。遇景开怀。
且尽生前有限杯。

韶华几许。鶗鴂声残无觅处。莫自因循。
一片花飞减却春。

又 劝饮酒

金貂贳酒。乐事可为须趁手。且醉青春。
白发何曾饶贵人。

凤笙鼉鼓。况是桃花落红雨。莫诉觥筹。
炊熟黄粱一梦休。

又 止贪词

鸾坡凤沼。轩冕傥来何足道。存养天真。
安用浮名绊此身。

劳生逸老。摆脱纷华须是早。解绶眠云。
林下何曾见一人。

又 望仙词

危楼引望。天气犹寒花未放。远思悠悠。
芳草何年恨即休。

仙踪何处。此去蓬山多少路。春霭腾腾。

更在瑶台十二层。

又 春词

帝城春媚。绿柳参天花照地。共乐升平。
处处楼台歌板声。

香轮玉辇。驰骤芳郊争选胜。妙舞轻讴。
扰乱春风卒未休。

菩萨蛮 和舒信道水心寺会次韵

琼杯且尽清歌送。人生离合真如梦。瞬息又春归。回头光景非。

香喷金兽暖。欢意愁更短。白发不须量。
从教千丈长。

鹊桥仙

岁华将暮 ,寒林萧索 ,极目冻云垂地。官
梅忽见一枝芳 ,便顿觉、新春情味。

小筵开处 ,歌喉清婉 ,舞态踈跽争媚。沈
腰潘鬓两休论 ,共举白、何须惜醉。

减字木兰花 水仙花

雕阑香砌。红紫妖韶何足计。争似幽芳。
几朵先春蘸碧塘。

玉盘金盏。谁谓花神情有限。绰约仙姿。
彷彿江皋解佩时。

洛阳春 丁香花

冷艳幽香奇绝。粉金裁雪。无端又欲恨
春风,恨不解、千千结。

曲槛小池清切。倚烟笼月。佳人纤手傍
柔条,似不忍、轻攀折。

醉蓬莱 廷评庆寿

漏新春消耗,柳眼微青,素梅犹小。帘幕
轻寒,引炉烟袅袅。凤管雍容,雁筝清切,对绮
筵呈妙。此际欢虞,门庭自有,辉光荣耀。

庆事难逢,世间须信,八十遐龄,古来稀
少。况偶佳辰,是桑弧曾表。满奉金觥,暂停
牙板,听雅歌精祷。惟愿增高,龟年鹤算,鸿恩
紫诏。

沁园春 廷评拜官

林叶阴浓,海云峰耸,夏景渐分。称画堂
开宴,雍雍笑语,高年耆德,初拜君恩。汉相家
声,一经传训,赏典今朝归庆门。清和昼,见香
飘百和,乐按长春。

休论。万事纷纭。算寿考、乡间能几人。
况凤书才降,龟龄正永,莫辞金盞,一醉醺醺。
萱草忘忧,榴花含笑,庭院风光如再新。成欢
颂,愿齐坚桧柏,频奉丝纶。

魏夫人

临江仙

庭院深深深几许，云窗雾阁春迟。为谁憔悴损芳姿。夜来清梦好，应是发南枝。
玉瘦檀轻无限恨，南楼羌管休吹。浓香吹尽有谁知。暖风迟日也，别到杏花肥。

好事近

雨后晓寒轻，花外早莺啼歇。愁听隔溪残漏，正一声凄咽。
不堪西望去程赊，离肠万回结。不似海棠阴下，按凉州时节。

阮郎归

夕阳楼外落花飞。晴空碧四垂。去帆回首已天涯。孤烟卷翠微。
楼上客，鬓成丝。归来未有期。断魂不忍下危梯。桐阴月影移。

减字木兰花

西楼明月。掩映梨花千树雪。楼上人归。
愁听孤城一雁飞。

玉人何处。又见江南春色暮。芳信难寻。
去后桃花流水深。

又

落花飞絮。杳杳天涯人甚处。欲寄相思。
春尽衡阳雁渐稀。

离肠泪眼。肠断泪痕流不断。明月西楼。
一曲阑干一倍愁。

菩萨蛮

溪山掩映斜阳里。楼台影动鸳鸯起。隔
岸两三家。出墙红杏花。

绿杨堤下路。早晚溪边去。三见柳绵飞。
离人犹未归。

又

东风已绿瀛洲草。画楼帘卷清霜晓。清
绝比湖梅。花开未满枝。

长天音信断。又见南归雁。何处是离愁。
长安明月楼。

又

红楼斜倚连溪曲。楼前溪水凝寒玉。荡
漾木兰船。船中人少年。

荷花娇欲语。笑入鸳鸯浦。波上暝烟低。

菱歌月下归。

定风波

不是无心惜落花。落花无意恋春华。昨日盈盈枝上笑。谁道。今朝吹去落谁家。

把酒临风千种恨。难问。梦回云散见无涯。妙舞清歌谁是主。回顾。高城不见夕阳斜。

点绛唇

波上清风,画船明月人归后,渐消残酒。独自凭阑久。

聚散匆匆,此恨年年有,重回首。淡烟疏柳。隐隐芜城漏。

武陵春

小院无人帘半卷,独自倚阑时。宽尽春来金缕衣。憔悴有谁知。

玉人近日书来少,应是怨来迟。梦里长安早晚归。和泪立斜晖。

江城子 春恨

别郎容易见郎难。几何般。懒临鸾。憔悴容仪,陡觉缕衣宽。门外红梅将谢也,谁信道、不曾看。

全宋词 魏夫人

晓妆楼上望长安。怯轻寒。莫凭阑。嫌怕东风，吹恨上眉端。为报归期须及早，休误妾、一春闲。

唐宋诸贤绝妙词选卷十

卷珠帘

记得来时春未暮。执手攀花，袖染花梢露。暗卜春心共花语。争寻双朵争先去。多情因甚相辜负。轻拆轻离，欲向谁分诉。泪湿海棠花枝处。东君空把奴分付。

系裙腰

灯花耿耿漏迟迟。人别后、夜凉时。西风潇洒梦初回。谁念我，就单枕，皱双眉。锦屏绣幌与秋期。肠欲断、泪偷垂。月明还到小窗西。我恨你，我忆你，你争知。

魏了翁

和孙蒲江□□上元词（蝶恋花）

（调名据紫芝漫抄本鹤山长短句补注，下俱同）

又见王正班玉瑞。霁月光风，恰与元宵际。横玉一声天似水。阳春到处皆生意。
十载奔驰今我里。昔□元非，未信今皆是。风月惺惺人自醉。却将醉眼看荣悴。

虞永康刚简所筑美功堂于城南以端午落成 唐涪州赋水调歌即席次韵（水调歌头）

江水自石纽，灌口怒腾辉。便如黑水北出，迤迤到三危。百尺长虹天矫，两岸苍龙偃蹇，翠碧互因依。古树百夫长，修竹万竿旗。

画堂开，风与月，巧相随。史君领客行乐，旌纛立披披。慨想二江遗迹，更起三闾忠愤，此日最为宜。推本美功意，禹甸六章诗。

张茶马□□生日 六月十八日（同上）

轻露淪残暑，蟾影插高寒。团团只似前夕，持向老莱看。九帙元开父算，六甲更逢

儿换，梧竹拥檀栾。都把方寸地，散作万云烟。

锦边城，云间戍，雪中山。风流老监在此，忧顾赖渠宽。天上玉颜含笑，堂上酩酊如酒，家国两平安。又恐玉川子，茗碗送飞翰。

杨崇庆熹生日（同上）

风露浸秋色，烟雨媚湖弦。旌旗十里小队，拟约醮坛仙。身在黄旗朱邸，名在玉皇香案，底事个人传。正恐未免耳，惊搅日高眠。

虎分符，龙握节，鹿御幡。于君本亦余事，所乐不存焉。一点春风和气，无限蓝田种子，渺渺玉生烟。富贵谁不有，借问此何缘。

赵运判师劣生日（同上）

万里蜀山险，难似上青天。谁知间有、人心之险甚山川。赖得皇华星使，满载春风和气，来自鉴湖边。要识方寸地，四十万云烟。

佩珑璁，冠昱爚，组蝉联。眼前富贵余事，所乐不存焉。闻道汉家子政，博考兰台载籍，胸次著千年。会有太一老，同结海山缘。

广汉士民送别用韩推官韵为谢（念奴娇）

万人遮道，拨不断、争挽房湖逐客。臣罪既盈应九死，全荷君王矜恻。况是当技，

十字街头立。恩波浩荡，孤忠未报涓滴。

世事应若穿杨，一弦不到，前发皆虚的。
自判此生元有分，不管筮违龟食。靴帽丛中，
渔樵席上，无入非吾得。倚湖一笑，夜深群
动皆息。

杜安人生日（临江仙）

九十秋光三十八，新居初度称觞。青衫
彩服列郎娘。孙枝无处著，犹欠两东床。

尽是当年亲手种，如今满院芬芳。只凭
方寸答苍苍。个中无尽藏，谁弱又谁强。

送嘉甫弟赴眉山（同上）

细雨斜风驱晓瘴，绰开坦坦长途。膏车
秣马问程初。梅梢迎候骑，雁影度平芜。

行已不论官小大，穷探不间精粗。只从
厚处作去声规模。简编迂事业，屋漏拙功夫。

和阎广安□□感皇恩韵

三峡打头风，吹回荆步。坎止流行谩随
遇。须臾风静，重踏西来旧武。世间忧喜地，
分明觑。

喜事虽新，忧端依旧，徒为岷峨且欢舞。
阴云掩映，天末扣阍无路。一鞭归去也，鸥
为侣。

登白鹤山，借前韵呈同游诸丈（水龙吟）

阑风长雨连霄，昨朝晴色随轩骤。松声花气，江烟浦树，如相迎候。山送青来，僧随麦去，山为吾有。更搘筇直上，薜萝深处，云垂幄、藓成蹙。

未至相如独后。对山尊、劝酬多又。记曾犯雪，重来已是，绿肥红瘦。好语时闻，忧端未歇，倚风搔首。谩持觞自慰，冰山安在，此山如旧。

次韵西叔兄咏兰（满江红）

玉质金相，长自守、间庭暗室。对黄昏月冷，朦胧雾浥。知我者希常我贵，于人不可而人即。彼云云、谩自怨灵均，伤兰植。

鸚鵡乱，春芳寂。络纬叫，池英摘。惟国香耐久，素秋同德。既向静中观性分，偏于发处知生色。待到头、声臭两无时，真闻识。

吴制置猎生日（水调歌头）

世界要扶助，人物载耆英。茫茫四海，谁识今代有庞臣。万顷青湖佳气，一片紫岩心事，天付与斯人。耸耸铁冠吏，表表白云卿。

海沮漳，城汉郢，宅峨岷。规摹妙处，

胸次纳纳几沧瀛。未说令公二纪，先看武公
百岁，年与学俱新。星弁百僚准，天宇四时
春。

和黄侍郎畴若见贻生日韵（南乡子）

万里载浮名。忆昔从容下帝京。冉冉七
年如昨梦，分明。赢得存存夜气清。谁使滥
专城。有罪当诛尚薄刑。细数当时同省士，
皆卿。落落韶阳独九龄。

张致政□□生日（水调歌头）

冬至子之半，玉筯罅微阳。壶中别有天
地，转觉日增长。一样金章紫服，一样朱颜
绿发，翁季俨相望。翁是修何行，未已且方
将。

玉生烟，兰竞秀，彩成行。翁无他智，
只把一念答苍苍。今日列城桃李，他日八荒
雨露，都是乃翁庄。要数义方训，不说窦家
郎。

杨子有德辅母夫人生日（临江仙）

尚忆去年称寿日，彩衣犹带天香。今年
还见雁成行。两头娘子拜，笑领伯仁觞。

知是几年培植底，如今满院芬芳。只凭
方寸答苍苍。春风来不断，点缀艳阳妆。

妇生朝李倅□同其女载酒为寿用韵谢之
(水调歌头)

曾向君王说，臣愿守嘉州。风流别乘初届，元在越王楼。湖上龟鱼何事，桥上雁犀谁使，争挽海山舟。便遣旧姻娅，解后作斯游。

晚风清，初暑涨，暮云收。公堂高会，恍疑仙女下罗浮。好是中郎有女，况是史君有妇，同对藕花洲。拟把鹤山月，换却鉴湖秋。

张邛州师夔生日 (临江仙)

腰著万钉犀玉夸，肘垂斗大金章。非关性分总寻常。要知真乐处，彩服鬓毛苍。

浩荡春风生玉树，蒸成满院芬芳。斗城无处著韶光。会归天上去，长捧伯仁觞。

赵运判师峿生日四月十一日 (水调歌头)

有匪碧岩使，满腹鉴湖秋。不居上界官府，来作散仙游。长佩高冠人伟，组练锦袍官贵，清献旧风流。杓柄长多少，洗尽蜀民愁。

鹑鷄冠，貂尾案，鹭鸶鞦。时来正恐不免，留滞剑南州。帘卷西州风雨，庭伫百城歌鼓，桃李翠云稠。谁谓蜀山远，只在殿山

头。

张总领□□生日（贺新郎）

家住峨山趾。暑风轻、双泉漱玉，五坡攒翠。坡上主人归无计。梦泛沧波清泚。曾拜奏、前旒十二。愿上皇华将亲去，及翁儿、未老相扶曳。乘款段，过闾里。

玺书未报人相谓。倚西风、胡尘涨野，隐忧如蝟。就似东门贤父子，只恐荣亲犹未。待洗尽、岷峨憔悴。便把手中长杓柄，为八荒，更作无边施。却上表，乞归侍。

管待李眉州□□劝酒（鹧鸪天）

十载交盟可重寻。剩于棠茇细论心。云障晚日供秋思，风递荷书作晚阴。

纡胜引，豁尘襟。未须紫马去骎骎。玻璃无计留君住，但乞天公三日霖。

管待李参政壁劝酒（水调歌头）

落日下平楚，秋色到方塘。人间袞暑难耐，独有此清凉。龙卷八荒霖雨，鹤唳十州风露，回薄水云乡。欲识千里润，记取玉流芳。

石兰衣，江蓠佩，芰荷裳。个中自有服媚，何必锦名堂。吸取玻璃清涨，唤起逍遥旧梦，人物俨相望。矫首望归路，三十六虚

皇。

管待杨伯昌子谩劝酒（贺新郎）

独立西风里。渺无尘、明河挂渺无尘、明河挂斗，碧天如洗。鸚鵡楼前迎风处，机中巧思。织就天孙云锦段，尚轻阴、朱阁留纤翳。亲为挽，天潢水。

等闲富贵浮云似。须存留、几分清论，护持元气。曾把古今兴亡事，奏向前旒十二。虽去国、言犹在耳。念我独兮谁与共，谩凝思、一日如三岁。夜耿耿，不皇寐。

李提刑冲佑至生日（水调歌头）

沆露浸秋色，零雨濯湖弦。做成特地风月，管领老臞杯仙。雁落村间杯影，鱼识桥边柱杖，虑澹境长偏。只恐未免耳，惊搅日高眠。

龙握节，貂插案，鹿衔幡。于公元只余事，所乐不存焉。手植蓝田种子，无数阶庭成树，郁郁紫生烟。富贵姑勿道，借问此何缘。

王总领□□生日八月六日（同上）

轻露淪残暑，哉魄拟初弦。天台万八千丈，中有紫霞仙。正理中枢旧武，却忆邻环昨梦，重上蜀青天。只守伯禽法，驹野万云烟。

锦川星，郎位宿，又移躔。为无结辈十

数，踏遍蜀山川。人识绍兴奉使，家有显谟科约，慧命得公传。从此造朝去，两地亦青毡。

利路杨宪熏生日（同上）

岁岁为公寿，著语不能新。自公持节北去，我亦有遐征。坐我碧瑶洞府，被我石楠嘉荫，冰柱向人清。待屈西风指，王事有期程。

我尝闻，由汉水，达河津。痴牛骏女会处，应有泛槎人。便向汉川东畔，直透银河左界，去上白云京。袖有传婿研，我欲丐余芬。

送张总领（摸鱼儿）

知年来、几番拜疏。但言归去归去。问归有底匆忙事，得恁陈情良苦。天未许。将花绶藻衣，为插仪庭羽。掉头不顾。念白发翁儿，本来天分，不是折腰具。

从头数。多少汉庭簪组。滔滔车马成雾。争如祖帐东门外，父子飘飘高举。峨眉下、有几许湖山，无著春风处。留君不住。但远景楼前，追陪杖履，莫忘却、别时语。

和赵黎州□□陪李参政壁游醴泉西园
（朝中措）

沙堤除道火成城。换得午桥清。寒色般添酒令，野芳抵当钶羹。

松馨花气，岸容山意，浦思溪情。谁记
一时胜引，坐中喜得间平。

李参政壁生日十一月二十四日（水调歌头）

曾记武林日，岁上德星堂。相君襟度夷
雅，容我少年狂。鞚路升平风月，禁陌清时
钟鼓，唯送紫霞觞。回首十年事，解后袞衣
乡。

古今梦，元一辙，谩千场。纷纷间较目
睫，谁解识方将。霜落南山秋实，风卷北邻
夜燎，世事正匆忙。天意那可问，只愿善人
昌。

送袁黎州柎（临江仙）

晓色眈眈云日澹，绰开坦坦长途。西宁
太守问程初。梅梢迎候骑，柳树困平芜。

九折邛峡浑可事，不妨叱驭先驱。平平
岂是策真无。抚摩迂事业，细密钝功夫。

安大使丙生日（水调歌头）

人物正寥阔，有美万夫望。七年填拊方
面，帷幄自金汤。千尺玉龙衔诏，六尺宝鞍
照路，载绩满旗常。富贵姑勿道，难得此芬
芳。

尝试看，今古梦，几千场。人情但较目
睫，谁解识方将。霜落南山秋实，风卷北邻

夜燎，世事正匆忙。海内知公者，只愿寿而臧。

上元放灯约束妓前灯火（临江仙）

怪见江乡文物地，轻豪争逐春妍。银花斜鞞紫金鞭。千灯浑是泪，一笑不论钱。

今岁遨头穷相眼，繁华不学常年。只余底事索人怜。诗书真气味，农扈老风烟。

次韵史少弼致政赋李参政壁西园海棠
（鹧鸪天）

日日春风满范围。海棠又发去年枝。月笼火树更深后，露滴燕支晓起时。

看不足，醉为期。宵征宁问角巾欹。一春好处无多子，不分西园掇取归。

同日李提刑至亦有词因次韵（临江仙）

脚踏西郊红世界，才知春意分明。不须更说锦官城。春来游冶骑，得得为渠停。

停到花眠人且去，酒杯苦欲留行。直须醉饮到参横。不因歌白雪，三日作狂醒。

郡圃新开云月湖约客试小舫（柳梢青）

撻掇花枝，撻那天气，一半春休。未分真休，平湖新涨，稚绿初抽。

等闲作个扁舟。便都把、湖光卷收。世事元来，都缘本有，不在他求。

饯黄侍郎畴若劝酒（摸鱼儿）

向江头、几回凝望，垂杨那畔舟才舫。江神似识东归意。故放一篙春水。却总被。三百里人家、祖帐连天起。且行且止。便为汝迟留，三朝两日，如此只如此。

还须看，世上忧端如蝟。一枰白黑棋子。肥边瘦腹都闲事。毕竟到头何似。当此际。要默识沈思，一著惺惺地。目前谁是。料当局诸公，敛容缩手，日夜待公至。

杨提刑子谟生日（水调歌头）

有匪碧岩使，长佩奏琅球。门前初暑才涨，一室淡于秋。帘卷峨眉烟雨，袖挟西川风露，满眼绿阴稠。人物眇然甚，得似此风流。

此何时，公犹滞，剑南州。分明忧在目睫，只恁付悠悠。未问人谋当否，须信天生贤哲，不只等“闲”（间）休。努力崇明德，巨浸要平舟。

赵茶马师劣生日（贺新郎）

汉使来何许。到如今、天边又是，薰弦三度。见说山深人睡稳，细雨自催茶户。向

滴博、云间看取。料得权奇空却后，指浮云、万里追风去。跨燕越，抹秦楚。

不妨且为斯人驻。正年来、忧端未歇，壮怀谁吐。顷刻阴晴千万态，怎解绸缪未雨。算此事、谁宽西顾。待洗岷峨凄怆气，为八荒、更著深长虑。间两社，辅明主。

鲜于安抚□□劝酒（念奴娇）

固陵江上，暮云急、一夜打头风雨。催送春江船上水，笑指□山归去。靴帽丛中，渔樵席上，总是安行处。惟余旧话，为公今日拈取。

见说家近岷山，翠云平楚，万古青如故。要把平生三万轴，唤取山灵分付。庐阜嵩高，睢阳岳麓，会与岷为伍。及时须做，鬓边应未迟暮。

生日谢寄居见任官载酒三十七岁（木兰花慢）

怕年来年去，渐雅志、易华颠。叹梦里青藜，间边银信，望外朱幡。十年竟成何事，虽万钟、于我曷加焉。海上潮生潮落，山头云去云还。

人生天地两仪间。只住百来年。今三纪虚过，七旬强半，四帙看看。当时只忧未见，恐如今、见得又徒然。夜静花间明露，晓凉竹外晴烟。

张总领□□生日六月十八日（满江红）

有美人兮，招不至、几回凝伫。应只为、家山自好，不堪他顾。忙里抽头真得计，闲中袖手看成趣。念从前、出处总无心，天分付。

云冉冉，更吞吐。泉活活，无朝暮。与自家意思，一般容与。月壑晓寒垂叶露，风窗午睡连山雨。看苍颜、白发两闲人，摩今古。

和李提刑至见贻生日韵（同上）

宇宙中间，还独笑、谁疏谁密。正从容行处，山停川溢。钟鼎勒铭模物象，山林赐路开行葺。要不如、胸次只熙熙，无今昔。

便百中，穿牙戟。怕六凿，生虚室。为幽香小伫，旋供吟笔。人事未须劳预虑，天公浑不消余力。看雨余、云卷约帘旌，明红日。

送宇文侍郎□□知汉州劝酒（鹧鸪天）

尚忆都门祖帐时。重来动是十年期。云拖暮雨留行色，露挟秋凉入酒卮。

湖上雁，水边犀。未须矫首叹来迟。北风满地尘沙暗，宣室方劳丙夜思。

李提刑癸生日（满江红）

秋意冷然，对宇宙、一尊相属。君看取、都无凝滞，天机纯熟。水拍池塘鸿雁聚，露浓庭畹芝兰馥。笑何曾、一事上眉头，萦心曲。

兴不浅，船明玉。人更健，巾横幅。问人间底处，升沉迟速。气压暗岩虹半吐，眼明平楚云相逐。但年年、屈指问西风，筹新录。

次韵李参政壁朝阳阁落成（鹧鸪天）

月落星稀露气香。烟销日出晓光凉。天东扶木三千丈，一片丹心似许长。

淇以北，洛之阳。买花移竹且迷藏。九重阊阖开黄道，未信低回两鬓霜。

李参政壁生日（满江红）

湖水平漪，与我意、一般容与。任多少、双凫乘雁，落花飞絮。露冷云寒烟外竹，霜明日洁梅边路。怪天随、人意作阴晴，无非数。

方寸地，图书府。老太史，亲分付。况身名四海，未为不遇。用舍行藏皆有命，时来将相还须做。且闲中、袖手阅时人，摩今古。

邓倅子美生日（虞美人）

许时闭户间疏散。风月无人管。自从阳律一番新。又把前回风月、送西邻。

浮云富贵非公愿。只愿公身健。更教剩活百来年。此老终须不枉、在人间。

任隆庆之母正月十一日生隆庆十三日生日
（醉落魄）

无边春色。试从汉谕堂边觅。儿前上寿孙扶掖。九十娘娘，身是五朝客。

眼前富贵浑闲历。个中真乐天然的。儿孙强劝持余沥。娘道休休，明日儿生日。

燕甲戌进士归自都城（水调歌头）

古说士夫郡，犹欠殿头魁。记曾分付公等，行矣勉之哉。世事奕棋无定，甲子循环复尔，不免且低回。人物价自定，万事付衔杯。

试与公，同握手，上春台。繁红丽紫何限，转首便尘埃。欲识化工定处，须向报秋时节，未用较先开。休道屋犹矮，卿相个中来。

张静甫之母夫人生日（临江仙）

天为西南分八使，更分四道蕃臣。争如

齿宿彩衣新。亲年开百岁，又见子生孙。

一度平反供一笑，无边桃李皆春。便归天上极恩荣。为君图寿母，更看太夫人。

叔母生日 前数月，西叔方以女妻唐述之，
故末联云云（鹧鸪天）

遥想庭闱上寿时。芝兰玉树俨成围。问娘鼎鼎修何行，一样都生及第儿。

春淡沲，日熏微。两头娘子玉东西。一杯更为诸孙寿，子舍新来恰上楣。

某 既赋小阁为叔母寿因复惟念昔者未尝不得与称觞之列今迎侍不果又以简书不克往侍缺然于怀再遣小阁托诸兄代劝（柳梢青）

记得年年。阿奴碌碌，常在眼前。彩舫吴天，锦轮蜀地，阅尽山川。

今年苦恋家园。便咫尺、千山万山。但想称觞，三荆树下，丛桂堂边。

次韵虞万州刚简以谒金门曲为叔母寿

那复有。气味馥于春酒。犹向故乡怀印绶。相过何日又。

吐出心肠锦绣。问我阿娘依旧。娘亦祝君如柏寿。相看霜雪后。

即席和李参政壁白笑花清平乐

蓝田玉种。为我酬清供。香压冰肌犹怕重。更倩留仙群捧。

看花美倩偏工。举花消息方浓。此笑知谁领解，无言独倚东风。

次韵李提刑_至白笑词并呈李参政壁

（清平乐）

谁分天种。来上花鬢供。绿叶素云姿雅重。那得愁心频捧。

他花自是无工。不关香淡香浓。才问为谁含笑，盈盈靴面敲风。

约李彭州_至兄弟看荔丹有赋（临江仙）

双荔堂前呼大撇，蚪枝看取垂垂。帝怜尘土著冰姿。故教冻雨过，浴出万红衣。

绿幄赭圆高下处，中含玉色清夷。浣人应笑太真肥。破除千古恨，须待谪仙诗。

李参政壁领客访环湖瑞莲席间索赋

（浣溪沙）

晓镜摇空髻耸丫。夜盘承露掌分叉。翠芳绰约总无华。

欲往从之空怅望，潜虽伏矣莫藏遮。淤

泥深处瑞莲花。

李参政壁赋浣溪沙三首再次韵谢之

一日嘉名万口传。都凭新乐播芳鲜。非关呈瑞作人妍。

地褊不妨金步稳，境幽生怕鼓声填。余尊相与重留连。

又

密叶留香护境天。好风时雨媚清涟。亭亭双秀倚湖弦。

造化曾居公掌握，呈祥宁许百花先。聊占棣萼蒂芳连。

又

试问伊谁若是班。二乔铜雀锁孱颜。千年痕露尚余潜。

羞向眼前供妩媚，独于静处惬幽娴。人情多少逐河间。

生日谢寓公载酒（贺新郎）

只记来时节。又三年、朱炜过了，恰如时霎。独立薰风苍凉外，笑傍环湖花月。多少事、欲拈还辍。扶木之阴三千丈，远茫茫、无计推华发。容易过，三十八。

此身待向清尊说。似江头、泛乎不系，扁舟一叶。将我东西南北去，都任长年旋折。风不定、川云如撇。惟有君恩浑未报，又故

山、猿鹤催归切。将进酒，缓歌阕。

和李参政壁惠生日（满江红）

物象芸芸，知几许、功夫来格。更时把、荷衣芰制，从容平熨。云淡天空诗献状，竹深花静机藏密。对窗前、屏岫老仪刑，真颜色。

商古道，谁俦匹。评今士，谁钧敌。向平舟问雁，久间霜翮。枰上举棋元不定，磨边旋蚁何曾息。傥天公、有意要平治，饶华发。

送简池宋倅□□之官即席赋（念奴娇）

修姱人物，元如许、谁把屏星留却。弄破峨眉山月影，似作平分消息。卷雾名谭，翳云长袖，未称三池客。且然袖手，人间烦暑方剧。

分手未见前期，风前耿耿，目断斜阳角。亦欲乘风归去也，问讯故山猿鹤。统鼓催鸡，挥弦送雁，转首成乖各。愿加餐饭，书来频寄新作。

虞万州刚简生日用所惠词韵（贺新郎）

久向闲边著。对沧江、烟轻日淡，雨疏云薄。一片闲心无人会，独倚团团羊角。便舍瑟、铿然而作。容室中间分明见，暮鸢飞、

不尽天空阔。青山外，断霞末。

看来此意无今昨。都不论、穷通得失，镇长和乐。此道舒之弥八极，卷却不盈一握。但长把、根基恢拓。将相时来皆可做，似君家、祖烈弥关洛。康国步，整戎略。

七夕之明日载酒李彭州至家即席赋
(鹊桥仙)

银潢濯月，金茎团露，一日清于一日。昨宵云雨暗河桥，似划地、不如今夕。乘查信断，搯机人去，误了桥边消息。天孙问我巧何如，正为怕、不曾陈乞。

李彭州至生日 (水调歌头)

促织谁遣汝，唧唧不能休。揽衣起观，四顾河汉淡如油。露下南山苍蔚，风抹西湖菱芰，客感浩悠悠。尚此推不去，岁寿两公侯。

自侯归，闲日月，几春秋。东方千骑，何事白首去为州。会有葛公清侣，携上神仙官府，玉案侍前旒。却袖经纶手，归伴赤松游。

王总卿□□生日 (八声甘州)

自王家无怨住襄城，世总生贤。似谢阶兰玉，马庭梧竹，一一堪怜。富贵关人何事，

且问此何缘。又踏前朝脚，领蜀山川。

点检重关复阁，尚甘棠匝地，乔木参天。
中兴规画，父老至今传。六十年、山河未改，
只芳菲、不断紧相联。相将又，参陪宰席，
还似当年。

别李参政壁（贺新郎）

此别情何限。最关情、一林醒石，重湖
宾雁。几度南楼携手上，十二阑干凭暖。肯
容我、樽前疏散。底事匆匆催人去，黯西风、
别恨千千万。截不断，整仍乱。

三年瞥忽如飞电。记从前，心情双亮，
意词交划。千古黎苏登临意，人道于今重见。
又分付、水流冰泮。满腹余疑今谁问，上牛
头、净拭乾坤眼。聊尔耳，恐不免。

许遂宁奕生日（同上）

多少龙头客。数从前、何官不做，清名
难得。万里将旌归报汉，青锁还应催当夕。
又一叶、扁舟去国。许史庐前车成雾，未如
公、正怕云霄逼。留不尽，二三策。

一声千里楼前笛。遏天涯、浮云不断，
镇长秋色。试上层楼分明看，无数水遥山碧。
问此意、有谁曾识。独抱孤衷苍茫外，满阑
干，都是长安日。终有待，佐皇极。

和瞻叔兄除夕（虞美人）

一年一度屠苏酒。老我惊多又。明年岂

是更无年。已是虚过、三十八年前。

世间何物堪称好。家有斑衣老。相期他日早还归。怕似瞻由、出处不曾齐。

刘左史光祖生日（念奴娇）

岸容山意，随春好，人在春风独立。立尽闲云来又去，目断一天红日。岂不怀归，于焉信宿，此意无人识。只看鬓发，丝丝都为人白。

风露正满人间，麴麴睡息，浑不知南北。要上南山披荟蔚，谁是同心相觅。天运无穷，事机难料，只有储才急。愿公寿考，养成元祐人物。

和刘左史光祖人日游南山追和去春词韵
（朝中措）

天公只解作丰年。不相冶游天。小队春旗不动，行庖晚突无烟。

吟须捻断，寒炉拨尽，雁自天边。唤起主人失笑，寒灰依旧重然。

元夕行灯轿上赋洞庭春色呈刘左使

花帽檐行，宝钗梁畔，还是上元。看去年芳草，如今又绿，当时皓月，此夕仍圆。节序驱人人不解，道岁岁年年都一般。看承处，有烛龙照夜，铁凤连天。

东风不知倦客，又吹向楼阁山巅。任管弦闹处，诗豪得志，绮罗香里，侠少当权。客与溪翁无一事，但随俗簪花含笑着。无限意，更醉骑马影，饱看丰年。

次韵刘左史光祖自和去年元夕词（鹧鸪天）

春漏逢欢恐不深。银花火树粲成林。酒中和乐无穷味，烛里光明一寸心。

金马朔，玉堂寻。风流文献未如今。连宵坐我东风里，春满肝脾月满襟。

刘左史光祖夫人生日（念奴娇）

刘郎初度随春到，尚记彩衣春立。又上夫人千岁寿，相望不争旬日。琴瑟仪刑，山河态度，长是春风识。都将和气，蒸成满院红白。

我被五斗红陈，三升官酒，驱到鄴城北。解后相逢同一笑，此会几年难觅。宝蜡烧春，花光缟夜，未放觥筹急。天然真乐，傥来知是疣物。

同官载酒为叔母寿次韵为谢时自潼过遂
（玉楼春）（按调此乃步蟾宫）

射洪官酒元曾醉。又六十八年重至。长江驿畔水如蓝，也应似、向人重翠。

人生岂必高官贵。愿长对、诗书习气。

陶家髻子作宾筵，有如个、嘉宾也未。

叔母生日用许侍郎奕所和去岁词韵为谢
(贺新郎)

谁主谁为客。叹人生、别离容易，会逢难得。省户高门十年梦，瞥忽浑如昨夕。风不定、乱云飞急。本自无心图富贵，也元知、富贵无缘逼。且还我，兔园策。

谁知一曲柯亭笛。向天涯、依然解后，长安本色。怪我阿奶今老眼，已是看朱成碧。但犹记、黄裳曾识。多谢殷勤无以报，愿阿奶、长健如今日。送公去，上霄极。

和虞万州刚简所惠叔母生日词韵 (洞仙歌)

人生一世。如此元如此。造化都从起时起。看庭前桃李，弄蕊开花，还又看，一度成阴结子。

母寿亲认取，叶叶枝枝，一气分来结成底。更得故人书，遗我新词，把寸心、分明指似。信过眼、浮华几何时，剩培植根心，等闲千岁。

妇生日许侍郎奕载酒用韵为谢 (西江月)

曾记刘安鸡犬，误随鼎灶登仙。十年尘土漉行缠。怪见霞觞频劝。

会合元非择地，乖逢宁得非天。妇闻风

月正嫵娟。亲泼床头醅面。

叔母生日刘左史光祖以余春时所与为寿词韵见贶复用韵谢之（念奴娇）

梦中犹记，来时路、五马蜘蛛攒立。江北城南春澹沲，山锁一天晴日。伊轧征车，徊徨去意，只有东风识。如今远在，谁人伴我浮白。

天外一曲阳春，依然有脚，来到萱堂北。不是奇情双照亮，肯寄鳞鸿相觅。酒引曹醇，歌翻楚调，触拨归心急。醉魂时绕，莺花世界风物。

叔母生日（水调歌头）

人道三十九，岁暮日斜时。儿今如许，才觉三十九年非。昨被玉山楼取，今仗牛山抱住，役役不知疲。自己未能信，漫仕亦何为。

亦何为，应自叹，不如归。问归亦有何好，堂上彩成围。上下东冈南陌，来往北邻西舍，遍地看儿啼。富贵适然耳，此乐几人知。

和费五九丈□□见惠生日韵（蝶恋花）

早岁腾身跻辇路。秋月春风，只作浑闲度。手挟雷公驱电母。袖中双剑蛟龙舞。

如此壮心空浪许。四十明朝，忍把流年数。又过一番生日去。寿觞羞对亲朋举。

新亭落成约刘左使光祖和见惠生日韵
(醉蓬莱)

又一番雨过，倚阁炎威，探支秋色。前度刘郎，为故园一出。黄发丝丝，赤心片片，俨中朝人物。诗里香山，酒中六一，花前康节。

倦客才归，新亭恰就，萱径荫浓，卜林香发。尊酒相逢，看露花风叶。跃跃精神，生生意思，入眼浑如涤。更祝天公，收回积潦，放开晴日。

次韵李参政壁见贻生日 (江城子)

水花湖荡翠连天。记年年。甚因缘。斗鸭阑干，云雾踏青妍。人似风流唐太白，披紫绮，卧青莲。

如今别思浩如川。欲腾骞。隔风烟。月到天心，人影在长编。只有此身飞不去，翔雁侧，狎鸥边。

和许侍郎奕韵 (贺新郎)

千里楼前客。数从前、几般契分，更谁同得。尚记流莺催人去，又见莎鸡当夕。叹天运、相煎何急。幸自江山皆吾土，被南薰、

吹信还相逼。临大路，控长策。

向来风月苏家笛。问天边、玉堂何似，
黄冈秋色。万事无心随处好，风定一川澄碧。
些个事、非公谁识。我亦年来知此意，但聪明、
不及于前日。谁为我，指无极。

贺刘左史光祖进职奉祠（满江红）

许大才名，知几许、功夫做得。独自殿、
三朝耆旧，岿然山立。出处只从心打当，去
留不管人忻戚。抱孤衷、脉脉倚秋风，无人
识。

龙可养，凡鳞匹。鸾可挚，凡禽敌。便
翩然归作，玉龙仙客。枰上举棋元不定，磨
边旋蚁何曾息。傥天公、有意要平治，须华
发。

刘左史光祖别席和韵（江城子）

一襟满贮梓城春。笑声频。笔挥银。自
有江山，长是管将迎。不似如今归去客，云
外步，水边身。

萧然今代杰魁人。混光尘。越精神。不
把浮云，轩冕拂天真。化洽堂边应创见，人
物旧，榜颜新。

约刘左使光祖谢会再和（同上）

如公何地不阳春。往来频。醉倾银。闻

道河阳，童稚正欢迎。移向德威堂上著，疑潞国，是前身。

行人还又送行人。夜无尘。对丰神。自古心知，别语转情真。须信人生归去好，三径旧，四时新。

又（同上）

西来紫马倦行春。上书频。阙排银。愿听臣归，子舍便将迎。又为老臣全晚节，关教化，系臣身。

帝心终眷老成人。想音尘。倍留神。且把闲风，淡月与全真。出处如公都有数，今古梦，几番新。

同官酌酒相贺再和前韵（同上）

与君同醉梓州春。不辞频。漏更银。尚记梅时，出郭喜相迎。又对西风斟别酒，云过眼，月分身。

傥来官职不关人。等微尘。苦劳神。更向中间，谩说假和真。只有交朋关分义，无久近，与陈新。

别许侍郎奕即席赋（鹧鸪天）

公在春官我已归。公来东蜀我居西。及公自遂移潼日，正我由潼使遂时。

如有碍，巧相违。人生禁得几分飞。只祈彼此身长健，同处何曾有别离。

许侍郎奕生日十月二十四日（木兰花慢）

记北人骑屋，看龙首、许仲元。自拥节来归，持荷直上，谁与争先。好官到头做彻，些儿欠缺便徒然。我爱庆元龙首，当春不逐时妍。

人生天地两仪间。且住百来年。数初度庚寅，未来甲子，尽自宽闲。太平竟须公等，终不成、造物谩生贤。拓取面前路径，著身常要平宽。

宴遂宁新进士（同上）

记薰风殿上，曾当暑、侍君王。看绛服临轩，白袍当殿，流汗翻浆。今年诏书催发，趁槐庭、初夏午阴凉。瘦马行时腊雪，叠猿啼处年光。

大科异等士之常。难得姓名香。叹陋习相承，驹辕垂耳，麟植成行。平生学为何事，到得时、遇主忍留藏。看取杏花归路，身名浑是芬芳。

即席和韵（同上）

问梅花月里，谁解唱、小秦王。向三叠声中，兰桡荃棹，桂醕椒浆。明朝濮渝江上，对暮云、平野北风凉。准拟八千里路，破除九十春光。

砚涵槐影漾旗常。披拂御炉香。念人世难逢，玉阶方寸，陛楯颜行。休言举人文字，系一生、穷达与行藏。凡卉都随岁换，幽兰不为人芳。

西江月梦中作觉后浑能省记独欠第五句
因足成之晓起大雪（西江月）

一段同云似练，更无剩幅间边。玉娥不怕五更寒。剪就飞花片片。

酒里吟边竞爽，枝头枝底争妍。入春无物不芳鲜。只我依然颜面。

许侍郎奕硕人生日十二月二十二日
（减字木兰花）

新符旧历。交割新年余七日。谁识春华。元住东川太守家。

一年一曲。拟尽形容无可祝。愿似庭梅。长向春风伴斗魁。

刘左史光祖生日 正月十日（满江红）

见说新来，把闲事、都齐阁束。日用处、浑无凝滞，天机纯熟。帘卷春风琴静好，庭移晓日兰芬馥。笑可曾，些子上眉头，萦心曲。

吞宇宙，船明玉。批风月，诗成轴。问人间底处，升沈荣辱。与我言兮虽我愿，不

吾以也吾常足。但年年、先后放灯时，筍新醪。

同官约瞻叔兄□□饮于郡圃海棠花
下遣酒代劝（海棠春令）

东君惯得花无赖。看不尽、冶容娇态。
拟傍小车来，又被轻阴给。

阴晴长是随人改。且特地、留花相待。
荣悴故寻常，生意长如海。

与同官饮于海棠花下烧烛照花即席赋
（临江仙）

自有天然真富贵，本来不为人妍。谨将
醉眼著繁边。更擎高烛照，惊搅夜深眠。

花不能言还自笑，何须有许多般。满空
明月四垂天。柳边红沁露，竹外翠微烟。

次韵同官约瞻叔兄□□及杨仲博约赏
郡圃牡丹并遣酒代劝（朝中措）

玳筵绮席绣芙蓉。客意乐融融。吟罢风
头摆翠，醉余日脚沈红。

简书绊我，赏心无托，笑口难逢。梦草
闲眠暮雨，落花独倚春风。

东叔兄生日（临江仙）

去岁玉堂山下住，母旁后弟前哥。今年

作县古松坡。静参朱祭酒，间印马头陀。
去路更无山隔断，春风跋马经过。不妨
缓辔尽婆娑。愿申临别语，长使得天多。

小圃牡丹盛开旧朋毕至小阁寓意（柳梢青）

昨夕相逢。烟苞沁绿，月艳羞红。旭日生时，初春景里，太极光中。

别来三日东风。已非复、吴中阿蒙。须信中间，阴阳大造，雨露新功。

叔母生日每岁兄弟多以校试莫遂彩衣团栾之乐今岁复尔良以缺然小词寄五兄代劝（小重山）

养得儿男百不中。年年随举子，踏春风。寿觞庭院燕泥融。将雏处，长是半西东。

移孝便为忠。儿行虽在远，母心同。若将一念答天公。归来拜，也胜橘双红。

即席次韵张太傅方为叔母生日赋（南柯子）

暮雨收尘马，薰风起箨龙。夜凉人锁武成宫。却忆亲旁、寿饼荐油葱。

谁锡诗人类，应晞颖谷封。儿行虽远母心通。触拨今宵、梦逐彩云东。

瞻叔兄生日五月三日（眼儿媚）

梦魂不踏正牙班。直作五云间。简编真

乐，薰篴雅韵，菽水清欢。

都将瞥忽荣华事，春梦晓云看。只期他日，实愿受用，大耐高官。

南叔兄生日用前韵五月六日（同上）

不居上界列仙班。梅隐寄幽闲。玉堂云晓，玉珍雨夜，总是真欢。

如兄才誉居人上，鹏路正看看。只祈兄弟，长随母健，不爱高官。

次韵许侍郎奕为叔母生日（洞仙歌）

寿觞庭户，正柳明桃炫。拟斫江鱼鲙银线。被春风吹入，花锦城中，惟有梦，时到轻轩翠幰。

归来春已过，桃柳成阴，但喜庭闱镇强健。更得故人书，遗我瑰词，应重记、去年相见。望白鹤朱霞杳难攀，谩芳草如烟，青青河畔。

又次韵为妇安人生日（鹧鸪天）

夫子同年第太常。偶然二内亦同乡。其间更有真同处，道义场中无别香。

花入思，绣为肠。不妨冬月作重阳。家人但歉今年会，犹欠腰金与鞠黄。

叔母生日刘左史光祖以余正月十日所与为寿
词韵见贻至是始克再用韵谢之（满江红）

彼美人兮，不肯为、时人妆束。空自爱、
北窗睡美，东邻醅熟。不道有人成离索，直
教无计分膏馥。望鹤飞、不到暮云高，阑干
曲。

驹在谷，人金玉。槃在陆，人宽轴。笑
吾今何苦，耐司空辱。应为嗷嗷乌反哺，真
成落落蛇安足。到梓州、旧事上心来，呼杯
醑。

再和班字韵谢南叔兄□□见贻生日
（眼儿媚）

北风不竞帝师班。雨足桔槔闲。且容湖
使，静中藏拙，忙里偷欢。

一枰黑白终何若，未可目前看。自量愚
分，不堪世用，只称田官。

生日谢同官六月八日（洞庭春色）

四十之年，头颅如此，岂不自知。正东
家尼父，叹无闻日，鄴人孟子，不动心时。
顾我未能真自信，算三十九年浑是非。随禄
仕，便加齐卿相，于我何为。

人间郁蒸难耐，谁借我五万蒲葵。上玉
台百尺，天连野□，□楼千里，江射晴晖。

此意分明谁与会，但时把瑶笙和月吹。吾归矣，有鸿相与和，鹤自由飞。

送赵阆州希异之官（水调歌头）

冻雨洗烦浊，烈日霁威光。逸人去作太守，旗志倍精芒。莎外马蹄香湿，柳下旂阴晨润，景气踏苍苍。夹道气成雾，我独犯颜行。

对颜行，斟尾酒，点头纲。请君釂此，更伴顷刻笑谭香。为问锦屏富贵，孰与熙宁谏议，千古蔚仪章。世道正颓靡，此意悦毋忘。

再用初八日韵谢通判运管以下（洞庭春色）

安石声名，买臣富贵，我不敢知。谩扬州泛泛，浮湛随水，阖门轨轨，开阖从时。满目浮荣何与我，只赢得一场闲是非。诚知此，问不归何待，不饮胡为。

岩松涧篁易老，应只能、采菽烹葵。看风沙漠漠，未清紫逻，烟云冉冉，时露晴晖。谁唤当年刘越石，为携取胡笳乘月吹。吾无用，但寤言独宿，奋不能飞。

吹韵东叔兄见贻生日（鹧鸪天）

内贵何妨知我希。芳荪纽佩石兰衣。不教尘外专云壑，准向人间驾使骅。

忧国梦，绕端闱。静言思奋不能飞。时
因风雨思畴昔，叹两苏公盍不归。

次韵高才卿恭叔见贻生日因以为寿
(水调歌头)

桃李眩春昼，松柏傲霜时。春妍不必皆
是，晚秀未为非。画斧河边瘴雾，叱驭关前
险阻，马竭复人疲。胡不效侪等，趣取好官
为。

居之安，于胥乐，咏而归。毡裘鸲舌成
市，书史俨相围。月淡秋亭烽影，日静春斋
铃索，未听杜鹃啼。美酒无深巷，莫道不吾
知。

次韵刘左史光祖和三月十八日词见贻生日
(小重山)

开汉江山落手中。满门花粲烂，锦蒙戎。
与人和气乐融融。应怜我，留滞剑南东。

风味两文忠。恍如畴昔夜，一尊同。如
今海内几刘公。覩天意，犹在笑颜红。

次韵李参政壁见贻生日 (临江仙)

闲放楼前千里目，天边云大如围。秋风
入帽露华新。无端忧国梦，应到守封臣。

旧弼如今都有几，长教燕坐申申。折杨
笑面背阳春。忧醒头欲雪，浊梦肺生尘。

贺许侍郎奕得孙（水调歌头）

三十作龙首，四十珥貂蝉。幡然携取名节，锦绣蜀山川。揽辔扶桑初晓，饮马咸池未旰，来日尽宽闲。兹事亦云足，所乐不存焉。

女垂髻，儿分鼎，妇供鲜。尊章青鬓未改，和气玉生烟。造物犹嫌缺陷，要启公侯衮衮，又畀贾嘉贤。公更厚封植，自古有丰年。

杜安人生日（临江仙）

七夕长留河汉女，重阳又属骚人。只余八八号佳辰。中和无与拟，椿作一家春。

俗事萦人何日了，随缘女嫁男婚。却将不系自由身。闲中书日月，随处弄儿孙。

九日席上呈诸友（贺新郎）

旧日重阳日。叹满城、阑风去雨，寂寥萧瑟。造物翻腾新机杼，不踏诗人陈迹。都扫荡、一天云物。挟客凭高西风外，暮鸢飞、不尽秋空碧。真意思，浩无极。

糕诗酒帽茱萸席。算今朝、无谁不饮，有谁真得。子美不生渊明老，千载寥寥佳客。无限事、欲忘还忆。金气高明弓力劲，正不堪、回首南山北。谁弋雁，问消息。

送赵监丞□□赴利路提刑（阮郎归）

西风吹信趣征鞍。日高鸿雁寒。稻梁啄
尽不留残。依归阿那边。

无倚著，只苍天。将心何处安。长教子
骏满人间。犹令依意宽。

送客归来道中再得数语（浣溪沙）

（按调应是阮郎归）

骊驹未撤客乘鞍。征鞭摇晚寒。雁边醒
梦角惊残。关山斜日边。

求道地，托恩天。人情久亦安。转移都
在笑颦间。鄙夫应也宽。

茂叔兄□□生日（同上）

（按此首方是浣溪沙）

云外群鸿逐稻梁。独乘下泽少游乡。赤
心片片为人忙。

俗事萦缠何日了，自身活计孰为长。闭
门书卷圣贤香。

许侍郎奕生日（沁园春）

惠我田畴，拯民水火，春满蜀东。更山
连睥睨，长蛇隐雾，红移略约，睢霓横空。
人卧流苏行席上，公心事夕阑晨枕中。长自

苦，算无人识得，只有天公。

天教百般如愿，也应是、天眼惺惚。看田间泥饮，门无夜打，水滨庐处，户有朝春。拟上公堂，称兕爵酒，未抵人间春意浓。无可愿，愿城池永与，公寿无穷。

李参政壁生日（水调歌头）

宇宙一大物，掌握付诸人。人心不满芳寸，块北浩无垠。或者寒蝉自比，不尔秃犀貽笑，龊龊竟何成。胡不引贤者，相与共弥纶。

未如何，尝试使，问苍旻。四时迭起代谢，有屈岂无伸。昨夜伶伦声里，一气排阴直上，阳德与时新。道长自今日，持此庆生申。

刘监丞翊之生日（眼儿媚）

乃翁表里玉无瑕。浑是得天多。一生受用，不完全处，都补填他。

郎君心念和平处，似得十分家。天何以报，重重印字，滴滴檐窠。

西叔兄生日（乌夜啼）

不肯呈身觅举，那能随俗为官。梅花寒飏书窗月，一味漂阳酸。

梅里无边春事，书中千古遐观。邻翁不

识清闲乐，惊见满堂欢。

许侍郎奕硕人生日（虞美人）

无端嫁得龙头客。富贵长相迫。云深碧落记骖鸾。又逐东方千骑、到人间。

妇前百拜儿称寿。季也参行酒。最怜小女太憨生。约住两头娘子、索新声。

刘左史光祖之生正月十日李夫人之生
以十九日赋两词寄之（浪淘沙）

老眼静中看。知我其天。纷纷得失了无关。花柳乾坤春世界，著我中间。

世念久阑珊。随寓随安。人情犹望袞衣还。我愿时清无一事，尽使公闲。

又

鹤外倚楼看。云飏晴天。天高鸡犬碍云关。掉臂双仙留不彻，还任人间。

客佩振珊珊。来贺平安。年年直待卷灯还。似是天公偏著意，占破春闲。

叔母庆七十（木兰花令）（按调此乃玉楼人）

儿前捧劝孙扶掖。共庆贺、娘娘七帙。此杯不比寻常，百年间、才是省陌。

眼前彩绣成行立。已应是、天公偏惜。何须剩觅长年，且只消、一百二十。

东叔兄生日（醉落魄）

才难如此。一门生许奇男子。长公更是惺惺底。千百年间，一寸心为纸。

人知公在诗书里。天知公在诗书外。人间百顺由公起。公把无心，总备人间事。

叔母生日同官载酒用去年词韵（小重山）

风雨移春醉梦中。忽然吹信息，堕泸戎。青炜风物换朱融。吾归矣，家在月明东。

公等为人忠。年年称母寿，一尊同。恨无佳句可酬公。相期意，滴滴小槽红。

叔母生日次韵许侍郎奕临江仙为寿
（临江仙）

春院绣帘垂罽毼，一天风月横陈。慈亲初度纪嘉名。每从歌舞地，犹记杰魁人。

大句忽随乌鹊至，恍如前岁逢春。只祈岁岁及兹辰。天风吹宝唾，华彩动文星。

叔母生日同家人劝酒（水调歌头）

涪右金华宅，上有蔚蓝天。当年玉女何事，未摆世间缘。要把平夷心事，散作吉祥种子，春暖玉生烟。回首生处所，更欲与周旋。

自归来，生处所，已三年。山头白鹤候我，应讶久留连。已作秋风归梦，忽递春风消息，吹我著泸川。安得且归去，绵上饱耕眠。

约程漕使遇孙初筵劝酒（八声甘州）

记幡然、持节下青云，巴月几成弦。待竹枝歌彻，讼棠匝地，扉草连天。却寻当年旧梦，来使蜀东川。人物寥寥甚，禁许回旋。

愧我推挤不去，尚新官对旧，后任如前。与故人饮酒，月露写明蠲。叹书生、康时无计，谩忧思、时堕酒痕边。且只愿、早休兵甲，长见丰年。

次韵费五十九丈□□题秋山阁有感时事
（贺新郎）

霞下天垂宇。倚阑干、月华都在，大明生处。扶木元高三千丈，不分闲云无数。谩转却、人间朝暮。万古兴亡心一寸，只涓涓、日夜随流注。奈与世，不同趣。

齐封冀甸今何许。百年间、欲招不住，欲推不去。闸断河流障海水，未放游鱼甫甫。叹多少、英雄尘土。挟客凭高西风外，问举头、还见南山否。花烂熳，草蕃庶。

次韵西叔兄访王宣干万（江城子）

梦随瘦马渡晨烟。月犹弦。稻初眠。宇

宙平宽，著我一人闲。梦破枇杷香满袂，应
唤我，驻行鞞。

雁声砧杵落晴川。抚流年。叹区缘。随
世功名，未信果谁贤。目断孤云东北角，离
复合，断还连。

即席次韵南叔兄同亲友饯王万里万回宣幕
(喜迁莺)

鬓霜盈握。叹白牧荒墟，稻梁衰索。落
日牛羊，晚云鸿雁，傍地飞空无托。牧人困
和雨睡，田父醉连云酌。醉梦未醒，虎噪川
谷，麋惊林薄。

离别。谁不恶。心事同时，都不论离合。
眼底时几，鼻端人物，谁辨北征东略。最怜
世途局趣，只道书生疏阔。无可赠君，松阴
庭院，菊华篱落。

即席次韵宋权县彝约客 (满江红)

世道何常，都一似、水流云出。叹自古、
燕巾滥宝，楚山迷璧。老我如今观变熟，行
藏语嘿惟时适。似沧溟、容得乘禽飞，双凫
集。

花露晓，松风夕。经味永，山光吸。历
岩中考第，案头月日。物欲强时心节制，才
资弱处书扶掖。拟棕鞋、桐帽了平生，投簪
舄。

即席和李潼川臺韵（水调歌头）

清燕卧霜角，月魄几回哉。一声云雁清叫，推枕赋归来。流水落花去路，画象棠阴陈迹，霄观傍楼台。别忆入梅艳，愁色上田莱。

记来时，惊列缺，走吴回。人间都失匕箸，老婢亦惊猜。匹马晓风鞭袖，孤堞暮烟烽柝，挥却挂蛇杯。不负此邦去，笑口也应开。

约李潼川饮即席赋（同上）

昨夜严家集是夕，饮于严氏园，霜斗飏晴天。乾坤如许空阔，著我两人闲。醉帽三更月影，别袂一帘花气，语隳不知还。二十年间事，肝肺写明蠲。

记相逢，一似昨，两经年。风波闹处，推出心胆至今寒。也为故人饮酒，也念邦人怀旧，姑为驻征鞍。未忍作离语，留待月华圆。

贺李潼川臺改知常德府（同上）

更尽一杯酒，春近武陵源。源头父老迎笑，人似老癯仙。检校露桃风叶，问讯渚莎江草，点检旧风烟。世界要人拄，公独卧闲边。

叹从来，分宇宙，有山川。主宾均是寄耳，赢得鬓毛斑。最苦中年相别，更是人才难得，相劝且加餐。归为玉昆说，时寄我平安。

刘左史光祖生日庆八十（同上）

山岳会元气，初度首王春。扶持许大穹壤，全德付耆英。二万九千日力，四百八旬甲子，酿此杰魁人。玉剑卧霜斗，金锁制天扃。

学宗师，人气脉，国精神。不应闲处袖手，试与入经纶。磊落蟠溪感遇，迢递彭篴岁月，远到漆园椿。用舍关时运，一片老臣心。

十五日同宪使观灯马上得数语（鹧鸪天）

解后皇华并辔游。追随世好学风流。儿童拍手拦街笑，只是酸寒魏梓州。

千炬烛，数声讴。不知白了几人头。惺惚两眼看来惯，且得人心乐便休。

六十日再赋（同上）

两使星前秉烛游。滔滔车马九河流。耳听宣政升平曲，目断炎兴未复州。

闻鼓吹，强欢讴。被人催送作遨头。凭谁为扫妖氛静，却与人间快活休。

再和四年前遂宁所赋韵（临江仙）

一点阳和浑在里，时来尔许芳妍。春风
吹上醉痕边。隼欢欺浅酌，清晤失佳眠。

聊把繁华开笑口，须臾雨送风般。因花
识得自家天。炯然长不夜，活处欲生烟。

汪提刑臬宜人生日（柳梢青）

庄敏传家，文安嫡胄，文惠诸孙。两大
相辉，晋秦匹国，韩媾盈门。

天风吹下双轩。恰趁得、酴醾牡丹。锦
绣光中，殿春不老，阅岁长存。

饯汪漕使臬劝酒（蝶恋花）

可煞潼人真慕顾。接得官时，只道来何
暮。岁岁何曾椿得住。遂人又见迎将去。

谩自儿曹相尔汝。心事同时，千里元相
梧。况是棠阴随处处。秋江夜月春空雾。

王子振辰应生日同书院诸公各赋一阕

（菩萨蛮）

鸣蝉泊雨晴云湿。游龙剪岸涪江碧。气
候尔和平。满家浑是春。

公堂虽有酒。不敌公真有。寿宿对魁星。
颊红衫鬓青。

次西叔兄送南叔兄赴钤干见寄韵（青玉案）

中年怕踏长亭路。便自有、离愁苦。一自送君趋幕府。惺惚莺舌，呢喃燕觜，那解春无语。

三年山月移朝暮。独倚松风等闲度。到得除书萦绊住。却愁不似，当时皓月，长伴君来去。

即席和书院诸友（西江月）

早厌人间腐鼠，要希云外飞皇。羲和不肯系朝阳。任向鬓边来往。

出谷声中气味，编薄册里晶光。至今心胆为渠狂。梦倚银潢天上。

虞简州刚简生日（水调歌头）

牛酒享宾客，焦烂列前荣。有人先事早计，残突伴孤星。香火家家绘象，鼙鼓村村祠宇，剪不断人情。清“唳”九皋鹤，唤起梦魂惺。

白苹洲，芳草渡，玉湖亭。画帘挂起箴箴，一卷易同盟。携手锦江菴隐，覩面墨池玄叟，扶杖蜀君平。三老輶然笑，云散太空清。

应提刑懋之生日（临江仙）

红杏花边曾共赏，天涯还是相逢。人言契分两重重。谁知声利外，别有一般同。

炯炯奇情双亮处，天光水色相通。磨中旋蚁渺何穷。共扶天事业，此意政须公。

范遂宁子长生日和所惠词韵报之（同上）

千里楼高人与并，个中彻地通天。秋风吹发半成宣。都将强岁月，空对旧山川。

养就人才端有意，公今三祖差肩。偏轻偏重几番船。要公常把柁，容我老闲边。

茂叔兄生日（同上）

占断人间闲富贵，长秋应是长春。前山推月上帘旌。缓觴煇旧友，勾拍按新声。

时倚晴空看过雁，几州明月关情。知君早已倦青冥。时来那得免，事业一窗萤。

送西叔兄之官成都（满江红）

逢著公卿，谁不道、人才难得。须认取、天根一点，几曾休息。未问人间多少士，一门男子头头立。只其间、如许广文君，谁人识。

冠盖会，渔樵席。豪气度，清标格。要

安排稳当，讲帷词掖。蜀泮堂堂元不恶，犹嫌偏惠天西壁。嘱公卿，著眼看乾坤，搜人物。

刘左使光祖生日（千秋岁引）

（按调应是最高楼）

天生耆德，占断四时先。春院落，锦山川。万家灯市明朱紫，一庭花艳傍貂蝉。妇承姑，翁抱息，子差肩。匱匝是、文公开九帙。陆续看、武公逾九十。从九九，到千千。海风谩送天鸡舞，蛰雷未唤壑龙眠。且从他，歌缓缓，鼓咽咽。

人日南山约应提刑懋之（醉落魄）

无边春色。人情苦向南山觅。村村箫鼓家家笛。祈麦祈蚕，来趁元正七。

翁前子后孙扶掖。商行贾坐农耕织。须知此意无今昔。会得为人，日日是人日。

上元马上口占呈应提刑懋之（南乡子）

连夕雨盈畴。先为农家做麦秋。更放年头晴甲子，知不。应是天公及尔游。

随事与民求。又与随时验乐忧。民气乐时天亦好，休休。为尔簪花插满头。

过凌云和张太博方（水调歌头）

千古峨眉月，照我别离杯。故人中岁聚散，脉脉若为怀。醉帽三更风雨，别袂一帘山色，为放笑眉开。握手道旧故，抵掌论人才。

山中人，灶间婢，亦惊猜。江头新涨催发，欲去重裴回。世事丝丝满鬓，岁月匆匆上面，渴梦肺生埃。酒罢听客去，公亦赋归来。

张太博方送别壁津楼再赋即席和
（水调歌头）

舫棹汉嘉口，更尽渭城杯。凌云山色，似为行客苦伤怀。横出半天烟雨，锁定一川风景，未放客船开。想见此楼上，阅尽蜀人才。

山猿鹤，江鸥鹭，亦相猜。滔滔日夜东注，全璧几人回。客亦莞然成笑，多少醉生梦死，转首总成埃。信屈四时耳，寒暑往还来。

次韵黄叙州□□（满江红）

风引舟来，恰趁得、东楼嘉集。正满眼、轻红重碧，照筵浮席。更是姓黄人作守，重新墨妙亭遗迹。对暮天、疏雨话乡情，更筹

急。

嗟世眼，迷朱碧。矜气势，才呼吸。彼蔡章安在，千年黄笔。腐鼠那能鹓凤吓，怒螭未信冥鹏翼。与史君、酌酒酌兴亡，浇今昔。

次韵黄叙州□□（水调歌头）

烟雨敛江色，江水大于杯。篷窗一枕霄梦，忽忽到无怀。苦被江头新涨，推起天涯倦客，万里片帆开。收用到我辈，天下岂无才。

路漫漫，行又止，信还猜。渊鱼得失有分，须载月明回。寄语鹤山亲友，若访吾庐花柳，为我扫烟埃。去去党无辱，振袂早归来。

次韵虞夔宪刚简新作巴绿亭（卜算子）

（按调此乃霜天晓角）

江横山簇。柏箭森如束。满眼飞蓬撩乱，知几几、未膏沐。

快意忽破竹。一奩明翠玉。千古江山只么，人都道、为君绿。

生日前数日杨仲博约载酒见访即席次韵

（贺新郎）

风定波纹细。夜无尘、云迷地轴，月流

天位。摇裔飞来江山鹤，犹作故乡嘹唳。清境里、伴人无睡。应叹余生舟似泛，浪涛中、几度身尝试。书有恨，剑无气。

从渠俗耳追繁吹。抚空明、一窗寒簟，对人如砥。梦倚银河天外立，云露惺惺满袂。看多少、人间嬉戏。要话斯心无分付，路茫茫、还有亲朋至。应为我，倒擷洗。

李季允_稹约登鄂州南楼即席次韵（卜算子）

携月上南楼，月已穿云去。莫照峨眉最上峰，同在峰前住。

东望极青齐，西顾穷商许。酒到忧边总未知，犹认胡床处。

李季允_稹同总漕载酒□湖相送即席再和

（同上）

能得几时留，王事催人去。翠荡涵空酒满船，苦要留人住。

身世两悠悠，飘泊知何许。但得心亲志合时，都是相逢处。

李季允曾为白芙蕖赋卜算子至是久旱得雨
借前韵有赋

风雨满空霏，总得江山妙。洗出湖光镜似明，不受纤尘涴。

心事竟堪凭，天意真难料。呼吸丰年顷

刻间，也合轩渠笑。

次韵西叔詹叔兄嘉甫弟惠生日□词
(水调歌头)

昨梦鹤山去，风景逐时新。藕花拍满栏槛，松竹被池频。尽日兄酥弟酪，触处言鲭义牒，相对只翁卿高魏山弟。梦觉帝乡远，有酒为谁倾。

忽飞来，天外句，梦中人。自怜何事，强把麋鹿裹朝绅。坐看九衢车马，鞭策长安日月，檐阁太玄经。只说来时节，金气已高明。

孙靖州应龙生日八月八日 (木兰花慢)

恰秋光四十，箕斗外、月初弦。笑浅濼平芜，寒城小市，掌许山川。半生梦魂不到，与君侯、岁岁此周旋。鞍马空销髀肉，兜牟未换貂蝉。

人生天地两仪间。须住百余年。数重卦三三，后天八八，来日千千。面前路头尽阔，放规模、运量十分宽。官职终还分定，儿孙也靠心传。

又孙靖州应龙生日 (水调歌头)

九十九峰下，百二十年州。西风吹起客

梦，月满驿南楼。影入天河左界，辰在寿星向上，还是去年秋。要和木兰曲，载酒寿君侯。

天边信，云外步，去难留。寿觞庭院依旧，已带别离愁。离合钟情未免，行止关人何事，浪白世间头。将相时来作，身健百无忧。

范靖州良辅生日十月二十□日（同上）

犹记端门外，鞭袖五更寒。一声天上钟柝，金锁掣重关。君向紫宸上阁，我侍玉皇香案，都号舍人班。梦觉帝乡远，相对两苍颜。

玉围腰，金系肘，绣笼鞵。乡人袞袞严近，五马度荆山。收拾五湖气度，卷束蟠胸兵甲，春意满人间。天锡公纯嘏，气象自平宽。

靖州江通判埙生日（鹧鸪天）

日上牛头度岁辰。黄钟吹籥煦乾坤。弦歌堂上三称寿，风月亭前又见君。

人似旧，景长新。明朝六桂侍双椿。蛮帮父老惊曾见，得似君家别有春。

和虞婿惠生日（满江红）

月上南箕，还认得、去年星历。知谁把、一天星象，荡摩朝昔。若使平生浑自弃，如

今老大何嗟及。更年来、偏得钝工夫，蹉跎力。

溪瘴碍，蛮烟隔。穹壤断，江山窄。纵燕巾滥宝。楚山囚玉。小小穷通都未问，忍闻同气相煎急。诵虞郎、百字短长诗，忧何极。

范静州良辅生日十月二十一日。二十三日交十一月节（鹧鸪天）

谁把璇玑运化工。参旗又挂玉梅东。三三律琯声馀亥，九九玄经卦起中。

新岁月，旧游从。一觞还似去年冬。人间事会无终极，分付翹关老令公。

江通判埧生日（菩萨蛮）

东窗五老峰前月。南窗九叠坡前雪。推出侍郎山。著君窗户间。

离骚乡里住。恰记庚寅度。挹取芷兰芳。酌君千岁觞。

绵州表兄生日绍定壬辰五月（念奴娇）

被东风吹送，都看尽、蜀三川。向涪水西来，东山右去，剑阁南旋。家家露餐风宿，数旬间、浑不见炊烟。踏遍王孙草畔，眼明帝子城边。

万家赤子日高眠。丝管夜喧阗。自梓遂而东，岷峨向里，汉益从前。人人里歌涂咏，愿君侯、长与作蕃宣。我愿时清无事，早归相伴华颠。

荣州表兄生日（贺新郎）

幸有天遮蔽。为西南、空虚一面，挺生男子。塞下将军支颐卧，夜半揽衣推起。扫十万、胡人如洗。见说巴山稍马退，也都因、粮运如流水。剑以北，一人耳。

十年梦断斜阳外。恰归来、昌蒲蘸酒，祝兄千岁。入从出藩谁不是。谁是难兄难弟。正乐意、融融未已。莫趣东方千骑去，愿时平、华皓长相对。闲富贵，只如此。

高嘉定生日和所惠韵（水调歌头）

高氏八千石，驹哄溢街坊。庸夫俗子，夸道锦绣裹家乡。谁识书生心事，各要济时行己，肯顾利名场。用我吾所欲，不用亦何伤。

汉嘉守，凡阅历，几麾幢。便教入从出节，都是分之常。但愿国安人寿，更只专城也好，不用较强梁。准拟耆英会，倚杖看人忙。

送蒋成父公顺（同上）

风雪锢迁客，闭户紧蒙头。一声门外剥

〔啄〕，客有从予游。直自离骚国里，行到林间屋畔，万里入双眸。世态随炎去，此意澹于秋。

感毕逋，怀嵇鞠，咏夫不。寻师学道虽乐，吾母有离忧。岁晚巫云峡雨，春日楚烟湘月，诗思满归舟。来日重过我，应记火西流。

高嘉定生日泰叔（摸鱼儿）

记年时、三星明处。尊前携手相语。家山幸有瓜和芋。何苦投身官府。谁知道，尚随逐风华，为蜀分南土。依前廉取。便卷却旌麾，提将绣斧。天口笑应许。

逢初度。从头要为君数。怕君惊落前箸。天东扶木三千丈，不照关河烟雨。谁砥柱。想造物生才，肯恁无分付。九州风露。待公等归来，为清天步。容我赋归去。

上巳和黄成之韵（水调歌头）

尚记春归日，锦绣裹江城。谁推日驭西去，水认故乡痕。鱼鸟自飞自跃。红紫谁开谁落。天运渺无声。四序镇如此，当当复亭亭。

是何年，修禊事，畅幽情。竞传元巳天气，别是一般清。便引郑郊溱洧。不道孔门沂泗。大道掌如平。待挽迷津者，都向此中行。

中秋（唐多令）

轻露濯秋风。新楼插太空。更遭逢、解事天公。为唤羲和驱六马，将杲日、挂帘栊。

日影正沈红。须臾月在东。百万家、乐意融融。民意乐时天亦好，聊与众、一尊同。

别吴毅夫、赵仲权、史敏叔、朱择善

（同上）

朔雪上征衣。春风送客归。万杨华、数点榴枝。春事无多天不管，教烂漫、住离披。

开谢本同机。荣枯自一时。算天公、不遣春知。但得溶溶生意在，随冷暖、镇芳菲。

江东漕使兄高瞻叔生日端平丙申五月

（水调歌头）

堪怪两外府，使传载朝纓。虽云身在江表，都号汉公卿。莫是才堪世用，莫是有人吹送，中外尔联荣。天运自消息，龙蠖不关情。

更寻思，谁得失，孰亏成。潜鱼要向深渺，犹恐太分明。且愿时清无事，长把书生阁束，归践对床盟。强似抗尘俗，岁岁上陪京。

建康留守陈尚书生日（同上）

天地一大物，扶植要人才。人才谁是，不肯随俗强追陪。与我言兮我愿。莫我知兮谁怨。全仗帝为媒。此意久寥阔，今见者留台。

笏围腰，书创屋，骑笼街。时贤白尽须发，老子抑名斋。更取堂名淇绿。要把北山万竹。一日倚云栽。自处只如此，将相任时来。

淮西总领蔡少卿范生日（唐多令）

人物盛乾淳。东嘉最得人。费江山、几许精神。我已后时犹遍识，君子子、又相亲。

秋入塞垣新。风寒上醉痕。万百般、倚靠苍旻。只愿诸贤长寿健，容老我、看闲身。

中秋新河（木兰花慢）

正秋阴盛处，忽荡起、一冰轮。甚汉魏从前，才人胜士，断简残文。都无一词赏玩，更拟将、美色似非伦。此意谁能领会，自夸光景长新。

待阴多处倍精神。俗眼转增明。向大第高楼，痴儿骏女，脆竹繁裯。此心到头未稳，

莫古人、真不及今人。坐看两仪消长，静观
千古浇淳。

偶书（八声甘州）

被西风吹不断新愁，吾归欲安归。望秦
云苍愴，蜀山渺漭，楚泽平漪。鸿雁依人正
急，不奈稻粱稀。独立苍茫外，数遍群飞。

多少曹苻气势，只数舟燥苇，一局枯棋。
更元颜何事，花玉困重围。算眼前、未知谁
恃，恃苍天、终古限华夷。还须念，人谋如
旧，天意难知。

魏杞

虞美人

冰肤玉面孤山裔。肯到人间世。天然不与百花同。却恨无情轻付、与东风。丽谯三弄江梅晓。立马溪桥小。只应明月最相思。曾见幽香一点、未开时。

卜算子 夜泛镜湖

一叶鉴中来 ,两岸青山起。送我红蕖万柄香 ,疑在蓬壶里。

天地莹无尘 ,巾袂凉如水。白浪无声月自高 ,不是人间世。

魏掞之

失调名

挂天师 ,撑著眼 ,直下觑。骑个生狞大艾
虎。闲神浪鬼 ,辟懞他方远方 ,大胆底 ,更敢
来、上门下户。

魏顺之

水调歌头

人世斗南瑞 ,天上璧东星。谁分佳种 ,钟作问世玉麒麟。本是南阳相种 ,来应瑞龙间气 ,试听即英声。若问贤相敌 ,君去问参军。

质金浑 ,标玉立 ,气冰清。梅花时候 ,结子便可鼎调金。人谓丹山苞凤 ,天产渥洼骏骨 ,德毓窦家椿。来作汤饼客 ,何幸厕嘉宾。

魏 庭 玉

水调歌头 饮芜湖雄观亭

璧月挂银汉，冷浸一江秋。天公付我清赏，仙籍桂香浮。极目江山如画，际晚云烟凝紫，秋色豁羁愁。领看上雄观，波影动帘钩。

雁排空，渔唱晚，楚天幽。湖阴一曲千载，成败倩谁筹。试问谪仙何处，唤起于湖同醉，小为作遨头。老子欲起舞，摆脱利名休。

贺新凉 赠送行诸客

暮雨初收霁。凭阑干、一江新绿，远山凝翠。漠漠春阴添客思，怅望天涯无际。又猛省、平生行止。楚尾吴头多少恨，付吟边、醉里消磨矣。浮世事，只如此。

阳关三叠徒劳耳。也何须、琵琶江上，掩青衫泪。一斗百篇乘逸兴，要借青天为纸。儿辈诧、龙蛇飞起。今夜月明呼酒处，待明朝、酒醒帆千里。且为我，唱新制。

魏子敬

生查子

愁盈镜里山，心叠琴中恨。露湿玉阑秋，
香伴银屏冷。

云归月正圆，雁到人无信。孤损凤皇钗，
立尽梧桐影。

卫芳华

木兰花慢

记前朝旧事，曾此地、会神仙。向月地云阶，重携翠袖，来拾花钿。繁华总随流水，叹一场、春梦杳难圆。废港芙蓉滴露，断堤杨柳摇烟。

两峰南北只依然。辇路草芊芊。怅别馆离宫，烟销凤盖，波没龙船。平生银屏金屋，对漆灯、无焰夜如年。落日牛羊陇上，西风燕雀林边。

卫元卿

谒金门

花过雨。又是一番红素。燕子归来愁不语。故巢无觅处。

谁在玉楼歌舞。谁在玉关辛苦。若使边尘吹得去。东风侯万户。

齐天乐 填温飞卿江南曲

藕花洲上芙蓉楫，羞郎故移深处。弄影萍开，拏香袖冱，鸂鶒双双飞去。垂鞭笑顾。问住否横塘，试窥帘户。妙舞妍歌，甚时相见定相许。

归来憔悴锦帐，久尘金犊幌，连娟黛眉颦妩。扇底红铅。愁痕暗渍，消得腰支如杵。鸾弦解语。镇明月西南，伴人凄楚。闷拾杨花，等闲春又负。

卫宗武

水调歌头 自适

风雨卷春去，绿紫总无馀。窈窕一川芳渚，软草接新蒲。杨柳垂垂飘絮，桑柘阴阴成幄，殷绿正粲敷。迁木莺呼友，营垒燕将雏。

金蕉举，珠樱累，豆梅腴。寿乡歌舞，樽前暂得皱眉舒。往事南柯印绶，晚岁北山杖屨，寂寞笑今吾。幸作耆年侣，写入洛英图。

摸鱼儿 咏小园晚春

小林峦、一年芳事，乱红还又飞雨。生香冉冉花阴转，云擘满空晴絮。游宴处。看乐意相关，庭下胎仙舞。歌声缓度。任圆玉敲寒，飞觞传晓，未许放春去。

闲中趣。明月清风当户。莘莘容屋陈俎。剪裁妙语频赓唱，巧胜郢斤般斧。心自许。拚凋景颓龄，为莺侑燕侣。同盟会取。共花下小车，竹间三径，长作老宾主。

前调 叠前韵

见春来、又将春尽，狂风那更痴雨。一番芳径催人老，回首绿杨飘絮。欢会处。有小小池亭，止欠妙歌舞。光阴梭度。对草木幽姿，候禽雅奏，客至未应去。

十年里，冷落翟公庭户。朋来草草樽俎。投闲赢得浮生乐，肯羨油幢绣斧。春几许。任洛谱名葩，留宴耆英侣。浮荣竞取。纵带玉围腰，印金系肘，争似莺花主。

木兰花慢 和野渡赋菊

聚林园芳景，尽输韩圃陶篱。任雨虐风饕，露凝霜压，丛木离披。正色幽香不减，与冬兰、并秀结心知。天赋花中名节，不教桃李同时。

清奇。秋后尤宜。浮卉尽、尚芬菲。称处士庭除，先生简册，声续吾伊。便好竹间松下，擅晚芳、长伴岁寒姿。懊恨携樽已晚，明年来把花枝。

酹江月 山中霜寒有作

露华凝聚，夜更长、寒压一床衾重。局缩龟藏灯幌悄，明灭银缸欲冻。鼻观流珠，肌纹浮粟，敲枕难成梦。明蟾交映，一窗清影梅弄。

晓见黄陨丹空，但琼华点缀，万梢森耸。
橘柚香来分好景，书后尽堪题送。青女呈工，
玉妃传信，渐六翼飞动。瑞花盈尽，看看叠
嶂银涌。

又 和友人催雪

暮云凝冻，耸玉楼、捻断冰髯知几。今
岁天公慳破白，未放六翼呈瑞。瘿马发祥，
妖麋应祷，终解从人意。腊前三白，瑶光一
瞬千里。

便好翦刻漫空，落花飞絮，滚滚随风起。
莫待东皇催整驾，点点消成春水。巧思裁云，
新词胜雪，引动眉间喜。期梅压竹，看看还
助吟醉。

满江红 寓古杭和南塘咏欲雪词

屑玉飞霰，正堪称、冯夷展布。空几度、
痴云凝聚，狂风掀舞。点点抛扬珠作霰，纤
纤断续丝垂雨。借银河、翦刻六花飘，天应
许。

水漠漠，斜桥渡。烟淡淡，长亭路。望
寒莎衰草，总成愁绪。坡老新堤须好在，逋
仙孤屿犹堪去。共寻梅、止欠雪双清，烦青
女。

前调 寿野渡

弧矢开祥，喜从此、旬兼九日。新岁改、
椒盘献颂，齐头七十。渐入唐人诸老画，可

追洛社耆英集。有陶潜、三径健吟哦，贫而适。

摘仙桂，探蟾窟。敛洪藻，归麟笔。总古先传记，讥评得失。不朽芬芳垂简册，浮荣土苴轻簪笏。看年如、卫武粲成章，诗传抑。

天仙子 前题

搭宅亭园虽不大。花木成阴难论价。豪端点缀有珠玑，竹一带。梅一派。明月清风何用买。

子子孙孙纡寿彩。家庆成图和蔼蔼。更添三岁古来稀，酒满斝。诗满架。直到耆颐年未艾。

水龙吟 和野渡生朝

桑蓬扫尽闲愁，未应人比梅花瘦。眉峰顿展，恰如云卷，北山□九。萦锦绣肠，袖丝纶手，骎骎希有。□□□博取，巍科□□，儒冠于我何负。

初度年来年去，喜称觞、腊前还又。安时委命，金鱼玉带，傥来斯受。傍屋园林，抚松对竹，共朋三寿。且逍遥、安乐窝中，岁岁进、长生酒。

金缕曲 寿南塘八月生朝

强半秋澄穆。半月弦、南极躔高，寿星

明煜。今岁户庭殊旧岁，洗尽闲愁千斛。沸
春夏、欢声相续。兰已种成香满砌，更蕤毕、
得偶颜如玉。双捧劝，寿齐祝。

郗枝芳映庄椿绿。觉这番、初度称觞，
桂增芬馥。生子生孙从此始，剩有人传祖笏。
看八座、青毡须复。两两闺中俱秀质，待子
平、婚嫁人人足。碧桃下，跨青鹿。

文 及 翁

贺新郎 西湖

一勺西湖水。渡江来、百年歌舞，百年
酣醉。回首洛阳花世界，烟渺黍离之地。更
不复、新亭堕泪。簇乐红妆摇画艇，问中流、
击楫谁人是。千古恨，几时洗。

余生自负澄清志。更有谁、磻溪未遇，
傅岩未起。国事如今谁倚仗，衣带一江而已。
便都道、江神堪恃。借问孤山林处士，但掉
头、笑指梅花蕊。天下事，可知矣。

失调名

朗吟飞过。

文 天 祥

齐天乐 庆湖北漕知鄂州李楼峰

南楼月转银河曙，玉箫又吹梅早。鸚鵡沙晴，葡萄水暖，一缕燕香清袅。瑶池春透。想桃露霏霞，菊波沁晓。袍锦风流，御仙花带瑞虹绕。

玉关人正未老。唤矶头黄鹤，岸巾谈笑。剑拂淮清，槊横楚黛，雨洗一川烟草。印黄似斗。看半砚蔷薇，满鞍杨柳。沙路归来，金貂蝉翼小。

又 甲戌湘宪种德堂灯屏

夜来早得东风信，萧湘一川新绿，柳色含晴，梅心沁暖，春浅千花如束。银蟾乍浴。正沙雁将还，海鳌初矗。云拥旌旗，笑声人在画阑曲。

星虹瑶树缥缈，佩环鸣碧落，瑞笼华屋。露耿铜虬，冰翻铁马，帘幕光摇金粟。迟迟倚竹。更为把瑶尊，满斟醽醑。回首宫莲，夜深归院烛。

酹江月 南康军和苏韵

庐山依旧，凄凉处、无限江南风物。空

翠晴岚浮汗漫，还障天东半壁。雁过孤峰，猿归危嶂，风急波翻雪。乾坤未老，地灵尚有人杰。

堪嗟漂泊孤舟，河倾斗落，客梦催明发。南浦闲云连草树，回首旌旗明灭。三十年来，十年一过，空有星星发。夜深愁听，胡笳吹彻寒月。

又 驿中言别友人

水天空阔，恨东风不借、世间英物。蜀鸟吴花残照里，忍见荒城颓壁。铜雀春情，金人秋泪，此恨凭谁雪。堂堂剑气，斗牛空认奇杰。

那信江海馀生，南行万里，属扁舟齐发。正为鸥盟留醉眼，细看涛生云灭。睨柱吞羸，回旗走懿，千古冲冠发。伴人无寐。秦淮应是孤月。

又 和

乾坤能大，算蛟龙、元不是池中物。风雨牢愁无著处，那更寒虫四壁。横槊题诗，登楼作赋，万事空中雪。江流如此，方来还有英杰。

堪笑一叶漂零，重来淮水，正凉风新发。镜里朱颜都变尽，只有丹心难灭。去去龙沙，江山回首，一线青如发。故人应念，杜鹃枝上残月。

满江红

和王夫人满江红韵，以庶几后山妾薄命之意

燕子楼中，又捱过、几番秋色。相思处、
青年如梦，乘鸾仙阙。肌玉暗消衣带缓，泪
珠斜透花钿侧。最无端、蕉影上窗纱，青灯
歇。

曲池合，高台灭。人间事，何堪说。向
南阳阡上，满襟清血。世态便如翻覆雨，妾
身元是分明月。笑乐昌、一段好风流，菱花
缺。

又 代王夫人作

试问琵琶，胡沙外、怎生风色。最苦是、
姚黄一朵，移根仙阙。王母欢阑琼宴罢，仙
人泪满金盘侧。听行宫、半夜雨淋铃，声声
歇。

彩云散，香尘灭。铜驼恨，那堪说。想
男儿慷慨，嚼穿龈血。回首昭阳离落日，伤
心铜雀迎秋月。算妾身、不愿似天家，金瓯
缺。

沁园春

题潮阳张许二公庙 《订补续记》云：原误作
“至元间留燕山作”，兹据大典卷五千三百四十五改

为子死孝，为臣死忠，死又何妨。自光
岳气分，士无全节，君臣义缺，谁负刚肠。
骂贼睢阳，爱君许远，留得声名万古香。后
来者，无二公之操，百炼之钢。

人生翕歔云亡。好烈烈轰轰做一场。使
当时卖国，甘心降虏，受人唾骂，安得留芳。
古庙幽沈，仪容俨雅，枯木寒鸦几夕阳。邮

亭下，有奸雄过此，仔细思量。

满江红

酹酒天山，今方许、征鞍少歇。凭铁肋、千磨百炼，丈夫功烈。整顿乾坤非异事，云开万里歌明月。笑向来、和议总蛙鸣，何关切。

铙吹动，袍生雪。军威壮，笳声灭。念祖宗养士，忍教残缺。洛鼎无亏谁敢问，幕南薄洒膻腥血。快三朝、慈孝格天心，安陵阙。

念奴娇 冰澌

琼琤何处，响空濛、却似鸣榔声沸。望里平江横雪岭，驾断虹梁渔市。若有神驱，如遵帝遣，瞬息层峦峙。南阳龙奋，溱沔凝合犹此。

遥想苏武穷边，霜鸿夜渡，蒿目吟寒视。铁骑衔枚还疾走，瑟瑟风摇旗帜。月白沙明，云凝地裂，四野悲笳至。羁魂牢落，我身今在何世。

又 雪霁

同云笼覆，遍效原、一望苍茫无际。是处青山皆改色，姑射琼台初启。渔艇迷烟，樵柯失径，妆点风霜厉。子猷短棹，三高祠畔堪系。

江城梦幻罗浮，踽步豪吟，东郭先生履。

全宋词 文天祥

欲伴袁安营土室，高卧六花堆里。此是冰天，
谁言水国，千古孤臣涕。芦苇首白，浑疑缟
素刘季。

文同

天香引 游嘉禾南湖

三月三、花雾吹晴。见麟凤沧洲，鸳鸯沙汀。华鼓清箫，红云兰棹，青绾旗亭。

细看来、春风世情。都分在、流水歌声。剪燕娇莺，冷笑诗仙，击楫扬舲。

又 拜和靖祠

正当时、处士、山祠。渐以南枝。春事些儿。枫渍殷脂。蕉撕故纸。柳死荒丝。

自寒涩、雌雄鹭鸶。翅参差、母子鸬鹚。再四嗟咨。捻此吟髭。弹指歌诗。

文彦博

映山红

遂请后。愿频醉、石楼溪口。

文 珣

虞美人

歌唇乍启尘飞处。翠叶轻轻举。似通舞
态逞妖容。嫩条纤丽玉玲珑。怯秋风。

虞姬珠碎兵戈里。莫认埋魂地。只应遗
恨寄芳丛。露和清泪湿轻红。古今同。

闻人武子

菩萨蛮

晴风吹暖枝头雪。露华香沁庭中月。屏上小江南。雨昏天际帆。

翠钗香雾湿。侧鬓云松立。灯背欲眠时。晓莺还又啼。

翁 定

壶中天

寿致政邑宰六十三，子任尉，孙领荐

昔时彭祖，闻道有、八百穹崇遐寿。屈指我公今几许，历岁才方七九。七百修龄，更三十七，犹是公之有。此逢诞节，盍须来献尊酒。

好是子舍孙枝，居官领荐，迭复青毡旧。陶令解龟何太早，去作幔亭仙友。只恐九重，思贤梦觉，未屈调羹手。周公居左，鲁公还是居右。

翁 合

贺新郎 寿蔡参政

世事今如许。祇先生、寿身寿国，尚堪撑拄。一脉宽仁忠厚意，留到如今可数。问谁是、擎天一柱。名节难全官职易，这娥眉、肯效争妍妒。几而作，色斯举。

沧州万顷舟横渡。对和风、桃花流水，一蓑烟雨。亲得紫阳传正印，且作斯文宗主。世望皋夔伊傅。天意须酬平治愿，抚参同、一卷长生谱。平治了，仙为侣。

卜算子 赠陈五星

口诵百中经，手运周天数。试问薇垣一小星，谁知是、韩王普。

知得客星来，知得贤人聚。我若乘槎犯斗牛，莫向常人语。

翁 孟 寅

烛影摇红

楼倚春城，锁窗曾共巢春燕。人生好梦比春风，不似杨花健。旧事如天渐远。奈情缘、素丝未断。镜尘埋恨，带粉栖香，曲屏寒浅。

环佩空归，故园羞见桃花面。轻烟残照下阑干，独自疏帘卷。一信狂风又晚。海棠花、随风满院。乱鸦归后，杜宇啼时，一声声怨。

阮郎归

月高楼外柳花明。单衣怯露零。小桥灯影落残星。寒烟蘸水萍。

歌袖窄，舞鬟轻。梨花梦满城。落红啼鸟两无情。春愁添晓醒。

齐天乐

幽香不受春料理，青青尚余秋鬢。涧曲岩隈，烟梳露浴，甘与菰蒲共隐。芳标瘦迥。

看纓结丁香，带紫晴苻。恨水东流，楚江憔悴乱云暝。

凄凉梦游故苑，纵妒花风暴，吹梦难醒。艳李妖桃，绀青佩紫，争似广交官冷。尘波万顷。算谁是同心，自怜孤影。收敛风流，素弦清夜永。

又 元夕

红香十里铜驼梦，如今旧游重省。节序飘零，欢娱老大，慵立灯光蟾影。伤心对景。怕回首东风，雨晴难准。曲巷幽坊，管弦一片笑声近。

飞棚浮动翠葆，看金钗半溜，春妒红粉。凤辇鳌山，云收雾敛，迤迤铜壶漏迥。霜风渐紧。展一幅青绡，净悬孤镜。带醉扶归，晓醒春梦稳。

摸鱼儿

卷西风、方肥塞草，带钩何事东去。月明万里关河梦，吴楚几番风雨。江上路。二十载头颅，凋落今如许。凉生弄麈。叹江左夷吾，隆中诸葛，谈笑已尘土。

寒汀外，还见来时鸥鹭。重来应是春暮。轻裘岷首陪登眺，马上落花飞絮。拚醉舞。谁解道，断肠贺老江南句。沙津少驻。举目送飞鸿，幅巾老子，楼上正凝伫。

翁 溪 园

水龙吟 代寿制帅贾参政

镇淮楼下旌旗，晶明辉映云山阁。宸旒倚重，折冲千里，无踰秋壑。缓带轻裘，纶巾羽扇，从容筹略。使毡裘胆破，丁宁边吏，无生事，空沙漠。

二十四桥风月，称迷楼、卷尽帘箔。绂麟华旦，饱吟玉蕊，款簪金药。驿骑朝驰，宝鞍赍赐，御筵宣押。更赐环促召，中书入令，作汾阳郭。

水调歌头 寿常州刘守

丹鹤结青士，玄鹿侍苍官。寿仙堂下，应伴鳧鷖戏莱斑。麟记当年绣绂，燕剪今朝彩胜，淑气逐椒盘。孕毓阳和粹，独占一春先。

平准了，勋叶盛，傲东山。中原犹待经略，趣诏凤池还。更数尧阶五荚，又上华封三祝，千载圣须贤。即拜玉枝赐，长冠紫宸班。

沁园春 代寿宗室

记得花筵，巧夕星河，初度女牛。更四双萸荚，十分桂魄，中元佳致，妆点初秋。蔼蔼非烟，濛濛如雾，锦水郁葱佳气浮。人人道，是王孙帝胄，今日生朝。

银潢万叶源流。见一点长庚辉绛霄。似东平为善，河间献雅，风流酝藉，西汉诸刘。恰遇称觞，蓬壶歌缓，满酌蒲萄双玉舟。椿松等算，年年醉傲，花马金裘。

洞仙歌 代寿李尉孺人

几番梅雨，蒲风过、端阳后。细数月轮，犹待双萸秀，戏彩华堂宴，设悦朱门右。酌金荷，争献寿。蟠桃新熟，阿母齐长久。

一门奋建，攀桂客、无双手。好事来春在，杏苑联蓝绶。应继琼林董，却胜燕山窦。夸盛事、真罕有。金花封诰，管取重重受。

踏莎行 寿人母八十三

萸荚飞双，桂分缺二。金风已肃深秋意。萱庭戏彩恰称觞，蕊宫仙子天台裔。

鹤发童颜，龟龄福备。孩儿书额添三字。常将机训付儿孙，取青行拥潘舆侍。

翁 元 龙

烛影摇红

蜀锦华堂，宝箏频送花前酒。妖娆全在半开时，人试单衣后。花面围春竞秀。如红潮、玉腮微透。欲苏还坠，浅醉扶头，朦胧晴昼。

金屋名姝，眼情空贮闲眉岫。世间还有此娉婷，拚尽珠量斗。真艳可令消受。倩莺催、天香共袖。冷烟庭院，淡月梨花，空教春瘦。

齐天乐 游胡园书感

曲廊连苑吹笙道，重来暗尘都满。种石生云，移花带月，犹欠藏春庭院。年华过眼。便梅谢兰销，舞沈歌断。露井寒蛩，为谁清夜诉幽怨。

人生乐事最少，有时得意处，光阴偏短。树色凝红，山眉弄碧，不与朱颜相恋。临风念远。叹蝶梦难追，鹭盟重换。一片斜阳，送人归骑晚。

菩萨蛮

春心莫共花争发。花开不管连环缺。梦断小楼空。杜鹃啼晓红。

眼看连理树。纤手移筝柱。调遍错成声。无人知此情。

又

玉纤闲捻花间集。赤阑干对芭蕉立。薤叶晚生凉。竹阴移小床。

拗莲牵藕线。藕断丝难断。弹水没鸳鸯。教寻波底香。

倦寻芳

燕帘挂晚。莺槛迷晴，花思零乱。试觅娉婷，日日傍湖亭苑。擗果墙阴窥驻马，采香深径抛春扇。醉归来，任钗云半落，绣帘慵卷。

念灿锦、年华如旧，飞絮游丝，萦恨难翦。蜀羽无情，早带怨红啼断，厚约轻辞寒食夜，行云空梦梨花院。莫凭阑，正斜阳、淡烟平远。

瑞龙吟

清明近。还是递馥东风，做成花讯。芳时一刻千金，半晴半雨、酬春未准。

雁归尽。离字向人欲写，暗云难认。西

园猛忆逢迎，翠纨障面，花间笑隐。

曲径池莲平砌，绛裙曾与，濯香湔粉。无奈燕幕莺帘，轻负娇俊。青榆巷陌，蹋马红成寸。十年梦、秋千吊影，袜罗尘褪。事往凭谁问。昼长病酒添新恨。烟冷斜阳紧。山黛远、曲曲阑干凭损。柳丝万尺，不如轻鬓。

隔浦莲近

街檐插缀翠柳。憔悴清明后。泪蜡堆香径，一夜海棠中酒。枝上酸似豆。莺声骤。恨软弹筝手。

搵眉袖。嘶骢过尽平芜，绿衬飞绣。沈红入水，渐做小莲离藕。亭冷沈香梦似旧。花瘦。欲留春住时候。

玲珑四犯

窗外啼莺，报数日西园，花事都空。绣屋专房，姚魏渐邀新宠。葱翠试剪春畦，羞对酒、夜寒犹重。误暗期、绿架香洞。月黯小阶云冻。

算春将揽邮亭鞚。柳成圈、记人迎送。蜀魂怨染岩花色，泥径红成陇。楼上半揭画帘，料看雨、玉笙寒拥。怕骤晴，无事消遣，日长清梦。

风流子

闻桂花怀西湖（题原作“木樨”，从绝妙好词卷

四改)

天阔玉屏空。轻阴弄、淡墨画秋容。正凉挂半蟾，酒醒窗下，露催新雁，人在山中。又一片，好秋花占了，香换却西风。箫女夜归，帐栖青凤，镜娥妆冷，钗坠金虫。

西湖花深窈，闲庭砌、曾占席地歌钟。载取断云归去，几处房栊。恨小帘灯暗，粟肌消瘦，薰炉烟减，珠袖玲珑。三十六宫清梦，还与谁同。

西江月

山色低衔小苑，春云暗宿空庭。秋千无月冷双绳。闲却画栏人静。

一夜海棠如梦，半窗银烛多情。好花留不到清明。日日阴晴无定。

忆秦娥

三月时。杨花飞尽无花飞。无花飞。不教春去，争得春归。

高楼望断黄金鞮。绿窗眉黛伤新离。伤新离。好将别后，长做归时。

恋绣衾

兽炉烟熏火半焦。卷帘时、雪意又销。过数点、残鸦外，想梅花、寒在灞桥。

谢娘春恨深如柳，未东风、先遣絮飘。

全宋词 翁元龙

且莫把、冰丝剪，有灯球、红绣未描。

水龙吟 雪霁登吴山见沧阁，闻城中箫鼓声

画楼红湿斜阳，素妆褪出山眉翠。街声暮起，尘侵灯户，月来舞地。宫柳招莺，水荭飘雁，隔年春意。黯梨云，散作人间好梦，琼箫在、锦屏底。

乐事轻随流水。暗兰消、作花心计。情丝万轴，因春织就，愁罗恨绮。昵枕迷香，占帘看夜，旧游经醉。任孤山、剩雪残梅，渐懒跨、东风骑。

醉桃源 柳

千丝风雨万丝晴。年年长短亭。暗黄看到绿成阴。春由他送迎。

莺思重，燕愁轻。如人离别情。绕湖烟冷罩波明。画船移玉笙。

谒金门

莺树暖。弱絮欲成芳茧。流水惜花流不远。小桥红欲满。

原上草迷离苑。金勒晚风嘶断。等得日长春又短。愁深山翠浅。

绛都春 秋晚，海棠与黄菊盛开

花轿半面。记蜜烛夜阑，同醉深院。衣

全宋词 翁元龙

袖粉香，犹未经年如年远。玉颜不趁秋容换。但换却、春游同伴。梦回前度，邮亭倦客，又拈笺管。

慵按。梁州旧曲，怕离柱断弦，惊破金雁。霜被睡浓，不比花前良宵短。秋娘羞占东篱畔。待说与、深宫幽怨。恨他情淡陶郎，旧缘较浅。

江城子

一年箫鼓又疏钟。爱东风。恨东风。吹落灯花，移在杏梢红。玉靥翠钿无半点，空湿透，绣罗弓。

燕魂莺梦渐惺松。月帘栊。影迷蒙。催趁年华，都在艳歌中。明日柳边春意思，便不与，夜来同。

西江月 立春

画阁换黏春帖，宝箏抛学银钩。东风轻滑玉钗流。织就燕纹莺绣。

隔帐灯花微笑，倚窗云叶低收。双鸳刺罢底尖头。剔雪闲寻豆蔻。

朝中措 赋茉莉

花情偏与夜相投。心事鬓边羞。薰醒半床凉梦，能消几个开头。

风轮慢卷，冰壶低架，香雾飏飏。更著

全宋词 翁元龙

月华相恼，木犀淡了中秋。

鹊桥仙 巧夕

天长地久，风流云散，惟有离情无算。
从分金镜不成圆，到此夜、年年一半。

轻罗暗网，蛛丝得意，多似妆楼针线。
晓看玉砌淡无痕，但吹落、梧桐几片。

巫山神女

惜奴娇其一

瑶阙琼宫 ,高枕巫山十二。睹瞿塘、千载滟滟云涛沸。异景无穷好 ,闲吟满酌金卮。忆前时。楚襄王 ,曾来梦中相会。吾正鬢乱钗横 ,敛霞衣云缕。向前低揖。问我仙职。桃杏遍开 ,绿草萋萋铺地。燕子来时 ,向巫山、朝朝行雨暮行云 ,有闲时 ,只恁画堂高枕。

瑶台景第二

绕绕云梯 ,上彻青霄霞外。与诸仙同饮 ,镇长春醉。虎啸猿吟 ,碧桃香异风飘细。希奇。想人间难识 ,这般滋味。姮娥奏乐箫韶 ,有仙音异品 ,自然清脆。遏住行云不敢飞。空凝滞。好是波澜澄湛 ,一溪香水。

蓬莱景第三

山染青螺缥渺 ,人间难陟。有珍珠光照 ,昼夜无休息。仙景无极。欲言时。汝等何知。且修心 ,要观游 ,亦非。大段难易。下俯浮生 ,

尚自争名逐利。岂不省 ,来岁扰扰兵戈起。天
惨云愁 ,念时衰如何是。使我辈、终日蓬宫下
泪。

劝人第四

再启诸公 ,百岁还如电急。高名显位瞬息
尔。泛水轻沤 ,霎那间、难久立。画烛当风里。
安能久之。速往茅峰割爱 ,休名避世。等功
成、须有上真相引指。放死求生 ,施良药、功无
比。千万记。此个奇方第一。

王母宫食蟠桃第五

方结实累累。翠枝交映 ,蟠桃颗颗 ,仙味
真香美。遂命双成 ,持灵刀割来 ,耳服一粒 ,令
我延年万岁。堪笑东方 ,便启私心盗饵。使宫
中仙伴 ,递互相尤殢。无奈双成 ,向王母高陈
之。遂指方 ,偷了蟠桃是你。

玉清宫第六

紫云绛霭 ,高拥瑶砌。晓光中、无限剖列。
肃整天仙队。又有殊音欲举 ,声还止。朝罢
时。亦有清香飘世。玉驾才兴 ,高上真仙尽
退。有琼花如雪 ,散漫飞空里。玉女金童 ,捧
丹文、传仙诲。抚诸仙 ,早起劳卿过耳。

扶桑宫第七

光阴奇。扶桑宫里。日月常昼，风物鲜明可爱。无阴晦。大帝频鉴于瑶池。朱阑外，乘风飞。教主开颜命醉。宝乐齐吹。尽是琼姿天妓。每三杯，须用圣母亲来揖。异果名花几千般，香盈袂。意欲归。却乘鸾车凤翼。

太清宫第八

显焕明霞，万丈祥云高布，望仙官衣带，曳曳临香砌。玉兽齐焚，满高穹、盘龙势。大帝起。玉女金童遍侍。奉勅宣言，甚荷诸仙厚意。复回奏，感恩顿首皆躬袂。奏毕还宫，尚依然云霞密，奇更异。非我君，何闻耳。

归第九

吾归矣。仙宫久离。洞户无人管之。专俟吾归。欲要开金燧。千万频修己。言讫无忘之。哩罗哩。此去无由再至。事冗难言，尔辈须能自会。汝之言，还便是如吾意。大抵方寸平平，无忧耳。虽改易之。愁何畏。

邬 虑

翻香令

醉和春恨拍阑干。宝香半炷倩谁翻。丁
宁告、东风道，小楼空，斜月杏花寒。

梦魂无夜不关山。江南千里霎时间。且
留得、鸾光在，等归时，双照泪痕干。

无何有翁

江城子 和

小年底死踏槐忙。叹蝉声,早斜阳。今夕何年,白骨照沙场。天上人间都是梦,石中火,镬中汤。

人如今且免秀才康。驰大马,试长枪。说与儿门,书里有膏粱。万万古来同一月,斫不尽,广寒香。

无际道人

渔家傲

七坐道场三奉诏。空花水月何时了。小
玉声中曾悟道。真堪笑。从来漫得儿孙好。

辩涌海潮声浩浩。明如浩月当空照。飞
锡西归云杳渺。巴猿啸。大家唱起还乡调。

无名氏

头盏曲

黄阁方开。金鼎和羹正待梅。

浣溪沙 武进厅壁

倦客东归得自由。西风江上泛扁舟。夜寒霜月素光流。

想得故人千里外，醉吟应上谢家楼。不多天气近中秋。

又

北固江头浪拍空。归帆一夜趁秋风。月明初上荻花丛。

渐入三吴烟景好，此身将过浙江东。梦魂先在鉴湖中。

沁园春

小阁深沈，寸心怀感，暗忆旧时。念母兄贫窘，姻亲劝诱，一身权作，七岁为期。及到门阑，小君猜忌，如履轻冰愁过违。多磨难，是房中诟骂，堂上鞭笞。

堪悲。命运乖衰。甚长个孩儿朝夜啼。叹此生缘业，两餐淡薄，无时无泪，如醉如痴。暗里相逢，低声说与，此个恩情休谩为。须知道，联难为夏竦，不易张祁。

失调名

解下痴绦。

王子高六么大曲

梦中共跨青鸾翼。……一簇楼台。

失调名

十五年来，从事风流府。

误桃源

砥柱勒铭赋，本赞禹功勋。试官亲处分，
赞唐文。

秀才冥子里，銮驾幸并汾。恰似郑州去，
出曹门。

云鬓松令 送傅国华奉使三韩

鬓云松，眉叶聚。一阕离歌，不为行人
驻。檀板停时君看取。数尺鲛绡，果是梨花
雨。

鹭飞遥，天尺五。凤阁鸾坡，看即飞腾
去。今夜长亭临别处。断梗飞云，尽是伤情
绪。

胜胜慢

严凝天气，近腊时节，寒梅暗绽疏枝。
素艳琼苞，盈盈掩映亭池。雪中欺寒探暖，
替东君、先报芳菲。暗香远，把荒林幽圃，
景致妆迟。

别是一般风韵，超群卉、不待淡荡风吹。
雅态仪容，特地惹起相思。折来画堂宴赏，
向尊前、吟咏怜伊。渐开尽，算闲花、野草
怎知。

又

寒应消尽，丽日添长，百花未敢先拆。

冷艳幽香，分过溪南春色。调酥旋成素蕊，向碧琼、枝头匀滴。愁肠断，怕韶华三弄，雪映溪侧。

应是酒阑人静，香散处、惟见玉肌冰格。细细疏风，清态为谁脉脉。芳心向人似语，也相怜、风流词客。待宴赏，伴娇娥、和月共摘。

汉宫春

梅萼知春，见南枝向暖，一朵初芳。冰清玉丽，自然赋得幽香。烟庭水榭，更无花、争染春光。休谩说、桃夭杏冶，年年蝶闹蜂忙。

立马伫、凝情久，念美人自别，鳞羽茫茫。临岐记伊，尚带宿酒残妆。云疏雨阔，怎知人、千里思量。除是托、多情驿使，殷勤折寄仙乡。

又

雪打风摧。正篱枯壁尽，却有寒梅。衰柳败蒲碍眼，喜见芳蕾。江树路曲，问青帘、与酌余醅。须凭取，东君为我，一枝先寄春来。

寂寞槿门牛巷，有清香自倚，不怕低回。终须会逢赏目，健步移栽。孤芳素艳，敢烦他、蜂蝶相陪。偏爱有、春风靳惜，同时不放花开。

又

点点江梅，对寒威强出，一弄新奇。零

珠碎玉，为谁密上南枝。幽香冷艳，纵孤高、却遣谁知。惟只有、江头驿畔，征鞍独为迟迟。

聊捻粉香重问，问春来甚日，春去何时。移将院落，算应未肯头低。无人共折，傍溪桥、雪压霜欺。君不见、长安陌上，只夸桃李芳菲。

鼓笛慢

雪霏冰结霜凝，是谁透得春工意。南枝向暖，江边岭上，独先众卉。闲态幽姿。绿窗红蒂，粉英金蕊。念冰肤秀骨，人间要见，除非是、真仙子。

羌管且休横吹。待佳人、新妆初试。鸾台晓鉴，人花相对，何须更比。疏影横斜，暗香浮动，月低风细。又岂知，渐结枝头翠玉，有和羹美。

又

去年今日关山路，疏雨断魂天气。据鞍惊见，梅花的皞，篱边水际。一枝折得，雪妍冰丽，风梳雨洗。正水村山馆，倚阑愁寄，有多少、春情意。

好是孤芳莫比。自不分、歌梁舞地。砌香砌影，高禅文友，清谈相对。琴韵初调，茗瓯催瀹，炉薰欲试，向此时，一段风流，付与晋人标致。

又

淡烟池馆，霜飏乍紧，又是年华暮。黄

花老尽，丹枫舞困，江梅初吐。点缀南枝，暗传春信，玉苞微露。凭危阑空断，谁家素脸，遥山远、空凝伫。

昨夜一枝开处。正前村、雪深幽曙。看来只恐，瑶台云散，玉京人去。〔庾〕岭寒余，汉宫妆晓，飞堆行雨。仗谁人惜取，孤芳雅致，作春光主。

念奴娇

雨肥红绽，把芳心轻吐，香喷清绝。日暮天寒，独自倚修竹，冰清玉洁。待得春来，百花若见，掩面应羞杀。当风抵雨，犯寒则怕吹霎。

潇潇爱出墙东，途中遥望，已慰人心渴。斗压阑干，人面共花面，难分优劣。嚼蕊寻香，凌波微步，雪沁吴绫袜。玉纤折了，殢人须要斜插。

又

岁华渐杪，又还是春也，难禁愁寂。欲探疏梅，独自个、寻访山村水驿。路转溪斜，竹低墙短，应是瑶姬宅。玉蕤不动，月轮寒浸国色。

回首故国风光，只因清好，重作江南客。堪笑广平，争解我、羁旅芳心脉脉。不借铅华，枝头雪霁，愈见香肌白。高楼且住，恁渠一弄羌笛。

又

兰枯蕙死，向竹斋深处，谁传消息。霜

雪丛中浑似个，缥缈吴人标格。绛萼微深，琼苞不露，自与尘凡隔。黄昏遥见，一枝烟淡笼白。

曾记雾阁云窗，轻飞香篆，佳句应难得。道韞能文，终未胜、潇洒风流姿质。待到春来，满城桃李，相并无颜色。殷勤祝付，画楼休品长笛。

洞庭春色

绛萼欺寒，暗传春信，一枝乍芳。向篱边竹外，前村雪里，青梢犹瘦，疏影溪傍。惹露和烟凝酥艳，似潇洒玉人初试妆。江南路，有多情伫立，回尽柔肠。

倚楼最难忘处，正皓月、千里流光。纵广平心劲，难思丽句，少陵诗兴，犹爱清香。休怪东君先留意，问他日和羹谁又强。还轻许，笑凌空桧影，松荫交相。

沁园春

山驿萧疏，水亭清楚，仙姿太幽。望一枝颖脱，寒流林外，为传春信，风定香浮。断送光阴，还同昨夜，叶落从知天下秋。凭阑处，对冰肌玉骨，姑射来游。

无端品笛悠悠。似怨感长门人泪流。奈微酸已寄，青青杪，助当年太液，调鼎和馐。樵岭渔桥，依稀精彩，又何藉纷纷俗士求。孤标在，想繁红闹紫，应与包羞。

全宋词 无名氏

真珠髻 红梅

重重山外，苒苒流光，又是残冬时节。小园幽径，池边楼畔，翠木嫩条春别。纤蕊轻苞，粉萼染、猩猩鲜血。乍几日，好景和风，次第一齐催发。

天然香艳殊绝。比双成皎皎，倍增芳洁。去年因遇东归使，指远恨、意曾攀折。岂谓浮云，终不放、满枝明月。但叹息，时饮金钟，更绕丛丛繁雪。

远朝归

新律才交，早旧梢南枝，朱污粉腻。烟笼淡妆，恰值雨膏初细。而今看了，记他日、酸甜滋味。多应是，伴玉簪凤钗，低扭斜坠。

迤邐。对酒当歌，眷恋得芳心，竟日何际。春光付与，尤其是见欺桃李。叮咛寄语，且莫负、尊前花底。拚沈醉，尽铜壶、漏传三二。

击梧桐

雪叶红凋，烟林翠减，独有寒梅难并。瑞雪香肌，碎玉奇姿，迥得佳人风韵。清标暗折芳心，又是轻泄，江南春信。最好山前水畔，幽闲自有，横斜疏影。尽日凭阑，寻思无语，可惜飘琼飞粉。但怅望、王孙未赏，

全宋词 无名氏

空使清香成阵。怎得移根帝苑，开时不许众芳近。免教向、深岩暗谷，结成千万恨。

泛兰舟

霜月亭亭时节，野溪开冰灼。故人信付江南，归也仗谁托。寒影低横，轻香暗度，疏篱幽院何在，秦楼朱阁。称帘幕。

携酒共看，依依承醉更堪作。雅淡一种天然，如雪缀烟薄。肠断相逢，手捻嫩枝，追思浑似，那人浅妆梳掠。

十月梅

千林凋尽，一阳未报，已绽南枝。独对霜天，冒寒先占花期。清香映月浮动，临浅水、疏影斜欹。孤标不似，绿李夭桃，取次成蹊。

纵寿阳、妆脸偏宜。应未笑、天然雅态冰肌。寄语高楼，凭栏羌管休吹。东君自是为主，调鼎鼐、终付他时。从今点缀，百草千花，须待春归。

蓦山溪

冰肌玉骨，不与凡花数。一点破清香，这心情、更谁为主。愁春归晚，时被雨廉纤，琼枝上，泪淋浪，似恨孤芳处。

幽姿标格，独向江头路。拟待使君来，

把芳心、丁宁分付。疏篱茅舍，回首试轻辞，争望远，嫁东风，对玉堂同处。

又

梅传春信，又报年华晚。昨夜半开时，似雪到、梢头未遍。凝酥缀粉，绰约玉肌肤，香黯淡，月朦胧，谁是黄昏伴。

故园深处，想见孤根暖。千里未归人，向此际、只回泪眼。凭谁为我，折寄一枝来，凝睇久，俯层楼，忍更闻羌管。

又

素苞淡注。自是东君试。占断陇头光，正雪里、前村独步。一枝竹外，日暮怯轻寒，山色远，水声长，寂寞江头路。

小桥斜渡。人静销魂处。淡月破黄昏，影浮疏、清香暗度。竹篱茅舍，斜倚为谁愁，应有恨，负幽情，惟恐风姨妒。

又

沙塘水浅，又一番春信。玉体不知寒，衬修篁、几苞隐映。幽香荏苒，不让洒蔷薇，弯月冷，漫涟漪，云断暗香影。

朱扉深处。谢绝尘埃境。百草未开花，□莹然、教伊孤冷。东风世态，只恋碧桃枝，曲玉管，且休吹，免使成遗恨。

又

前村昨夜，先报春消息。庾岭一枝开，见行人、频频顾惜。东君布巧，妆蕊似裁□，疏竹外，小溪边，雪里藏春色。

朔风吹绽，不假和风拆。根暖独亨嘉，

向百花、头先占得。高楼羌笛，且劝莫凄然，
协帝梦，起商岩，须尽调羹力。

又

冰肌玉骨，不假铅黄借。岂是占年芳，
又只恐、嫌春不嫁。十分清瘦，可煞有闲愁，
沙路晚，雪村晴，半幅江南画。

林间系马，曾忆关山夜。醉袖惹香归，
误几回、灯前娇雅。如今老矣，无计奈春何，
人去后，独来时，风月闲亭榭。

又

前村雪里，度一枝春信。况自占年芳，
淡妆梳、常嫌脂粉。樱唇轻捧，何似鹤头红，
香阵阵。回舆认。摘有金卮酝。

佳人嗅处，微把香尘喷。懊恼故无言，
使人□、重重再问。它年寄与，惟有陇头人，
春未困。香尤嫩。好与添风韵。

又

郊居牢落，一水流清浅。忆得去年冬，
数枝梅、低临水畔。今朝重见，把酒祝东风，
和雪看。整凝眸，宛若江南岸。

浮生瞥尔，劝汝休嗟叹。不觉失芳心，
柳腰□、纤纤仍换。一朝光景，休恁作浑闲，
春不远。且追游，又办寻芳宴。

又

重黎默运，可意萦人处。清楚玉蕤仙，
独幽栖、村溪月坞。冰腮露鬢，佳致在西湖，
月出早，雪消迟，立马红墙序。

寒梢微萼，点点蝇头许。欲露小檀心，

似生怕、施朱红紫。返魂香细，堪吊独醒人，
临泽国，袭清风，且咏离骚句。

又

前村雪里，漏泄春光早。似待故人来，
束芳心、幽香未老。溪边昨夜，雨过却参横，
云旖旎，玉玲珑，不遣纤尘到。

无情有意，寂寞谁知道。幽梦觉来时，
淡无言、风清月了。何郎去后，憔悴少新诗，
空怅望，倚楼人，玉笛霜天晓。

又

竹篱茆舍，底是藏春处。玉蓓锁檀心，
带黄昏、轻烟细雨。神清骨莹，端似雪堂仙，
临岁晚，傲寒威，寂寞江村住。

琼林阆苑，有信终归去。冷暖笑凡情，
辨南枝、北枝几许。灵芳绝艳，知肯为谁容，
东阁里，西湖畔，总与花为主。

又

岁寒辽邈，望断江南信。墙外一枝斜，
对兰堂、绮罗隐映。水清月淡，疑是寿阳妆，
烟浪急，小桥横，点点疏清影。

天姿潇洒，不减瑶台韵。占断玉楼春，
被松筠、笑他孤冷。幽人何在，无处觅余寒，
疏雨过，泪痕深，枉了衷肠恨。

又 翦彩梅花

危栏独倚，往事思量遍。回首掩朱扉，
敛云鬓、闲拈针线。轻罗碎翦，缝个小梅花，
灯闪闪，夜沈沈，玉指轻轻捻。

寒苞素艳，浑似枝头见。半拆与初开，

谁赢得、江南手段。玉冠斜插，惟恨欠清香，风动处，月明时，不怕吹羌管。

又 画梅

孤村冬杪，有景真堪画。茅舍绕疏篱，见一枝、寒梅潇洒。欲将诗句，拟待说包容，辞未尽，意悠悠，难把精神写。

临溪疏影，都是前人话。此外更何如，更须索、良工描下。明窗净几，长做小图看，高楼笛，尽教吹，不怕随声谢。

又 蜡梅

梅梢破萼，已见春心了。别有淡容仪，又不与、嫣然同笑。东风翦蜡，簇作闹蛾儿，冰未泮，水犹寒，散在千林表。

轻衫小帽，行尽荒山道。一点麝脐香，恼著人、多多少少。月斜门掩，消损怕黄昏，清影乱，翠帏深，且喜归来早。

又 蜡梅

小山苍翠，竹影横窗畔。青缕断薰炉，觉身居、风台月观。清香招近，谁为植幽丛，金作蓓，蕾成花，尚带鹅黄浅。

汉宫半额，未许人间见。不比岭前梅，问无因、天高水远。宜烟宜雨，淡淡一枝春，乘好兴，缀新诗，只恐冰生砚。

又 蜡梅

江南春信，已过长安路。柳眼尚贪眠，又争知、先传春去。东风漏泄，休更滞垂杨，深雪里，一枝开，谁占先春处。

当时马上，回首曾凝顾。水浅月黄昏，

倚琼枝、谁家亭户。一声羌管，遗恨到如今，
凭栏处，赏花时，莫使花轻负。

又 野梅

当时曾见，上苑东风暖。今岁却相逢，
向烟村、亭边驿畔。垂鞭立马，一晌黯无言，
江南信，寿阳人，怅望成肠断。

琼妆雪缀，满野空零乱。谁是倚阑干，
更那堪、胡笳羌管。疏枝残蕊，犹懒不娇春，
水清浅，月黄昏，冷淡从来惯。

梅花引

园林静。萧索景。寒梅漏泄东君信。探
春回。探春回。四时却被，伊家苦相催。江
村畔。开灿灿。看看又近年光晚。绽芬芳。
喷清香。寿阳宫里，爱学靓梳妆。

天桃红杏夸颜色。争似情怀雪中拆。冒
严寒。冒严寒。游蜂戏蝶，莫作等闲看。故
人别后知何处。春色岭头逢驿使。赠新诗。
折高枝。楼上一声，羌管不须吹。

绿头鸭

敛同云。破腊雪霁前村。占阳和、孤根
先暖，数枝已报新春。如青女、谩同素质，
笑姑射、难并天真。疏影横斜，澄波清浅，
暗香浮动月黄昏。山驿畔，行人立马，回首
几销魂。江南远，陇使趁程，踏尽冰痕。

有个人人，玉肌偏似，移我常对金尊。

全宋词 无名氏

捻纤枝、鬓边斜戴，嗅芳蕊、眉晕潜分。素
脸笼霞，香心喷日，寿阳妆罢酒初醒。待调
鼎、须贪结子，忍见落纷纷。霜天晓，愁闻
画角，声断谯门。

金盏倒垂莲

依约疏林，见盈盈春意，几点霜蕤。应
是东君，试手作芳菲。粉面倚、天风微笑，
是日暖、雪已晴时。人静么凤翩翩，踏碎残
枝。

幽香浑无著处，甚一般雨露，独占清奇。
淡月疏云，何处不相宜。陌上报春来也，但
绿暗、青子离离。桃杏应仗先容，次第追随。

梅香慢

高阁寒轻，映万朵芳梅，乱堆香雪。未
待江南，早冠百花，先占一阳佳节。翦彩凝
酥，无处学、天然奇绝。便寿阳妆，工夫费
尽，艳姿终别。

风里弄轻盈，掩珠英明莹，待腊飘烈。
莫放芳菲歇。剩永宵欢赏，酒酣吟折。倒玉
何妨，且听取、樽前新阕。怕笛声长，行云
散尽，谩悲风月。

冒马索

晓窗明，庭外寒梅向残月。吴溪庾岭，

一枝偷把阳和泄。冰姿素艳，自然天赋，品格真香殊常别。奈北人、不识南枝，唤作腊前杏先发。

奇绝。照溪临水，素禽飞下，玉羽琼芳斗清洁。懊恨春来何晚，伤心邻妇争先折。多情立马，待得黄昏，疏影斜斜微酸结。恨马融、一声羌笛起处，纷纷落如雪。

定风波慢

漏新春、消息前村，数枝楚梅轻绽。□雪艳精神，冰肤淡伫，姑射依稀见。冷香凝，金蕊浅。青女饶伊妒无限。堪羨。似寿阳妆阁，初匀粉面。

纤条绿染。异群葩、不似和风扇。向深冬、免使游蜂舞蝶，撩拨春心乱。水亭边，山驿畔。立马行人暗肠断。吟恋。又忍随羌管，飘零千片。

庆春泽

晓风严，正萧然兔园，薄雾微罩。梅渐弄白，耸危苞、匀胜胭脂，半点琼瑰小。望江南、信息何杳。纵寿阳妍姿，学就新妆，暗香须少。

幽艳满寒梢，更游蜂舞蝶，浑无飞绕。天赋品格，借东皇施巧。孤根占得春前俊，笑雪霜、谩欺容貌。况此花高强，终待和羹，肯饶芳草。

尉迟杯

岁云暮。叹光阴苒苒能几许。江梅尚怯余寒，长安信音犹阻。春风无据。凭阑久，欲去还凝伫。忆溪边月下徘徊，暗香疏影庭户。

朝来冻解霜消，南枝上，香英数点微露。把酒看花，无言有泪，还是那时情绪。花依旧、晨妆何处。谩赢得、花前愁千缕。尽高楼，画角频吹，任教纷纷飞絮。

木兰花慢

望阳生渐布，见梅萼、暖初回。向雪里、一枝才苞，素艳已占春台。烟笼半含粉面，透清香、暗触满襟怀。可惜前村望断，魏林庾岭栽培。

皑皑。嫩蕊清光，凝笑也恁风猥。但折取行人，途中对酒，不用尊垒。芬芳正当岁暮，谩休夸桃李苦相催。早报明年律应，又还依旧先开。

又

饱经霜古树，怕春寒、趁腊引青枝。逗一点阳和，隔年信息，远报佳期。凄葩未容易吐，但凝酥半面点胭脂。山路相逢驻马，暗香微染征衣。

风前袅袅含情，虽不语、引长思。似怨感芳姿，山高水远，折赠何迟。分明为传驿

全宋词 无名氏

使，寄一枝春色写新词。寄语市桥官柳，此先占了芳菲。

最高楼

梅花好，千万君须爱。比杏兼桃犹百倍。分明学得嫦娥样，不施朱粉天然态。蟾宫里，银河畔，风霜耐。

岭上故人千里外。寄去一枝君要会。表江南信相思。清香素艳应难对。满头宜向尊前戴。岁寒心，春消息，年年在。

尾犯

轻风淅淅，正园林萧索，未回暖律。岭头昨夜，寒梅初发，一枝消息。香苞渐拆。天不许、雪霜欺得。望东吴，驿使西来，为谁折赠春色。

玉莹冰清容质。迥不同、群花品格。如晓妆匀罢，寿阳香脸，徐妃粉额。好把琼英摘。频醉赏、舞筵歌席。休待听，呜咽临风，数声月下羌笛。

望远行

重阴未解，又早是、年时梅花争绽。暗香浮动，疏影横斜，月淡水清亭院。好是前村，雪里一枝开处，昨夜东风布暖。动行人、多少离愁肠断。

凝恋。天赋自然雅态，似寿阳、初匀粉面。故人折赠，欣逢驿使，只恐陇头春晚。寄与高楼，休学龙吟三弄，留取琼花烂熳。正有人、同倚阑干争看。

宝鼎现

东君著意，化工恩被，灼灼娇艳。袅嫩梢轻蓓，萦风惹露，偏早香英绽。似向人、故矜夸标致，倚阑全如顾盼。尚困怯余寒，柔情弱态，天真无限。

断桥压柳时非浅。先百花、风光独占。当送腊初归，迎春欲至，芳姿偏婉变。料碎翦就，缁纨辉丽，更把胭脂重染。自赋得、一般容冶，宛胜神仙妆脸。

折送小阁幽窗，酷爱处、令亲几砚。尽孜孜观赏，不枉人称妙选。待密付、如膏雨泽。金玉仍妆点。任扰扰、百卉千花掩迹，一时羞见。

望梅花

寒梅堪羨。堪羨轻苞初展。被天人、制巧妆素艳。群芳皆贱。碎翦月华千万片。缀向琼枝欲遍。

小庭幽院。雪月相交无辨。影玲珑、何处临溪见。谢家新宴。别有清香风际转。缥缈著人头面。

喜迁莺

南枝向暖。乍秀出庾岭，梅英初吐。玉颊轻匀，琼腮微抹，姑射冰容相许。几回立马凝伫，影映寒光霜妒。□尽占，在百花头上，严冬独步。

芳华春意早，昨夜一番，雪里开无数。万蕊千梢，铅堆粉污，总是化工偏赋。月明暗香浮动，休使龙吟声苦。且留取。待时时，频倚阑干重顾。

又

腊残春未。正候馆梅开，墙阴雪里。冷艳凝寒，孤根回暖，昨夜一枝春至。素苞暗香浮动，别有风流标致。谢池月，最相宜，疏影横斜临水。

谁为。传驿骑。陇上故人，不见今千里。寄与东君，徒教知人，别后岁寒清意。乱山万叠何在，但有飞云天际。故园好，早归来，休恋繁桃秣李。

又

霜凝雪互，正斗标临丑，三阳将近。万木凋零，群芳消歇，禁苑有梅初盛。异香似薰沈水，素色端如玉莹。人尽道，第一番，天遣先占春信。

标韵。尤耿耿。月观水亭，谁解怜疏影。何逊扬州，拾遗东阁，一见便生清兴。望林止渴功就，不数夭桃繁杏。岁寒意，看结成秀子，归调商鼎。

又

一阳初起。渐庾岭梅雪，才苞香蕊。品格清高，姿容闲雅，别受化工深意。放开独占严景，不使混同凡卉。微雨霁。似玉容寂寞，无言有泪。

难比。凝素态，不共艳阳，桃杏争妍丽。疑是佳人，巧捻香酥，枝上玉纤轻缀。前村可惜无赏，好近天庭阶砌。成实后，有调和鼎鼐，一般滋味。

折红梅

陇上消残雪，曲水流断，淑气潜通。群花冷未吐，夜来梅萼，数枝繁红。光夺化工。发艳色、不染东风。信凭晓风，难压精神，占青春未上，别是标容。

天香渐杳，似蓬阙玉妃，酒困娇慵。只愁恐、上阳爱惜，和种移向瑶宫。西归驿使，折赠处、庾岭溪东。

又须寄与，多感多情，道此花开早，未识游蜂。

又

倚花阑清晓，裊回探得，南枝初绽。通春意、漏巧斗奇，东君首先回暖，盈盈素面。刚强点、胭脂深浅。是他自有，标格清香，恁千种妖饶，万般闲雅。

移时细看。算浓雪严霜，怎生拘管。也拟是、小桃未蕊，依约杏添清伴。笛声休怨。怕恐使、群芳零乱。待须把酒，守著花枝，

愿期与花枝，久长相见。

又

忆笙歌筵上，匆匆见了，□□相别。红炉暖、画帘绣阁，曾共鬓边斜插。南枝向暖，北槛里、春风犹怯。也应别后，不减芳菲，念咫尺阑干，甚时重折。

清风间发，如天与浓香，粉匀檀颊。纱窗影、故人凝处，冷落暮天残雪。一轩明月。怅望花争清切。便教尽放，都不思量，也须有，蓦然上心时节。

又

睹南翔征雁，疏林败叶，凋霜零乱。独红梅、自守岁寒，天教最后开绽。盈盈水畔。疏影蘸、横斜清浅。化工似把，深色胭脂，怪姑射冰姿，剩与红间。

谁人宠眷。待金锁不开，凭阑先看。曾飞落、寿阳粉额，妆成汉宫传遍。江南风暖。春信喜、一枝清远。对酒便好，折取奇苞，捻清香重嗅，举杯重劝。

满庭霜

一种江梅，偷传春信，夜来先绽南枝。嫩苞寒萼，妆点缀胭脂。雪里浑迷素质，明月下、惟有香肌。山村路，人家舍窄，低亚水边篱。

偏宜。寿阳女，新妆淡淡，粉面曾施。更胡笛羌管，塞曲争吹。陌上行人暂听，香风动、都入愁眉。音书杳，天涯望断，折寄

似凭谁。

又 蜡梅

园林萧索，亭台寂静，万木皆冻凋伤。晓来初见，一品蜡梅芳。疑是黄酥点缀，超群卉、独占中央。堪闲玩，檀心紫蕊，清雅喷幽香。

华堂。欢会处，陶陶共醉，相劝瑶觞。逞风流开早，不畏严霜。才子佳人属意，搜新句、吟咏诗章。歌筵罢，醺醺归去，蟾影照回廊。

黄莺儿

香梢匀蕊先回暖，点点胭脂轻衬。红苞隐映疏篁，红翠相间。方瑞雪乍晴时，爱日初添线。五云楼上遥看，似睹溪边，仙子妆面。

堪羨。影转玉枝斜，艳拂朝霞浅。就中娇娆，独得芬芳，偏教容易琼苑。闻又报一阳时，不似莺声唤。肯与梅脸争春，靥笑群芳晚。

锦堂春 雪梅

腊雪初晴，冰销凝泮，寻幽闲赏名园。时向长亭登眺，倚遍朱阑。拂面严风冻薄，满阶前、霜叶声干。见小台深处，数叶江梅，漏泄春权。

百花休恨开晚，奈韶华瞬息，常放教先。

全宋词 无名氏

非是东君私语，和煦恩偏。欲寄江南音耗，念故人、隔阔云烟。一枝赠春色，待把金刀，剪倩人传。

瑶台月

严风凛冽，万木冻，园林肃静如洗。寒梅占早，争先暗吐香蕊。逞素容、探暖欺寒，遍妆点、亭台佳致。通一气，超群卉。值腊后，雪清丽。开筵共赏，南枝宴会。

好折赠、东君驿使。把岭头信息远寄。遇诗朋酒侣，尊前吟缀。且优游，对景欢娱，更莫厌、陶陶沈醉。羌管怨，琼花缀。结子用调鼎饵。将军止渴，思得此味。

玉梅香慢

寒色犹高，春力尚怯。微律先催梅拆。晓日轻烘，清风烦触，凝散数枝残雪。嫩英妒粉，嗟素艳、有蜂蝶。全似人人，向我依然，顿成离缺。

裴回寸肠万结。又因花、暗成凝咽。捻蕊怜香，不禁恨深难绝。若是芳心解语，应共把、此情细细说。泪满阑干，无言强折。

双头莲

触目庭台，当岁晚凋残，恁时方见。琼英细蕊，似美玉碾就，轻冰裁剪。暗想蜂蝶

不知，有清香为援。深疑是，傅粉酡颜，何殊寿阳妆面。

惟恐易落难留，仗何人巧把，名词褒美。狂风横雨，枉坠落、细蕊纷纷千片。异日结实成阴，托称殊非浅。调鼎鼐，试作和羹，佳名方显。

夏云峰

琼结苞，酥凝蕊，粉心轻点胭脂。疑是素娥妆罢，玉翠低垂。化工深意，巧付与、别个标仪。怎奈向，风寒景里，独是开时。

缘何不与春期。此花又、岂肯争竞芳菲。疑雨恨烟，忍见岭畔江湄。冷烟幽艳，曾不许、霜雪相欺。只恐向，笛声怨处，吹落残枝。

庆清朝

北陆严凝，东郊料峭，化工争付归期。前村夜来雪里，先见纤枝。想像靓妆淡伫，钗头翡翠茧蛾儿。冰壶莹，坐间静对。姑射仙姿。

潇洒处，非艳冶最奇。是名赋、处士新诗。尊前坐曲，忍听羌管频吹。试问占先众卉，微笑不奈苦寒欺。何须问，定应未美，桃李芳菲。

烛影摇红

点点飞香，见梅知道春心透。怕寒不卷

全宋词 无名氏

玉楼帘，羞与花同瘦。手捻青枝频嗅。诮冷落、蔷薇金斗。翻惊绿鬓，不似芳姿，年年依旧。

才破凝酥，满园桃李看看又。江南幽梦了无痕，啼晕残襟袖。鸳被有谁温绣。怎敢更、十分殢酒。伴君独自，几个黄昏，月明时候。

凤凰台忆吹箫

红蓓珠圆，素蕤玉净，南荒已报春还。便迤迤，云开五岭，雪霁群蛮。喜见东君信息，应不管、潘鬓新斑。凭谁寄，心萦秋水，目断春山。

长记小桥斜渡，潇洒处，苇篱茅舍三间。肯伴我、风光赏遍，月影疑残。好为调羹结子，玉铉冷、金鼎空闲。北枝畔，谁念嶰律犹寒。

东风第一枝

腊雪犹凝，东风递暖，江南梅早先拆。一枝经晓芬芳，几处漏春信息。孤根寒艳，料化工、别施恩力。迥不与、桃李争妍，自称寿阳妆饰。

雪烂熳、怨蝶未知，磋燕孤、画楼绮陌。暗香空写银笺，素艳谩传妙笔。王孙轻顾，便好与、移栽京国。更免逐、羌管凋零，冷落暮山寒驿。

又

溪侧风回，前村雾散，寒梅一枝初绽。雪艳凝酥，冰肌莹玉，嫩条细软。歌台舞榭，似万斛、珠玑飘散。异众芳，独占东风，第一点装琼苑。

青萼点、绛唇疏影，潇洒喷、紫檀龙麝。也知青女娇羞，寿阳懒匀粉面。江梅腊尽，武陵人、应知春晚。最苦是，皎月临风，画楼一声羌管。

昼夜乐

一阳生后风光好。百花瘁，群木槁。南枝探暖欺寒，嘉卉争先占早。晓来风送清香杳。映园林、报春来到。素艳自超群，似姑射容貌。

画堂开宴邀朋友，赏琼英，同欢笑。陇头寄信丁宁。楼上新妆斗巧。对景乘兴倾芳酒，拚沈醉、玉山频倒。结实用和羹，是真奇国宝。

柳初新

千林凋谢严凝日。青帝许、梅花拆。孤根回暖，前村雪里，昨夜一枝凝白。天匠与、雕琼镂玉，淡然非、人间标格。

别有神仙第宅。绣帘垂、碧纱窗隔。月明风送，清香苒苒，著摸美人词客。向晓来、芳苞乍摘。对菱花、倍添姿色。

蜡梅香

爱日初长。正园林才见，万木凋黄。槛外朝来，已见数枝，复欲掩映回廊。赐与东皇。付芳信、妆点江乡。想玉楼中，谁家艳质，试学新妆。

桃杏苦寻芳。纵成蹊，岂能似恁清香。素艳娇娆，应是尽夜，曾与明月添光。瑞雪冰霜。浑疑是、粉蝶轻狂。待拚吟赏，休听画楼，横管悲伤。

满江红

林外溪边，深深见、一林寒雪。惟觉有、袭人襟袖，暗香不绝。天与风流标格在，肯同桃杏开时节。也须烦、玉手折将来，和明月。

调鼎事，君休说。龙笛韵，空悲咽。将何助清赏，待传佳阕。君不见广平词赋丽，挥毫弄翰心如铁。便直饶、何逊在扬州，成虚设。

选冠子

憔悴江山，凄凉古道，寒日澹烟残雪。行人立马，手折江梅，红萼素英初发。月下瑶台，弄玉飞琼，不老年年春色。被东君、唤遣娆红，高韵且饶清白。

因动感、野水溪桥，竹篱茅舍，何似玉堂金阙。天教占了，第一枝春，何处不宜风月，休问庾岭止渴，金鼎调羹，有谁如得。傲冰霜、雅态清香，花里自称三绝。

又

庾岭烟光，江南风景，冷落岁寒庭院。疏林万木冻折，孤根独犯，晓霜回暖。萼点胭脂，粉凝芳叶，依稀几枝初绽。上层楼、月夜凭阑，风送暗香清远。

嗟往昔、汉妃临鸾，新妆才饰，艳绝人间金钿。东君信息，造化工夫，却笑众葩开晚。若是芳菲迅速，终与和羹，凤池仙馆。愿楼头、羌笛休吹，免使为花肠断。

落梅慢

带烟和雪，繁枝澹伫，谁将粉融酥滴。疏枝冷蕊压群芳，年年常占春色。江路溪桥谩倒，裊裊风中无力。暗香浮动冰姿，明月里，想无花比高格。

争奈光阴瞬息。动幽怨、潜生羌笛。新花斗巧，有天然闲态，倚阑堪惜。零乱残英片片，飞上舞筵歌席。断肠忍泪念前期。经岁还有芳容隔。

早梅香

北帝收威，又探得早梅，漏春消息。粉蕊琼苞，拟将胭脂，轻染颜色。素质盈盈，

终不许、雪霜欺得。奈化工、偏宜赋与，寿阳妆饰。

独自逞冰姿，比夭桃繁杏，迥然殊别。为报山翁，逢此有花，樽前且须攀折。醉赏吟恋，莫辜负、好天风月。恐笛声悲，纷纷便似，乱飞香雪。

马家 春慢

珠箔风轻，绣帘浪卷，乍入人间蓬岛。斗玉阑干，渐庭馆帘栊春晓。天许奇葩贵品，异繁杏、夭桃轻巧。命化工、倾国风流，□与一枝纤妙。

樽前五陵年少。纵丹青异格，难别颜貌。悲露凝烟，困红娇额，微颦低笑。须信浓香易歇，更莫惜、醉攀吟绕。待舞蝶游蜂，细把芳心都告。

望梅

画阑人寂，喜轻盈照水，犯寒先拆。袅芳枝、云缕蛟绡，露浅浅涂黄，汉宫娇额。翦玉裁冰，已占断、江南春色。恨风前素艳，雪里暗香，偶成抛掷。

如今眼穿故国。待拈花嗅蕊。时话思忆。想陇头、依约飘零，甚千里芳心，杳无消息。粉怯珠愁，又只恐、吹残羌笛。正斜飞、半窗晓月，梦回陇驿。

又

小寒时节，正同云暮惨，劲风朝烈。信

早梅、偏占阳和，向日暖临溪，一枝先发。
时有香来，望明艳、瑶枝非雪。想玲珑嫩蕊，
绰约横斜，旖旎清绝。

仙姿更谁并列。有幽香映水，疏影笼月。
且大家、留倚阑干，对绿醕飞觥，锦笺吟阅。
桃李繁华，奈比此、芬芳俱别。等和羹大用，
休把翠条谩折。

洞仙歌

蓬莱宫殿。去人间三万。玉体仙娥有谁
见。被月朋雪友，邀下琼楼，溪桥畔。相对
寒光浅浅。

一般天上格，独带真香，冰麝犹嫌未清
远。似太真望幸，一饷销凝，愁未惯。消瘦
难禁素练。又只恐、东风破寒来，伴神女同
归，阆峰仙苑。

又

摧残万物，不忍临轩槛。待得春来是早
晚。向纷纷、雪里开，一枝见。清香满。漏
泄东君先绽。

暗香浮动、疏影横斜，只这些儿意不浅。
怎禁他，澹澹地、匀粉弹红，争些儿、羞杀
桃腮杏脸。为传语、东风共垂杨，奈辛苦，
千丝万丝撩乱。

又

断云疏雨，冷落空山道。匹马骎骎又重
到。望孤村，两三间、茅屋疏篱，溪水畔、
一簇芦花晚照。

寻思行乐地，事去无痕，回首湘波与天杳。叹人生几度，能醉金钗、青镜里、赢得朱颜未老。又枝头、一点破黄昏，问客路春风，为谁开早。

又

梳风洗雨，兰蕙摧残后。玉蕊檀芳做霜晓。板桥平，溪岸小。月下归来、乘露冷，赢得清香满抱。

一支春在手，细嗅重看，风味人间自然少。拟欲问东君，妙语难寻，搜索尽、池塘春草。想不是、诗人赏幽姿，纵竹外横斜，是谁知道。

摸鱼儿

岁华向晚，遥天布同云，霰雪轻飞。前村昨夜漏春光，楚梅先放南枝。叹东君运巧思。裁琼镂玉妆繁蕊。花中偏异。解向严冬，逞芳菲。免使游蜂粉蝶戏。

梁台上，汉宫里。殷勤仗、高楼羌管休吹。何妨留取凭阑干，大家吟玩欢醉。待明年，念芳草、王孙万里。归未得、仙源应是。又被花、开向天涯、泪洒东风对桃李。

春雪间早梅

梅将雪共春。彩艳灼灼不相因。逐吹霏霏能争密，排枝碎碎巧妆新。谁令香来满坐，独使净敛无尘。芳意饶呈瑞，寒光助照人。

玲珑次第开已遍，点缀坐来频。

那是俱怀疑似，须知造化，两各逼真。荧煌清影初乱眼，浩荡逸气忽迷神。未许琼花并重，将从玉树相亲。先期迎献岁，更同歌酒占兹辰。六华蜡蒂相辉映，轻盈敢自珍。

万年欢

北陆风回，顿园林凋尽，庭院岑寂。潇洒寒梅，偷报艳阳消息。素澹英姿粹质。天赋与、出伦标格。一枝向、雪里初开，纤说清香寻得。

神仙乍离姑射。更琼妆翠佩，冰莹肌骨。仿佛华清浴罢，懒匀脂泽。陇上休轰怨笛。且留取、累累成实。终须待、金鼎调羹，偏与群芳春色。

又

天气严凝，乍寒梅数枝，岭上开拆。傅粉凝脂，疑是素娥妆饰。先报阳和信息。更雪月、交光一色。因追念，往日欢游，共君携手同摘。

别来又经岁隔。奈高楼梦断，无计寻觅。冷艳寒容，啼雨恨烟愁湿。似向人前泪滴。怎不使、伊家思忆。惟只恐，寂寞空枝，又随昨夜羌笛。

雨中花

梦破江南春信，渐入江梅，暗香初发。

全宋词 无名氏

乞与横斜疏影，为怜清绝。梁苑相如，平生有赋，未甘华发。便广寒争遣，韶华惊怨，讵访轻折。

扬州二十四桥歌吹，不道画楼声歇。生怕有、江边一树，要堆轻雪。老去苦无欢事，凌波空有纤袜。恨无好语，何郎风味，定教谁说。

早梅芳 雪梅

冰唯清，玉唯润。清润无风韵。此花风韵，自然清润传香粉。故应春意别，不使凡英恨。到春前腊后，长是寄芳信。

此情闲，此意远。一点萦方寸。风亭水馆，解与行人破离恨。广寒宫未有，姑射仙曾认。向雪中月下，吟未尽。

婆罗门

江南地暖，数枝先得岭头春。分付似、翦玉裁冰。素质偏怜匀澹，羞杀寿阳人。算多情留意，偏在东君。

暗香旋生。对澹月与黄昏。寂寞谁家院宇，斜掩重门。墙头半开，却望雕鞍无故人。断肠处、容易飘零。

踏青游

岭上梅残，堤畔柳眠娇小。绽数枝、横

烟临沼。既大雅，且秾丽，繁而不扰。冒寒来、游蜂戏蝶尚阻，年年占得春早。

澹白轻红，清香迎芳道。更情与、碧天如扫。魏台妆，吴姬袖，妖妍多少。为传语、无言分付甘桃李，不比闲花浪草。

绛都春

东君运巧。向枝头点缀，琼英虽小。全是一般，风味花中最轻妙。横斜疏影当池沼。似弄粉、初临鸾照。众芳皆有，深红浅白，岂能争早。

莫厌金樽频倒。把芳酒赏花，追陪欢笑。有愿告天，愿天多情休教老，奇花也愿休残了。免乐事、离多欢少。易老难叙衷肠，算天怎表。

雪梅香

岁将暮，云帆风卷正凄凉。见梅花呈瑞，素英澹薄含芳。千片逞姿向江国，一枝无力倚邻墙。凝眸望，昨夜前村，雅态难忘。

争妍斗鲜洁，皓彩寒辉，冷艳清香。姑射真人，更兼粉傅容光。梁苑奇才动佳句，汉宫娇态学严妆。无寥恨，独对光辉，别岸垂杨。

又

冻云深，六出瑶花满长空。渐飘来呈瑞，皑皑万里皆同。荒野枯冰竦欲折，小亭寒梅

吐轻红。香清□，疏影横斜，照水溶溶。

临风。传芳信，驿使来自，庾岭南峰。占早争先，总无粉蝶游蜂。妆点鲜妍汉宫里，羌笛呜咽画楼东。赏南枝，倚阑凝望，时见征鸿。

千秋岁

腊残春近。江上梅开粉。一枝漏泄东君信。寿阳妆面靓，姑射冰姿莹。似浅杏。清香试与分明认。

只恐霜侵破，又怕风吹损。待折取，还不忍。莫将花上貌，来点多情鬓。凝睇久，行人立马成遗恨。

月上海棠

南枝昨夜先回暖。便临寒、开花暗香远。化工忒黠，把琼瑶、恣情裁剪。皑皑的、点缀梢头又遍。

横斜影蘸清溪浅。似玉人、临鸾照粉面。大家休折，且迟留、对花开宴。祝东风、吹作和羹未晚。

眼儿媚

前时同醉曲江滨。初样小梅春。花残人远，几经风雨，结子青青。

谁知别后无肠断，行尽水云程。修峰万

仞，邮亭息鞚，独对黄昏。

相见欢

月明疏影林间。水潺潺。一点浓香十里、渡关山。

且莫负。好分付。冷无眠。只怕笛声呜咽、到愁边。

捣练子 八梅

捣练子，赋梅枝。暖借东风次第吹。自是百花留不住，让教先发放春归。

捣练子，赋梅芳。柳绿桃红谩点妆。试问仙标横竹外，敢同高节伴冰霜。

捣练子，赋梅红。玉体凝酥半醉中。诗酒兴来须要早，忍看红雨落西东。

捣练子，赋梅香。蕙魄兰魂又再阳。只为人间无著处，借他龙笛返仙乡。

捣练子，赋梅英。枝上商量细细生。不是根株贪结子，被吹羌笛两三声。

捣练子，赋梅妆。镜里佳人傅粉忙。额子画成终未是，更须插向鬓云傍。

捣练子，赋梅音。云底江南树树深。怅望故人千里远，故将春色寄芳心。

捣练子，赋梅青。休共檀梨取次争。叶底青青如豆小，已知金鼎待和羹。

鹧鸪天

冷落人间昼掩门。泠泠残粉麝成纹。几

枝疏影溪边见，一拂清香马上闻。

冰作质，月为魂。萧萧细雨入黄昏。人间暂识东风信，梦绕江南云水村。

又

梦草池塘春意回。巧传消息是寒梅。北枝休羨南枝暖，恁仗东风次第开。

酥点萼，粉匀腮。未攀已得好香来。西邻且莫吹羌笛，留待行春把酒杯。

又

雪屋冰床深闭门。缟衣应笑织成纹。雨中清泪无人见，月下幽香只自闻。

长在眼，远销魂。玉奴那忍负东昏。偶然谪坠行云去，不入春风花柳村。

又

小槛冬深未破梅。孤枝清瘦耐风埃。月中寂寞无人管，雪里萧疏近水栽。

微雨过，早春回。阳和消息自天来。才根多谢东君力，琼蕊苞红一夜开。

又

春入江梅破晚寒。冻枝惊鹊语声乾。离愁满抱人谁问，病耳初闻心也宽。

风细细，露珊珊。可堪驿使道漫漫。斜梢待得人来后，簪向乌云仔细看。

又 蜡梅

别得东皇造化恩。黛消铅褪自天真。耻随庾岭花争白，疑是东篱菊返魂。

风淡淡，月盈盈。麝煤沈馥动孤根。寒

蝉冷蝶知何处，惟有蜂房不待春。

浣溪纱

水净烟闲不染尘。小山斜卧几枝春。夜寒香惹一溪云。

粉淡朱轻妆未了，十分孤迥好精神。为伊清瘦却愁人。

又

冉冉飞云横画阑。黄昏烟雨满江干。小梅香浅不禁寒。

楼上风轻帘不卷，酒红销尽昼妆残。玉人斜捻一枝看。

又

十月开花是子真。小春分付与精神。折来含露晓妆新。

暖意便从窗下见，粉容何待鉴中匀。宛然长似玉华清。

又

梅粉初娇拟嫩腮。一枝春信腊前开。玉英珠颗傍妆台。

明月泛将疏影去，暗香疑是那人来。消魂独自立空阶。

又 茶梅

翦碎红娘舞旧衣。汉宫妆粉满琼枝。东风来晚未曾知。

颜色不同香小异，瑶台春近宴回时。宝

灯相引素娥归。

又 蜡梅

梅与为名蜡与容。寒枝遍缀小金钟。插时只恐鬓边熔。

疑是佳人熏麝月，起来风味入怀浓。暗香依旧月朦胧。

又 蜡梅

梅与称名蜡与黄。枝无袅娜色无光。掩檀欺麝冠群芳。

结处定缘蜂力就，开时微带蜜脾香。风标不减寿阳妆。

太常引

行云踪迹杳无期。梅梢上、又春归。不道久别离。这一度、清香为谁。

多情嘱付，庾楼羌管，凭仗且休吹。留取两三枝。待和泪、封将寄伊。

又

江梅开似蕊珠宫。报桃李、又春风。蓦岫看前峰。待摘取、横斜盏中。

魏林楚岭，素妆清绝，不与众芳同。和月映帘栊。羞几点、施朱太红。

小重山

竹里清香帘影明。一枝照水弄精神。楼头横管罢龙吟。休三弄，留为与调羹。

紫陌与青门。溪边浮动处，绝纤尘。等闲休付寿阳人。潇洒处，月淡又黄昏。

又

不是蛾儿不是酥。化工应道也难摹。花儿清瘦影儿孤。多情处，时有暗香浮。

试问玉肌肤。夜来霜雪重，怕寒无。一枝欲寄洞庭姝。可惜许，只有雁衔芦。

又

天际春来都为君。依稀丹萼动，泛红云。恼人天气近黄昏。霜月底，山麝斗微薰。

标格自天真。寿阳仙骨瘦，玉无纹。芳容临鉴洗馀醺。双蛾稳，花面两难分。

西地锦

不与群花相续。独占春光速。幽香远远散西东，惟竹篱茅屋。

羌管谁调一曲。送月夜、犹芬馥。凭君折取向玉堂，只这些清福。

又

岭上初消残雪。有梅花先坼。东君造化多成翠，巧风韵奇绝。

小院黄昏时节。暗香浮、疏影横斜。寄取和羹未晚，却免教攀折。

踏歌

带雪。向南枝，一朵江梅坼。许多时、

全宋词 无名氏

甚处收香白。占千葩百卉、先春色。拟莹洁。
正广寒宫殿人窥隔。销魂处、画角数声彻。

暗香浮动黄昏月。最潇洒处最奇绝。孤
标迥、不与群芳列。吟赏竟连宵，痛饮无休
歇。输有心牧童偷折。

感皇恩

翦玉蹙花苞，腊寒时候。间竹横溪自清
瘦。黄昏时候，拂拂暗香微透。寿阳妆面恨，
眉频斗。

堪赏占断，三春先手。不是东君意偏有。
百花羞尽，故教孤芳独秀。只愁明月夜，笛
声奏。

枕屏儿

江国春来，留得素英青住。月笼香，风
弄粉，诗人尽许。酥蕊嫩，檀心小，不禁风
雨。须东君、与他做主。

繁杏夭桃，颜色浅深难驻。奈芳容，全
不称，冰姿伴侣。水亭边，山驿畔，一枝风
措。十分似、那人淡伫。

忆秦娥

瑶台月。寒光零乱蒙香雪。蒙香雪。横
枝疏影，动人清彻。

分明姑射神仙骨。冰姿雪里难埋没。难

埋没。百花头上，为春先发。

望江南

梅花好，满树锦江边。不似武陵曾见日，
清香冷艳扑尊前。销得醉留连。

凭造化，分付与花权。已共雪光争腊早，
且将春信为君传。桃李莫夸先。

又

梅花好，依约透春光。记得佳人初睡起，
巧临鸾鉴试新妆。粉面斗琼芳。

江亭上，绕树嗅清香。拟把一枝传信去，
不知何处是兰房。独自暗凄凉。

品令

山重云起。断桥外、池塘水。晓来风定，
竹枝相亚，残阳影里。多少风流，都在冷香
疏蕊。

江南千里。问折得、谁能寄。几番归去，
酒醒月满，阑干十二。且隐深溪，免笑等闲
桃李。

又

一阳生暖。见庾岭、梅初绽。琼枝玉树，
浑如傅粉，寿阳妆面。疏影横斜，隐隐月溪
清浅。

前村雪里，向雪里、真难辨。倩谁说与，
高楼人道，休吹羌管。且与从容，来岁和羹

未晚。

又

雪花飞坠。有人报、江南意。博山炉畔，
砚屏风里，铜槃寒水。赋得幽香，疏散数枝
相倚。

绛肤黄蕊。另一种、高标致。笛中芳信，
岭头春色，不传红紫。寂寞闲亭，月下夜阑
影碎。

相思引

笑盈盈，香喷喷。姑射仙人风韵。天与
肌肤常素嫩。玉面犹嫌粉。

斜倚小楼凝远信。多少往来人恨。只恐
乘云春雨困。迢迢娇容褪。

又

半苞红，微露粉。潇洒早梅犹嫩。香入
梦魂残酒醒。芳意相牵引。

不畏晓霜侵手冷。欲折一枝芳信。折得
却无人寄问。争信相思损。

庆金枝

新春入旧年，绽梅萼、一枝先。陇头人
待信音传。算楚岸、未香残。

小枕风雪凭栏干。下帘幕、护轻寒。年
华永占入芳筵。付尊前、渐成欢。

菩萨蛮

天威乱糝琼蕤密。一光吞尽千山碧。梅与雪争妍。孤香风暗传。

玉骨从来瘦。不奈春僝僽。羌管一声残。水乡生暮寒。

又

黄昏月暗清溪色。帘垂小阁霜华白。一夜玉玲珑。横斜水月中。

小行孤影动。生怕惊花梦。半夜得春归。屏山人未归。

又

霜天不管青山瘦。轻云浅拂修眉皱。烟树隔潇湘。隔帆吹异香。

影残春恨小。淡墨敲斜倒。无处著消愁。笛寒人倚楼。

南乡子

梅蕊露鲜妍。雪态冰姿巧耐寒。南北枝头香不断，堪观。露浥琼苞粉未干。

画手写应难。横管休吹恐易残。留得佳人临晓际，凭栏。试把新妆比并看。

又

把酒对江梅。个是花中第一枝。冰雪肌肤潇洒态，须知。姑射仙人正似伊。

东阁赋新诗。惭愧当年杜拾遗。月里何

人横玉笛，休吹。正是芳梢著子时。

又

莫作俗花看。珠有清香雪太寒。拟把千
钟酬国艳，林间。醉倒犹嫌酒量慳。

欲去更重攀。送尽斜阳未忍还。争得重
城休上锁，留连。借取冰轮照玉颜。

又

醉捻一枝春。此意谁人会得君。嫩白轻
红才入手，盈盈。一似前时酒半醺。

心眼两相亲。绝代风流恼杀人。粉蝶霜
禽休怅望，叮咛。只要扬州作主盟。

又

栏槛对幽堂。翠叶枝头万朵霜。檀口乍
开龙麝喷，非常。体胜佳人异骨香。

花与月争光。偏引蜂儿戏绕墙。不与群
英争艳丽，芬芳。溪落东君只淡妆。

又

凛冽苦寒时。万木凋枯力渐衰。昨夜前
村深雪里，春回。庾岭南枝绽早梅。

映月与清辉。驿使加鞭喜探回。风送馨
香来小院，芳时。料想群花尚未知。

又 催梅

把酒祝江梅。春到南枝早早开。人在陇
头凝望久，徘徊。驿使如今尚未来。

寄语莫相催。直待东风细剪裁。只恐未
能传信息，妆台。先要飞来衬粉腮。

夏金钗

梅蕊破初寒，春来何太早。轻傅粉、向人先笑。比并年时较些少。愁底事，十分清瘦了。

影静野塘空，香寒霜月晓。风韵减、酒醒花老。可杀多情要人道。疏竹外、一枝斜更好。

人月圆

园林已有春消息，寻待岭头梅。一枝清淡，疏疏带雪，昨夜初开。

芳心几点，东风多少，先为传来。不随红紫，纷纷闹闹，蝶妒蜂猜。

一斛珠

寒冰初泮。岭头一朵香苞绽。萼萼如画真堪羨。休逞随风、柳絮垂金线。

月宫每嬖开较晓。寿阳又喜匀妆面。更闻何处鸣羌管。一曲一声、惹起神撩乱。

解佩令

蕙兰无韵，桃李堪扫。都不数、凡花闲草。对月临风，长是伊、故来相恼。和魂梦、被他香到。江头陇畔，争先占早。

全宋词 无名氏

一枝枝、看来总好。似恁风标，待发愿、
春前祈祷。祝东君、放教不老。

醉花阴

粉妆一捻和香聚。教露华休妒。今日在
尊前，只为情多，脉脉都无语。

西湖雪过留难住。指广寒归去。去后又
明年，人在江南。梦到花开处。

又

霓裳浅艳来何处。不是闲云雨。雪苑旧
精神，燕席吟窗，昨夜生轻素。

阑珊岂是东风妒。惜暗香分付。香在玉
清宫，不惹年华，只带春寒去。

扫地舞

酥点萼。玉碾萼。点时碾时香雪薄。才
折得。春方弱。半掩朱扉，垂绣幕。怕吹落。

捻一饷。嗅一饷。捻时嗅时宿酒忘。春
争上。不忍放。待对菱花，斜插向。宝钗上。

玉楼人

去年寻处曾持酒。还是向、南枝见后。
宜霜宜雪精神，没些儿、风味减旧。

先春似与群芳斗。暗度香、不待频嗅。
有人笑折归来，玉纤长、尽露罗袖。

燕归梁

月里云装冷艳裁。独秀在岩隈。雪中昨夜一枝开。探春色、岁前来。

清香折得，多情寄与，人向陇头回。凭君移取近瑶台。伴桃李、日边栽。

忆人人

密传春信。微妆晓景，淡伫香苞欲绽。临风虽未吐芳心，奈暗露、盈盈粉面。

何人月下，一声长笛，即是飞英凌乱。凭阑无惜赏芳姿，更莫待、倾筐已满。

又

前村深雪，难寻幽艳，无奈清香漏绽。烟梢霜萼出墙时，似暗妒、寿阳妆面。

幽香浮动，无缘攀赏，但只心劳魂乱。不辞他日醉琼姿，又只恐、阴成子满。

采桑子

阳和欲报春来也，先上南枝。桃李休疑。折遍香梢人未知。

黄昏小院谁攀折，疏影斜欹。半掩朱扉。旋嗅清香月下归。

又

江南春信梅先赋，休道春迟。映竹开时。

姑射仙人雪作肌。

青楼且莫吹羌管，留劝金卮。折取高枝。
香满名园蝶未知。

又

南枝淡伫无妖艳，蜡蕊羞黄。争似红妆。
不假施朱弄晓光。

雪融日暖琼肌腻，酒晕生香。桃脸相当。
尤笑桃花混众芳。

又

幽芳莹白前村里，岂藉春工。胜尽群红。
琼捻凝酥向不同。

一声羌管愁人处，片片西东。睹此遗踪。
不怨狂风怨马融。

又

东君有意观群卉，故放争先。带露含烟。
对月偏宜映水边。

琼苞素蕊胭脂淡，雪后风前。堪赏堪怜。
曾与歌楼佐管弦。

又

群芳尽老园林尽，独有寒梅。探得春回。
昨夜前村一朵开。

轻盈雪里孤根秀，素脸香腮。羌管休催。
留取琼葩佐酒杯。

又

霜风漏泄春消息，折破孤芳。野兴傍徨。
姑射神仙触处藏。

新妆不假施朱粉，雪月交光。欲赠东皇。

冷淡龙涎点点香。

又

烟笼淡月寒宵永，悄悄帘栊。微度香风。
几点梅开小院中。

拥衾敲枕难成寐，萧寺初钟。雁响遥空。
家在青山千万重。

又 再雪中

飞琼欲赴瑶台宴，先具威仪。云驾霓衣。
从者皆骑白凤飞。

人间尽变为银海，此景偏奇。姑射冰姿。
昨夜前村见一枝。

又 蜡梅

熔金脱得花钿小，点缀琼枝。月淡风微。
露浥香肌自是奇。

玉人呵手昂头翦，纤鬓边垂。似簇蜂儿。
春入芳容不肯飞。

寻梅

幽香浅浅湿未透。认雪底、思来始有。
剪裁尚觉琼瑶皱。苦寒中、越恁骨清肌瘦。

东风气象园林旧。又去年、而今时候。
急宜小摘当尊酒。选一枝、且付玉人纤手。

鞋红

粉香尤嫩，衾寒可惯。怎奈向、春心已
转。玉容别是，一般闲婉。悄不管、桃红香

浅。

月影帘栊，金琼波面。渐细细、香风满院。一枝折寄，故人虽远，辄莫使、江南信断。

武林春

昨夜前村深雪里，春信为谁传。风送清香满座间。不用热沈檀。

竹外一枝斜更好，偏称玉人攀。休放游蜂去又还。嫌怕损芳颜。

瑞鹧鸪

临鸾常恁整妆梅。枝枝仙艳月中开。可杀天心、故与多端丽，那更罗衣峭窄裁。

几回瞻觑魂消黯，芙蓉匀透双腮。好将心事、都分付与，时暂到、小庭来。玉砌红芳点绿苔。

又 蜡梅

汉宫铅粉净无痕。蜡点寒梢水畔村。忍犯冰霜欺竹柏，肯同雪月吊兰荪。

骚人咏去清诗健，驿使传来旧典存。病眼浑疑春思早，一枝聊洗画图昏。

又 蜡点梅花

柳未回青兰未芽。谁知此物在君家。绿窗借得先春手，黄蜡吹成耐冻花。

农麝暗薰香仿佛，山蜂误认影横斜。凭

全宋词 无名氏

君说与徐熙道，翰墨从今不足夸。

一落索

腊后东风微透。越梅时候。一枝芳信到江南，来报先春秀。

宿醉频拈轻嗅。堪醒残酒。笛声容易莫相催，留待纤纤手。

鬓边华

小梅香细艳浅。过楚岸、尊前偶见。爱闲淡，天与精神，掠青鬓、开人醉眼。

如今抛掷经春，恨不见、芳枝寄远。向心上、谁解相思，赖长对、妆楼粉面。

御阶行

平生有个风流愿。愿长与梅为伴。问伊因甚破寒来，只恐百花先绽。比兰比麝，比酥比玉，休恁闲撩乱。

瑶台月下分明见。依旧残妆浅。不知分得几多香，一片清如一片。直须遮断，恐人眼毒，不解轻轻看。

西江月

北岭天饶瑞雪，南枝地段红苞。朦胧霁月映寒梢。谁把玉人纱罩。

香胜炉薰龙麝，奇过庭拥琼瑶。一杯清
酒愿相招。慰我茅堂清瘦。

又

悲翠枝头晚萼，婵娟月里飘香。春兰秋
蕙作寻常。不与夭桃朋党。

笑见深红浅白，从教蝶舞蜂忙。风流标
致道家妆。萧洒得来别样。

又 蜡梅

黄蜡谁将点缀，红膏不许施妆。孤根来
自水云乡。风味天然酝酿。

看取玉奴呵手，摘来珠露沾裳。翠鬟斜
插一枝香。似簇蜂儿头上。

又

万木经霜冻折，孤根独报春来。前村雪
里一枝开。将缓月华光彩，一点唇红不褪，
妆如傅粉皑皑。和羹端的禀天才。终入庖人
鼎鼐。

蝶恋花

暖发黄宫和气软。雪里精神，巧借东君
翦。嫩蕊商量春色浅。青枝疑是香酥溅。

谁道和羹芳信远。点点微酸，已向枝头
见。休待玉英飞四散。且移疏影横金盏。

桃源忆故人

园林万木凋零尽。惟是寒梅香喷。不许

雪霜欺损。迥有天然性。

南枝渐吐红苞嫩。冠绝夭桃繁杏。不记
故人音信。对景成离恨。

又

江天雪意云飞重。却倚阑干初冻。回傍
小楼独拥。尽日无人共。

墙梅未落春先纵。欲寄一枝谁送。月夜
暗香浮动。似作离人梦。

又 蜡梅

南枝向暖清香喷。谁付骚人词咏。一种
陇头春信。不借胭脂晕。

梢头谁把轻黄搵。浑似不忺施粉。疑是
寿阳孤冷。染得相思病。

又

寒苞初吐黄金莹。色染蔷薇犹嫩。枝上
紫檀香喷。洒落饶风韵。

南枝一种同春信。何事不忺朱粉。自称
霓裳孤冷。怨感宫腰恨。

添字浣溪沙 白梅

雪态冰姿好似伊。料应尝笑水仙迟。驿
使初传芳信早，赏佳期。

暗想花神多巧妙，黏酥缀玉压纤枝。粉
面临鸾宜月殿，整妆时。

又 红梅

谁染深红酥缀来。意浓含笑美颜开。误

认浣溪人饮罢，上香腮。

辨杏疑桃称好句，名园色异占多才。折得一枝斜插鬓，坠金钗。

又

取次匀妆粉有痕。参差玉软淡精神。姑射重绡风卷乱，喜相迎。

蝶戏飞层双翅重，清中富贵最多情。全似寿阳当日事，点残英。

又 蜡梅

蜜室蜂房别有香。腊前偏会泄春光。凝伫清容何所似，笑姚黄。

蜡注金钟诚得意，风飘气味压群芳。不似寿阳夸粉面，道家妆。

玉交枝

胆样瓶儿几点春。翦来犹带水云痕。且移孤冷，相伴最深樽。

每为惜花无晓夜，教人甚处不销魂。为君惆怅，独自倚黄昏。

又 蜡梅

蕙子兰孙小样儿。化工簇就寄南枝。笑他兰蕙，虽韵带轻肥。

香霭紫檀和雾重，色攒黄蜡界金徽。有人潇洒，插向鬓边宜。

又

谁道花房采蜜脾。翦成黄蜡小花儿。恶

嫌朱粉，不肯肖青枝。

檀吐暗香兰许韵，月移芳影雪生肌。不妨花蕊，羌笛尽教吹。

玉楼春

迢递前村深雪里。望断行云香细细。笛中宫里慕芳姿，怨曲啼妆长见泪。

不会同心荣落易。冷艳翻随分岭水。有谁曾念陇头人，远寄江南春日意。

又

萧萧海上风长起。也有梅花开玉蕊。爱君风措莹如冰，伴我情怀清似水。

诗人纵复工难拟。莫把闲花容易比。浓香吹尽不须愁，细雨微风催结子。

又 蜡梅

腊前先报东君信。清似龙涎香得润。黄轻不肯整齐开，比着红梅仍旧韵。

纤枝瘦绿天生嫩。可惜轻寒摧挫损。刘郎只解误桃花，怅恨今年春又尽。

捣练子

欺万木，怯寒时。倚阑初认月宫姬。拭新妆，披素衣。孤标韵，暗香奇。冰容玉艳缀琼枝。借阳和，天付伊。

喜团圆

轻攢碎玉，玲珑竹外，脱去繁华。尤殢东君，最先点破，压倒群花。

瘦影生香，黄昏月馆，清浅溪沙。仙标淡伫，偏宜么凤，肯带栖鸦。

愁倚栏

冰肌玉骨精神。不风尘。昨夜窗前都折尽，忽疑君。

清泪拂拂沾巾。谁相念、折赠芳春。羌管休吹别塞曲，有人听。

减字木兰花

庭梅初绽。风递幽香清更远。别有孤根。不待阳和一点恩。

雪中风韵。皓质冰姿真莹静。月下精神。来到窗前疑是君。

又

疏梅风韵。不许游蜂飞蝶近。要识芳容。除向瑶台月下逢。

尊前一见。换尽平生桃李眼。却笑襄王。楚梦无踪空断肠。

又

山城驿近。又报寒梅传驿信。远水孤村。

月下何人与断魂。

幽芳在手。花木无情那得瘦。似此天真。
好赠东阳姓沈人。

又

香肌清瘦。泪湿轻红疏雨后。笑靥微开。
宿雨微醺越女腮。

多情无奈。玉管休吹帘影外。薄晚池台。
惆怅繁华梦里来。

又

东君有待。留得一枝香雪在。晚日融融。
只恐轻酥暖渐熔。

歌催管送。芳酒一尊谁与共。寂寞墙东。
潇洒黄昏满院风。

又 蜡梅

鹅黄初吐。无数蜂儿飞不去。别有香风。
不与南枝斗浅红。

凭谁折取。拟把玉人分付与。碧玉搔头。
淡淡霓裳人倚楼。

又

园林衰槁。一品梅花开太早。紫蕊檀心。
独占中央色似金。

幽香清远。对景开尊同赏玩。雅称仙姿。
莫是多情染相思。

临江仙

漏出春光三四朵，冰肌玉骨偏宜。乍开

应笑百花迟。将军曾止渴，画角已先知。

素艳不容蜂蝶采，清香自有人知。而今
虽被霜雪欺。和羹终待手，金鼎自逢时。

又

陇首云收天色暮，寒光射月初开。昆荆
山玉莫疑猜。琳琅疑此地，仙子不红腮。

丽质霜裾真性雅，馥香暗送人来。乱将
碎玉缀枝排。雪中寻不见，青萼辨奇才。

又

昨夜新阳回候馆，芳菲正满霜林。此时
珍赏重千金。谁知红粉艳，还有岁寒心。

风动霞衣香散漫，酒醺丹脸深沈。妖娆
偏称美人簪。一枝无处赠，折得自孤吟。

又

爱日新添春一线，化工先到寒梅。不随
桃李傍熙台。前村深雪里，昨夜一枝开。

姑射仙人标格韵，凝墙粉谢香腮。数家
清弄笛声哀。愁人不怨听，自向枕边来。

又

玉貌香腮天赋与，清姿不假铅华。素芳
寻在五陵家。欲知春信息，庾岭一枝斜。

别有玲珑潇洒处，月梢淡影笼遮。休教
羌笛一声嗟。宫妆犹未似，留取意无涯。

踏莎行

枝绿初匀，萼红犹浅。化工妆点年华晚。

暗香疏影水亭边，黄昏月下依稀见。

十二危楼，谁人倚遍。只愁羌笛声幽怨。
少留情意待春来，东君准拟长拘管。

又

萼破前村，枝横江路。铁心应也频凝伫。
怕愁惟恐不禁愁，宁教雪月相分付。

不测春来，难追香去。无人知我心先误。
多情总道是东君，东君也有无情处。

又

点点琼酥，初寒乍结。看来未忍轻轻折。
园林正告久萧条，春工著意饶先发。

眼底不凡，枝头自别。也知彻苦宜霜雪。
这般风味恁馨香，怎教桃李同时节。

又

玉母池边，曾记旧识。玉京仙苑新移得。
素娥青女好精神，比看终是无颜色。

传入汉宫，偷拟妆饰。寿阳空恁劳心力。
寒香都不为春来，莫将远寄春消息。

渔家傲

蕙死兰枯篱菊槁。返魂香入江南早。竹
外一枝斜更好。谁解道。只今惟有东坡老。

去岁花前人醉倒。酒醒花落嫌人扫。人
去不来春又到。愁满抱。青山一带连芳草。

又

雪点江梅才可可。梅心暗弄纤纤朵。疑

是月娥庭下过。仙翘辔。云衫密缀真珠颗。
玉笋金鸂连臂坐。芳辰莫把离魂挫。一曲绣筵娇婀娜。情无那。阳关声里樱桃破。

定风波

又是春归烟雨村。一枝香雪度黄昏。竹外云低疏影亚。潇洒。水清沙浅见天真。
瘦玉欺寒香不暖。堪羨。冰姿照夜月无痕。楼上笛声休听取。说与。江南人远易销魂。

又

一树寒梅傍小溪。夜来陡觉绽南枝。冷艳冰姿金蕊浅。堪羨。凝明因与雪霜期。
折赠美人临宝鉴。云脸。鬓边斜插最相宜。凭仗高楼频祝付。说与。马融羌管且停吹。

鹊踏枝

南国寒轻山自碧。庭际梅花，先报春消息。绮萼玉英何忍摘。真堪树下陈瑶席。
旋嗅清香消酒力。翦采无功，粉笔争描得。一曲新欢须共惜。等闲零落随羌笛。

又

故里山遥春霭碧。为想繁枝，清梦何曾息。缙带霜英人不摘。纷纷日暮飘茵席。
休抱离肠凭酒力。只有轻纨，依约应传

全宋词 无名氏

得。白发未归空自惜。柔肠寄尽平阳笛。

清平乐

寒溪过雪。梅蕊春前发。照影弄姿香萼
萼，临水一枝风月。

梦游仿佛仙乡。绿窗曾见幽芳。事往无
人共说，愁闻玉笛声长。

春光好

看看腊尽春回。消息到、江南早梅。昨
夜前村深雪里，一朵花开。

盈盈玉蕊如裁。更风细、清香暗来。空
使行人肠欲断，驻马裴回。

殢人娇 后庭梅花开有感

玉瘦香浓，檀深雪散。今年恨、探梅较
晚。江楼楚馆。云闲水远。清昼永，凭阑翠
帘低卷。

坐上客来，尊中酒满。歌声共、水流云
断。南枝可插，便须频翦。莫直待、西楼数
声羌管。

二色宫桃

镂玉香苞酥点萼。正万木、园林萧索。
惟有一枝雪里开，江南有信凭谁托。

全宋词 无名氏

前年记赏登高阁。叹年来、旧欢如昨。
听取乐天一句云，花开处、且须行乐。

河传

香苞素质。天赋与、倾城标格。应是晓
来，暗传东君消息。把孤芳、回暖律。寿阳
粉面增妆饰。说与高楼，休更吹羌笛。花下
醉赏，留取时倚阑干，斗清香、添酒力。

七娘子

清香浮动到黄昏，向水边、疏影梅开尽。
溪边畔，轻蕊有如浅杏。一枝喜得东君信。
风吹只怕霜侵损。更新来、插向多情鬓。
寿阳妆鉴，雪肌玉莹。岭头别后微添粉。

忆少年

疏疏整整，斜斜淡淡，盈盈脉脉。徒怜
暗香句，笑梨花颜色。
羁马萧萧行又急。空回首、水寒沙白。
天涯倦牢落，忍一声羌笛。

浪淘沙

春色入横塘。变尽凄凉。青梢弄粉雪溪
傍。疑是化工偏著意，欲试新妆。
玉蓓锁春藏。占断寒芳。他时鼎鼎不须

忙。泄漏清香方有思，别是春光。

又

雪里暗香浓。乍吐琼英。横斜疏影月明中。学傅胭脂桃与杏，虚废春工。素艳有谁同。不并妖红。应如褒姒笑时容。绝胜梨花春带雨，旖旎春风。

又

村左小溪傍。粉黛宜芳。寒添萧洒冷添霜。清瘦几枝堪入画。竹映苔墙。疏影浸横塘。月暗浮香。当时曾伴寿阳妆。不似东君先倚槛，泄漏春光。

点绛唇

破萼江梅，迥然标格冰肌莹。暗香疏影。月张银塘静。

折取一枝，与插多情鬓。临鸾镜。粉容相并。试问谁端正。

又

烟淡黄昏，小移疏影横斜去。暗香微度。点缀梢头雨。

玉管休吹，更要留春住。人何处。对花无语。望断江南路。

又

点点江梅，向疏篱处香风逗。未容春透。花亦知人瘦。

姑射山头，谁伴黄昏后。君知否。自然

孤秀。横玉休三奏。

又

雪里芳丛，岭头还报东君信。寿阳妆靛。
姑射冰肌莹。

曲岸横斜，清浅波相应。风不定。暗香
疏影。占断花中韵。

又

万木凋残，早梅独占孤根暖。前村雪满。
昨夜南枝绽。

堪恨倚栏，容易吹羌管。飘琼片。翠蛾
争选。贴向桃花面。

又

昨夜寒梅，一枝雪里多风措。幽香无数。
不与群花语。

最是凝情，月夜交光处。谁为主。待须
折取。羌管休轻举。

又

春日芳心，暗香偏向黄昏逗。玉肌寒透。
抵死添清瘦。

影落横塘，月淡人归后。君知否。一枝
先秀。应向东君奏。

又

赋雪归来，绿窗一夜霜风紧。也知春信。
消息南枝近。

隐映斜阳，玉暖香成阵。西湖景。繁英
有恨。只□□□□。

惜双双

冒雪披风开数点。万花压、欺寒探暖。
掩映闲庭院。月下疏影横斜，幽香远。

命友开尊同宴玩。听丽质、歌声宛转。
对景侧金盏。任他结实和羹，归仙馆。

朝中措

山城水隘小桥傍。竹里早梅芳。纵有丹青
图画，难描幽韵清香。

妖娆天赋，偏宜素淡，杨氏宫妆。雅态
何须艳丽，孤标不在春光。

虞美人

清江一曲君应见。昨夜潮头浅。不争落
落斗奇奇。看取水边寒蕊、雪边枝。

日斜疏影还敲倒。沙上娇鹳老。只今何
处有新诗。好在小春十月、醉翁辞。

醉落魄

琼搓粉滴。南枝只报江南坼。横斜疏影
溪边窄。翦碎白云，分付陇头客。

冰肌绰约疑姑射。铅华消尽见真色。不
随桃李开红白。我为东君，来报春消息。

又 赏梅

梅花似雪。赏花记得同欢悦。更阑犹自
贪攀折。不怯春寒，须要待明月。

如今月上花争发。疏枝冷蕊对离缺。人
心只道花争别。不道人心，不似旧时节。

更漏子

宝香瓶，桐叶卷。荡水痕微还远。思乡
信，觉春迟。野梅初见时。

上潮风，临晚渡。人欲过西江去。吹寒
管，陇云低。江南花未知。

又

绛纱笼，金叶盖。向晓灯花犹在。冰未
结，小琉璃。陇梅香满枝。

雪无香，花有意。不是江南新寄。霜月
尽，碧天寒。玉楼人倚阑。

落梅风

宫烟如水湿芳晨。寒梅似雪相亲。玉楼
侧畔数枝春。惹香尘。

寿阳娇面偏怜惜，妆成一面花新。镜中
重把玉纤匀。酒初醺。

古记

一枕恹恹春困。记得小梅风韵。何处最

全宋词 无名氏

关情，嫩蕊初传芳信。堪恨。堪恨。谁傍横
斜疏影。

又

腊半雪梅初绽。玉屑琼英碎翦。素艳与
清香，别有风流堪羨。苞嫩。蕊嫩。羞破寿
阳人面。

又

疑是水晶宫殿。云女天仙宝宴。吟赏欲
黄昏，风送一声羌管。烟淡。霜淡。月在画
楼西畔。

生查子

朔风吹冻云，云破天容碧。新月过溪来，
隐见横云色。

天与水争妍，花与月争白。一倩管城君，
寄此春消息。

蓦山溪

青春三月。

失调名

夜寒斗觉罗衣薄。

又

深诚杳隔无疑。

调笑集句

盖闻：行乐须及良辰，钟情正在吾辈。飞觞举白，目断巫山之暮云；缀玉联珠，韵胜池塘之春草。集古人之妙句，助今日之馀欢。

珠流璧合暗连文。月入千江体不分。此曲只应天上有，歌声岂合世间闻。

巫山

巫山高高十二峰。云想衣裳花想容。欲往从之不惮远，丹峰碧障深重重。楼阁玲珑五云起。美人娟娟隔秋水。江边一望楚天长，满怀明月人千里。

千里。楚江水。明月楼高愁独倚。并梧宫殿生秋意。望断巫山十二。雪肌花貌参差是。朱阁五云仙子。

桃源

渔舟容易入春山。别有天地非人间。玉颜亭亭花下立，鬓乱钗横特地寒。留君不住君须去。不知此地归何处。春来遍是桃花水，流水落花空相误。

相误。桃源路。万里苍苍烟水暮。留君不住君须去。秋月春风闲度。桃花零乱如红雨。人面不知何处。

洛浦

艳阳灼灼河洛神。态浓意远淑且真。入眼平生

全宋词 无名氏

未曾有，缓步佯羞行玉尘。凌波不过横塘路。风吹仙袂飘飘举。来如春梦不多时，天非花艳轻非雾。

非雾。花无语。还似朝云何处去。凌波不过横塘路。燕燕莺莺飞舞。风吹仙袂飘飘举。拟倩游丝惹住。

明妃

明妃初出汉宫时。青春绣服正相宜。无端又被东风误，故著寻常淡薄衣。上马即知无返日。寒山一带伤心碧。人生憔悴生理难，好在毡城莫相忆。

相忆。无消息。目断遥天云白白。寒山一带伤心碧。风土萧疏胡国。长安不见浮云隔。纵使君来争得。

班女

九重春色醉仙桃。春娇满眼睡红绡。同辇随君侍君侧，云鬓花颜金步摇。一霎秋风惊画扇。庭院苍苔红叶遍。蕊珠宫里旧承恩，回首何时复来见。

来见。蕊宫殿。记得随班迎凤辇。余花落尽苍苔院。斜掩金铺一片。千金买笑无方便。和泪盈盈娇眼。

文君

锦城丝管日纷纷。金钗半醉坐添春。相如正应居客右，当轩下马入锦裯。斜倚绿窗鸳鉴女。琴弹秋思明心素。心有灵犀一点通，感君绸缪逐君去。

君去。逐鸳侣。斜倚绿窗鸳鉴女。琴弹

全宋词 无名氏

秋思明心素。一寸还成千缕。锦城春色知何许。那似还山眉妩。

吴娘

素枝琼树一枝春。丹青难写是精神。偷啼自搵残妆粉，不忍重看旧写真。佩玉鸣鸾罢歌舞。锦瑟华年谁与度。暮雨潇潇郎不归，含情欲说独无处。

无处。难轻诉。锦瑟华年谁与度。黄昏更下潇潇雨。况是青春将暮。花虽无语莺能语。来道曾逢郎否。

琵琶

十三学得琵琶成。翡翠帘开云母屏。暮雨朝来颜色故，夜半月高弦索鸣。江水江花岂终极。上下花间声转急。此恨绵绵无绝期，江州司马青衫湿。

衫湿，情何极。上下花间声转急。满船明月芦花白。秋水长天一色。芳年未老时难得。目断远空凝碧。

放队

玉炉夜起沈香烟。唤起佳人舞绣筵。去似朝云无处觅，游童陌上拾花钿。

九张机

醉留客者，乐府之旧名；九张机者，才子之新调。凭夏玉之清歌，写掷梭之春怨。章章寄恨，句

句言情。恭对华筵，敢陈口号。

一掷梭心一缕丝，连连织就九张机。从来巧思知多少，苦恨春风久不归。

一张机。织梭光景去如飞。兰房夜永愁无寐。呕呕轧轧，织成春恨，留著待郎归。

两张机。月明人静漏声稀。千丝万缕相萦系。织成一段，回纹锦字。将去寄呈伊。

三张机。中心有朵耍花儿。娇红嫩绿春明媚。君须早折，一枝浓艳，莫待过芳菲。

四张机。鸳鸯织就欲双飞。可怜未老头先白，春波碧草，晓寒深处，相对浴红衣。

五张机。芳心密与巧心期。合欢树上枝连理。双头花下，两同心处，一对化生儿。

六张机。雕花铺锦半离披。兰房别有留春计。炉添小篆，日长一线，相对绣工迟。

七张机。春蚕吐尽一生丝。莫教容易裁罗绮。无端翦破，仙鸾彩凤，分作两般衣。

八张机。纤纤玉手住无时。蜀江濯尽春波媚。香遗囊麝，花房绣被。归去意迟迟。

九张机。一心长在百花枝。百花共作红堆被。都将春色，藏头裹面，不怕睡多时。

轻丝。象床玉手出新奇。千花百草光凝碧。裁缝衣著，春天歌舞，飞蝶语黄鹂。

春衣。素丝染就已堪悲。尘世昏污无颜色。应同秋扇，从兹永弃。无复奉君时。

歌声飞落画梁尘。舞罢香风卷绣茵。更欲缕成机上恨，尊前忽有断肠人。敛袂而归，相将好去。

同前

一张机。采桑陌上试春衣。风晴日暖慵

无力。桃花枝上，啼莺言语，不肯放人归。

两张机。行人立马意迟迟。深心未忍轻分付，回头一笑，花间归去，只恐被花知。

三张机。吴蚕已老燕雏飞。东风宴罢长洲苑，轻绡催趁，馆娃宫女，要换舞时衣。

四张机。咿哑声里暗颦眉。回梭织朵垂莲子。盘花易绾，愁心难整，脉脉乱如丝。

五张机。横纹织就沈郎诗。中心一句无人会。不言愁恨，不言憔悴。只恁寄相思。

六张机。行行都是耍花儿。花间更有双蝴蝶，停梭一晌，闲窗影里。独自看多时。

七张机。鸳鸯织就又迟疑。只恐被人轻裁剪，分飞两处，一场离恨，何计再相随。

八张机。回纹知是阿谁诗。织成一片凄凉意。行行读遍，厌厌无语，不忍更寻思。

九张机。双花双叶又双枝。薄情自古多离别。从头到底。将心萦系。穿过一条丝。

南歌子

席近浑如远，帘高故放低。偏它能画斗头眉。戴顶烧香铺翠、小冠儿。

酒伴残妆在，花随秀鬓垂。薄罗小扇写新诗。解下双双罗带、要重题。

又

象戏红牙局，琵琶绿锦绦。小窗方罨困香醪。帘外拂檐宫柳、翠阴交。

烟媚莺莺近，风微燕燕高。更将乳酪伴樱桃。要共那人一递、一匙抄。

又

小小生金屋，盈盈向风帟。斜枝石竹绣罗衣。为怕春来风日、卷帘稀。

金殿承恩久，兰堂得梦回。薰炉空惹御香归。今夜花前还是、日平西。

又

阁儿虽不大，都无半点俗。窗儿根底数竿竹。画展江南山景、两三幅。

彝鼎烧异香，胆瓶插嫩菊。翛然无事净心目。共那人人相对、弈棋局。

又

风动槐龙舞，花深禁漏传。一竿红日照花砖。走马晨晖门里、快行宣。

百五开新火，清明尚禁烟。鱼符不请便朝天。醉里归来疑是、梦游仙。

感皇恩

暖律破寒威，春回宫柳。晴景初曦上元候。禁城烟火，移下一天星斗。素娥凝碧汉，明如昼。

绣毂电转，锦鞞飞骤。九踏笙歌按新奏。胜游方凝，忽听晓钟银漏。两两归去也。应回首。

鱼游春水

秦楼东风里。燕子还来寻旧垒。余寒微

全宋词 无名氏

透，红日薄侵罗绮。嫩笋才抽碧玉簪，细柳轻窳黄金蕊。莺啭上林，鱼游春水。

屈曲阑干遍倚。又是一番新桃李。佳人应念归期，梅妆淡洗。凤箫声杳沈孤雁，目断澄波无双鲤。云山万重，寸心千里。

五彩结同心

珠帘垂户。金索悬窗，家接浣沙溪路。相见桐阴下，一钩月、恰在凤凰栖处。素琼捻就宫腰小。花枝袅、盈盈娇步。新妆浅，满腮红雪，绰约片云欲度。

尘寰岂能留住。唯只愁、化作彩云飞去。蝉翼衫儿，薄冰肌莹，轻罩一团香雾。彩笺巧缀相思苦。脉脉动、怜才心绪。好作个、秦楼活计，吹箫伴侣。

侍香金童

宝台蒙绣，瑞兽高三尺。玉殿无风烟自直。迢迢传杯盈绮席。苒苒菲菲，断处凝碧。是龙涎凤髓，恼人情意极。想韩寿、风流应暗识。去似彩云无处觅。惟有多情，袖中留得。

洞仙歌

溶溶泄泄，似飘扬愁绪。不是因风等闲度。道无心用甚，却又情多，行未驻，还作

高阳暮雨。

襄王情尚浅，会少离多，空自朝朝又暮暮。肠断晓光中，一缕归时，销散后、不知何处。试密锁、琼楼洞房深，与遮断江皋，楚台归路。

永遇乐

功名闲事，利禄休问，莫系心上。幸有衣食，随缘过得，著甚乾劳攘。风前月下，三杯两盏，撞著即莫与放。且与个、山庄道友，退闲故人来往。

新来做得，一个宽袖布衫，著来也畅。出户迎宾，入城干事，恰似王保长。我咱恹后，神歌鬼舞，任尔万般毁谤。死来后，一家一个，那底怎向。

西江月

灯火楼台欲下，笙歌院落将归。冰瓷金缕胜琉璃。春笋捧来纤细。

饮罢高阳人散，曲终巫峡云飞。千方修合斗新奇。须带别离滋味。

水调歌头

帆落松陵浦，枯柳缆琼艘。杖策无人独步，浪压百花桥。我挂风裳水佩，一笑波寒月白，馀韵触惊涛。绝景有谁赏，雾幕闭三

高。

不须臾，千古事，一萧条。鲈鱼纵有，
泽荒甫里失溪桥。更吾名高业茂，终归荒田
野草，且稳一枝巢。举酒酌空阔，烟远路迢
迢。

菩萨蛮

江城烽火连三月。不堪对酒江亭别。休
作断肠声。老来无泪倾。

风高帆影疾。目送舟痕碧。锦字几时来。
薰风无雁回。

减字木兰花

蔷薇叶暗。满架浓阴风不乱。午酒才醒。
历历黄鹂枕上听。

此情难遣。不比红蕉心易展。要识离愁。
只似杨花不自由。

浣溪沙 酴醾

梦入瑶台千步芳。万妃相向玉为装。同
心擎带翠罗长。

浓艳只宜供枕席，醉魂长是傍壶觞。绀
纱囊薄为谁香。

又

白玉楼中白雪歌。更将白纻衬春罗。软
红香里最么麽。

全宋词 无名氏

桃叶桃根随处有，江南江北见来多。风
前月底奈愁何。

临江仙 闻郡守移传芑林

竹里行厨草草，花边系马匆匆。使君移
传意何穷。儿童随骑火，猿鹤避歌钟。

梅雪自欺舞态，独花先放春红。酒醒人
散夜堂空。殷勤松上月，独照老仙翁。

阮郎归

山池芳草绿初匀。柳寒眉尚颦。东风吹
雨细如尘。一庭花脸皴。

莺共蝶，怨还嗔。眼前无好春。这番天
气杀愁人。人愁旋旋新。

浣溪沙

春院无人花自香。飞来蜂蝶意何狂。玉
钩帘卷日偏长。

笑又不成愁未是，曲屏闲倚绣鸳鸯。归
时应供□□妆。

南乡子

李郭共仙舟。准拟苏台烂漫游。风雪为
谁留住也，沧洲。一尺银沙未肯收。

无语只关愁。强殢金卮不计筹。想得人

人梳洗懒，妆楼。祇窳帘儿不上钩。

凤栖梧

姑射仙人游汗漫。白凤翩翩，银海光凌乱。龟手儿童贪戏玩。风檐更折梅梢看。

漠漠银沙平晚岸。笑拥寒蓑，聊作渔翁伴。横玉愁云吹不断。归舟又载苹花满。

归自谣

愁冉冉。目送书空鸿数点。落霞风剪江分染。胜处屏云犹未掩。羞娥敛。红潮怕上春风脸。

卜算子

曾约再来时，花暗春风树。今日人来花未开，春未知人处。

坐客有疏狂，彩笔题新语。浑为玉人颓玉山，忘了阳关路。

又

烟髻绾层颠，云叶生寒树。斜目行人窈窕村，愁阵纵横处。

细细写蛮笺，道寄相思语。会倩春风展柳眉，回马章台路。

好事近

潇洒小楼东，斜亚一枝梅雪。若在玉溪仙馆，更风流奇绝。

花神应为护芳心，付与何人折。行客几回搔首，认暗香浮月。

谒金门

江上路。依约数家烟树。一枕归心村店暮。更乱山深处。

梦过江南芳草渡。晓色又催人去。愁似游丝千万缕。倩东风约住。

杜韦娘

华堂深院，霜笼月采生寒晕。度翠幄、风触梅香喷。渐岁晚、春光将近。惹离恨万种，多情易感，欢难聚少愁成阵。拥红炉，凤枕慵敲，银灯挑尽。

当此际，争忍前期后约，度岁无凭准。对好景、空积相思恨。但自觉、恹恹方寸。拟蛮笺象管，丹青好手，写出寄与伊教信。尽千工万巧，唯有心期难问。

摸鱼儿

被谁家、数声弦管，惊回好梦难省。起

来无语疏雨过，芳草嫩苔侵径。春昼永。迟日暮，碧沼浪浸红楼影。卷帘人静。被风触，一叶两叶，杏花零乱对残景。

依前是，撩拨春心堪恨。檀郎言约无定。不知何处贪欢笑，恣纵酒迷歌逞。珠泪迸。自别后，每忆翠黛凭谁整。芳年相称。又到得今来，却成病了，羞懒对鸾镜。

满庭芳

五斛相逢，千钟一饮，古今乐事无过。香生银瓮，浮蚁浴春波。潋滟光凝盏面，轻风皱、浅碧宫罗。乘欢处，倾壘痛饮，珠贯引清歌。

云何。君不饮，良辰美景，聚少离多。忍怎放春风，容易蹉跎。但愿一樽常共，花阴下、急景如梭。须乘醉，彫鞍归去，争看醉颜酡。

潇湘静

画帘微卷香风逗。正明月、乍圆时候。金盘露冷，玉炉篆消，渐红鳞生酒。娇唱倚繁弦，琼枝碎、轻回云袖。风台歌短，铜壶漏永，人欲醉、夜如昼。

因念流年迅景，被浮名、暗辜欢偶。人生大抵，离多会少，更相将白首。何似猛寻芳，都莫问、积金过斗。歌阑宴阕，云窗凤枕，钗横麝透。

十月桃

东篱菊尽，遍园林败叶，满地寒菱。露井平明，破香笼粉初开。佳人共喜芳意，呵手剪、密插鸾钗。无言有艳，不避繁霜，变作春媒。

问武陵溪上谁栽。分付与南园，舞榭歌台。恰似凝酥衬玉，点缀装裁。东君自是为主，先暖信、律管飞灰。从今雪里，第一番花，休话江梅。

汉宫春

江月初圆，正新春夜永，灯市行乐。芙蕖万朵，向晚为谁开却。层楼画阁。尽卷上、东风帘幕。罗绮拥，欢声和气，惊破柳梢梅萼。

绰约。暗尘浮动，正鱼龙曼衍，戏车交作。高牙影里，缓控玉羈金络。铅华间错。更一部、笙歌围著。香散处，厌厌醉听，南楼画角。

又

玉减香销，被婵娟误我，临镜妆慵。无聊强开强解，蹙破眉峰。凭高望远，但断肠、残月初钟。须信道，承恩在貌，如何教妾为容。

风暖鸟声和碎，更日高院静，花影重重。愁来待只殢酒，酒困愁浓。长门怨感，恨无

全宋词 无名氏

金、买赋临邛。翻动念，年年女伴，越溪共采芙蓉。

风流子

淑景皇州满，和风渐、催促柳花飞。过清明骤雨，五侯台榭，青烟散入，新火开时。绣帘外、傍人飞燕子，映叶语黄鹂。秋千昼永，绮罗人散，花阴笑隔，红粉墙低。

青门多行乐，寻芳处、何计强逐轻肥。空对旧游满目，谁共开眉。遇有时系马，垂杨影下，风前伫立，惆怅佳期。回望故园桃李，应待人归。

夏日宴黄堂

日初长。正园林换叶，瓜李飘香。帘外雨过，送一霎微凉。萍芜迳，曲凝珠颗，衬汀沙、细簇蜂房。被晚风轻飏，圆荷翻水，泼觉鸳鸯。

此景最难忘。趁芳樽泛蚁，筠簟铺湘。兰舟棹稳，倚何处垂杨。岂能文字成狂饮，更红裙、闲也何妨。任醉归明月，虾须帘筛，几线馀霜。

渔家傲

轻拍红牙留客住。韩家石鼎联新句。珍重龙团并凤髓。君王与。春风吹破黄金缕。

全宋词 无名氏

往事不须凭陆羽。且看盏面浓如乳。若是蓬莱鳌稳负。知何处。玉川一枕清风去。

醉春风

陌上清明近。行人难借问。风流何处不来归，闷闷闷。回雁峰前，戏鱼波上，试寻芳信。

夜久兰膏烬。春睡何曾稳。枕边珠泪几时干，恨恨恨。惟有窗前，过来明月，照人方寸。

卓牌儿

当年早梅芳，曾邂逅、飞琼侣。肌云莹玉，颜开嫩桃，腰支轻袅，未胜金缕。佯羞整云鬓，频向人、娇波寄语。湘佩笑解，韩香暗传，幽欢后期欢诉。

梦魂顿阻。似一枕、高唐云雨。蕙心兰态，知何计重遇。试问春蚕丝多少，未抵离愁半缕。凝伫。望凤楼何处。

南乡子

晓日压重檐。斗帐犹寒起未忺。天气困人梳洗倦，眉尖。淡画春山不喜添。

闲把绣丝拈，红得金针又怕拈。陌上行人归也未，恹恹。满院杨花不卷帘。

又 咏双荔支

深结花工知。赐与衣裳尽是绯。曾向玉

盘深处见，隈随。两个心肠一片儿。

从小便相依。酒伴歌筵不暂离。只恐被人分擘破，东西。怎得团圆似旧时。

望远行

当时云雨梦，不负楚王期。翠峰中、高楼十二掩瑶扉。尽人间欢会，只有两心自知。渐玉困花柔香汗挥。

歌声翻别怨，云驭欲回时。这无情红日，何似且休西。但涓涓珠泪，滴湿仙郎羽衣。怎忍见、双鸳相背飞。

归田乐

水绕溪桥绿。泛苹汀、步迷花曲。衣巾散余馥。种竹更洗竹。咏竹题竹。日暮无人伴幽独。

光阴双转毂。可惜许、等闲愁万斛。世间种种，只是荣和辱。念足又愿足。意足心足。忘了眉头怎生蹙。

临江仙

促坐重燃绛蜡，香泉细泻银瓶。一鸥月露照人明。清真无俗韵，久淡似交情。

正味能销酒力，余甘解助茶清。琼浆一饮觉身轻。蓝桥知不远，归卧对云英。

行香子

天与秋光。转转情伤。探金英、知近重阳。薄衣初减，绿蚁初尝。渐一番风，一番雨，一番凉。

黄昏院落，恹恹惶惶。酒醒时、往事愁肠。那堪永夜，明月空床。问砧声捣，蛩声细，漏声长。

诉衷情

碧天明月晃金波。清浅滞星河。深深院宇人静，独自问姮娥。

圆夜少，缺时多。事因何。嫦娥莫是，也有别离，一似人麽。

绕池游

渐春工巧，玉漏花深寒浅。韶景变、融晴蕙风暖。都门十二，三五银蟾光满。瑞烟葱茜，禁城闾苑。

棚山雉扇。绛蜡交辉星汉。神仙籍、梨园奏弦管。都人游玩。万井山呼欢抃。岁岁天仗，愿瞻凤辇。

好事近

小院看酴醾，正是盛开时节。莫惜大家

全宋词 无名氏

沈醉，有春醅初泼。

花前月下细看来，无物比清绝。若问此花何似，似一堆香雪。

阮郎归

春风吹雨绕残枝。落花无可飞。小池寒绿欲生漪。雨晴还日西。

帘半卷，燕双归。讳愁无奈眉。翻身整顿著残棋。沈吟应劫迟。

点绛唇

公子归来，画堂深院丛罗绮。绿杯浮蚁。风皱红鳞起。

信马斜阳，误入桃源里。珠帘底。淡妆斜倚。一寸秋江水。

海棠春

晓莺窗外啼春晓。睡未足、把人惊觉。翠被晓寒轻，宝篆沈烟袅。

宿醒未解，双娥报道。别院笙歌宴早。试问海棠花，昨夜开多少。

宴桃源

落日霞消一缕。素月棱棱微吐。何处夜归人，呕嘎几声柔橹。归去。归去。家在烟

波深处。

祝英台

海棠开、花影下、忆得共游戏。恰似双鸾，同步彩云里。梦回雨收云散，匆匆归去，一枕乍、惊回浓睡。

甚情味。人去花亦彫零，秣芳伴憔悴。点点飞红，知是去时泪。可堪冷落黄昏，潇潇微雨，断魂处。朱阑独倚。

夜游宫

是处追寻侣。灯光散、九衢红雾。人在星河繁闹处。暗相逢，惹天香，飘满路。

游困先归去。奈怨别、相思情绪。闲傍小桃□独步。月明寒，捻宜男，无一语。

杨柳枝

簌簌花飞一雨残。乍衣单。屏风数幅画江山。水云闲。

别易会难无计那，泪潸潸。夕阳楼上凭栏干。望长安。

摊破浣溪沙

相恨相思一个人。柳眉桃脸自然春。别离情思，寂寞向谁论。

全宋词 无名氏

映地残霞红照水，断魂芳草碧连云。水边楼上，回首倚黄昏。

一剪梅

恨入椒觞暖未拈。春葱微蘸，谁是纤纤。别来愁夜不胜长，明日从教一线添。

夜久寒深睡未忺。旧愁新恨，占断眉尖。一钩斜月却知人。直到天明，不下疏帘。

卜算子

垂螺近额时，只怕莺声老。尽日贪花斗草忙，不信有闲烦恼。

凤鬓已胜钗，恨别王孙早。若把芳心说与伊，道绿遍、池塘草。

忆王孙

杨柳风前旗鼓闹。正陌上、闲花芳草。忍将愁眼觑芳菲，人未老。春先老。

长安比日知多少。日易见、长安难到。无情苕水不西流，渐迤邐、仙舟小。

南歌子

夕露沾芳草，斜阳带远村。几声残角起谯门。撩乱栖鸦飞舞、闹黄昏。

天共高城远，香馀绣被温。客程常是可

全宋词 无名氏

销魂。乍向心头横著、个人人。

又

楼迥迷云日，溪深涨晓沙。年来悴憔费
铅华。楼上一天春思、浩无涯。

罗带宽腰素，真珠溜脸霞。海棠开尽柳
飞花。薄幸只知游荡、不思家。

又

玉殿分时果，金盘弄赐冰。晚来阶下按
歌声。恰好一方明月、可中庭。

露下天如水，风来夜又清。偏他不肯大
家行。漾下扇儿拍手、引流萤。

失调名

千里伤行客。

又

黄叶无风自落，彩云不雨空归。

玉珑璁

城南路。桥南路。玉钩帘卷香横雾。新
相识。旧相识。浅颦低拍，嫩红轻碧。惜惜
惜。

刘郎去。阮郎住。为云为雨朝还暮。心
相忆。空相忆。露荷心性，柳花踪迹。得得
得。

浣溪沙 蔡州瓜陂铺有用篦刀刻青泥壁为词

碎剪香罗浥泪痕。鹧鸪声断不堪闻。马嘶人去近黄昏。

整整斜斜杨柳陌，疏疏密密杏花村。一番风月更销魂。

点绛唇 丰城南禅寺题壁

燕子依依，晓来总为谁归去。淡云生处。已觉宾鸿度。

浅笑深嗔，便面机中素。乘鸾女。琐窗琼宇。会有明年暑。

踏青游 游崔念四妓馆

识个人人，恰正二年欢会。似赌赛、六只浑四。向巫山、重重去，如鱼水。两情美。同倚画楼十二。倚了又还重倚。

两日不来，时时在人心里。拟问卜、常占归计。拚三八清斋，望永同鸳被。到梦里。蓦然被人惊觉，梦也有头无尾。

玉楼春 铅山驿壁

东风杨柳门前路。毕竟雕鞍留不住。柔情胜似岭头云，别泪多如花上雨。

青楼画幕无重数。听得楼边车马去。若

全宋词 无名氏

将眉黛染情深，且到丹青难画处。

浣溪沙

云锁柴门半掩关。垂纶犹自在前湾。独
乘孤棹夜方还。

任使有荣居紫禁，争如无事隐青山。浮
名浮利总输闲。

二

一副纶竿一只船。蓑衣竹笠是生缘。五
湖来往不知年。

青嶂更无荣辱到，白头终没利名牵。芦
花深处伴鸥眠。

三

钓罢高歌酒一杯。醉醒曾笑楚臣来。夕
阳维缆碧江隈。

蓑笠每因山雨戴，船窗多为水花开。安
居流景任相催。

四

雨气兼香泛芰荷。回舟冒雨懒披蓑。夜
阑风静水无波。

白酒追欢常恨少，青山入望岂嫌多。人
间荣辱尽从他。

定风波

雨雾云收望远山。钓竿林下恣清闲。蝉
噪日斜林影转。溪岸。绿深红浅画屏间。

全宋词 无名氏

对酒狂歌时鼓枻。更邀同志醉前湾。待月却寻维缆处，归来，烟萝一迳接柴关。

雨中花 改冯相三愿词

我有五重深深愿。第一愿、且图久远。二愿恰如雕梁双燕。岁岁后、长相见。

三愿薄情相顾恋。第四愿、永不分散。五愿奴留收园结果，做个人宅院。

望海潮 吊杨芳与黄岩妓投江

彩筒角黍，兰桡画舫，佳时竞吊沅湘。古意未收，新愁又起，断魂流水茫茫。堪笑又堪伤。有临皋仙子，连壁檀郎。暗约同归，远烟深处弄沧浪。

倚楼魂已飞扬。共偷挥玉箸，痛饮霞觞。烟水无情，揉花碎玉，空余怨抑凄凉。杨谢旧遗芳。算世间纵有，不恁非常。但看芙蓉并蒂，他日一双双。

失调名

喜则喜、得入手。愁则愁、不长久。忻则忻、我两个厮守。怕则怕、人来破斗

扑蝴蝶

烟条雨叶，绿遍江南岸。思归倦客，寻

全宋词 无名氏

芳来较晚。岫边红日初斜，陌上飞花正满。
凄凉数声羌管。

怨春短。玉人应在，明月楼中画眉懒。
蛮笺锦字，多时鱼雁断。恨随去水东流，事
与行云共远。罗衾旧香犹暖。

侍 香 金童

喜叶之地，手把怀儿摸。甚恰恨、出题
厮撞著。内臣过得不住脚。忙里只是，看得
斑驳。

骇这一身冷汗，都如云雾薄。比似年时
头势恶。待检又还猛想度。只恐根底，有人
寻着。

啄木儿

洗出养花天气。

柳梢青

晓星明灭。白露点、秋风落叶。故址颓
垣，荒烟衰草，溪前宫阙。

长安道上行客，念依旧、名深利切。改
变容颜，销磨古今，垆头残月。

眉峰碧

蹙破眉峰碧。纤手还重执。镇日相看未

全宋词 无名氏

足时，忍便使、鸳鸯只。

薄暮投村驿。风雨愁通夕。窗外芭蕉窗
里人，分明叶上心头滴。

失调名

送千里蟾宫客。

又

来春高步过南宫，更答取龙头策。

又

恐伊不信是龙头，和书寄与三题草。

又

问醉吟今夜，何处凤楼偏好。

又

光生里闾，荣破天荒。

行香子

清要无因，举选艰辛。系书钱、须要十分。浮名浮利，虚苦劳神。叹旅中愁，心中闷，部中身。

虽抱文章，苦苦推寻。更休说、谁假谁真。不如归去，作个齐民。免一回来，一回讨，一回论。

失调名

君是园中杨柳，能得几时青。趁金明、

春光尚好，尊酒赏闲情。他年归去，强山阴处，一枕晓霞清。

又

华宫瑶馆游毕。却返绛节、回鸾翼。荷殷勤、三斝香醪，供养我、上真仙客。赤霄浮空，祥云远布，是我来时节。且频修，同泛舸、上云秋碧。

湘灵瑟

霜风摧兰。银屏生晓寒。淡扫眉山。脸红殷。

潇湘浦，芙蓉湾。相思数声哀叹。画楼尊酒闲。

失调名

平地一声雷。

又

休休得也□，云深处、高卧斜阳。

又

单于若问君家世，说与教知。便是红窗迥底儿。

又

说与教知。便是中朝一汉儿。

又

便是盐商孟客儿。

全宋词 无名氏

减字木兰花

家门希差。养得一枚依样画。百事无能。
只去篱边缠倒藤。

几回水上。轧捺不翻真个强。无处容他。
只好炎天熬作巴。

满庭芳 嘲蔡京

光芒。长万丈，司空见惯，应谓寻常。
……仍传□、僭崖父老，祇侯蔡元长。

失调名

妙手庖人，搓得细如麻线。面儿白、心
下黑，身长行短。蓦地下来后，吓出一身冷
汗。这一场欢会，早危如累卵。

便做羊肉燥子，勃推钉碗。终不似、引
盘美满。舞万遍。无心看。愁听弦管。收盘
盏。寸肠暗断。

浪淘沙

水饭恶冤家。些小姜瓜。尊前正欲饮流
霞。却被伊来刚打住，好闷人那。

不免着匙爬。一似吞沙。主人若也要人
夸。莫惜更搀三五盏，锦上添花。

夜游宫

因被吾皇手诏。把天下、寺来改了。大觉金仙也不小。德士道。却我甚头脑。

道袍须索要。冠儿戴、恁且休笑。最是一种祥瑞好。古来少。葫芦上面生芝草。

西江月

早岁轻衫短帽。中间圆顶方袍。忽然天赐降宸毫。接引私心入道。

可谓一身三教。如今且得逍遥。擎拳稽首拜云霄。有分长生不老。

青玉案 咏举子赴省

钉鞋踏破祥符路。似白鹭、纷纷去。试盞幞头谁与度。八厢儿事，两员直殿，怀挟无藏处。

时辰报尽天将暮。把笔胡填备员句。试问闲愁知几许。两条脂烛，半盂馊饭，一阵黄昏雨。

失调名

瘦得脸儿两指大。

又

柳丝只解风前舞。谩系惹、那人不住。

滴滴金 案原无调名，此据花草粹编卷四

当初亲下求言诏。引得都来胡道。人人招是骆宾王，并洛阳年少。

自讼监宫并岳庙。都一时闲了。误人多，是误人多，误了人多少。

水调歌头

平生太湖上，短棹几经过。如今重到，何事愁与水云多。拟把匣中长剑，换取扁舟一叶，归去老渔蓑。银艾非吾事，丘壑已蹉跎。

脍新鲈，斟美酒，起悲歌。太平生长，岂谓今日识兵戈。欲泻三江雪浪，净洗胡尘千里，不用挽天河。回首望霄汉，双泪堕清波。

失调名

做园子，得数载。栽培得、那花木，就中堪爱。特将一个、保义酬劳，反做了、今日殃害。

诏书下来索金带。这官告、看看毁坏。放牙笏、便担屎担，却依旧种菜。

又

叠假山、得保义。幞头上、帶著百般村气。做模样、偏得人憎，又识甚条例。

全宋词 无名氏

今日仗惟安置。官诰又来索气。不如更
叠个盆山，卖八文十二。

结带巾 案原无调名，此据花草粹编卷五

头巾带。谁理会。三千贯赏钱，新行条
例。不得向后长垂，与胡服相类。

法甚严，人尽畏。便缝阔大带，向前面
系。和我太学先辈，被人呼保义。

失调名

却折花枝斜插鬓。

又

薰风时送芰荷香。

又

花有重开月再圆。

鹊桥仙

柳家一句最著题，道暮雨、芳尘轻洒。

失调名 咏纸钱谑词

你自平生行短，不公正、欺物瞒心。交
年夜、将烧毁，犹自昧神明。若还替得，你
可知好里，争奈无凭。

我虽然无口，肚里清醒。除非阎家大伯，

一时间、批判昏沈。休痴呵，临时恐怕，各自要安身。

又 琵琶行大曲

别有暗愁深意。

又

晓风吹人，酒醒时候。

又

海棠花谢清明后。

鹧鸪天 上元词

春晓千门放钥匙。万官班从出祥曦。九重彩浪浮龙盖，一点红云护赭衣。

车马过，打球归。芳尘洒定不教飞。钧天品动回鸾曲，十里珠帘待日西。

日暮迎祥对御回。宫花载路锦成堆。天津桥畔鞭声过，宣德楼前扇影开。

奏舜乐，进尧杯。传宣车马上天街。君王喜与民同乐，八面三呼震地来。

紫禁烟光一万重。五门金碧射晴空。梨园羯鼓三千面，陆海鳌山十二峰。

香雾重，月华浓。露台仙仗彩云中。朱栏画栋金泥幕，卷尽红莲十里风。

香雾氤氲结彩山。蓬莱顶上驾头还。绣鞞狨坐三千骑，玉带金鱼四十班。

风细细，珮珊珊。一天和气转春寒。千门万户笙箫里，十二楼台月上栏。

禁卫传呼约下廊。层层掌扇簇亲王。明

珠照地三千乘，一片春雷入未央。

宫漏永，御街长。华灯偏共月争光。乐声都在人声里，五夜车尘马足香。

宝炬金莲一万条。火龙围辇转州桥。月迎仙仗回三殿，风递韶音下九霄。

登复道，听鸣鞘。再颁酥酒赐臣僚。太平无事多欢乐，夜半传宣放早朝。

玉座临轩宴近臣。御楼灯火发春温。九重天上闻仙乐，万宝床边侍至尊。

花似海，月如盆。不任宣劝醉醺醺。岂知头上宫花重，贪爱传柑遗细君。

九陌游人起暗尘。一天灯雾锁彤云。瑶台雪映无穷玉，阆苑花开不夜春。

攒宝骑，簇雕轮。汉家宫阙五侯门。景阳钟动才归去，犹挂西窗望月痕。

宣德楼前雪未融。贺正人见彩山红。九衢照影纷纷月，万井吹香细细风。

复道远，暗相通。平阳主第五王宫。凤箫声里春寒浅，不到珠帘第二重。

风约微云不放阴。满天星点缀明金。烛龙衔耀烘残雪，羯喜催花发上林。

河影转，漏声沈。缕衣罗薄暮云深。更期明夜相逢处，还尽今宵未足心。

五日都无一日阴。往来车马闹如林。葆真行到烛初上，丰乐游归夜已深。

人未散，月将沈。更期明夜到而今。归来尚向灯前说，犹恨追游不称心。

彻晓华灯照凤城。犹嗔宫漏促天明。九重天上闻花气，五色云中应笑声。

频报道，奏河清。万民和乐见人情。年

全宋词 无名氏

丰米贱无边事，万国称觞贺太平。

忆得当年全盛时。人情物态自熙熙。家家帘幕人归晚，处处楼台月上迟。

花市里，使人迷。州东无暇看州西。都人只到收灯夜，已向樽前约上池。

步障移春锦绣丛。珠帘翠幕护春风。沈香甲煎薰炉暖，玉树明金蜜炬融。

车流水，马游龙。欢声浮动建章宫。谁怜此夜春江上，魂断黄梁一梦中。

真个亲曾见太平。元宵且说景龙灯。四方同奏升平曲，天下都无叹息声。

长月好，定天晴。人人五夜到天明。如今一把伤心泪，犹恨江南过此生。

失调名 原底本误作“汪秀才”，据
《订补续记》改

有个秀才姓汪。骑个驴儿过江。江又过不得，做尽万千趋锵。

又

有个秀才姓汪。住在祁门下乡。行第排来四八，做尽万千趋锵。

失调名

何时一尊酒，重与细论文。

又

六论不知出处。写得乌梅几字。圣恩广

大如天，也赐束帛归去。

又

高文虎，称伶俐。万苦千辛，作个放生亭记。后头没一句说著朝廷，尽把师彝归美。这老子忒无廉耻。不知润笔能几。夏王说不是商王，只怕伏生是你。

又

十年前事，浑似梦初惊。

又

千里有个好相识，望青山一色。

又

五马游春，彩佩照人，光生南陌。

又

炉香如雾斗帐深。

又

香野锦林谁是主。

又

一庭影浸梧竹。

金钱子

昨夜金风，黄叶乱飘阶下。听窗前、芭蕉雨打。触处池塘，睹风荷凋谢。景色凄凉，总闲却、舞台歌榭。

独倚阑干，惟有木犀幽雅。吐清香、胜

全宋词 无名氏

如兰麝。似金垒妆成，想丹青难画。纤手折来，胆瓶中、一枝潇洒。

念奴娇

沁园秋早。对亭台冷落，荒凉池沼。西帝晨游无异胜，都把仙花开了。金粟玲珑，鹅黄娇嫩，不管霜风悄。清香入梦，梦魂惟怕天晓。

乘兴折取一枝，满身兰麝，不减蟾宫好。赠与佳人，因笑道、休学姮娥空老。待约明朝，金英满地，莫遣儿童扫。相将花上，醉眠尤胜芳草。

失调名

芳草绿如茵，与蓝袍、草争翠色。

鹧鸪天

五百人中第一仙。等闲平步上青天。绿袍乍著君恩重，黄榜初开御墨鲜。

龙作马，玉为鞭。花如罗绮柳如绵。时人莫讶登科早，自是嫦娥爱少年。

鹊桥仙

我嗔今夜为情忙，又那得、工夫送巧。

失调名

瑞霞成绮。映舴艋棹轻，鲤鱼狂风起。

又

□□□□□金缕。探听春来处。

又

晓日楼头残雪尽。乍破腊、风传春信。
彩燕丝鸡，珠幡玉胜，并归钗鬓。

又

南楼人未起。爆竹声闻，应在笙歌里。

又

竹爆当门庭，震门陛也。

又

待醉里小王，书写副、神荼郁垒。

木兰花

东风昨夜吹春昼。陡觉去年梅蕊旧。谁
人能解把长绳，系得乌飞并兔走。清香潋滟
杯中酒。新眼苗条江上柳。尊前莫惜玉颜酡。
且喜一年年入手。

又

东风昨夜归来后。景物便为春意候。金
丝齐奏喜新春，愿介香醪千岁寿。寻花插破
桃枝臭。造化工夫先到柳。熔酥剪彩恨无香，

且放真香先入酒。

失调名

捏个牛儿体态。按年令，旋拖五彩。彭
乐相迎，红裙捧拥，表一个、胜春节届。

又

彩缕幡儿花枝小。凤钗上、轻轻斜袅。

又

金吾不禁元宵，漏声更莫催晓。

又

况今宵好景，金吾不禁，玉漏休催。

又

金铺翠、蛾毛巧。是工夫不少。闹蛾儿
拣了蜂儿卖，卖雪柳、宫梅好。

又

灯球儿小，闹蛾儿颤。又何须头面。

新水令

冒风连骑出金城，闻孤猿韵切，怀念亲
眷。为笑徐都尉，徒夸彩绘，写出盈盈娇面。
振旅阗阗。讶睹阆苑神仙。越公深骤万马，
侵袭转盼。感先锋，容放镜，收鸾鉴一半。
归前阵，惨怛切，同陪元帅恣欢恋。二岁偶
尔，将军沈醉连绵，私令婢捧菱花，都市寻

遍。新官听说邀郎宴。因令赋悲欢。孰敢。
做人甚难。梅妆复照，傅粉重见。

驻马听

雕鞍成谩驻。望断也不归，院深天暮。
倚遍旧日，曾共凭肩门户。踏青何处所。想
醉拍、春衫歌舞。征旆举。一步红尘，一步
回顾。

行行愁独语。想媚容、今宵怨郎不住。
来为相思苦。又空将愁去。人生无定据。叹
后会、不知何处。愁万缕。仗东风、和泪吹
与。

南歌子

禁苑沈沈静，春波漾漾行。仙姿才韵两
相并。叶上题诗、千古得佳名。

墙外分明见，花间隐约声。银钩掷处眼
双明。应讶昔时、不得见情人。

失调名

角黍厅前，祭天神、妆成异果。

又

旋酌菖蒲酒，灵气满芳尊。

又

自结成同心百索。祝愿子、更亲自系著。

阮郎归 端五

及妆时结薄衫儿。蒙金艾虎儿。画罗领抹
褙裙儿。盆莲小景儿。

香袋子，搐钱儿。胸前一对儿。绣帘妆罢
出来时。问人宜不宜。

又 端五

门儿高挂艾人儿。鹅儿粉扑儿。结儿缀着
小符儿。蛇儿百索儿。

纱帕子，玉环儿。孩儿画扇儿。奴儿自是
豆娘儿。今朝正及时。

失调名

双凤钗头，争带御书符。

又

才向兰汤浴罢，娇羞簪云髻，正雅称鸳鸯
会。

又

才向兰汤浴罢，娇羞困、殢人未忺梳掠。
艾虎衫儿，轻衬素肌香薄。

又

御符争带。斜插交枝艾。

又

从前浪荡休整理。钉赤口、防猜忌。而

今魔难管全无，一似粽儿黏腻。

又

天上佳期。九衢灯月交辉。摩睺孩儿，斗巧争奇。戴短檐珠子帽，披小缕金衣。嗔眉笑眼，百般地、敛手相宜。转睛底、工夫不少，引得人爱后如痴。快输钱，须要扑，不问归迟。归来猛醒，争如我、活底孩儿。

伊州曲

金鸡障下胡雏戏。乐极祸来，渔阳兵起。鸾舆幸蜀，玉环缢死。马嵬坡下尘滓。夜对行宫皓月，恨最恨、春风桃李。洪都方士。念君萦系。妃子。蓬莱殿里。觅寻太真，宫中睡起。遥谢君意。泪流琼脸，梨花带雨，仿佛霓裳初试。寄钿合、共金钗，私言徒尔。在天愿为、比翼同飞。居地应为、连理双枝。天长与地久，唯此恨无已。

失调名

月到中秋偏莹。乍团圆、早欺我孤影。穿帘共透幕，来寻趁。钩起窗儿，里面故把、灯儿扑烬。

看尽古今歌咏。状玉盘、又拟金饼。谁花言巧语、胡厮胫。我只道、尔是照人孤眠，恼杀人，旧都名业镜。

又

手捻茱萸簪髻，一枝聊记重阳。

又

插黄花、对尊前，且看茱萸好。

又

明年此□，□知谁健，且尽黄花酒。

倾杯序

昔有王生，冠世文章，尝随旧游江渚。偶尔停舟寓目，遥望江祠，依依陌上闲步。恭诣殿砌，稽首瞻仰，返回归路。遇老叟，坐于矶石，貌纯古。因语□，子非王勃是致，生惊询之，片饷方悟。子有清才，幸对滕王高阁，可作当年词赋。汝但上舟，休虚。迢迢仗清风去。到筵中、下笔华丽，如神助。

会俊侣。面如玉。大夫久坐觉生怒。报云落霞并飞孤鹜。秋水长天，一色澄素。阎公竦然，复坐华筵，次诗引序。道鸣鸾佩玉，锵锵罢歌舞。

栋云飞过南浦。暮帘卷向西山雨。闲云潭影，淡淡悠悠，物换星移，几度寒暑。阁中帝子，悄悄垂名，在于何处。算长江、俨然自东去。

失调名

奈愁又、愁无避处，愁随一线□长。

又

万户与千门，驱傩鼎沸。

又

兽炭共围，通宵不寐，守尽残更待春至。

蝶恋花

花为年年春易改。待放柔条，系取春常在。宫样妆成还可爱。鬓边斜作拖枝戴。

每到无情风雨大。点检群芳，却是深丛耐。摇曳绿罗金缕带。丹青传得妖娆态。

如梦令

今夜荼蘼风起。应是玉消琼碎。淡荡满城春，恼破愁人春睡。须醉。须醉。莫待梅黄雨细。

最高楼

司春有序，排次到荼蘼。远预报，在庭知。蕊珠宫里晨妆罢，披香殿下晓班齐。探花正、驱使问，菊花期。

元不逊、梅花浮月影，也知妒、梨花带雨枝。偏恨柳、绿条垂。与其向晚包团絮，不如对酒折芳蕤。谢东君，收拾在，牡丹时。

南柯子

翠袖熏龙脑，乌云映玉台。春葱一簇荐

全宋词 无名氏

金杯。曾记西楼同醉、角声催。

袅袅凌波浅，深深步月来。隔纱微笑恐郎猜。素艳浓香依旧、去年开。

满庭芳

青幄高张，琼枝巧缀，万颗香染红殷。绛罗衣润，疑是火然山。白玉钗头试簪，黄金带、奇巧工钻。题评处，仙家异种，分付在人间。

年年。输帝里，欢呼内监，妆点金样。况曾得真妃，笑脸频看。炎岭当时奏曲，风流命、乐府名传。凭谁道、移归禁苑，长使近天颜。

浣溪沙

酒拍胭脂颗颗新。丹砂然火弃精神。暑天秋杪棉生春。

香味已惊樱实淡，绛皮还笑荔枝皴。美人偏喜破朱唇。

南柯子

积雪迷松迳，围炉掩竹扉。床头一味有蹲鸱。软火深开香熟、已多时。

自得陶朱法，休教懒瓚知。浪传黄独正甘肥。紫玉婴儿盈尺、更新奇。

贺新郎 为东阊赵先生寿

天意扶炎宋。为吾皇、维衡岳孕，长沙星梦。社稷勋庸天地窄，不数智名功勇。要自有、胸中妙用。擎着东南天一柱，看边民、买犊归耕种。官职易，此身重。

黄封已见传宣送。却春来、洪钧初转，紫枢归拱。岁岁玉楼春晷处，慧质明妆环拥。正弟劝、兄酬欢纵。一寸丹心坚似铁，待磨崖、勒就浯溪颂。龙尾道，接天踵。

贺圣朝 预赏元宵

太平无事，四边宁静狼烟眇。国泰民安，谩说尧舜禹汤好。万民翘望彩都门，龙灯凤烛相照。只听得教坊杂剧欢笑。美人巧。

宝篆宫前，咒水书符断妖。更梦近、竹林深处胜蓬岛。笙歌闹。奈吾皇、不待元宵景色来到。只恐后月，阴晴未保。

踏莎行

宴罢琼林，醉游花市，此时方显男儿志。

祝英台近

客毡寒，兰房悄，金炉爇红兽。好个霜天，消遣正宜酒。嫩橙初截鹅肪，肌肤香透。

又还记、吴姬纤手。

事难偶。墨冻空染梨笺，新词谩题就。酒薄愁浓，敲枕听寒漏。可堪霜月亭亭，照人无寐，映窗外、一枝梅瘦。

花心动 连昌宫有感

碧瓦朱甍，锁千门沈沈，丽日初旭。画栋暗尘，锦瑟空弦，窈窕故窗红绿。御柳宫花依然好，春不管、为谁妆束。翠华远，风光尽属，野樵夷牧。

指似行人恸哭。尚能道、先朝圣游不足。凤辇路荒，龙沼波干，犹有弃珠遗玉。禁廊人静风琴响，祇疑是、霓裳遗曲。断魂晚，寒鸦又啼古木。

西江月

梁上喃喃燕语，纸间戢戢蚕生。满城风雨近清明。不道有人新病。

春事一溪流水，杨花千点浮萍。好风一霎为吹晴。独步小园清影。

梅花引

清阴陌。狂踪迹。朱门团扇香迎客。牡丹风。数苞红。水香扑蕊，新妆谁为容。

蜡灯春酒风光夕。锦浪龙须花六尺。月波寒。玉琅玕。无情又是，华星送宝鞍。

恋绣衾

元宵三五酒半醺。马蹄前、步步是春。
闹市里、看灯去，喜金吾、不禁夜深。

如今老大都休也，未黄昏、先闭上门。
待月到、窗儿上，对梅花、如对故人。

青玉案

年年社日停针线。怎忍见、双飞燕。今日江城春已半。
一身犹在，乱山深处，寂寞溪桥畔。

春衫著破谁针线。点点行行泪痕满。落日解鞍芳草岸。
花无人戴，酒无人劝，醉也无人管。

捣练子

偏□戏，最风流。斗帐金猊暖不收。一阵蜜蜂狂絮里，
酒酣眠折玉搔头。

又

初酒醒，乍衣单。褪著裙儿侧著冠。门外小桥寒食夜，
月明人去杏花残。

楼心月

柳下争拿画桨摇。水痕不觉透红绡。月

全宋词 无名氏

明相顾羞归去，都坐池头合凤箫。

又

手把新荷叶一枝。唤来池上只愁归。流萤裹在红纱袖，忽到持杯个个飞。

又

新著生红小舞衣。案前磨墨误淋漓。含嗔逗晚不梳洗，背面牙床吃荔支。

花心动 得于江西歌者，而不知名氏

粉蝶云齐，度清笳、愁入暮烟林杪。素艳透春，玉骨凄凉，勾带月痕生早。江天苍莽黄昏后，依然是、粉寒香瘦。动追感、西园嫩约，夜深人悄。

记得东风窈窕。曾夜踏横斜，醉携娇小。惆怅旧欢，回首俱非，忍看绿笺红豆。香销纸帐人孤寝，相思恨、花还知否。梦回处，霜飞翠楼已晓。

踏莎行

殢酒情怀，恨春时节。柳丝巷陌黄昏月。把君团扇卜君来，近墙扑得双蝴蝶。

笑不成言，喜还生怯。颠狂绝似前春雪。夜寒无处著相思，梨花一树人如削。

鹧鸪天

题得相思字数行。起来桐叶满纱窗。秋

全宋词 无名氏

光欲雨棋声泻，粉帐不穿花露香。

新寂寞，旧疏狂。玉炉消息记钱塘。小
阑立遍红蕉树，一带残云趁月黄。

阮郎归

薄罗生色画醅醪。醅醪满架时。隔池贪
看燕争泥。坠双红荔支。

销金字，晚唐诗。夹纱团扇儿。自遮微
雨傍花归。个情天得知。

青门怨

月笄烟景。远思孤影。旧梦云飞，离魂
冰冷。脉脉恨满东风。对孤鸿。

翠珠尘冷香如雾。人何许。心逐章台絮。
夜深酒醒烛暗，独倚危楼。为谁愁。

水调歌头

不能烦恼得，掉臂便归休。前度风樯，
这回潦辙几悠悠。幸得有云一谷，更自有书
万卷，著甚麽来由。月采混鱼目，霜口涴蝇
头。

相山中，侯醉境，将诗流。情知薄命，
天样勋业也须收。避遯世间万事，推放那边
一壁，百尺卧高楼。日月草头露，天地水中
沔。

失调名

东南妩媚，雌了男儿。

霜天晓角

一声阿鹊。人在云西角。信有黄昏风雨，
孤灯酒、不禁酌。

错错。谁误著。明明明做却。颇寄香笺
归去，教看了、细揉嚼。

满庭芳

凤阁祥烟，龙城佳气，明禋恭谢时丰。
绮罗争看，帘幕卷南风。十里仙仪宝仗，暖
红翠、玉碾玲珑。銮回也，箫韶缓奏，声在
五云中。

千官，迎万乘，丝纶叠叠，锦绣重重。
听鸣稍辇路，宴罢鳌宫。瞻仰天颜有喜，君
恩霈、寰宇雍容。生平愿，洪基巩固，圣寿
永无穷。

庆清朝

银漏花残，红消烛泪。九重鱼钥欢声沸。
奏万乘、祥曦门外。盖圣君、恭谢灵休，谨
访景明嘉礼。天意好，祥风瑞月，时正当、
小春天气。

全宋词 无名氏

禁街十里香中，御辇万红影里。千官花底，控绣勒、宝鞭摇曳。看万年，永庆吾皇，捻指又瞻三载。

御街行

时康三载升平世。恭谢三朝礼。群臣禁卫带花回，靛巷儿郎精锐。战袍新样团雕拥，重隘围子队。

绣衣花帽挨排砌。锦仗天街里。有如仙队玉京来，妙乐钧天盈耳。都民观望时，果是消灾灭罪。

瑞鹤仙

是欢声盈万户。庆景陵礼毕，銮舆游步。西郊暖风布。喜湖山深锁，非烟非雾。传收绣羽。骅骝驰骤绒缕。望彤芳、稳稳金銮，袞鸾翔舞。

云驭。近回天厩，锡宴琼津，洪恩均顾。霞天向暮。翠华动，舞韶举。绛纱笼千点，星飞清禁，银烛交辉辇路。瑞光中、渺祝无疆，太平圣主。

真珠帘

病酒情怀犹困懒。

沁园春

国步多艰，民心靡定，诚吾隐忧。叹浙民转徙，怨寒嗟暑，荆襄死守，阅岁经秋。虏未易支，人将相食，识者深为社稷羞。当今亟，出陈大谏，箸借留侯。

□□迂阔为谋。天下士如何可籍收。况君能尧舜，臣皆稷契，世逢汤武，业比伊周。政不必新，贯仍宜旧，莫与秀才做尽休。吾元老，广四门贤路，一柱中流。

小重山

鼓报黄昏禽影歇。单衣犹未试，觉寒怯。尘生锦瑟可曾阅。人去也，闲过好时节。

对景复愁绝。东风吹不散，鬓边雪。些儿心事对谁说。眠不得，一枕杏花月。

谒金门

休只坐。也去看花则个。明日满庭红欲堕。花还愁似我。

索性痴眠一和。凭个梦儿好做。杜宇不知春已过。枝头声越大。

失调名

惜花心性。

行香子

浙右华亭。物价廉平。一道会、买个三升。打开瓶后，滑辣光馨。教君霎时饮，霎时醉，霎时醒。

听得渊明。说与刘伶。这一瓶、约迭三斤。君还不信，把秤来秤。有一斤酒，一斤水，一斤瓶。

长相思

晴也行。雨也行。雨也行时不似晴。天晴终快人。

名也成。利也成。利也成时不似名。名成天下惊。

摸鱼儿 紫云山房拟赋菡

过湘皋、碧龙惊起，冰涎犹护髯影。春洲未有菱歌伴，独占暮烟千顷。呼短艇。试翦取纤条，玉溜青丝莹。尊前细认。似水面新荷，波心半掩，点点翠钿净。

凄凉味，酪乳那堪比并。吴盐一箸秋冷。当时不为鲈鱼去，聊尔动渠归兴。还记省。是几度西风，几度吹愁醒。鸥昏鹭暝。谩换得霜痕，萧萧两鬓，羞与共秋镜。

失调名

东君去后花无主。

多 丽 杨花

日初长，宝炉一缕沈烟。绿阴新，垂杨亭树，知谁巧擘香绵。有时共、落红零乱，有时共、芳草留连。只道无情，那知有意，几回飞过绮窗前。人争讶，艳阳三月，乾雪舞晴天。游丝外，不堪燕掠，无奈蜂黏。

那小鬟、忒黠娇劣，镇日地、倚阑干。轻吹处、樱桃的的，闲拈处、笋指纤纤。爱点猩罗，装成粉缣，嗔人不许放朱帘。端相好、蓦然风起，特送上秋千。明朝看，池塘雨过，萍翠应添。

沁园春 未开梅

我善观梅，识梅妙处，舍我其谁。待裁冰翦雪，已无足道，凝酥弄粉，愈不为奇。枉费心神，巡檐索笑，点检南枝并北枝。梅应道，似这般题品，未是相知。

分明有个端倪。遮莫把人间凡眼窥。那精神全在，半含蕊处，风流全在，未有香时。万木丛边，两三点白，此是生生化化机。花开也，又怎生消得，个样词儿。

壶中天

日长晴昼。厌厌地、懒向窗前绉绣。因倚屏风无意绪，把眉儿双皱。似醉还醒，才眠又起，频捻梨花嗅。看他儿女，闲寻百草来斗。

相思能几何时，料归期不到，清和时候。生怕鸳鸯香被冷，旋薰沈檀薰透。欲把单衣，鼎新裁剪，又怕供春瘦。试看今夜，孤灯还有花否。

满江红 梅词

一点阳和，天不许、凡花先得。这些儿深意，蜂蝶怎生窥测。北陆正当风凛冽，南枝却漏春消息。教琼仙、翦水缀成葩，天然白。

影横处，寒窗月。香浮处，寒梢雪。被东皇做就，这般标格。虽是腊前年后景，终非竹外篱边物。不安排、顿放玉堂中。真堪惜。

买坡塘 和李玉田韵

喜西风、朝来如约，新凉一雨初霁。家山望断知何处，渺渺长天秋水。空眼底。叹雁杳鱼沈，尺纸无人寄。芸窗草砌。渐影颤疏桐，声敲落叶，孤枕怎成睡。

全宋词 无名氏

逢场戏。遮莫悲秋憔悴。今朝有酒须醉。
尊前待唤佳人道，为雪藕丝轻脆。闲省记。
便笑口频开，一岁知能几。归期尚未。且蜡
屐兰桡，湖山深处，同赏月中桂。

瑞鹤仙 和李梅南

赏残陶径菊。正裊裊愁予，风凄露肃。
何人抱幽独。更檐马锵金，廊鱼响木。此情
谁属。向底处、骋怀游目。小窗前，频览菱
花，一笑鬢丝犹绿。

萧索。故国云迷，佳人日暮，轻颦倚竹。
短钗敲玉。算几夜，恁孤宿。问旅情如许，
怎生排遣，应费酒尊诗轴。最无端、谁隔西
楼，正调弦促。

更漏子

画楼深，春昼永。帘幕东风微冷。莺啭
罢，燕归来。佳人午梦回。

鬢钗横，眉黛浅。一捻楚腰纤软。推绣
户，倚雕阑。无言看牡丹。

又

鬢慵梳，眉懒画。独自行来花下。情脉
脉，泪垂垂。此情知为谁。

雨初晴，帘半卷。两两衔泥新燕。人比
燕，不成双。枉教人断肠。

又

粉墙低，蓬户小。一点尘埃不到。眠纱

全宋词 无名氏

帐，坐薄团。道人随分安。

笋芽新，蔬甲嫩。日日家常羹饭。羹饭
罢，怎消闲。携筇出看山。

愁倚阑令

东风恶，宿云凝。忒无情。合造梨花深
院雨，断肠声。

枕上春梦初醒。红窗外、何处啼莺。已
办春游双画舫，几时晴。

红窗迥

河可挽。石可转。那一个愁字，却难驱
遣。眉向酒边暂展。酒后依旧见。

枫叶满阶红万片。待拾来、一一题写教
遍。却倩霜风吹卷。直到沙岛远。

一翦梅

漠漠春明酒半酣。风透春衫。雨透春衫。
人家蚕事欲眠三。桑满筐篮。柘满筐篮。

先自离怀百不堪。樯燕呢喃。梁燕呢喃。
篝灯强把锦书看。人在江南。心在江南。

长相思

不思量。又思量。一点寒灯耿夜光。鸳
衾闲半床。

全宋词 无名氏

雨声长。漏声长。几阵斜风摇纸窗。如何不断肠。

又

云垂垂。雨霏霏。只恐今年花事迟。不然辜负伊。

燕飞飞。柳依依。有个人人倚翠扉。深攒双黛眉。

又

雨如丝。柳如丝。织出春来一段奇。莺梭来往飞。

酒如池。醉如泥。遮莫教人有醒时。雨晴都不知。

又

燕成双。蝶成双。飞去飞来杨柳旁。问伊因底忙。

绿纱窗。篆炉香。午梦惊回书满床。棋声春昼长。

采桑子

年年才到花时候，风雨成旬。不肯开晴。误却寻花陌上人。

今朝报道天晴也，花已成尘。寄语花神。何似当初莫做春。

风光好

柳阴阴。水深深。风约双鳧不自禁。碧

波心。

孤村桥断人迷路。舟横渡。旋买村醪浅
浅斟。更微吟。

虞美人 此上佚八页

□□□□□□□。 □□□□□。
□□□□□□□。 □□□□□□、□□□。
□□□□□□□处。归向桃源住。桃源有
路透渔溪。自恨仙凡从此、隔云泥。

又

绮疏人把罗衣叠。岫幌铺残月。宝烟细
袅博山中。梦惹暖红鸳锦、醉香风。
觉来犹记乘鸾处。不是蓝桥住。落花流
水认前溪。想见五云为路、静无泥。

又 咏八月梅

悲商吹尽枝间绿。绛萼含冰玉。为谁搀
早冒寒开。应念天涯憔悴、挽春回。
玉壶自酌清漪满。又识东风面。夜深斜
月印窗纱。好在数枝疏瘦、两三花。

又 赠吕庆长

萧萧风竹千蛟舞。云阁催诗雨。中秋时
节变新凉。又是一番红叶、下三湘。
君如膝上王文度。早晚乡关去。绣香佳
处且留连。正好橙黄橘绿、未寒天。

又 咏双海棠

当年合德并飞燕。颉颃无人见。清魂沦

全宋词 无名氏

入海棠枝。料想天寒同著、翠罗衣。
同心佩带连环玉。并髻云鬟绿。谁教红
萼自成双。恰似新荷叶里、睡鸳鸯。

木兰花 春日述怀

小桃枝上东风转。□□草绿江南岸。绿
杨学舞小蛮腰，红药惜开菩萨面。
故乡何处天涯远。黄梁梦断行云断。登
楼准拟故人书，殷勤试问西归雁。

朝中措 咏秋日牡丹赠严尹父

严霜封草树凋红。叶落小园空。何事洛
阳花面。却来冠冕秋风。
尊前羞损，篱边野菊，池上芙蓉。莫放
花归昆阆，且留客醉金钟。

又

红鸾飞下绿云中。天淡日和融。回首小
园桃杏，怜伊独困霜风。
妖姿丽质，天然富贵，不假铅红。梦作
一双蝴蝶，翻翻绕遍芳丛。

又

洛阳常见画图中。春去只心融。国色辉
开寒日，天香熏破霜风。
平生看了，姚黄魏紫，一捻深红。莫是
神仙韩令，裁成顷刻花丛。

又 咏九月桃呈□晋侯

从来黄菊占秋风。红只许芙蓉。正是百

花浓睡，如何唤起春工。

小桃破萼，胭脂淡伫，妆粉轻笼。为报多情刘阮，武陵消息先通。

又

宦游只欲赋归休，花为解离愁。看取星星潘鬓，花应羞上人头。

武陵流水，桃源路远，空误渔舟。把住春光一醉，从教风叶悲秋。

西江月 登城晚望

草市人归日落，荒城风急鸦翻。独携尊酒上高寒。缥缈云横楚观。

柳外半篙绿水，烟中数笔青山。天涯流落岁将残。望断故园心眼。

又 待雪

扑扑云垂四野。冥冥雁下平芜。萧萧风叶乱黄芦。寒入一滩鸥鹭。

准拟云窗水榭。装成玉树冰壶。卷帘独坐捻髭须。待看六花飞舞。

又

风雨朝来恶甚，池塘春去无多。绿杨阴里溜莺梭。枝上老红犹堕。

酒满蚁浮金匱，烛残泪滴铜荷。更阑孤枕奈情何。只恐巫山梦破。

又 冷氏小楼春望

花下春光正好，柳边春色才多。雨声日

夜长沧波。暗地芳心滴破。

拍拍浪飞白雪，冥冥山点青螺。汀兰岸芷有情么。还惜江城春过。

又 待雪

膝下红金不暖，窗前绛蜡犹然。夜深城麓走风烟。的砾还飘雪霰。

海上正迷蝶梦，山阴未棹溪船。愿骑白凤玉为鞭。西赴瑶池芳宴。

又 雪

琼沼融成沆瀣，冰檐滴尽真珠。一园草木气方苏。又学杨花飞舞。

何必乱飘密洒，却疑细糝轻铺。谁将粉墨画成圆。玉做小亭高树。

又 即席呈吴节判二首

翦翦轻寒雨后，瞳瞳晓日晴时。春风先到绿杨枝。金缕野桥山市。

鸚鵡巧调琴筑，海棠惜吐胭脂。玉骢未解锦障泥。且挂征鞭一醉。

又

翠岭游仙梦破，暖香残酒醒时。子规啼月下花枝。日涌山光照市。

柳拂眉间黛色，桃匀脸上胭脂。萋萋芳草路无泥。脉脉归心似醉。

又

风雨余寒过了，池塘春水生时。迁莺飞上拂云枝。春遍柳村花市。

酒面清空似水，玉杯温莹如脂。莫教花

全宋词 无名氏

谢浣尘泥。把住东君索醉。

点绛唇 晓步楚观

晓翠初分，挂藤窈窕穿深静。鸟啼风径。
竹舞千蛟影。

又过重阳，感叹伤流景。人多病。酒杯慵问。闲却金卮柄。

好事近 咏梅

篱落晓来霜，花嫩不禁寒力。脉脉自摇
疏影，印一奁空碧。

天生潇洒谢夫人，绝世有谁识。何必嫣然一笑，已倾城倾国。

秦楼月 五阙佚二

□□□。□□□□□□□□。□□□。
□□□□，□□□□。

白鸥飞下屏山曲。行人点破秋郊绿。秋郊绿。细看重咏，怎生得足。

又

秋漠漠。登临常羨东飞鹤。东飞鹤。一襟乡泪，为君观落。

明年不负黄花约。故人须我归舟泊。归舟泊。荆溪亭下，晚秋寒薄。

又 待雪

风淅淅。天容暗淡梅花白。梅花白。点

全宋词 无名氏

酥凝粉，比君不得。

清歌飞下龙沙雪。绮疏休印蟾宫月。蟾宫月。婵娟虽好，有时圆缺。

西地锦 章台留客

重过黄梁古驿。著一鞭春色。长亭细柳，青青尚浅，不禁攀折。

且醉章台风月。莫归鞍催发。紫泥诏下，朝天去了，如何来得。

如梦令 留客

试问春归何处。红入小桃花树。同访古章台，把盏重听金缕。休去。休去。应被好山留住。

清平乐 辛卯清明日

风不定。舞碎海棠红影。数点雨声池上听。湿尽一庭花冷。

倚阑多少心情。轻寒未放春晴。谁管天涯憔悴，楚乡又过清明。

浣溪沙

遍地轻阴绿满枝。乍晴初试袷罗衣。东风院落日长时。

鸂鶒池边飞燕子，海棠花里闹蜂儿。一

全宋词 无名氏

春心事只春知。

望江南 立秋日晓作

清夜老，流水淡疏星。云母窗前生晓色，梧桐叶上得秋声。村落一鸡鸣。催唤起，带梦著冠缨。老去悲秋如宋玉，病来止酒似渊明。满院竹风清。

醉蓬莱 生朝日

见笋成新竹，燕教雏飞，画堂清昼。萱草榴花，遍小庭如绣。角簟纱厨，葛巾葵扇，正麦秋时候。玉尘生风，翛然隐几，香蟠金兽。

又值生初，故乡何在，三楚云高，谩劳回首。睡起情怀，况渊明止酒。赖有宾朋，惠来相顾，尽一时英秀。旋涤瑶觞，重歌金缕，与公同寿。

满庭芳 牡丹

梅子成阴，海棠初谢，小园才过清明。百花扫地，红紫践为尖。别有烟红露绿，嫣然笑、管领东君。还知否，天香国色，独步殿余春。

轻盈。多态度，洛阳图画，韩令经营。想谪仙风韵，洒面词成。一捻深红尚透，谁信道、花亦通灵。君休待、花归阆苑，莫惜

醉山倾。

汉宫春

争似我，随时临风对月，畅饮更高歌。

瑞鹤仙

恨佳人命薄。似春云无定，杨花飘泊。

失调名

须信道、颜色如花，命如秋叶。

又 古秋千词

但入新年，愿百事、皆如意。

水龙吟

□□含娇眼。

失调名

雨后轻寒。

又 古柳词

柳丝柔无力。

又

伤怀长是蹙双眉。怎禁持。

全宋词 无名氏

又
杨花飞絮。搅乱少年情绪。
又
天气阴阴。
又
倚遍阑干十二楼。

满庭芳

柳眼花心，此夜欢会。

失调名

蝶意蜂情，恣还飘逸。
又
金鸭香消。

念奴娇

脉脉此情难识。

失调名

无计奈愁何。
又
知他今夜，好好为谁梳洗。

又

西楼独上等多时。月团圆、人未归。

最高楼

南陌踏青游。

青玉案

更憔悴、羞人见。

失调名

任他春去春来。

又

嫩草初抽匀细绿。

又

湖膩烟光，柳垂新绿。

又

语燕飞来绕画梁。

又

一钩新月。

又

怕到黄昏转凄切。

全宋词 无名氏

又
凝情羞对海棠花。
又
枝头点检，退尽芳菲。
又
寸心如铁不关愁。
又
入到春来转见愁。

最高楼

却教人、逢春怕，见花羞。

失调名

不如柳絮，穿帘透幕，飞到伊行。

菩萨蛮

衔泥双燕来还去。

天仙子

谷雨清明空屈指。

失调名

这愁绪、仗他谁。

又 古赏芳春词

樱桃新荐小梅红。

又

恩爱顿成离别恨。

又

要解心头愁闷，除非殢酒。

洞仙歌

惟有莺莺燕燕。

失调名

病酒厌厌，未解余醒，三竿丽日。

千秋岁

一声啼鸟，常道无消息。

失调名

暗把归期数。

又
危楼愁独倚。

谒金门

满地落红千片。

失调名

频拭脸边新泪。

好事近

更一声啼鸟。

失调名

落花狼藉无行处。

贺新郎

一点芳心事。

虞美人

东君去后无踪迹。

失调名

登楼欲认经由处，无奈云山遮望眼。

又

缺月挂檐牙。

又

杜鹃声劝不如归。……蹙损远山眉。

南乡子

宝鸭沈烟袅。

最高楼

子规叫断黄昏月。

失调名

夜深帘幕静，一曲管弦清。

又 古上元词

千门灯火，九街风月。

蝶恋花

十里绮罗香不断。

全宋词 无名氏

失调名

灯火楼高，移下一天星斗。

天仙子

残月朦胧人瘦损。

失调名

那得工夫送。

天仙子

危楼十二阑干曲，望不尽、愁不尽。

失调名

春光悭涩，风颠雨恶，未放晴天气。

又

百紫千红开遍了。

又

自家无好况。

又

谁道酒能消恨。

全宋词 无名氏

又

绿草茸茸媚柳芳。

极相思

夕阳外，禽声切。

点绛唇

荷叶乍圆，正是困人天气。

失调名

落花点点绣苍苔。

又

花开时节连风雨。

又

杏花著雨胭脂透。

水调歌头

云作伴，月为邻。

太清歌词

红片半随风，又半随流水。

全宋词 无名氏

鹊桥仙

吴蚕老后。

殢人娇

也待作个、箬儿寄与。

极相思

一番雨过横塘。

南歌子

菖蒲泛酒香。

宴清堂

旋折枝头新果。

洞仙歌

六尺湘漪簟冷。

失调名

玉泉清洁，正好浮瓜沈李。

全宋词 无名氏

又

花底倾杯，花影娇随人醉。

水调歌头

竹边风细，月色淡阴阴。

长相思

绣停针。泪盈盈。断肠梁燕语声频。

声声慢

双双旧家燕子，又飞来、清明池阁。

快活年

蛩吟声不住。

金落索

风撼梧桐影碎。凄凉天气。

品令

残蝉噪晚

全宋词 无名氏

点绛唇

枕簟冰清，渐觉秋凉也。

洞仙歌

窗外蛩吟雨声细。

御街行

云淡碧天如水。

夏金钗

怎数向、更筹计。

失调名

敲枕无眠又无寐。

又 巫山云雨歌词

便直饶、铁作心肠，也须是泪滴。

卜算子

欲把愁分付。

全宋词 无名氏

又

算一一都在我心头。

满庭芳

似篾身材，纤腰一捻，新来消瘦如削。

失调名

一寸柔肠，如丝千结，不奈愁如铁。

秋蕊香

眼也生应哭破。

长相思

好思量。转凄惶。捱到黄昏愈断肠。

卜算子

云雨阳台梦不成。

古四北洞仙歌

银缸挑尽，纱窗未晓，独拥寒衾一半。

全宋词 无名氏

失调名

魄散魂飞。

绮罗香

酒醒后、一枕清风，梦断处、半窗残月。

鹧鸪天

小小池亭自有凉。

又

落花凝恨夕阳中。

失调名

春来长是病厌厌。

一丛花

晓来寒露滴疏桐。

念奴娇 中秋

不比寻常三五夜。

全宋词 无名氏

失调名

愁厌厌、脉脉上心谁消遣。

吴音子

早团圆，早早团圆。

声声慢

心虽相许，事未曾谐。

满庭芳

风剪梧桐。

失调名

同赏败荷疏柳。

采莲令

重阳泪眼，又早是、苦离肠。

朝中措

征雁不来无信，教人空度重阳。

全宋词 无名氏

满庭芳

黄菊正飘香。

于飞乐

近来清瘦，为谁为谁。

失调名

自家无好况。

双雁儿

这心事、倚他谁。

诉衷情

黄昏新月一钩纤。

满江红

魂梦断，难寻觅。

定风波

素笺封了还重拆。

全宋词 无名氏

满江红

谁知恩爱，变成怨恨。

失调名

无情却被多情恼。

念奴娇 木犀

乘兴折取一枝，满身兰麝。

失调名

花有重开日□圆。

念奴娇

一点芳姿，信道是、不比人间凡木。

失调名 古木犀词

费尽骚人词与诗。

又 古岩桂词

岩玉枝头金粟斗。

全宋词 无名氏

又 古梅词

枉被梨花瘦损，又成春梦。

念奴娇

冻云阁雨，渐长空迢迢，严凝天气。愁
雀无声深院静。

失调名

闻道酒肠宽似海。

又

山万叠，水千重。

又

纱窗晓色朦胧。

又

别是一般春色好。

又

更作句桃符。

秋千儿词

小子里、灯□声，明年又添一岁。

全宋词 无名氏

江神子

今朝鸳帐酒醒初。……还忧酒，解醒无。

失调名

晚起倦梳妆。

西江月

强调朱粉对菱花。蹙损眉峰懒画。

失调名

夜来一阵催花雨。

又

满地榆钱，算来难买住春归。

小重山

六曲句阑四面风。

又

一钩新月上。

全宋词 无名氏

失调名

红粉墙头，绿杨楼外，声声唤起新愁恨。

又

料如今，甘心海角天涯。

又

枕冷衾寒，夜长无奈愁何。

又

月移疏影上窗纱。

又

轻盈照路旁。

又

独倚阑干十二。

沁园春

凝眸。悔上层楼。便惹起新愁与旧愁。

失调名

离情愁思，尽分付、眉头眼底。

于飞乐

教我莫思量，争不思量

全宋词 无名氏

满庭芳

兽炉烟断，残烛照庭帏。

失调名

鸳鸯鸥鹭，浴乱一池春碧。

真珠帘

把酒祝东君，愿与花枝长为主。

武陵春

柳绿花红春烂漫。

失调名

断肠屈曲屏山。

洞仙歌

独拥香衾一半。

失调名

蹙损两眉峰。

又

添憔悴、看肌瘦损。

又

细雨乱如毛。

又

恨江南塞北，鱼沈雁杳，空肠断、书难寄。

又

去不远，路无多。

又 喷饶人词

尽啜情一饱、泪珠弹子重搵，背人睡也。

卜算子

你为情多泪亦多。

阮郎归

无心傍照台。

失调名

巧画远山眉。

全宋词 无名氏

于飞乐

天然体段殊常。

声声令

未怕飞燕似轻盈。

失调名 瑞雪对江梅赋

须教相并檐前望，被飞絮、扑簌香腮。

定风波

古鼎龙涎香犹喷。

失调名

烛暗时酒醒，原来又是梦里。

又

为谁瘦、为谁癯。

喜迁莺

芳春天晓。听绿树、数声如簧莺巧。

全宋词 无名氏

满庭芳

花外风传漏永，鸳鸯暖、金鸭香浓。

失调名

香阁寂寥。

鹧鸪天

清明将近春时节。

一落索

倚楼一霎酒旗风。

如梦令

不暖不寒天，春色恰倚人意。

庆青春

平明一阵催花雨。

踏莎行

悄无人语重帘卷。

全宋词 无名氏

夏云峰

昨日看花花正好，枝枝香嫩红殷。

粉蝶儿

共双双飞入，乱红深处。

鹧鸪天

往事旧游浑似梦。

拜星月

贺新春，尽带春花、春幡春胜，是处春
光明媚。

诉衷情

悠悠万里云水。

洞仙歌

今夜谁添一种愁。

全宋词 无名氏

御街行

夜深无语楼空倚。

失调名

淡红衫，缕金裙。

浣溪沙

水阁池亭自有凉。

小重山

水风生处小亭临。

失调名

西风渐冷，园林万木凋黄。

念奴娇

玲珑枝枝，斗妆金粟

又

万里秋容浩荡。

失调名

枕上偷垂泪眼流。

惜黄花

庭梧叶坠。

失调名

等得秋风满院吹。又争如、毒热时。被
唧唧啾啾，不教人来梦里，望前程也、促织
儿。

又

只为情多病也多，省可思量我。

又

蟾辉兔影十分满。

念奴娇

对景真奇绝。

失调名

砌畔蛩吟喧不住。

全宋词 无名氏

又

梧桐叶落雨潇潇。

眼儿媚

厌厌愁闷无情绪。

失调名

好容仪、取次梳妆。

青玉案

彤云黯黯寒云绕。

失调名

小窗幽幌，独坐都无侣。

祝英台近

每爱霜月风前。

失调名 古惯饶人词

泪珠弹了。

全宋词 无名氏

满庭芳

飞花剪、六出工夫。

永遇乐

有限光阴。

失调名

倾城颜色。

念奴娇

绝艳仍清淑。

鹧鸪天

满池荷叶动秋风。

玉抱肚

园林草木，迢迢凋残。

卜算子

借问陇头梅，春信还知否。

全宋词 无名氏

满庭芳

光景如梭。

失调名

酒入柔肠似泪流。

真宗封禅四首

导引

民康俗阜，万国乐升平。庆海晏河清。唐尧禹舜垂衣化，讵比我皇明。九天宝命垂丕祝，云物效祥英。星罗羽卫登乔岳，亲告禅云亭。

我皇垂拱，惠化洽文明。盛礼庆重行。登封降禅燔柴毕，天仗入神京。云雷布泽遍寰瀛。遐迩振欢声。巍巍圣寿南山固，千载贺承平。

六州

良夜永，玉漏正迟迟。丹禁肃，周庐列，羽卫绕皇闈。严鼓动，画角声齐。金管飘雅韵，远逐轻飏。荐嘉玉、躬祀神祇。祈福为黔黎。升中盛礼，增高益厚，登封检玉，时迈合周诗。

玄文锡，庆云五色相随。甘露降，醴泉涌，三秀发灵芝。播、史册光辉。受鸿禧。万年永固丕基。吾君德、荡荡巍巍。迈尧舜文思。从今寰宇，休牛归马，耕田凿井，鼓腹乐昌期。

十二时

圣明代，海县澄清。惠化洽寰瀛。时康岁足，治定功成。遐迩贺升平。嘉坛上，昭事神灵。荐明诚。报本禅云亭。俎豆列牺牲。宸心蠲洁，明德荐惟馨。纪鸿名。千载播天声。

燔柴毕，云罕回仙仗，庆銮辂还京。人神扈跸，四隩来庭。嘉气覆重城。殊常礼，旷古难行。遇文明。仁恩苏品汇，沛泽被簪纓。祥符锡祚，武库永销兵。育群生。景运保千龄。

告庙导引

明明我后，至德合高穹。只翼励精衷。上真紫殿回飚驭，示圣胄延鸿。躬承宝训表钦崇。庆泽布寰中。告虔备物朝清庙，荷景福来同。

奉祀太清宫三首

导引

穹旻锡祐，盛德日章明。见地平天成。垂衣恭己干戈偃，亿载祐黎氓。羽旄饰驾当春候，款谒届殊庭。精衷昭感膺多福，夷夏保咸宁。

圣君御宇，祇翼奉三灵。已偃革休兵。区中海外鸿禧浹，恭馆励虔诚。九旂七萃著声明。僎后徇輿情。丕图宝绪承繁祉，率土仰隆平。

六州

千载运，宝业正遐昌。钦至道，崇明祀，盛礼迈前王。銮辂动，万骑腾骧。驰道纷彩仗，瑞日煌煌。奉秘检、玉羽群翔。非雾满康庄。躬朝真馆，齐心绎思，顺风俯拜，奠酒爇萧芗。

精衷达，飏轮降格昭彰。回羽旆，驻雕辇，旧地访睢阳。享清庙、孝德辉光。届灵场。星罗万国珪璋。陈牲币、金石锵洋。景福降穰穰。垂衣法坐，恩覃群品，庆均海宇，圣寿保无疆。

十二时

乾坤泰，帝祚遐昌。寓县乐平康。真游

降格，宝诲昭彰。宸躅造仙乡。崇妙道、精意齐庄。款灵场。洁豆荐芬芳。备乐奏铿锵。犹龙垂裕，千古播休光。极褒扬。明号洽徽章。

朝修展，春豫谐民望。睹文物煌煌。言旋羽卫，肃设坛场。报本达萧茅。申严祀、礼备烝尝。答穹苍。纯禧沾品汇，庆赉浹穷荒。封人献寿，德化掩陶唐。保绵长。锡祐永无疆。

亳州回诣玉清昭应宫一首

导引

秘文镂玉，金阁奉安时。旌盖严仙仪。珠旒俯拜陈章奏，精意达希夷。卿云郁郁曜晨曦。玉羽拂华枝。灵心报贶垂繁祉，宝祚永隆熙。

亲享太庙一首

导引

躬朝太室，列圣大功宣。彩仗耀甘泉。秘文升辂空歌发，一路覆祥烟。珠旒荐献极精虔。列侍俨貂蝉。穰穰降福均寰宇，垂拱万斯年。

南郊恭谢三首

导引

重熙累盛，睿化畅真风。尊祖奉高穹。
林焚彩仗明初日，瑞气满晴空。玉銮徐动出
环宫。虔巩罄宸衷。礼成均庆人神悦，圣寿
保无穷。

六州

承天统，圣主应昌辰。宝篆降，飏游至，
瑞命庆惟新。崇大号，仰奉高真。献岁当初
吉，天下皆春。谒秘宇、藻卫星陈。芻藘极
纷纶。琼编焜耀，仙衣粹縑，垂旒俯拜，荐
献礼惟寅。

芬芳备，精衷上达穹旻。尊道祖，享清
庙，助祭万方臻。升泰畤、縟典弥文。侍群
臣。汉庭儒雅彬彬。烟飞火举毕严禋。天地
降氤氲。高临华阙，恩覃动植，庆延宗社，
圣寿比灵椿。

十二时

享嘉会，万宇欢康。圣化迈陶唐。元符
锡命，天鉴昭彰。徽号奉琳房。陈縟礼、献
岁惟良。耀旗章。翠辇驻仙乡。睿意极齐庄。
仙衣渥采，玉册共荧煌。荐芬芳。飏馭降灵

场。

回云罕，尊祖趋仙宇，金石韵锵洋。聿朝清庙，躬奠瑶觞。报本国之阳。执笏豆、列侍貂珰。对穹苍。洪恩霈夷夏，大庆浹家邦。垂衣紫极，圣寿保遐昌。集祺祥。地久与天长。

天书导引七首

诣泰山

我皇缵位，覆焘合穹旻。秘篆示灵文。齐居紫殿膺玄贶，降宝命氤氲。奉符让德事严禋。检玉陟天孙。垂鸿纪号光前古，迈八九为君。

灵台偃武，书轨庆同文。奄六合居尊。圆穹锡命垂真篆，清晓降金门。升中报本祥云云。严祀事惟寅。无为致治臻清净，见反朴还淳。

诣太清宫

宝图熙盛，登格圣功全。瑞命集灵篇。钦修祀典成明察，道祖降云辇。赖乡真馆宅真仙。朝谒帝心虔。尊崇教父膺鸿福。绵亘万斯年。

犹龙胜境，真宇俨灵姿。肃谒展皇仪。宝符先路嘉祥应，云物焕金枝。纷纭紫节间黄麾。藻卫极葳蕤。高穹报贶延休祉，仁寿协昌期。

诣玉清昭应宫

紫霄金阙，重叠降元符。亿兆祚皇图。

云章焜耀传温玉，宝阁起清都。奉迎彩仗溢天衢。观者竞欢呼。明君钦翼承鸿荫，亿载御中区。

宝符锡祚，庆寿命维新。俄降格飏轮。巍巍帝德增虔奉，懿号荐穹旻。精齐秘馆奉严禋。文物耀昌辰。升烟太一修郊报，鸿祉介烝民。

诣南郊

圣神缵绪，赫奕帝图昌。宝篆降穹苍。宸心励翼修郊报，彩仗列康庄。祥烟瑞霭杂天香。笳磬发声长。升坛礼毕膺繁祉，睿算保无疆。

建安军迎奉圣像导引四首

玉皇大帝

太霄玉帝，总御冠灵真。威德耸天人。宝文瑞命符皇运，绵远庆维新。洞开霞馆法虚晨。八景降飏轮。含生普洽□鸿福，圣寿比仙椿。

圣祖天尊

至真降鉴，飏馭下皇闈。清漏正依依。范金肖像申严奉，仙馆壮翠飞。万灵拱卫瑞烟披。岸柳映黄麾。九清祚圣鸿基永，尧德更巍巍。

太祖皇帝

元符锡命，祇受庆诚明。恭馆法三清。

开基盛烈垂无极，金像俨天成。奉迎霞布甘泉仗，箫瑟振和声。灵辰协吉鸿仪毕，万国保隆平。

太宗皇帝

膺乾抚运，垂庆洽重熙。元圣嗣鸿基。发挥宝绪灵仙降，感吉梦先期。良金璀璨范真仪。精意答蕃禧。闕宫神馆崇严配，万祀播葳蕤。

圣像赴玉清昭应宫导引四首

玉皇大帝

先天气祖，魄宝御中宸。列位冠高真。绿符锡瑞昭元圣，宝历亘千春。琳宫壮丽俯严禋。璇碧照龙津。珍金铸像灵仪醉，集福庇蒸民。

圣祖天尊

仙宗灵祖，御气降中宸。孚宥庆维新。国工熔范成金像，仪炳动威神。玉虚圣境绝纤尘。欢忭洽群伦。导迎云驾归琳馆，恭肃奉高真。

太祖皇帝

石文应瑞，真主御寰瀛。慈俭抚群生。巍巍威德超千古，大业保盈成。神皋福地开恭馆，灵贶日昭明。铸金九牧天仪醉，绀殿矗千楹。

太宗皇帝

乘云英圣，千载仰皇灵。垂法蔼朝经。

全宋词 无名氏

禹金熔范肖仪刑。日角焕珠庭。琳宫翠殿凤文屏。迎奉庆安宁。孝思瞻谒荐惟馨。诚恧贯青冥。

奉宝册导引三首

玉清昭应宫

太霄垂佑，绵宇洽祺祥。秘检焕云章。宸心虔奉崇徽号，茂典迈前王。霞明藻卫列通庄。宝册奉琳房。都人震抃腾谣颂，亿载保欢康。

景灵宫

明明道祖，金阙冠仙真。清禁降飙轮。遥源始悟垂鸿庆，亿兆耸群伦。虔崇徽号盛仪陈。宝册奉良辰。邦家亿载蒙繁祉，圣寿保无垠。

太庙

祖宗垂佑，亨会协重熙。德泽被烝黎。虔崇尊谥陈徽册，藻卫列葳蕤。宸心致孝极孜孜。展礼诏台司。祥烟瑞霭浮清庙，绵宇被纯禧。

天禧三年南郊鼓吹歌曲三曲

导引

皇穹锡瑞，帝业愈蕃昌。会万玉来王。

名山珍馆神游接，实信降云房。卜兹显位严坛埴，奕奕睹辉光。精衷昭格灵心答，天历保无疆。

皇家立极，炎德赫中区。执契应萝图。文章灿烂垂星斗，威略定方隅。丹扉翠岫锡灵符。瑞物纪神输。紫坛大报陈昭配，福庆降清都。

六州

齐天宇，四海洽淳风。接宝胄，垂真检，景祚无穷。成玉牒、日观归功。冀野升方鼎，臙上由崇。钦桼井、云跸巡东。国本震为宫。乾文焕炳，真祠曲密，重祥叠瑞，琼蕴降高穹。

膺丕烈，虔心建垂鸿。询吉士，郊兆执玉荐衷。钟律应、云物迎空。乐和轮囷。嘉气葱葱。天神来降发冲融。玉烛四时通。星回金辂雷作解，昆蛟被惠，亿载帝基隆。

十二时

雕戈偃玉塞清明。道德洽和平。龟畴凤柙，腾实飞英。岱畎让功成。汾水上、寅辂銮声。荐精诚。仙宇玉为京。圭洁奉高明。瑶山银榜，固国本丕闕。诏公卿。绵蕤徇輿情。

稽阳位，报本郊坛峙，助祭俨簪纓。祖宗配侑，朱燎晶荧。百礼备丰盈。答天地、用厚怀生。泰黎氓。千畿先润泽，万宝尽开

荣。龙沙日窟，文轨永来并。保嘉享，史册
焕鸿名。

天圣二年南郊鼓吹歌曲三曲

导引

真人临御，实端集丰融。万国仰天聪。
喜裡盛礼文章焕，齐洁致清衷。笙镛六变三
神格，喜备盛仪容。乾穹上达昭灵飨，庆绪
蔼丕隆。

阳郊报本，礼意弥勤裡。太一下威神。
天临两观推三赦，庆祉被臣民。徽名荐册缙
仪陈。盛节焕书筠。涂歌邑诵扬徽懿，鼎命
协惟新。

六州

承皇统，天地洽清宁。熙帝载，建民极，
百度推明。崇讲肄、博考儒经。游豫腾谣诵，
星躔天行。留绀宇、顺拜金庭。兆庶动欢声。
灵心上达，卿云成盖，祥风袭物，瑞日耀圜
清。

列圣孝德被寰瀛。就阳位协吉，周正俨
簪纓。交对越群灵。皇威赫奕盛仪成。徽册
受鸿名。鸡竿肆赦，鸳行均庆，翺飞浸泽，
斯万保升平。

十二时

嘉亨运，躋历均调。光烈迈唐尧。珍图缘错，垂锡乾霄。封岱顺车杓。修合答、万玉来朝。瑞丕昭。构宇结瑛瑶。虚气下仙飚。钦崇道祖，輿驾动临谯。整銮鑣。郊报厚黎苗。

均纯祝，渗漉咸滋液，能事播欢谣。继明纘绪，缓赋轻徭。京庾比丰饶。勤中昃、采善询莩。五风飘。授人时吏正，休马橐兵销。良肱隆栋，助化率皇僚。德声遥。懿铄简书标。

籍田导引 明道二年四曲

绵区浹宇，三万里封疆。躬稼穡重光。神宗昔举殊尤礼，今复睹吾皇。先农祀罢东郊晓，玉趾染游场。三推初毕公卿遍，从此万斯箱。

务农敦本。自古属明王。万册布彝章。吾皇睿圣躬千亩，将欲积神仓。去年宿雪田膏极，黛耜应农祥。尧郊击壤迎归辂，解雨遍遐荒。

六州

寰宇定，四海奉文思。书轨混，梯航凑，共载昌期。稽古典、方咏京抵。耕籍丰民稼，

敦本农时。陈羽卫、日月旌旗。袞冕次坛墀。帷宫宿设，榑栳相差。穆清端拱，星毕照罍罍。

良宵永，为民广洽，庞褭奏、行漏昭庭燎，铙吹鼓曾颺。百神拥卫斗东移。明发俨皇仪。手揽洪縻。丰年万亿与千斯。德泽遍华夷。回旋辂、天临双阙，四方在宥，永保鸿基。

十二时

君天下，万国来王。玉帛凑梯航。五风十雨，品物蕃昌。栖有余粮。躬千亩、天步龙翔。化重光。举祖彝章。验晨正农祥。东郊如砥，黛耜御游场。荐芬芳。稼穡仞丰穰。

成耨礼，三事并卿尹，执耒有经常。此仪旷绝，行自吾皇。玉振复金相。睹九色、流衍仓箱。洽欢康。虫鱼皆茂育，戈祲永韬藏。两闱至圣，辅以股肱良。祚延长。寿岳保无疆。

奉禋歌

六龙承驭。紫坛平、瑞蔼葱笼拥神都。肃环卫、严貔虎。鸡人行漏传呼。灵景霁、星斗临帝居。旷天宇。微风来、翠幄绕相乌。对越方初。笳鼓震，铙箫举。阳律才动协气舒。氛祲交祛。

物昭苏。抚瑶图。柴类精诚，当契唐虞。思前古。泰平承多祐。包戈偃革，柔远咏皇

谟。称文武。四表覆盂。端冕出、从路车。
兵帅谨储胥。唯奏凯、乐康衢。朝野欢娱。
歌帝烈，扬盛节，圜丘礼大洽，霈泽绵区。

庄献明肃皇后恭谢太庙 明道二年三曲

导引

母仪天下，圣祚保延长。声教被遐方。
严恭孝飨来清庙，鸾辂历康庄。箫韶九奏凤
来翔。祔翟焕祥光。惟馨蕊醴奠瑶觞。万寿
永无疆。亲承先顾，保佑助吾皇。亿载正乾
纲。宗文祖武尊邦社，天下锡蕃昌。六宫扈
从亲重翟，清庙荐萧芻。礼行乐备神祇飨，
四海永来王。

六州

炎灵永。长乐助文明。居靖懿，敷皇化，
四海升平。慈是宝、万物怀生。耀德不观兵。
大治欢声。金辂饬、藻卫天行。春色满皇京。
登歌清庙，神祇顾飨，瑄玉纯精。亿万载持
盈。

膺天〔祝〕，尤祥纷委来呈。木连芝三
秀，玉烛协和平。仲春月、万杏初荣。整羽
卫葱衡。亲款神明。九韶叠奏罄箫笙。上以
继咸英。黄流玉瓚，殊庭胖蚤，宸仪回复，
景祐遍寰瀛。

十二时

母仪下，国祚和平。玉帛奏寰瀛。尤祥
极瑞，茂实英声。两耀比皇明。昭孝飨、躬
荐精诚。祥并保佑洽由庚。和乐遍怀生。柔
远能迓，海宇永澄清。复曾城。宝册受鸿名。

绵龙绪，十治同齐圣。至治播欢声。止
弋为武。顿纲搜英。察万物人情。损服御、
不尚瑛琼。俗怀生动，修文考制，颀法上天
明。地不爱宝，人不爱其诚。帝图宏。寿岳
永峣崢。

章献明肃皇后章懿皇后升

祔 庆历五年二曲

导引

受遗仍几，负宸拥文明。勤翼助持盈。
徽音不独流笙管，青册更峥嵘。羽辔上汉玉
衣轻。隙駟去无程。宸心追远严成配，亿世
飨烝盛。

受天明命，作汉发灵长。龙日梦休祥。
真人承体应图箴，庆祚启无疆。望舒未满殒
清光。舜慕极旻苍。祔宫崇祔申追养，禘祫
复蒸尝。

全宋词 无名氏

三圣御容赴南京鸿庆宫 庆历七年

导引

炎精啗乾，正统膺瑶历。万宇归神德。
以圣继圣三后，光声明、扬典则。天清日润
莹玉泽。华殿辉金碧。宸心思孝仙驭，三灵
休、绥万意。

真宗加上谥号册宝 庆历七年

导引

圣真下武，淳烈缉丕隆。绝瑞与天通。
封山育谷声名举，仙驭邈轩龙。腾金篆玉显
成功。业业承垂鸿。惟皇孝述光前志，保佑
福来同。

明堂 导引皇祐二年四曲

膺乾兴运，辰火正心房。宗祀继文王。
典容希阔成昭备，彬郁亶晖光。因心崇孝申
郊侑，内外罄斋庄。神灵欢嘉昌绵瓞，受福
介无疆。

六州

崇严配，衢室飨中宸。寻汉礼，崇唐典，

袞曠情文。方宝辂、羽卫星陈。藻绣填驰路，昭烂如云。灵顾茀，德升闻。旷瑞集纷纭。承平嘉靖，收成和熟，万方歌舞，喜气满青旻。成熙事、宣和輿物惟新。展宫寝，疑庙室，飨帝极尊亲。罄宸虑，四海骈臻。肃簪绅。斋明际，浹人神。乾元盛则属兹辰。皇业协华勋。房心正位，端居报政，三年美荐，广孝福吾民。

十二时

恢皇统，宵旰勤考，正朔亶同规。留谈经幄，来谏书帷。稽古极文思。尊耀魄、宝秩神祇。礼从宜。显相协钦祇。颢气结华滋。西成献瑞，百谷满京抵。化无为。期万卜年期。降昌运，大报同姬成，文武绍重熙。历朝缺典，自我亲祠，容采炳葳蕤。嘉能事、秀错多仪。太平时。精风涵溥惠，浩露浹深慈。群方昭泰，保定宅华夷。拥灵禧。万叶累鸿基。

三圣御容万寿观奉安 皇祐五年

导引

万灵昭瑞，天地赞昌期。宝运协开基。巍巍烈圣无疆德，神化洽重熙。虔思出驾罄彰施。岁暮俨神宜。云輿迎奉依珍馆，塞外焕朝仪。

三圣御容赴滁并澶州奉安 皇祐五年

导引

穆清冲境，金阙秘寥阳。二后侍虚皇。
真人恭默钦先烈。肖象启琳房。岿然神物护
灵光。玉色粹逾彰。虎旌龙节辉前后，馆御
镇无疆。

太祖孝明皇后御容赴太平兴国寺
开先殿奉安 至和二年

导引

划除霸轨，穆穆照皇明。大统一寰瀛。
穷湖绝塞人安业。武库遂销兵。仙游昔日上
三清。极望紫云平。珠宫宝坐严崇奉，圣祚
永绥宁。

太宗元德皇后御容赴启圣院
奉安 至和二年

导引

宝图全盛，端拱信巍巍。声教暨华夷。
辰髦尽入英雄彀，齐筑太平基。仙輿前指玉
霄归。夹道九鸾飞。真宫秘殿严崇奉，圣治

永无为。

恭谢导引 嘉祐元年四曲

龙驰驾，玉辂俨宸威。天仗下端闈。华旌翠羽笼黄道，赫奕照晨晖。大哉仁孝逾尧舜，圭瓚罄虔祇。神灵肸蚩来歆答，万寿保纯禧。

合宫歌

泰阶平。勋业属全盛。旰〔昃〕焦劳，访道缙三朝仁政。大庭蒞事款上灵。服冕执圭。侑飨尊累圣。豆笾奕奕嘉靖。神光四照百礼成。回御天门。讲丕彝，敷大庆。蒙被草木，万国仰声明。

六州

严太寝，容礼绎前经。仰苍粹，钦厚顺，式报生成。至信洽，上格神灵。太和凝气象，霄宇澄清。圭币列，鼓钟铿。群品荐丰盈。熙事既备，大仪交举，百嘉允集，万福来迎。

十二时

金徒箭、晓漏延长。霄极烂星芒。珠旒绚采，黼袞交章。宸表寝永昂。上交合尊鬯流香。燎扬光。神锡以百祥。寿延于无疆。

全宋词 无名氏

三时告稔，万亿满仓箱。思边防。蛮貊尽来王。

袷享太庙 嘉祐四年四曲

导引

天仪安豫洽无为。九域被雍熙。鸾刀亲割升圭瓚，清庙展孝思。箫韶九变皇灵格，嘏告显深慈。精诚动感归能飨，福祚衍金枝。

奉禋歌

皇泽均普，群生遂。万宇和祔，讲天津、合祭圣宗神祖，八音钧奏谐节。堂上荐鸣球，琴瑟击。越布濩、霜空静，月华凝、光景蔼蔼。纷纷晓霞披。和铃作、鸾舆回。天人共睹，庆无疆、祚崇明祀。五辂驾、腾黄纯駟。旗常扈跸严环卫。公卿奉引，虚徐驰道，衽容藿靡。葱葱郁郁，祥风瑞霭。发天光旖旎。锡羨丰融，漏泉该浹，上恩遐被。群心豫，颂声作，皇德至，侔乾祝，浩浩霈。

六州

深仁化。穹厚格成平。徇诚虑，托皇统，万宇光亨。申孝致法飨宗祊。金驾徐徐动，容礼辉明。躬道祖谒款殊庭。列圣固纯诚。灵心底豫，休祥充塞，端闱肆眚，爰日灿然

明。

十二时

明昌世、乾统弥文。皇德揆华勋。三辰顺晷，庆霭轮囷。潜宝耀坤珍。躬袷飨、肃荐牺尊。孝仪申。助祭俨纓绅。大乐奏韶钧。阳开阴闭，幽显尽欣欣。庆霄文。思结在黎民。

宣祖昭宪皇后御容赴奉先禅院

奉安 嘉祐五年

导引

于皇祖烈，大宋启鸿名。骏命属炎灵。闾宫厚德太阴精。重华诞圣明。轩台百世护基扃。龙驾在清冥。汉家原庙崇新饰，鼎业永安宁。

明德章德皇后御容赴晋安禅院

奉安 嘉祐六年

导引

母仪天宇，彤史蔼遗芳。纒余庆气固灵长。基祚浸明昌。重华大孝奉蒸尝。原庙闾灵光。采章褫翟严新饰，歆愿福穰穰。

明堂导引 嘉祐七年四曲

帝皇盛烈，教孝谨民常。严父位明堂。
管丝金石含天韵，笱豆荐芬芳。肃然音响灵
来下，容与动祥光。四方内外交欣喜，饮福
万年觞。

合宫歌

太平时。宝殿垂衣治。馭左右贤俊，万
国执玉助祭。凉秋九月霜华飞。感发纯孝，
五室配上帝。紫汉入夜凝霁。房心下，泛华
艺。大田栖粮，岁功成，农歌沸。复道躬拜，
肃迎神嬉。漏声迟。玉磐响，递清吹。嘉荐
升雕俎，柘桨屡酌几醉。云扶灵驾歛若归。
天意留顾，万福如山委。便御丹阙，布为皇
泽，与民熙熙。远观唐虞，未有如兹盛礼。
愿常遇鸣銮，三岁亲祠。

六州

承景运，天子奉明堂。玉烛应，金飙动，
万宝盈箱。严法驾、天路龙骧。采仗迎祥。
日色动扶桑。款清庙、我诚将。回御八鸾锵。
于皇仁孝，祖宗来顾，熙于四极，令问载无
疆。躬严配、笙镛奏凤来翔。瑞烟起，浮帝
袞，玉步间天香。升重宇、璧玉华光。桂流
觞。神虞夕照焮黄。九霄鸣珮下清厢。齐拱

太微傍。群心同愿，长临路寝，三年讲礼，
显祀文王。

十二时

承平世，嘉祐壬寅。九月上旬辛。酒醪
香旨，穀实丰珍。宗祀敞中宸。宾延上帝五
方神。以严亲。诚心通杳杳，文物盛彬彬。
金声玉色，和奏翕铿纯。荡无垠。天地一洪
钧。明天子、至化深仁。壹意奉精禋。感时
怵惕，即事恭夤。用孝教斯民。多仪举，大
恩沦。福来臻。清风动阖闾，皓气下天津。
〔币〕诚玉腆，朱燎焜樵薪。积灌欣。皇历万
斯春。

仁宗神主祔庙 嘉祐八年

导引

九虞初毕，黼座掩瑶觞。羽卫盛煌煌。
数声清跸来天上，想像赭袍光。新成清庙勛
云堂。孝飧奉蒸尝。子孙千载承丕绪，景福
介无疆。

仁宗御容赴〔景灵〕（灵景）宫

奉安 治平二年

导引

彤霞缥缈，海上隐三山。仙去莫能攀。

珠宫本是神灵宅，飙驭此来还。云边天日望威颜。不似在人间。当时齐鲁鸣鸾处，稽首泪潺湲。

治平二年南郊鼓吹歌曲四曲

导引

治平天子，景至肇严禋。华玉礼威神。六龙齐捧銮舆动，采仗转钩陈。归来瑞气满清晨。金石舜韶新。楼前山鹤衔书下，天地已为春。

六州

垂炎运，真主嗣瑶图。海波晏，卿云烂，日月丽皇都。年屡稔、万宝山储。广莫风生律，一气潜嘘。陈法驾、翠羽装舆。清跸下天衢。金匏六变，欵然灵顾，来车风马，拜祝紫坛初。

奉神娱。嘉筮荐，美玉奠，照荧爍。星彩动，霜华薄，禁阁漏声疏。回龙驭、宝瑞纷敷。众心愉。钧天别奏箫竽。仙人楼上捧赦书。舞鹤更踟蹰。丹徼北，穷沙漠，涵皇泽，盛德迈唐虞。

十二时

千年运，五叶升平。法宸坐中楹。天高

日润，雷动风行。三万里声明。灵台偃伯仆边兵。事农耕。一气重滋萌。万宝迄登成。天生嘉穀，博硕又芳馨。罄齐精。谒款谢嘉生。

神明地，当阳定，天位来助见人情。璧珪葱璨，金石铿铉。仪礼盛西京。灵祇喜、福绿来盈。咏夷庚。幔城班上笏，銮路趣还衡。觚棱双阙，赭案切三清。动欢声。恩泽遍寰瀛。

奉禋歌

皇天眷命集珍符。上圣膺期起天衢。环紫极鸿枢。此时朝野欢娱。乐于于。似住华胥。和气至，嘉生遂，豆实正芬敷。礼与诚俱。风飘洒，灵来下，喜怡愉。斗随车转，月上坛觚。奉禋初。至诚孚。如山岳、福委祥储。车旋轨、云间双阙峙，百尺朱绳到地，两行雉扇排虚，仙鹤衔书。珍袍上笏相趋。共欢呼。号令崇朝，遍满寰区。阳动春嘘。躬盛事，受多祉，千万祀，天长地久皇图。

寿原初掩，归躅九虞终。仙驭更无踪。思皇攀慕追来孝，作庙继三宗。旌旗居外拥千重。延望想威容。宝輿迎引归新殿，奏享备钦崇。

熙宁二年仁宗英宗御容赴西京会圣 宫应天禅院奉安导引一首

九清三境，飙驭杳难追。功烈并巍巍。洛都

不及西巡到，犹识醉容归。三条驰道隐金槌。
仙伏共逶迤。珠宫绀宇申严奉，亿载固皇基。

章惠皇太后神主赴西京导引一首

祥符盛际，二鄙正休兵。瑞应满寰瀛。
东封西祀鸣銮辂，从幸见升平。仙游一去上
三清。庙食享隆名。寝园松柏秋风起，箫吹
想平生。

中太一宫奉安神像导引一首

九霄仙驭，四纪乐西清。游衍遍黄庭。
云辇万里归真室，上应泰阶平。金舆玉像下
瑶京。彩仗拥霓旌。天人感会千年运，福祚
永昌明。

四年英宗御容赴景灵宫奉安导引一首

鼎湖龙去，仙仗隔蓬莱。辇路已苍苔。
汉家原庙临清渭，还泣玉衣来。凤箫鸾扇共
徘徊。帐殿倚云开。春风不向天袍动，空绕
翠舆回。

熙宁十年南郊皇帝归青城用降仙台一首

清都未晓，万乘并驾，煌煌拥天行。祥
风散瑞霭，华盖耸，旗常建，耀层城。四列
兵卫，燿火映、金支翠族。众乐警、作充宫

庭。皦绎成。

绀幄掀，袞冕明。妥帖坛陛霄升。振珩璜、神格至诚。云车下冥冥。储祥降嘏莫可名。御端闕、盼号敷荣。泽翔施溥，茂祉均被含生。

元丰二年慈圣光献皇后发引四首

仪仗内导引一首

驾斑龙。忽催金母转仙仗、去瑶宫。绛闕深沈杳无踪。渐尘空。丝网琼林，花似怨东风。垂清露啼红。犹想旧春中。献万寿、宝船空。

警场内三曲

六州

九龙舆。记春暮、幸蓬壶。琼围敞，绣仗趋。年华与逝水俱。瑶京远，信息断无。宝津池面落花铺。愁晚容车来禁涂。凤箫鸾翼，西指昭陵去。旧赏蟠桃熟，又见涨海枯。应共灵真母，曳霞裾。

宴清都。恨满山隅。春城翠柏藏乌。肩户剑，照灯鱼。人间一梦觉余。泉宫窈窕锁夜龙。银江澄澹浴仙凫。烟冷金炉玉殿虚。绿苔新长，雕辇曾行处。夜夜东朝月，似旧照锦疏。侍女盈盈泪珠。

十二时

治平时。暂垂帘，佑圣子、解危疑。坐安天下逾岁。厌避万机。退处宸闈。殿开庆养，志入希夷。扶皓日，浴咸池。看神孙、抚御千载，重雍累熙。四方钦仰洪慈。阴德远，仁功积，欢养罄九域，礼无违。事难期。乘霞去，乍睹升仙，诰下九围。泣血涟如，更鸾车、动春晚、雾暗翠旗。路指嵩伊。薤歌凤吹。悠扬逐风悲。珠殿悄，网尘垂。空坐湿，罔极吾皇孝思。镂玉写音徽。彤管炜，青编纪，宁更羨周雅，播声诗。

柎陵歌

真人地，瑞应待圣时。巩原西。荥河会，涧洛与瀍伊。众水萦回。嵩高映抱，几叠屏帟。秀岭参差。遥山群凤随。共瞻陵寝浮佳气，非烟朝暮飞。龟筮告前期。奠收玉斝，筵卷时衣。銮辂晓驾载龙旗。路透迟。铃歌怨、画翬引华芝。雾薄风微。真游远、闭宝阁金扉。侍女悲啼。玉阶春草滋。露桃结子灵椿翠，青车何日归。衔恨望西畿。便房一锁，夜台晓无期。

全宋词 无名氏

虞主回京四首

仪仗内导引一曲

龙舆春晚，晓日转三川。鼓吹惨寒烟。
清明过后落花天。望地馆依然。东风百宝泛
楼船。共荐寿当年。如今又到宛西边。但魂
断香辇。

警场内三曲

六州

庆深恩。宝历正乾坤。前帝子，后圣孙。
援立两仪轩。西宫大母朝寝门。望椒闼常温。
芳时媚景，有三千宫女，相将奉、玉辇金根。
上林红英繁。缥缈钧天。奏梨园。望绝瑶池，
影断桃源。恨难论。开禁闾。春风丹旂翩翩。
飞翠盖、驾雕辇。容卫入西原。管箫动地清
喧。陵上柏烟昏。残霞弄影，孤蟾浮天外，
行人触目是销魂。问苍天。尘世光阴去如奔。
河洛潺湲。此恨长存。

十二时

望嵩邙。永昭陵畔，王气压龙冈。巩洛
灵光。郁郁起嘉祥。虚彩帟，转哀仗，闷幽

堂。叹仙乡路长。景霞飞松上。珠襦宵掩，
细扇晨归，崑阆茫茫。满目东郊好，红葩斗
芳。韶景空骀荡。对春色、倍凄凉。最情伤。
从辇嫔嫱。指瑶津路，泪雨泣千行。翠珥明
珰。曾忆荐琼觞。春又至，人何往。事难忘。
向斜阳断肠。听钧天嘹亮。清都风细，朱栏
花满，谁奏清商。紫幄重帘外，时飘宝香。
环佩珊珊响。问何日、反雕房。

虞主歌

转紫芝。指东都帝畿。愁雾里、箫声宛
转，辇路透迤。那堪见、郊原芳菲。日迟迟。
对列凤翥龙旗。轻阴黯四垂。楼台绿瓦互琉
璃。仙仗归。寿原清夜，寒月掩帘帟。翠幌
雕轮，空反灵螭。

憩长岐。嵩峰远，伊川渺瀰。此时还帝
里。旌幡上下，葆羽葳蕤。天街回、垂杨依
依。过端闾。闾阖正辟金扉。觚棱射暖晖。
虞神宝篆散轻丝。空涕洟。望陵宫女，嗟物
是人非。万古千秋，烟惨风悲。

虞主祔庙仪仗内导引一首

轻輿小辇，曾宴玉栏秋。庆赏殿宸游。
伤心处，兽香散尽，一夜入丹邱。翠帘人静
月光浮。但半卷银钩。谁知道，桂华今夜，
却照鹊台幽。

五年景灵宫神御殿成奉迎导引一首

新宫翼翼，钜丽冠神京。金虬蟠绣楹。都人瞻望洪纷处，陆海涌蓬瀛。仙輿缥缈下圆清。彩仗拥天行。焮黄珠幄承灵德，锡羨永升平。

慈孝寺彰德殿迁章献明肃皇后御容 赴景灵宫衍庆殿奉安导引一首

九清云杳，飙驭邈难追。功化盛当时。保扶仁圣成嘉靖，彤管载音徽。天都左界抗华棂。仙仗下逶迤。宝楹黼帐承神贶，万寿永无期。

八年神宗灵驾发引四首

导引

金殿晚，注目望宫车。忽听受遗书。白雪缥缈帝乡去，抱弓空慕龙湖。瑶津风物胜蓬壶。春色至、望雕舆。花飞人寂寂，凄凉一梦清都。

六州

炎图盛，六叶正，协重光。膺宝瑞，更法度，智勇超轶成汤。昭回云汉烂文章。震扬威武慑多方。生民帖泰拥殊祥。封人祝颂，

万寿与天长。岂知丹鼎就，龙下五云旁。飘然真驭。游衍仙乡。泣彤裳。伊落洋洋。嵩峰少室相望。藏弓剑，游衣冠，俊功盛德难忘。泉台寂、鱼烛荧煌。银海深、鳧雁翱翔。想像平居谩焚香。望陵人散，翠柏忽成行。犹余嵩峰月，夜夜照幽堂。千秋陈迹凄凉。

十二时

珍符锡佑启真人。储思在斯民。勤劳日升万物，皆入陶钧。收威柄，更法令，鼎从新。东风吹百卉，上苑正青春。流虹节近，衣冠玉帛，交奏严宸。万寿祝尧仁。忽听宫车晚出，但号慕，瞻云路，企龙鳞。穷天英。冠古精神。杳然上僊，人空望、属车巡。虚仗星陈。画翼环拥龙辂。泉宫掩，帝乡远，邈难亲。反雕轮。飞羽盖、还渡天津。雾迷朱服，风摇细扇，触目悲辛。列嫔嫱，垂红泪，泔行尘。相将问。何日下青旻。

永裕陵歌

升龙德，当位富春秋。受天球。膺骏命，玉帛走诸侯。宝阁珠楼临上苑，百卉弄春柔。隐约瀛洲。旦旦想宸游。那知羽驾忽难留。八马入丹邱。哀仗出神州。笳声凝咽，旌旗去悠悠。碧山头。真人地，龟洛奥，凤台幽。绕伊流。嵩峰冈势结蛟虬。皇堂一闭威颜杳，寒雾带无愁。守陵嫔御，想像奉龙辂。牙盘赭案肃神休。何日覩云裘。红泪滴衣襟。那

全宋词 无名氏

堪风点缀、柏城秋。

虞主回京四首

导引

上林寒早，仙仗转郊圻。笳鼓入云悲。
逶迤辇路过西池。楼阁锁参差。都人瞻望意
如疑。犹想翠华归。玉京传信杳无期。空掩
赭黄衣。

六州

承圣绪，垂意在升平。驱貔虎，策豪英。
号令肃天兵。四方无复羽书征。德泽浸群生。
睿谋雄俊，绌汉高狭陋，慕三皇二帝，登闕
缉乐缀文明。将升岱岳告功成。玉牒金绳。
腾宝飞声。事难评。轩鼎就、清都一梦俄顷。
飞霞佩，乘龙馭，羽卫入高清。祥光浮动五
色，迎鸾凤，杂箫笙。因山功就，同轨人至，
铭旌画翣，行背重城。楚笳凝咽，汉仪雄盛，
攀慕伤情。惟余内传，知向蓬瀛。

十二时

太平时。御华夷。躬听断破危疑。春秋
鼎盛，绌声乐游嬉。日升繁机。长驾远馭垂。
意在轩羲。恢六典、斥三垂。有殊尤绝迹，
盛德魄周施。方将缀缉声诗。扩皇纲，明帝

典，绍累圣重熙。高拱无为。事难知。春色盛，偈千秋嘉节，忽闻玉几。颁命彤闱。厌世御云归。翊翠凤，驾文螭。缥缈难追。侍臣宫女，但攀慕号悲。玉轮动，指嵩伊。龙鑣日益远空游，汉庙冠衣。惟盛德巍巍。镂玉册，传青史。昭示无期。

虞神

复土初。明旗下储胥。回虚仗，箫笳互奏，旌旆随驱。岂知飏御在蓬壶。道萦纡。风日惨、六马踟躇。留恨满山隅。不堪回首，翠柏已扶疏。帝城渐迓，愁雾锁天衢。公卿百辟，鳞集云敷。迓龙舆。端门辟，金碧凌虚。此时还帝都。严清庙，入空时升，文物灿烂极嘉娱。配三宗，号称神，古所无。帝德协庙虞。九歌毕奏斐然殊。会轩朱。神具燕喜，锡福集皇居。更千万祀，佑启邦图。

神主祔庙导引一首

岁华婉婉，侍宴玉皇宫。雕辇出房中。岂知轩后丹成去，望绝鼎湖龙。寿原初掩九虞终。归躅五云重。惟余宝册书鸿烈，清庙配三宗。

政和三年追册明达皇后导引一首

来嫔初载，令德冠层城。柔范蔼徽声。

全宋词 无名氏

熊罴梦应芳兰郁，佳气拥雕楹。珠宫缥缈泛蓬瀛。脱履世缘轻。空余宝册光琼玖，千古仰鸿名。

神主祔别庙导引一首

柔容懿范，蚤岁蔼层闱。兰梦结芳时。秋风一夜惊罗幕，鸾扇影空回。荣追祔翟盛威仪。遗像掩瑶扉。春来只有芭蕉叶，依旧倚晴晖。

景灵西宫坤元殿奉安钦成 皇后御容导引一首

云辇芝盖，仙路去难攀。海浪溅三山。重迎遗像临驰道，还似在人间。西宫瑶殿指坤元。璇榜耸飞鸾。移升宝殿从新诏，盛典永流传。

别庙导引一首

蓬莱邃馆，金碧照三山。真境胜人间。秋风又见芭蕉长，遗迹在人寰。云轩一去杳难攀。斑竹彩舆还。深宫旧监闻箫鼓，怅望惨朱颜。

高宗郊祀大礼鼓吹歌曲五首

导引

圣皇巡狩，清跸驻三吴。十世嗣瑶图。边尘不动干戈戢，文德溥天敷。灰飞缙室气潜嘘。郊见紫坛初。归来赦令楼前下，喜气溢寰区。

六州

双凤落，佳气蔼龙山。澄江左，清湖右，日夜海潮翻。因吉地、卜筑圜坛。宏基隆陛级，神位周环。边陲静、挂起橐鞬。奠枕海隅安。三年亲祀，一阳初动，虔修大报，高处紫烟燔。看鸣銮，钩陈肃，天仗转，朔风寒，孤竹管，云和瑟，乐奏彻天关。嘉筮荐、玉奠玕璠。奉神欢。九霄瑞气起祥烟。来如风马欻然。还留福，已滋繁。回龙驭，升丹阙，布皇泽，春色满人间。

十二时

日将旦、阴曀潜消。天宇扇祥飙。边陲静谧，夜熄鸣刁。文教普旁昭。兴太学、多士舒翘。奉宗祧。新庙榜宸毫。配有享于郊。慈宁万寿，四海仰东朝。男女正，中壶至桃夭。年屡稔，漕舟衔尾夥，高廩接楹饶。庙堂自有、擎天一柱，功比汉庭萧，多少群工

同德，俊义旁招。吉祥诸福集，燮理四时调。
三年郊见，六变奏咸韶。望云霄。降福与唐尧。

奉禋歌

苍苍天色是还非。视下应疑。亦若斯。
统元气，覆无私。四时寒暑推移。物蕃滋。
造化有谁知。严大报，反本始，礼重祀神祇。
律管灰吹。黄宫动，阳来复，景长时。

车陈法驾，仗列黄麾。帝心祇。紫霄霁，
霜华薄，星烂明垂。祥烟起，纷敷浮袞冕，
六变笙镛迭奏，一诚币玉交持。宫漏声迟。
千官显相多仪。百神嬉。风马云车，来止来
绥。诞降纯禧。受神策、万年无极，歌颂昊天，
成命周诗。

降仙台

升烟既罢，良夜未晓，天步下神邱。锵
锵鸣玉佩，炜炜照金莲，杳蔼云裘。彩仗初
转，回龙驭、旌旆悠悠。星影疏动与天流。
漏尽五更筹。大明升，东海头。杲杲灵曜，
倒影射旗旒。辇路具修。葱郁瑞光浮。归来
双阙看御楼。有仙鹤、衔书赦囚。万方喜气，
均祉福，播歌讴。

全宋词 无名氏

亲耕籍田四首

导引

春融日暖，四野瑞烟浮。柳苑更柔柔。土膏脉起条风扇，宿雪润田畴。金根毂转如雷动，羽卫拥貔貅。扶携老稚康衢满，延跂望凝旒。

斗移星转，一气又环周。六府要时修。务农重谷人胥劝，耕籍礼殊尤。坛墼岳峙文明地，黛耜驾青牛。雍容南亩三推了，玉趾更迟留。

六州

昭圣武，不战屈人兵。干戈戢，烽燧息，海宇清宁。民丰业，歌咏升平。愿咸归畎亩，力穡为氓。经界正、东作西成。农务轸皇情。躬亲耒耜，相劝深耕。人心感悦，击壤沸欢声。乘鸾辂，羽旗彩仗鲜明。传清跸，行黄道，缙骑出重城。仰瞻日表，映朱紘。环佩更锵鸣。百执公卿。不辞染履意专精。准拟奉粢盛。田多稼，风行遐迩，家家给足。胥庆三登。

十二时

临寰宇，恭己岩廊。属意在耕桑。爱民利物，德迈陶唐。跻俗尽淳庞。开千亩、帝

籍神仓。举彝章。祇袞坛场。为农事祈祥。涓辰行礼，节物值春阳。罄齐庄。明德荐馨香。宫禁邃，嫔妃并御侍，种稷献君王。中闱表率，阴教逾光。帐殿霭焮黄。榼栝设、翠幕高张。庆云翔。樽罍陈酒醴。金石奏宫商。神灵感格，岁岁富仓箱。庆明昌。行旅不赍粮。

奉禋歌

吾皇端立太平基。奉祀肃雍、格神祇。抚御耦，降嘉种何辞。手览洪縻。命太史视日，祇告前期。验穹象，天田入望更光辉。掌礼陈仪。搜钜典，迎春令，颁宣温诏遍九围。人尽熙熙。仰明时。俨垂衣。佳气氤氲表庞禧。丰年屡，大田生异粟，含滋吐秀，九种传图，尽来丹阙，瑞应昌时。亨运正当摄提。伫见咏京坻。躬稼穡，重耘耔。盛礼兴行先百姓，崇本业，忧勤如禹稷，播在声诗。

显仁皇后上仙发引三首

导引

长乐晚彩戏莱衣。奄忽梦报仙期。帝乡渺渺乘鸾去，啼红嫔御不胜悲。苍梧烟水杳难追。肠断处、过江时。银涛千万叠，不知何处是瑶池。

六州

中兴运，孝治格升平。回骊馭，弭凤驾，册宝初上鸿名。龙楼问寝候鸡鸣。更翻莱戏彩衣轻。坤躔夜照老人星。金觞上寿，长愿燕慈宁。乘云何处去，愁断紫箫声。追思金殿，椒壁丹楹。又谁知、勤俭仁明。风行化被宫庭。佑圣主，底明时。阴功暗及生灵。离宫晚、花卉娉婷。甲观高、潮海峥嵘。往事回头忽飘零。空留嫔御，掩泣望霓旌。会稽山翠，永祐陵高，而今便是蓬瀛。

十二时

炎图景运正延鸿。文思坐深宫。慈宁大养，乐事时奏宸聪。皇龄永，恩霈下，遍寰中。君王乘彩服，嫔御上瑶钟。年年诞节，就盈吉月，交庆流虹。欢洽意方浓。不觉仙游渺邈，但号泣苍穹。追慕念音容。诗书慈俭，配古追踪。躬行四德，谁知继、二南风。移盼俄空，宝鉴脂泽尘封。清都远，帝乡遥，杳难通。想云辇、还上瀛蓬。稽山何在，当年禹宅，万古葱葱。最难堪，潮头定，海波融。

显仁皇后神主祔太庙导引一首 道宫

返虞长乐，犹是忆宾天。何事驾仙帟。

全宋词 无名氏

箫笳仪卫辞宫阙。移仗入云烟。于皇清庙敞华筵。昭穆谨承先。千秋长奉蒸尝孝，永享中兴年。

钦宗皇帝导引一首 道宫

鼎湖龙远，九祭毕嘉觞。遥望白云乡。箫笳凄咽离天阙，千仗俨成行。圣神昭穆盛重光。宝室万年藏。皇心追慕思无极，孝飨奉蒸尝。

安穆皇后导引一首

凤箫声断，缥缈遶丹邱。犹是忆河洲。荧煌宝册来天上，何处访仙游。葱葱郁郁瑞光浮。嘉酌侑芳羞。雕舆绣幌归新庙，百世与千秋。

景灵宫奉安神御三首

徽宗皇帝导引

中兴复古，孝治日昭鸿。原庙饰瑰宫。金璧千门礚万礚，楹桷竞穹崇。亭童芝盖拥旌龙。列圣俨相从。共锡神孙千万寿，龟鼎亘衡嵩。

显仁皇后导引

坤仪厚载，遗德满寰中。归御广寒宫。

全宋词 无名氏

玉容如在飙舆远，长乐起悲风。霓旌绛节下层空。云阙晓瞳眈。真游千载安原庙，圣孝与天通。

钦宗皇帝导引

深仁厚德，流泽自无穷。仙驭倏宾空。衣冠未返苍梧远，遥望鼎湖龙。

人间仿佛认天容。缥缈五云中。帝城犹有遗民在，垂泪向西风。

安恭皇后上仙发引三首

黄钟羽导引

金殿晚、愁结坤宁。天下母、忽仙升。云山浩浩归何处，但闻空际彩鸾声。紫箫断后无踪迹，烟霭霭，夜澄澄。晓梦到瑶城。当时花木正冥冥。

六州

娟娟月，初未缺，忽沈西。桂枝残，寒兔下，惟见露脚斜飞。六宫歌笑奉瑶墀。一朝寂寞掩袂衣。夜星不动玉鸾嘶。沈沈何处，愁雾锁金扉。

群仙瞻道范，肃驾到蓬池。紫清逸辔，飞电奔驰。又谁知。一世柔仪。椒涂玉钮金螭。赞圣主，膺天命，功勤曾佐雍熙。瑶天

隔，玉阙低迷。五云高、绛府参差。往事如今好寻思。留得香笺镂管、写新诗。但看芳猷美，宝册传徽。隆名万古昭垂。

十二时

皇家景运合无疆。天子坐明堂。丰年多黍，四方争报时康。酒常清，花易好，寿君王。天宫见玉女，大笑意千场。不知何事椒涂暗淡，瑶殿凄凉。宝镜玉台光。可奈画眉人去，脂泽散余芳。极目望潇湘。波遥草远，只见残阳。南山古阜，松柏茂，蔚苍苍。杳霭宫商。风过金殿琳琅。导歌繁，严鼓近，惨悲伤。水凝愁，山攒恨，烟淡云黄。神山何在，蟠桃已远，弱水何长。最难堪，回翟雉，返鸾凰。向芙蓉别殿、谩焚香。

神主祔庙道宫导引

紫鸾飞去，玉殿锁坤宁，珠箔俨银屏。仙家不似人间世，无处觅云辇。

金铺肃肃湛严扃，天册下彤庭。嘉觴好在新宫荐，万世妥神灵。

庄文太子薨导引一首

秋月冷、秋鹤无声。清禁晓、动皇情。玉笙忽断今何在，不知谁报玉楼成。七星授轡骖鸾种，人不见、恨难平。何以返霓族。

一天风露苦凄清。

加上太上皇帝太上皇后册宝导引一首

皇家多庆，亲寿与天长。德业播辉光。
焜煌宝册来清禁，玉篆映金相。庭闱尊奉会
明昌。佳气溢康庄。洪禧申辑名增衍，亿载
颂无疆。

虞主赴德寿宫导引一首

上皇天大，华旦焕尧文。鸿福浩无垠。
羽龙俄驾灵輶去，空锁鼎湖云。稽山翠拥浙
江滨。归旆卷缤纷。仙游指日严升祔，万载
颂高勋。

祔庙导引一首

虞觞奉主，仙驭返皇宫。礼典极钦崇。
云旗前导开清庙，龙管咽薰风。巍巍尧父告
神功。追慕孝诚通。千秋万岁中兴统，宗祀
与天同。

淳熙十六年高宗神御奉安导引一首

中兴揖逊，功德仰兼隆。仁泽被华戎。
鼎湖俄痛遗弓堕，日日想威容。柔仪懿范与
尧同。飏驭俨相从。灵宫真馆偕来燕，垂裕
永无穷。

恭上寿圣皇太后至尊寿圣皇帝寿成
皇后尊号册宝导引一首

皇家盛事，三殿庆重重。圣主极推崇。
瑶编宝列相辉映，归美意何穷。钧韶九奏度
春风。彩仗焕仪容。欢声和气弥寰宇。皇寿
与天同。

加上寿圣皇太后尊号册宝导引一首

重亲万寿，八帙衍新元。礼典备文孙。
温温和气迎长日，宝册焕瑶琨。徽音显号自
尧门。德行已该存。更期昌算齐箕翼，愈久
愈崇尊。

庆元六年光宗皇帝发引一首

笳鼓发、云惨寒空。丹旌去、卷悲风。
忧勤六载亲几务，有巍巍、圣德仁功。褰裳
尊处大安宫。荆鼎就、遽遗弓。仙游攀不及，
臣民号恸诉苍穹。

神御奉安导引一首

龟书畀姒，历数在皇躬。揖逊仰高风。
鼎湖龙去遗弓堕，冠剑锁深宫。涂山齐德翊
成功。仙魄蚤宾空。珍台闲馆栖神地，献飨
永无穷。

嘉泰二年加上寿成太皇
太后册宝导引一首

思齐文母，盛德比姜任。拥佑极思深。
汤孙归美熙鸿号，镂玉更绳金。虞庭万辟萃
华簪。法仗俨天临。展闱庆典年年举，千古
播徽音。

宁宗郊祀大礼四首

六州

皇抚极，明德贯乾坤。信星列，卿云烂，
辉亘紫微垣。思报贶、明诏祠宫，练时搜旷
典，紫峙觚坛，昭孝德、亲御和銮。振鹭玉
珊珊。精纯谒款，苜萧炉炷，黄流湛澹，百
末布生兰。扣天阊，延飞驾，相仿佛，降云
端。神光集，嘉响应，霭霭万衣冠。竣熙事
清晓轻寒。恣荣观。华衣雾縠船般。乾坤并
贶庆君欢。翘首圣恩宽。遵皇极，沛天泽，
灵心恻，龟鼎永尊安。

十二时

宵景霁，河汉清夷。旷典讲明时。合祛
升侑，孝德爰熙。陈裸函宫，澹觞太室，来
奏天仪。駉苍螭。玉辂驭蕤绥。觚陛展躬祠。
长梢饰玉，翠羽秀金支，华始倡，雅韵出宫

垂。神来下，云车风马，缤旖蔼、宴栖迟。
毕觴流胙，柴烟竣事，棠梨回謁，宣室受蕃
厘。盛德无心专飨，端为民祈。云恩有截，
雨泽霈无涯。君王愉乐，齎气溢瑶卮。寿天
齐。长拥神基。

奉禋歌

葭飞璇籥，孕初阳。云绝清台、荐景祥。
风应律，日重光。岁功顺，底金穰，寿而康。
庭壶乐无疆。皇展报，新礼乐，觚陛咏宾乡。
珠幄焮黄。登瑞縑，陈俎豆，澹嘉觴。袞衣
辉焕，宝佩琳琅。奠椒浆。庆阴阴，神来下，
凤翥龙骧。灵燕喜，锡符仍降嘏，鏞管琳琅。
欢亮神之出，祓兰堂。辇路天香。轻烟半袭
旗常。祉滂洋。受厘宣室，返馭斋房。恩与
风翔。华封祝、皇来有庆，八荒同寿，宝历
无疆。

降仙台

星芒收采，云容放晓，羲馭渐扬明。觚
坛竣事，斋风袭、袞衣轻。銮路尘清。甘泉
卤簿，褻威肃、回轸旋衡。千官导从粲簪纓。
钧奏间韶英。瞻龙闈，近凤城。都人云会，
芬苒夹道欢迎。宸极尊荣。卮玉庆熙成。琼
楼天上起和声。布春泽，洪畅寰瀛。嵩呼万
岁，鼙三抃、颂升平。

景献太子薨导引一首

霜月苦、宫鼓咚咚。霓旌启、鹤闹空。
洞箫声断知何处，海山依约五云东。玉符龙
节参神阙，昭圣眷、惨天容。千古恨无穷。
遍山松柏撼悲风。

宁宗皇帝发引三首

导引

三弄晓、云黯天低。攀六引、转悲凄。
俭慈孝哲钟天性，深仁厚泽遍群黎。东西南
北徯商霓。功甫就、别宸闱。臣民千古恨，
几时羽卫带潮归。

六州

明天子，昔日丕纂鸿图。躬道德，崇学
问，稽古训，访群儒。日亲广厦、论唐虞。
讲求政治、想都俞。君臣一德、志交孚。外
夷效顺，犹自选车徒。仁恩沾四国。固结满
寰区。千年宗社，万岁规摹。重新天命出乾
符。老癯策杖相扶。愿观德化遍方隅。幸无
死须臾。谓宜圣寿等嵩呼。遽登云舆，上龙
湖。宸居幽寂紫云孤。宸章宝画，但与日星
俱。龙帷凤翼已载涂。忍听笳鼓嗟呼。

十二时

弋绋革舄最仁贤。俭德自躬全。忧勤庶政，三十余年。金风肃，秋渐老，摄调倦。忱恂遍，群祀号泣诉旻天。缀衣将出，神凝玉几。一夜登仙。弓堕隔苍烟。七月有来同轨，引綆动灵輶。凄怆泪潸然。行号巷哭，薤露声传。东城去路，惊涛忍见江船。憔悴山川。不禁箫鼓咽，山阴处，茂林修竹芊芊。望陵宫，应弗远，金粟堆前。人徒慕恋，百神警待，盘翥驱先。戴鸿恩，空痛慕，泪珠连。千秋岁、功德寄华编。

神主祔庙导引一首

中兴四叶，休德继昭清。王度日熙平。气调玉烛金穰应。八表颂声腾。中原图籍入宸廷。列圣慰真灵。袞龙登庙游仙阙。亿万载尊承。

宝庆三年奉上宁宗徽号导引一首

中兴五叶，天子肇明禋。一德格高旻。宁皇至圣功超古，万国慕深仁。徽称显号又还新。功德粲雕珉。乾坤绘画终难尽，遗泽在斯民。

满庭芳

若论风流，无过圆社，拐赚蹬蹠搭齐全。
门庭富贵，曾到御帘前。灌口二郎为首，赵
皇上、下脚流传。人都道、齐云一社，三锦
独争先。

花前。并月下，全身绣带，偷侧双肩。
更高而不远，一搭打秋千。球落处、圆光赚
拐，双佩剑、侧蹠相连。高人处，翻身佶料，
天下总呼圆。

又

十二香皮，裁成圆锦，莫非年少堪收。
绿杨深处，恣意乐追游。低拂花梢慢下，侵
云汉、月满当秋。堪观处，偷头十字拐，舞
袖拂银钩。

肩尖，并拐搭，五陵公子，恣意忘忧。
几回沈醉，低筑傍高楼。虽不遇文章高贵，
分左右、曾对王侯。君知否，闲中第一，占
断是风流。

鹧鸪天 遏云致语筵会用

遇酒当歌酒满斟。一觴一咏乐天真。三
杯五盏陶情性，对月临风自赏心。环列处，
总佳宾。歌声嘹亮遏行云。春风满座知音者，
一曲教君侧耳听。

全宋词 无名氏

满庭芳 集曲名

共庆清朝，四时欢会，贺筵开会集佳宾。
风流鼓板，法曲献仙音。鼓笛令、无双多丽，
十拍板、音韵宣清。文序子，双声叠韵，有
若瑞龙吟。

当筵，闻品令，声声慢处，丹凤微鸣。
听清风八韵，打拍底、更好精神。安公子、
倾杯未饮，好女儿、齐隔帘听。真无比、最
高楼上，一曲称人心。

水调歌头

八蛮朝凤阙，四境绝狼烟。太平无事，
超烘聚哨效梨园。笛弄昆仑上品，筛动云阳
妙选，画鼓可人怜。乱撒真珠迸，点滴雨声
喧。

韵堪听，声不俗，驻云轩。谐音节奏，
分明花里遇神仙。到处朝山拜岳，长是争筹
赌赛，四海把名传。幸遇知音听，一曲赞尧
天。

西江月 打双陆例

么六把门已定，二四三五成梁。须知四
六做烟梁。五六单行无障。

掷得么三采出，填胥此处高强。到家先
起妙无双。号曰金赢取赏。

卜算子令

我有一枝花，斟我些儿酒，唯愿花心似我心，岁岁长相守。

满满泛金杯，重把花来〔嗅〕。不愿花枝在我旁，付与他人手。

浪淘沙令

今日□筵中。酒侣相逢。大家满满泛金钟。自起自斟还自饮。一笑春风。

传与主人翁。权且饶侬。侬今沈醉眼朦胧。此酒可怜无伴饮。付与诸公。

调笑令

花酒。满筵有。酒满金杯花在手。头上戴花方饮酒。饮罢了高叉手。琵琶拨尽相思调。更向当筵舞袖。

花酒令

花酒。是我平生结底亲朋友。十朵五枝花，三杯两盏酒。

休问南辰共北斗。任从他乌飞兔走。酒满金卮花在手。且戴花饮酒。

锦缠道

燕子呢喃，景色乍长春昼。睹园林、万花如绣。海棠经雨胭脂透。柳展宫眉，翠拂行人首。

向郊原踏青，恣歌携手。醉醺醺、尚寻芳酒。问牧童、遥指孤村道。杏花深处，那里人家有。

浣溪沙

水涨鱼天拍柳桥。云鸠拖雨过江皋。一番春信入东郊。

闲碾凤团消短梦。静看燕子垒新巢。又移日影上花梢。

如梦令

莺嘴啄花红溜。燕尾点波绿皱。指冷玉笙寒，吹彻小梅春透。依旧。依旧。人与绿杨俱瘦。

金明池 春游

琼苑金池，青门紫陌，似雪杨花满路。云日淡、天低昼永，过三点、两点细雨。好花枝、半出墙头，似怅望、芳草王孙何处。更水绕人家，桥当门巷，燕燕莺莺飞舞。

怎得东君长为主。把绿鬓朱颜，一时留住。佳人唱、金衣莫惜，才子倒、玉山休诉。况春来、倍觉伤心，念故国情多，新年愁苦。纵宝马嘶风，红尘拂面，也则寻芳归去。

眼儿媚

杨柳丝丝弄轻柔。烟缕织成愁。海棠未雨，梨花先雪，一半春休。

而今往事难重省，归梦绕秦楼。相思只在，丁香枝上，豆蔻梢头。

青玉案

一年春事都来几。早过了、三之二。绿暗红嫣浑可事。绿杨庭院，暖风帘幕，有个人憔悴。

买花载酒长安市。又争似、家山见桃李。不枉东风吹客泪，相思难表，梦魂无据，惟有归来是。

声声令

帘移碎影，香褪衣襟。旧家庭院嫩苔侵。东风过尽，暮云锁、绿窗深。怕对人、闲枕剩衾。

楼底轻阴。春信断、怯登临。断肠魂梦两沈沈。花飞水远，便从今、莫追寻。又怎禁、蓦地上心。

临江仙

绿暗汀洲三月暮，落花风静帆收。垂杨低映木兰舟。半篙春水滑，一段夕阳愁。

灞水桥东回首处，美人亲上帘钩。青鸾无计入红楼。行云归楚峡，飞梦到扬州。

怨王孙

梦断漏悄。愁浓酒恼。宝枕生寒，翠屏向晓。门外谁扫残红。夜来风。

玉箫声断人何处。春又去。忍把归期负。此情此恨此际，拟托行云。问东君。

凤凰阁

遍园林绿暗，浑如翠幄。下无一片是花萼。可恨狂风横雨，忒煞情薄。尽底把、韶华送却。

杨花无奈，是处穿帘透幕。岂知人意正萧索。春去也，这般愁、没处安著。怎奈向、黄昏院落。

祝英台近

剪酴醾、移红药，深院教鹦鹉。消遣宿醒，敲枕熏沈炷。自从载酒西湖，探梅南浦，久不见、雪儿歌舞。

全宋词 无名氏

恨无据。因甚不展眉头，凝愁过百五。
双燕见情，难寄断肠句。可怜泪湿青绡，怨
题红叶，落花乱、一帘风雨。

鹧鸪天 春闺

枝上流莺和泪闻。新啼痕间旧啼痕。一
春鱼鸟无消息，千里关山劳梦魂。

无一语，对芳尊。安排肠断到黄昏。甫
能炙得灯儿了，雨打梨花深闭门。

长相思

红满枝。绿满枝。宿雨厌厌睡起迟。闲
庭花影移。

忆归期。数归期。梦见虽多相见稀。相
逢知几时。

谒金门

春雨足。染就一溪新绿。柳外飞来双羽
玉。弄晴相对浴。

楼外翠帘高轴。倚遍阑干几曲。云淡水
平烟树簇。寸心千里目。

探春令

绿杨枝上晓莺啼，报融和天气。被数声、
吹入纱窗里。又惊起娇娥睡。

全宋词 无名氏

绿云斜亸金钗坠。惹芳心如醉。为少年
湿了，蛟绡帕上，都是相思泪。

点绛唇

春雨濛濛，淡烟深锁垂杨院。暖风轻扇。
落尽桃花片。

薄幸不来，前事思量遍。无由见。泪痕
如线。界破残妆面。

又

莺踏花翻，乱红堆径无人扫。杜鹃来了。
梅子枝头小。

拨尽琵琶，总是相思调。知音少。暗伤
怀抱。门掩青春老。

声声慢

梅黄金重，雨细丝轻，园林雾烟如织。
殿阁风微，帘外燕喧莺寂。池塘彩鸳戏水，
雾荷翻、千点珠滴。闲昼永，称潇湘竿叟，
烂柯仙客。

日午槐阴低转，茶瓯罢、清风顿生双腋。
碾玉盘深，朱李静沈寒碧。朋侪闲歌白雪，
卸巾纱、樽俎狼藉。有皓月、照黄昏，眠又
未得。

大圣乐 初夏

千朵奇峰，半轩微雨，晓来初过。渐燕

全宋词 无名氏

子、引教雏飞，菡萏暗薰芳草，池面凉多。浅斟琼卮浮绿蚁，展湘簟双纹生细波。轻纨举，动团圆素月，仙桂婆娑。

临风对月恣乐，便好把千金邀艳娥。幸太平无事，击壤鼓。富贵安居，功名天赋，争奈皆由时命呵。休眉锁。问朱颜去了，还更来麽。

菩萨蛮

金风簌簌惊黄叶。高楼影转银蟾匝。梦断绣帘垂。月明乌鹊飞。

新愁知几许。欲似丝千缕。雁已不堪闻。砧声何处村。

捣练子

心耿耿，泪双双。皓月清风冷透窗。人去秋来宫漏永，夜深无语对银缸。

女冠子

同云密布。撒梨花、柳絮飞舞。楼台俏似玉。向红炉暖阁院宇。深庭广排筵会，听笙歌犹未彻，渐觉轻寒，透帘穿户。乱飘僧舍，密洒歌楼，酒帘如故。

想樵人、山径迷踪路。料渔人、收纶罢钓归南浦。路无伴侣。见孤村寂寞，招飏酒旗斜处。南轩孤雁过，唳唳声声，又无书度。

全宋词 无名氏

见腊梅、枝上嫩蕊，两两三三微吐。

满江红

斗帐高眠，寒窗静、潇潇雨意。南楼近、
更移三鼓，漏传一水。点点不离杨柳外，声
声只在芭蕉里。也不管、滴破故乡心、愁人
耳。

无似有，游丝细。聚复散，真珠碎。天
应分付与，别离滋味。破我一床蝴蝶梦，输
他双枕鸳鸯睡。向此际、别有好思量，人千
里。

秋霁 秋晴

虹影侵阶，乍雨歇长空，万里凝碧。孤
鹜高飞，落霞相映，远状水乡秋色。黯然望
极。动人无限愁如织。又听得。云外数声，
新雁正嘹呖。

当此暗想，画阁轻抛，杳然殊无，些个
消息。漏声稀、银屏冷落，那堪残月照窗白。
衣带顿宽犹阻隔。算此情苦，除非宋玉风流，
共怀伤感，有谁知得。

忆秦娥

香馥馥。樽前有人如玉。人如玉。翠
翘金凤，内家妆束。

娇羞爱把眉儿蹙。逢人只唱相思曲。相

全宋词 无名氏

思曲。一声声是，怨红愁绿。

柳梢青

有个人人。海棠标韵，飞燕轻盈。酒晕潮红，羞娥凝绿，一笑生春。

为伊无限伤心。更说甚、巫山楚云。斗帐香消，纱窗月冷，著意温存。

烛影摇红

乳燕穿帘，乱莺啼树清明近。隔帘时度柳花飞，犹觉寒成阵。长记眉峰偷隐。脸桃红、难藏酒晕。背人微笑，半弹鸾钗，轻笼蝉鬓。

别久啼多，眼应不似当时俊。满园珠翠逞春娇，没个他风韵。若见宾鸿试问。待相将、彩笺寄恨。几时得见，斗草归来，双鸳微润。

苏幕遮

陇云沈，新月小。杨柳梢头，能有春多少。试著罗裳寒尚峭。帘卷青楼，占得东风早。

翠屏深，香篆袅。流水落花，不管刘郎到。三叠阳关声渐杳。断雨残云，只怕巫山晓。

昼锦堂

雨洗桃花，风飘柳絮，日日飞满雕檐。
懊恼一春幽恨，尽属眉尖。愁闻双飞新燕语，
更堪孤枕宿醒忺。云鬓乱，独步画堂，轻风
暗触珠帘。

多厌。晴昼永，琼户悄，香销金兽慵添。
自与萧娘别后，事事俱嫌。短歌新曲无心理，
凤箫龙管不曾拈。空惆怅，长是每年三月，
病酒恹恹。

青玉案

人生南北如歧路。世事悠悠等风絮。造
化小儿无定据。翻来覆去，倒横直竖，眼见
都如许。

伊周功业何须慕。不学渊明便归去。坎
止流行随所寓。玉堂金马，竹篱茅舍，总是
无心处。

绛都春 早梅

寒阴渐晓。报驿使探春，南枝开早。粉
蕊弄香，芳脸凝酥琼枝小。雪天分外精神好。
向白玉堂前应到。化工不管，朱门闭也，暗
传音耗。

轻渺。盈盈笑靥，称娇面、爱学宫妆新
巧。几度醉吟，独倚栏干黄昏后。月笼疏影

横斜照。更莫待、单于吹老。便须折取归来，
胆瓶顿了。

孤鸾

天然标格。是小萼堆红，芳姿凝白。淡
伫新妆，浅点寿阳宫额。东君相留厚意，倩
年年、与传消息。昨夜前村雪里，有一枝先
折。

念故人、何处水云隔。纵驿使相逢，难
寄春色。试问丹青手，是怎生描得。晓来一
番雨过，更那堪、数声羌笛。归去和羹未晚，
劝行人休摘。

金菊对芙蓉

花则一名，种分三色，嫩红妖白娇黄。
正清秋佳景，雨霁风凉。郊墟十里飘兰麝，
潇洒处、旖旎非常。自然风韵，开时不惹，
蝶乱蜂狂。

携酒独揖蟾光。问花神何属，离兑中央。
引骚人乘兴，广赋诗章。几多才子争攀折，
嫦娥道、三种深香。状元红是，黄为榜眼，
白探花郎。

失调名

郎马频嘶竟不来。

又

轻暖轻寒，正是赏花天气。

又
盼盼秋波。
又
春色恼人眠不得。
又
千丝万绪惹春风。
又
燕子引雏飞。
又
莫怪沈腰易瘦。
又
双双飞燕柳边轻。
又
帘卷画堂人寂静。
又
一番雨过，池塘十里芰荷香。
又
湘簟展清波。
又
醉乡天广大。
又
云情雨意商量雪。

又
凤楼帘卷鳌山对。
又
箫鼓向晚。
又
倚风三喷横竹。
又
卷上珠帘光。
又
轻暖轻寒，正是困人天气。
又
一种相思两地愁。
又
饮尽莫留残。

秋霁 櫟括东坡前赤壁

壬戌之秋，是苏子与客，泛舟赤壁。举酒属客，月明风细，水光与天相接。扣舷唱月。桂棹兰桨堪游逸。又有客。能吹洞箫，和声呜咽。

追想孟德、困于周郎，到今空有，当时踪迹。算惟有、清风朗月，取之无禁用不竭。客喜洗盏还再酌。既已同醉，相与枕藉舟中，始知东方，晃然既白。

贺新郎 櫟括东坡后赤壁

步自雪堂去。望临皋、将归二客，从余遵路。木叶萧萧霜露降，仰见天高月吐。共对影、行歌频顾。月白风清如此夜，叹无肴、有酒成虚度。闻薄暮，网罟举。

归而斗酒谋诸妇。便携鳞载酒，相从旧追游处。断岸横江寻赤壁，不复江山如故，但放舟、中流容与。客去冥然方就睡，梦翩跹、羽衣揖余语。相顾笑、遂惊寤。

如梦令 佳人

韵似江梅标致。美似江梅多丽。清似腊梅香，白似雪梅香腻，非是。非是。我道梅花似你。

忆秦娥 忆别

暮云碧。佳人不见愁如织。愁如织。两行征雁，数声羌笛。

锦书难寄西飞翼。无言只是空相忆。空相忆。纱窗人梦，梦双人只。

又

娇滴滴。双眉敛破春山色。春山色。为君含笑，为君愁蹙。

多情别后无消息。此时更有谁知得。谁知得。夜深无寐，度江横笛。

又 咏笛

秋寂寂。碧纱窗外人横笛。人横笛。天津桥上，旧曾听得。

宫妆玉指无人识。龙吟水底声初息。声初息。月明江上，数峰凝碧。

浪淘沙

帘外五更风。吹梦无踪。画楼重上与谁同。记得玉钗斜拨火，宝篆成空。

回首紫金峰。雨润烟浓。一江春浪醉醒中。留得罗襟前日泪，弹与征鸿。

满庭芳 秋思

碧落横秋，浮云崩浪，夜凉先到梧桐。荷花十丈，人在赤城中。凤髻尚梳雾湿，眉峰翠、的烁双瞳。多应是，金丹一粒，点就蕊仙宫。

相逢。蓬岛客，酒翻银海，一饮如虹。弄横玉招月，吹上层空。青鸾传书满座，蟠桃树、已结轻红。拚沈醉，人间拍手，一笑有东风。

失调名

和尚性好耍。贪恋一枝花。见说醉归明月夜。滋味难禁价。

金帛宁论价。毒手遭他下。料想从今难

全宋词 无名氏

更也。空惹傍人话。

望江南

江南竹，巧匠织成笼。赠与吾师藏法体，
碧潭深处伴蛟龙。色即是成空。

西江月

早晚以成行色，主人莫与留延。正当春
月艳阳天。去赛从前心愿。

执状去呈仙尉，殷勤早与周旋。不辞客
路往来难，暂辍舞裙歌扇。

燕山亭 芍药词

风雨无情，红药吐时，下得恹恹摧挫。
云艳卷凉，旋汲银屏，收拾二三千朵。长日
留伊，要把酒、不教放过。无那。越放纵香
心，越盘来大。

特地点检笙歌，先要吹个、六么曲破。
总是少年，负却才名，佳客共伊围坐。粉薄
香浓，为笑多、不肯梳裹。知麽。须醉倒、
今宵伴我。

鹧鸪天

山色晴岚景物佳。暖烘回雁起平沙。东
郊渐觉花供眼，南陌依稀草吐芽。

全宋词 无名氏

堤上柳，未藏鸦。寻芳趁步到山家。陇头几树红梅落，红杏枝头未著花。

眼儿媚

深闺小院日初长。娇女绮罗裳。不做东君造化，金针刺绣群芳样。

斜枝嫩叶包开蕊。唯只欠馨香。曾向园林深处，引教蝶乱蜂狂。

南乡子

帘卷水西楼。一曲新腔唱打油。宿雨眠云年少梦，休讴。且尽生前酒一瓯。

明日又登舟。却指今宵是旧游。同是他乡沦落客，休愁。月子弯弯照几州。

失调名

帝里元宵风光好，胜仙岛蓬莱。玉动飞尘，车喝绣毂，月照楼台。

三官此夕欢谐。金莲万盏，撒向天街。讶鼓通宵，花灯竟起，五夜齐开。

酹江月 寿叶丞相

阳春歌阙，正玉梅翻雪，江涛如海。秀孕东阳山水，果诞黑头元宰。早蹋天扉，洪钧独运，嘉会符千载。衔杯乐圣，不妨机务

聊解。

且恁笑弄云泉，太平勋业，说与苍生须在。闻道槐庭虚位久，天意端如有待。袞绣来时，渔蓑脱取，留我他年晒。良辰一笑，醉乡天地宽大。

水调歌头 寿枢密

明月双溪上，胜景号金华。当年此夕，多少鸾凰杂云霞。共拥飘飘仙伯，来作人间英杰，王谢旧名家。纶綍妙文采，帷幄富忠嘉。

圣天子，形梦寐，眷尤加。麒麟阁上，早晚丹陛听宣麻。鼎轴无穷勋业，岁岁薰风日永，萱秀北堂花。潏潏绮筵酒，寿算等河沙。

水龙吟 寿癯斋赵侍郎

昔人风调谁高，二疏盛日还乡里。公卿祖道，百城图画，争传佳事。闻自垂车日，都门外、送车凡几。今世无工画，署之勿道，焜煌处、烛青史。

佳甚东阳山水。是昔时、钓游某地。风流脱似，洛中耆老，一人而已。好为霞觞酌，正庭阶、彩衣荣侍。便明朝有诏，启门解说，值先生醉。

谒金门 寿李侍郎

春不老。细数花风犹到。挥翰玉堂应早

全宋词 无名氏

早。花知中令考。

词进芳笺才调。文饮清樽怀抱。一片潇湘供一笑。楚山青未了。

千春词 寿游侍郎

瞿岭云齐，建溪源远，庆衍英奇。且机乘天巧，臣贤主圣，后光同日月以为期。千载相逢，一朝盛事，自昔人夸今见之。催归诏，要领班宸殿，捧万年卮。

嘻嘻。莫道春迟。已著梅梢第一枝。映紫荷持橐，星辰步武，黄金横带，朝夕论思。不但斯时，重恢事业，整顿乾坤弘所施。洪钧转，虽寒根雪谷，物物生辉。

酹江月 寿史贰卿

欢声雷动，问邦民，知道君侯生日。欲把天文占好事，夜半遥瞻南极。耿耿三台，寒光相射，瑞采连珠璧。自今以始，我公眉寿千亿。

见说燕寝香凝，旌旗微动，猎猎薰风入。收拾乾坤生长意，留向人间敷锡。预约明年，难兄难弟，同侍虞琴侧。坐令仁寿，八荒开此寿域。

沁园春 寿游侍郎

兹审某官秀毓全闽，龄开八帙。一身高邵，为

全宋词 无名氏

天下之达尊；两字康宁，享福中之至贵。绂麟呈瑞，厦燕倾诚。某适以事拘，后于躬贺。望宫墙之仞，誓坚雅志之依刘；歌眉寿之章，愿效诗人之颂鲁。倘蒙电眄，无任眷荣。

五岳三光，孕秀精神，时生俊髦。看出匣锋铓，备施盘错，济川力量，历试风涛。直卷经纶，十徵不就，争羨先生出处高。徜徉处，有晋公绿野，陶令东皋。

精神翰墨游遨。无一点风霜上鬓毛。不访蓬莱，遍搜仙药，不登阆苑，三摘蟠桃。洒洒丰姿，棱棱标致，长对梅花雪里梢。青如许，与老松苍竹，定岁寒交。

念奴娇 寿侍郎

今年秋早，似常年、人世光阴如电。君看老仙风度别，绿发芳瞳长健。细数平生，三千功行，一一修持遍。通明殿上，钧天张乐高燕。

应似六一先生，神清之洞，万仞苍苔藓。少待中原开霁了，一片闲云舒卷。姹女炼成，婴儿养就，坐阅蓬莱浅。青霄笙鹤，也应回顾鸡犬。

水调歌头 寿真玉堂

早是玉堂客，犹著侍臣冠。便为霖去亦晚，何况此身闲。胸次光风霁月，意味满庭芳草，体用两相关。坐对粤山好，名更重于山。

寿生申，霜肃晓，露宾寒。从教重九过了，政有菊堪餐。日绕东篱笑傲，香共秋容淡薄，晚节要人看。久不见贾谊，天已问平安。

又 寿刘监丞

伏以日躔婺宿，正五萸敷萸之辰；神隆崧嵩，记六矢垂蓬之旦。祥薰宇宙，欢动里闾。恭惟某官云谷渊源，冰壶节操。霁月光风之潇洒，浑金璞玉之温纯。望重东山，起夜鹤晓猿之悲；思形宣室，开云龙风虎之机。绂麟喜际于诞辰，笼鸽想多于颂语。某阻缀鳧趋之末，倍深燕贺之私。砌九十五字之芜词，寄声水调；祝万八千岁之大椿算，与日川增。持献雷门，仰祈电瞩。

一线添宫绣，昼景刻初还。五云旬浹不散，瑞色满乾坤。凝作山堂佳气，来庆冰壶寿旦，戏彩喜重斑。相对羹桂椿，环列谢芝兰。

经纶事，勘定策，两才全。苍生翘首三载，霖雨报东山。已感宵衣梦寐，应录御屏姓字，光动紫微垣。一骑日边至，趣诏凤池班。

满江红 寿杨殿撰

蓓蕾江梅，正好是、小春时候。螺浦下、乾坤间气，山川钟秀。作起风流今几代，诚斋心印亲传授。更修名、大节与谁同，韩山斗。

修月斧，擎天手。鸿敛翼，云归岫。有庄园陶径，菊滋松茂。只恐东山真事业，更

全宋词 无名氏

应西洛登耆旧。有年年、宣劝到螯扉，黄封酒。

满庭芳 寿安抚

北斗璇魁，南闽元帅，西清真地行仙。东林白社，依约认前缘。霞炯天台万叠，记当时、秀减山川。三生梦，岩公宝刻，云锁石桥边。

时度御炉吹雾，宫烛传烟。望图中家庆，朱紫蝉联。入见辕门佳节，到新春、长是开筵。明年看，五云深处，黄发映貂蝉。

水调歌头 寿范帅

三楚诗书帅，人物压中州。飘飘青琐，典刑蜀国旧风流。小袖玉堂挥手，来拥元戎十乘，红旆照青油。尺一唤归去，名久在金瓯。

倚春声，赓水调，倩歌喉。登龙旧客，只回误上武陵舟。正是蟠桃开也，特向尊前为寿，一醉一千秋。携取此花去，还侍玉宸游。

朝中措 寿魏都大

郎星初度一旬前。瑞雪早蹁跹。金节耆祥称寿，一妃宣劝迎年。

锦天绣地，薰香手祷，福祿如川。只恐

全宋词 无名氏

催呈魏笏，便还紫橐青毡。

宝鼎现 寿曹安抚

天高良月。瑞霭葱蒨，绮霞粲浩。望宝阁、奎躔交绚，秀毓文星正佳节。九万里俱在下，礼乐三千剡切。扶兴运、魁星标瑞，曾补赭黄袞阙。盎盎一道棠阴蒂，宜福星、临照南国。

岁屡稔，月沈夜柝，父老欢谣齐喜溢。庆袞袞、罗庭前兰玉，好是香连夜月。十万户深深祝，愿此寿星南极。自是天上神仙，宽宸顾、实劳耆德。辄使星入觐，又报日边消息。天为遣、梅花催雪。惟有春知得。要待列、金鼎和羹，两两台星齐色。

沁园春 寿郭宪使

闾阖初开，羽葆来从，斗畔天南。看长身玉立，精神耿耿，风姿冰冷，琼佩珊珊。政数龚黄，才称屈宋，君合居其伯仲間。犹堪庆，早恩沾令子，新著朝冠。

东园。未即开藩。且乡曲吾曹共往还。向棋边几见，烂柯樵客，琴中时写，流水高山。野鹤立阶，灵龟支坐，修竹梅花伴岁寒。荣华事，有传家从橐，立上清班。

虞美人 寿赵仓

翠屏罗幕遮前后。舞袖翻长寿。紫髯冠

全宋词 无名氏

佩御炉香。看取明年归奉、万年觞。今宵池上蟠桃席。咫尺长安日。宝烟飞焰万花浓。试看中间白鹤、驾仙风。

瑞鹤仙 寿提举

薰风送炎暑。正万品亨嘉，恢台当序。祥烟淡天宇。渐银蟾满魄，金茎凝露。奎躔壁度。见寒光、凌乱辉吐。记当年此际，真仙命世，恍惊飙驭。

荣遇。妙龄英发，腾实蜚声，早班郎署。歌喧五裤。更万里，期轩翥。暂乘轺揽辔，肃将王命，已洽百城休誉。愿从今、夕揭金瓯，永隆依注。

万年欢 寿太守

南极星明，问笙歌弦管，今是何夕。竹马儿童，尽道使君生日。又见蟠桃结实。是谁向、珠宫偷得。炉烟袅，惟愿年年，使君常驻熊轼。

那知宦游似客。任双旌五马，飘转南北。细柳甘棠，都是使君亲植。见说吾皇仄席。恐非晚、归朝宣直。功成了，却隐东山，算惟龟鹤相识。

酹江月 寿倅车

东南钟秀。记当年、玉麟坠地，风云奔

全宋词 无名氏

走。别驾风流才展骥，未快经纶大手。风月平分，吏民胥庆，松李阴浓昼。满城灯火，崧高神降时候。

好是今夕华筵，水沈烟里，竹径松姿瘦。闻道君王仄席，尺一凤凰飞诏。堤筑新沙，印垂大斗，毡复貂蝉旧。麒麟勋业，庄椿难计眉寿。

沁园春 寿王倅

天遣东皇，来庆诞辰，和气先回。趁未将风月，平分八桂，且垂弧矢，相映三槐。歌遏行云，舞萦回雪，不比常年寿宴开。有贤守，送三千乐指，环侍金罍。

文章政事奇哉。曾飞鸞双凫天外来。便合除之六察，少旌最绩，何为别驾，暂屈长才。尚亿传家，行将跨灶，岂但侯藩与外台。称觴看，灵龟支坐，老鹤眠阶。

东坡引 寿余倅

人物伊周样。清政龚黄状。平分风月双溪上。红颜方少壮。红颜方少壮。

生贤令节，满觴摇漾。红袖舞，青蛾唱。我来祝寿无他望。相门重拜相。相门重拜相。

木兰花 庆赵倅

北湖云锦。铺遍琉璃三万顷。风月诗仙。

全宋词 无名氏

趁得花时出洞天。

红菱碧藕。满劝一杯千岁寿。来岁看花。
新筑苏堤路上沙。

八宝妆 寿节推权教

是舍人才调，犹采茅、紫芝峰。有列宿心胸，清辞太白，雅趣元龙。从他暂、无毡官冷，怡然怀抱自从容。枫陛荐章吻合，金闺仙籍名通。

暑余凉送薰风。圆桂魄、丽遥空。庆初度垂弧，莲开十丈，酒满千钟。明年称寿何处，看玉犀、人在玉堂中。藻鉴正当莲省，诸生来到蟾宫。

沁园春 寿刘提干

学富总龟，英蜚漕鹗，正当少年。向山阴发轫，从容莲幕，结知当路，翠剡争先。万斛龙骧，湖襄飞饷，赏秩新纶来日边。重重庆，又金鱼新渥，玉树芝兰。

今朝好语欢传。正南极真人生世天。是紫囊阴鹭，朱幡美德，平山钟秀，崧岳生贤。事业惊人，行魁胪唱，展庆公庭云母间。称觴祝，对今宵明月，千古团圆。

满庭芳 寿干官五月十五日

梅雨初晴，时当夏五，一轮桂魄方圆。

全宋词 无名氏

平山毓秀，间世产英贤。那更椿庭戏彩，祇觴处、簇拥神仙。荷囊紫，朱幡辉映，新渥又兰孙。

山阴，方借迳，结知当路，荐剡争先。况湖襄输转，赏秩新颁。更喜两飞漕鹞，魁兰省、首听胪传。丹墀上，屏分云母，鲁后与周前。

齐天乐 寿刘机宜

天开图画江山秀。怪得人间希有。屏岛精神，潭溪骨格，钟作名门华胄。满堂昼绣。甚褷集兰亭，竹修林茂。得得明朝，绂麟亲解公侯绶。

心胸剩罗列宿。便能光绍，太常勋旧。却恋盘湖，贪求精舍，日日佳篇醇酎。陶朱敌富。更沧海双珠，掌中明透。赢得年年，莲龟松鹤祝公寿。

桂枝香 寿赵运管

武夷九曲。甚乐响云韶，旆走星纛。更捧琼浆九酝，蟠桃初熟。元来崧岳生申旦，会群仙、献长生篆。岁寒堂上，冰壶影里，长跨青鹿。

记往日、堤沙旧筑。有书籀金〔滕〕，勋写歌鹄。更化和朝，半是世臣乔木。明年瑞庆才经月，侍重瞳、应奉卮玉。此时奋建联班，却将万年齐祝。

满江红 寿洪教授

才入新年，喜两见、希奇盛事。正五旦、虹流电绕，星枢呈瑞。方庆千秋开宝运，又今六日生名世。河清生圣岳生贤，风云际。

修月手，凌云气。吞泽量，飞泉思。况声名已自，惊天动地。上寿不须儿女语，著鞭且展英雄志。北方焰焰看来年，魁名字。

贺新郎 寿刘宰

四海文章伯。自雪堂人老，有谁当得。余子纷纷何足数，除是壶中仙客。况夺得、秋光清彻。笔下诗成愁鬼魅，更千军、侍帐看飞檄。须信道，万人杰。

胸襟浩荡乾坤窄。向楼东吟笑，壮心谁识。直渡黄河擒颉虏，吐尽平生奇策。终不负、雄姿英发。闻说九重飞紫诏，想鸣珂、早晚朝天阙。鸿鹄举，楚天阔。

西江月 庆赵宰季修

一派先天妙学，十年克己工夫。割鸡聊此宰中都。人在春台鼓舞。

昏垫非由己溺，拊摩不异予辜。万家香火祝悬弧。我亦无多颂语。

全宋词 无名氏

沁园春 寿刘宰

天下知名，今日刘郎，胜如旧时。记当年幕府，元戎高会，万花围席，争看题诗。尽道坡仙，再生尘世，有制宜烦立马挥。东阳小，岂容久驻，鳧鷖暂双飞。

诸公荐墨交驰。要推上青云百丈梯。况平生慷慨，闻鸡起舞，中原事业，不付公谁。生记今朝，频将指数，较莱公争半月期。功名事，不输前辈，行即诏封泥。

金缕词 寿宁化刘宰

瑞气重闽宇。小春余、璇霜避暖，敛威青女。一点阳和钟英气，崧岳今朝诞甫。正两荚、尚留萸舞。应想宁川称寿处，听金笼、放鸽儿童语。愿千岁，祝慈父。

君家自有安民谱。袖良规、时宽轡策，夜闲桴鼓。直赖汀南为保障，无复鼙鼓啸聚。果峻秩、升朝褒叙。治最行将书第一，去思碑、拟颂歌明府。飞诏趣，缀鸳鹭。

鹧鸪天 寿赵簿

当日名驹产渥洼。追风千里堕君家。不辞贤路甘栖棘，来伴河阳且种花。

梅试雪，酒潮霞。寿觞还捧笑声哗。唐朝九相青毡旧，为报新堤早筑沙。

满庭芳 寿梅监税、丙戌登第

标格清高，性姿雅淡，群芳独步惟梅。当年秀气，付作此奇材。不逐东风桃李俗，冰霜里、弹压春回。还应是，崧神降瑞，屈指一阳来。

文章，推大手，关征小试，暂费筹财。我殷勤为寿，起舞持杯。鹏翮抟风再整，南枝报、管占新魁。从今看，和羹大用，指日主三台。

鹧鸪天 寿摆铺

鹤算遗芳续世传。武夷来作散神仙。柳营隐隐兵戎整，兰砌泔泔子舍贤。

倾柏酒，爇沈烟。殷勤起舞祝长年。行须一札飞鸦诏，促缀银班侍九天。

西江月 寿苗摆铺

一夕凉浮如水，崧高瑞世生贤。觴来闲伴幔亭仙。行副九天降眷。

数万范公兵甲，三千李白诗篇。兜鍪元许换貂蝉。好把平戎策献。

又 寿周主簿

侯绩分从东鲁，世勋来在姬公。桂枝少日冠蟾宫。枳棘暂栖鸾凤。

报道小春来也，令辰申降高崧。功名富

全宋词 无名氏

贵管无穷。指日经纶大用。

临江仙 寿石守

良月露浓仙掌润，郁葱佳气充闾。几年重席旧师儒。大椿同未老，灵寿不须扶。

江左衣冠登桂籍，蝉联四世谁如。琳宫昨下凤凰书。金闺班趣缀，禁路莫踟蹰。

醉蓬莱 寿李侍郎

庆长庚协梦，仙李蟠根，挺生名世。粉省收声，早云霄自致。凤掖鸾台，荷囊簪笔，久要津历试。红旆颁春，碧油开府，出分忧寄。

均逸真祠，左弧开宴，璧月光澄，玉炉烟细。漆发冰眸，揽浮丘仙袂。伫看九重，迅驰三节，诏促还丹陛。槐府凉生，榴樽香泛，年年欢醉。

满庭芳 寿陈守

桐叶霜乾，芦花风软，晚来一色清秋。碧天无际，良夜月明楼。瑞应长庚入梦，钟奇秀、特座贤侯。堪夸处，雄姿英发，连箭射双雕。

回头。思往事，皂囊三进，豪气冲牛。记前回凤诏，空下南州。冷笑浮云坠甑，鲈鱼美、归老扁舟。祝君寿，青山不尽，绿水

自悠悠。

七娘子 寿梅太守

暖律未回春时候。向旧根、腊底红先透。
玉有冷香，粉无纤垢。更〔饶〕雪里还清瘦。

琳宫拟诏风流守。任折来、深醮金杯酒。
欲赏一枝，樽前为寿。愿公归作调羹手。

多丽 寿临江通判

近中秋，迥然玉宇澄鲜。更尧蓂、十有一叶，向人特敷妍。喜名家、世行阴德，有余庆、门拥祥烟。梦协熊罴，间生鸞鹭，妙年攀桂振青毡。横飞上，金闺粉署，小试佐临川。翩然返，一身似叶，琳馆清闲。

记榜下、曩尝附骥，浪萍还有夤缘。曳长裾、不辞远道，接漫刺、复面同年。邂逅佳辰，铺排雅席，金炉香袅欲何言。愿趣诏、入扶宗社，浩气愈纯全。长年少，龟龄共永，鹤算同坚。

百字令

某恭审某人笃生华旦，茂衍遐龄。暂归潭府之安，行正台衡之拜。某宅身杜厦，仰德韩门。不揆芜辞，上期椿算。

自天钟秀，看人物谁与、君家为比。椿桂相辉年少日，事业文章如此。玉殿诗书，金瓯姓字，简记宸衷里。有三株桂，一时归

全宋词 无名氏

耀桑梓。

我愿寿祝南山，尊空北海，不获陪珠履。
惟有瓣香心起敬，敢颂鲁侯燕喜。大厦万间，
金城千里，国计如家计。日边有诏，苍生端
望公起。

玉烛新 寿监岳

养高梓里，袖手珍祠，太平五福人物。
自是昔年，场屋文章旧豪杰。诗书平生事业。
问造物、为谁悭惜。谩眷怀、兰玉桂香，已
露消息。

尝试问、天公好事，鼎来家庆自因袭。
更看绶蓝森列，映灵椿双碧。诸郎击鲜奏食。
笑贾陆、一更十日。画堂上，鹤算延长，兕
觥无极。

南柯子 寿赵路分

花萼清辉近，蓬莱紫气浓。濮园流庆与
天同。生得名驹千里、策秋风。阅武戈初偃，
论文酒不空。摩挲铜狄灞桥东。看取朱衣双
引、袞真封。

满庭芳 寿殿帅

威策冰河，兵严玉帐，济时人在壶天。
妙龄谈笑，图画上凌烟。但见勋书鼎鼎，谁
知道、名列高仙。风云会，钩陈羽卫，绿鬓

映貂蝉。

绵绵。流庆远，芝兰秀发，折桂争先。占盛一门，文武更双全。已〔饵〕琼英绛雪，灵龟寿、何止千年。年年看，笙歌丛里，金盏侧垂莲。

水调歌头 寿学生

金兽袅香穗，银烛灿花枝。眼前风景殊异，酌酒庆生时。要是祖宗流庆，方有此身此日，盍亦反其思。何以上雅寿，敢用此为规。

况君家，本学业，致轻肥。牙签玉轴，全胜阡陌占东西。好把胸中一点，照破堂中万卷，五福自来宜。谨勿效雌伏，指日要雄飞。

又 寿丘月林

天地钟奇秀，山泽有儒仙。词锋前驱万马，三度奏捷菊花天。信是文场敏手，如把梟卢对掷，高叱便回旋。一点英雄气，四顾浩无边。

长羨君，先我著，祖生鞭。今朝尊酒持劝，岂特颂长年。要入兰宫妙选，共向集英殿里，玉陛听胪传。姓字标黄甲，香墨照人鲜。

又 庆东屏

来复迈七日，亨泰兆三阳。恰逢临吉中应，浸长三阳刚。天地凝成正气，岳渎钟为秀杰，玉燕纪呈祥。莹彻冰壶操，皎月映秋

霜。

日星回，乾坤辟，再更张。时乘君子道长，茅如喜生光。抱负黄钟大吕，资稟盐梅栋柏，施用在岩廊。一骑春风里，紫诏下山堂。

沁园春 寿东屏

奏捷淮堧，勒功燕石，鼓吹凯旋。正归班玉笋，花袍方卸，彩衣亟著，忠孝双全。清德独高，皇心简注，燕寝凝香朱两轡。君王问，录屏风姓字，趣对金銮。

平山。躡履綉冠。竞来庆嘉平五日间。是炎刘昴宿，光至再现，绛人甲子，四百新颁。碧麦称觞，玉枝等算，长对梅花开岁寒。春回也，报调羹时候，梅子微酸。

西江月 寿东屏有青在堂

几萼红搀桃径，双茎翠舞萸阶。小春霏霭瑞蓬莱。寿旦称觞青在。

牛斗辉腾概，风云壮入襟怀。年年鹤发笑颜开。西爽亭前戏彩。

柳梢青 寿友人

正好江南，一分春色，梨花白雪。化日迟迟，文章半刺，平分风月。

满堂花醉三千，看妙舞、六么十八。笑

全宋词 无名氏

捧瑶卮，祝君归去，琼楼金阙。

西江月 寿中山

一片冰霜气概，几多锦绣文章。鹏抃相踵桂枝香。盛事争夸歆向。

岁岁萸敷九叶，喜催一线迎长。柏松祝算奉霞觞。事业非熊吕望。

水调歌头 庆友人

何以作公寿，一纸寄讴吟。当年生申有兆，鸞鹭梦文禽。气宇虹霓万丈，胸次蟠龙七泽，锦绣萃中心。高谊薄云表，随处是知音。

人俊逸，文卓萃，气雄深。版岩合辞故隐，霖雨慰当今。且把梅花酌酒，行即桂枝入手，桑荫未移阴。珍重此时祝，何日盍朋簪。

满江红 庆发举友人

学富胸襟，才名擅、菊潭第一。都缘是、文星在命，光联南极。已向九霄横鹗荐，词场独步花生笔。况而今、好事又相逢，趋朝急。

增喜气，眉黄色。须还做，龙头客。且今朝满泛，寿觞琼液。自昔箕畴称五福，惟公兼备真难得。看明朝、夺取锦标归，头方

黑。

乳燕飞 寿种春翁

指点金蕉叶。倩双成、十分为注，九天琼液。中有玉梅风露气，持寿卯金仙伯。听贱子、歌翻新阕。不作寻常儿女祝，把先生、好事从头说。须快饮，莫留滴。

风流晋宋人物。有锦囊万首，不博小儿馆职。膝下双雏真伟器，足继传家事业。且做个、人间闲客。试问种春春几许，尽芝田万顷天来阔。天有尽，春无极。

沁园春 寿长斋友人

眼底高年，如老曾仙，斗南一人。能持斋守戒，香山居士，乐天知命，康节先生。满眼儿孙，满堂金玉，多宝如来现后身。真堪羨，有许多福力，越见精神。

庆公今日生申。喜渐近中秋对月明。这平生积善，三千功行，前程享福，八百椿龄。见说寿筵，大开佛事，煮鹤炮龙烙凤麟。从今后，愿年年长健，事事如心。

踏莎行 庆友人

月朏银河，秋生玉宙。金风丛桂香生袖。儿孙重侍戏斑兰，霞觞共庆公家寿。

学问从心，希年谁有。东之行应贤良召。

全宋词 无名氏

吉音先动菊花期，一门依旧夸三秀。

望江南 寿东人母

阶萸舞，才半小春天。青女霜前犹避暖，
素娥月里乍羞圆。蓬岛降天仙。

称寿处，琼液拍浮船。长伴瑶池金母宴，
蟠桃花下驾云骈。结实看千年。

蝶恋花 寿江察判孺人

风雨一春寒料峭。才到中和，喜气薰晴
晓。九叶仙茅呈瑞巧。青青辉映萱庭草。

红著蟠桃春不老。戏彩称觞，阿母开颜
笑。丹桂五枝年并少。荣亲伫下金花诰。

鹧鸪天 寿妇人

织女初秋渡鹊河。逾旬蟾苑聘嫦娥。蓬
莱仙子今宵降，前后神仙引从多。

餐玉蕊，抚云璈。寿筵戏彩捧金荷。黄
金照社三儿贵，他日潘舆侍绮罗。

满江红 寿赵安人

萱草堂开，仙姿秀、金枝玉叶。亲曾映、
尧阶三月，萸舒六荚。荣侍早随台辅鼎，长
生已镂天潢牒。自当年、萍藻伋勋门，能循
法。

全宋词 无名氏

掌中贵，双珠握。慈训笃，家传学。信陶亲圭母，要还相业。最好鳌头攀盛事，只今鹤发承殊渥。任年年、王母献蟠桃，金书帖。

八声甘州 寿国太夫人

渐纷纷、木叶下亭皋，秋容际寒空。庆屏山南畔，龟游绿藻，鹤舞青松。缥缈非烟非雾，喜色有无中。帘幕金风细，香篆蒙蒙。

好是庭闱称寿，簇舞裙歌板，欢意重重。况芝兰满砌，行见黑头公。看升平、乌栖画戟，更重开、大国荷荣封。人难老，年年醉赏，满院芙蓉。

庆灵椿 夫人生日

瑞溪庭，满闰秋色好，帘幕低垂。一床簪笏人间盛，沈檀影里，笙歌沸处，齐捧瑶卮。

习礼复明诗。胡氏清畏人知。寿堂已庆灵椿老，年年岁岁，重添嫩叶，频长繁枝。

万年欢 仁寿夫人生日

日暖霜融，画戟门开，锦筵欲振梁尘。正是慈闱熙熙，庆诞佳辰。象服鱼轩粲烂，喜高年、福祿长新。承颜处，朱紫满堂，华胄泂泂。

全宋词 无名氏

家声未论王谢，有禁中颇牧、江左机云。
雁序鸳行，雍容高步金门。更有子孙侍列，
拥阶庭、玉洁兰薰。持芳醕、满酌瑶觞，意
祝遐寿千春。

水调歌头 寿刘宰母

泽国嫩寒月，天气小阳春。萱堂今朝生
日，瑞霭郁轮囷。身佩铜章墨绶，手捧霞觞
玉液，献寿太夫人。且喜藤舆稳，共戏彩衣
新。

发垂鹄，瞳点漆，倍精神。麻姑来庆，
笑道沧海几扬尘。伫看起居八座，更好回班
百辟，异数耸朝绅。此母生此子，再拜谢宸
恩。

满江红 寿妇人 有二子登第，一为
教，一为户

绣线添长，屈指隔、书云三日。华堂里，
十分佳气，葱葱郁郁。一点老人星正照，千
年王母桃方实。向绮罗、丛里酌流霞，称觞
客。

凤雏贵，名仙籍。鸾诰宠，恩慈极。萃
一门盛事，皆诗书力。芹泮珠曹争禄养，桂
林雁郡催行色。看明年、两处寿筵开，长生
节。

醉瑶池 寿妇人

柳捻金丝花吐绣。蝶拍莺歌，来献天人

全宋词 无名氏

寿。一点红黄眉上秀。玻璃满泛长生酒。

丁祝遐龄天样久。年年岁岁笙歌奏。早晚郎君纡紫绶。归来色共斑衣斗。

瑞鹤仙 寿夫人

五云翔碧汉。望卿月光中，老人星现。黄堂盛华宴。庆君恩、许奉安舆游衍。鹿城壮观。幸王母、人间得见。望君侯、彩服称觞，喜溢万家欢抃。

堪羨。一生福善，九帙康宁，万钟尊显。肩舁上殿。封两国、未应晚。管阴功、何止平反，一笑钧陶惠满。看瑶池、手种蟠桃，著花万遍。

满庭芳 寿硕人

千里旌麾，万家灯火，晓来气霭佳瑞。宝猊烟里，龟甲锦屏张。尽道蓬莱仙瑞世，九霄外、鸣玉飞香。阴功著，恩疏三品，金诰久弥芳。

华堂。丝管□，金樽齐捧，百拜称觞。看绕庭兰玉，济济成行。占尽人间五福，壶中景、日月偏长。春难老，芳瞳发秀，千岁寿宁康。

酹江月 寿陈硕人

云幢凤舞，下天风、吹落轮袍仙曲。阿

全宋词 无名氏

母人间今百岁，两鬓犹含秋绿。萍小乾坤，
九看日月，不用长生策。一封天上，鼎来五
色花轴。

须信寿老难侔，世间无价，空有明珠千
斛。此夕兰堂风露好，雅称飞觞支属。十样
宫眉，两行红袖，烧烛围香玉。不妨沈醉，
共拚月上华屋。

鹊桥仙 寿黄丞母

凤箫羽扇，霓裳云袂，谩尔人间游戏。
行看两国锡鸾封，信知道、母因子贵。潘舆
彩舞，瑶池春媚。笑语兰孙共醉。大椿一万
六千年，自今日、从头数起。

玉楼春 子寿母

戏彩堂高无溽暑。满座风生闻笑语。慈
闈今日庆生申，歌遏行云香篆缕。

万事从今休挂虑。儿辈行当壮门户。一
杯祝寿比庄椿，愿长与、儿孙作主。

减字木兰花 子寿母八十

慈闈生日。恰则今年当八十。玉宇澄清。
五夜分明见寿星。

恩深鞠育。长愿一身全五福。满劝椒觞。
岁岁今朝拜阿娘。

全宋词 无名氏

满江红 侄寿叔

指日中秋，便满目、蟾光如洗。又还竹溪溪上，长庚瑞世。事业权舆韩范辈，文章拍调苏黄里。借北来双鹤寿芳筵，人千岁。

羞阿买，依兰砌。看大阮，趋枫陛。这冰壶人物，蓬山地位。荐墨未曾乾翠剡，除书已拟封黄纸。把爆筵、趁取牡丹红，花前醉。

鹧鸪天 弟寿兄又赴省

冬至阳生才两日，欣逢伯氏绂麟辰。鹤翎原上欢声沸，棣萼堂前喜气新。

斟九酝，劝千巡。华途从此问云津。杨前未把耆年祝，且愿青云早致身。

千秋岁 夫寿妻

记当初归我，似德耀、嫁梁鸿。算三十年间，艰难历遍，甘苦相同。新来有孙可抱，也添些、喜色到眉峰。今日又逢生日，不妨樽酒从容。

老翁。只是一村农。欠你孺人封。幸儿渐知耕，妇能知识，莫问穷通。君看世间富贵，比浮云、缥缈过晴空。何似大家清健，玉林岁岁春风。

全宋词 无名氏

蝶恋花 寿家人

急鼓初钟声报晓。楼上今朝，卷起珠帘早。环佩珊珊香袅袅。尘埃不到如蓬岛。
何用珠玑相映照。韵胜形清，自有天然好。莫向尊前辞醉倒。松枝鹤骨偏宜老。

鹊桥仙 寿朱经略硕人

东西二府，掖垣一相，谁似硕人兄弟。骖鸾来伴紫阳仙，要同享、橘中千岁。
银灯初试，花城不夜，铁马响冰春碎。来年璧月淡罍罍，看犹有、传柑归遗。

沁园春 侄寿叔又调官

某共审某官，门弧纪瑞，朝旆生辉。寿年固等于南山，宠命行膺于北阙。既有联翩之喜，可无祝祷之忱。某兰砌幼元，竹林小阮，夙蒙矜诲，倍切欣愉。敬缀沁园之词，用侈庄椿之祝。三熏三献，一盼为荣。

长至阳生，律转黄钟，门左弧垂。记当年瑞世，梦传玉燕，今朝诞节，香爇金猊。南极星明，北山堂邃，松桧苍苍龟鹤随。况蟠桃下熟，仙童来献，喜介双眉。

平生谋画多奇。算收拾功名须有时。曾指麾万骑，乌飞粟輓，折冲千里，彗扫星驰。荐口澜翻，宸恩鼎至，此去须还衣锦归。人都道，黑头卿相，慷慨男儿。

鹧鸪天 寿弟生日

新月光寒昨夜霜。三年不一奉瑶觞。朱颜大药知能驻，白日仙家岂计长。

枫渐赤，橘初黄。五湖烟水动归航。且倾寿酒歌难老，便见除书出未央。

永遇乐 寿族兄正月初六，与定光佛同日生

柏颂才过，梅妆方试，六秀萸萸。恰是今朝，白花岩里，一佛生时节。前身再现，金城桃熟，千岁莲花重发。更一念、善根常在，作个在家菩萨。

活饥好事，造桥阴鹭，乐施常开金穴。瑶籍儿孙，玉京夫妇，庆聚神仙窟。从今生旦，三千纪算，常对昙华优钵。华严会，彩箱庆满僧宝骨。

鹊桥仙 夫寿妻

日长槐夏，凉生冰室，又是生辰来到。年年把酒对荷花，颜色比、荷花更好。

儿歌女舞，彩衣共戏，仰祝齐眉偕老。欢欢喜喜八千春，更何处、蓬莱仙岛。

菩萨蛮 夫寿妻

秋风扫尽闲花草。黄花不逐秋光老。试

全宋词 无名氏

与插钗头。钗头占断秋。

簪花人有意。共祝年年醉。不用泛瑶觞。
花先著酒香。

减字木兰花 寿外公

祥呈香褱。尝记翁生当己卯。福祿俱添。
绿鬓红颜七十三。

芝兰满砌。争著彩衣堂下戏。祝寿无涯。
王母襟期醉九霞。

鹊桥仙 寿丈人

某兹者共审丈人宣义蓬弧纪瑞，庭户增辉。某百拜称觞，未遂职供于半子；一章侑席，切晞芹献于野人。调谨按于鹊桥，年冀齐于鹤算。露封以献，电盼为荣。

才临复日，便逢生旦，料想门阑多喜。好将何物寿冰翁，但有个、新词为礼。

如今已办，一千余阕，尽按宫商角徵。一年一阕祝椿龄，自今日、从头数起。

鹧鸪天 自寿

云外青山是我家。两年城里作生涯。杜陵赏月延秋桂，彭泽无钱对菊花。

初度日，感年华。三杯浊酒一瓯茶。尊前儿女休相笑，更有人穷似汝爷。

贺新郎 生日自寿

官职从他大。官大时、烦恼偏多，不如到我。我有数间临水屋，随分田园些个。也薄有、新蔬时果。浊酒三杯棋一局，对花前、时抱添丁坐。闲觅句，唱仍和。

年年生日人争贺。谩相期、黄扉紫闼，玉堂青琐。一日平章风月事，奉保永无期祸。只如此、有何不可。阁箸相疑真可笑，政事堂、日里如何□。似恁地，待则么。

水调歌头 生日自寿

久雨忽开霁，花靥斗春娇。家人笑道，老子今日是生朝。细数平生功行，断自狂吟之外，全不犯科条。心事淡如水，天合与逍遥。

也何须，期寿算，比松乔。但令此去清健，到处狎渔樵。说与门前鸥鹭，护我山中杞菊，日日长心苗。世事儿戏耳，尊酒百忧消。

鹧鸪天 生日自寿赋谢人庆寿

生羨鸡冠与凤仙。时秋华艳遍园间。自怜生日悲生事，搔首吴江载月船。休身外，且樽前。喜君文采锦相鲜。青云贻我长生曲，唤醒凄凉乐暮年。

沁园春

自寿甲子一周，织乌相催，又还十年。但诗狂酒圣，坐常有客，书痴传癖，囊不留钱。拍手浩歌，出门长笑，谁是知心有老天。犹多事，更时游艺圃，日耨情田。

细思世事无边。只好把清樽对眼前。看槐国功名，有如戏剧，竹林宴赏，便似神仙。富贵危机。荣华作梦，早已输人一著先。从今去、莫将醉趣，与醒人传。

减字木兰花 寿隐士

一丘一壑。野鹤孤云随处乐。篆带纱巾。且与筠庄作主人。

高山流水。指下风生千古意。寿庆年年。长在新秋六日前。

西江月 寿居士

好个马山居士，功名富贵浮云。庵儿侧傍万杉阴。烟里时横小艇。

律中林钟将半，华堂寿斝频斟。声声齐祝百千龄。坐看云仍贵盛。

满庭芳 贺人生日新冠

月属重三，蓂开二六，于门车马骈阗。

全宋词 无名氏

彩麟高设，金鸭喷祥烟。试问谁来瑞世，人都道、蓬岛神仙。非凡子，年才志学，勋业已精专。

坐联。汤饼客，倾银注玉，盛展华筵。羨巍冠初冠，气宇飘然。底用遐龄频祝，但愿双亲未老，富贵双全。功名事，吾家旧物，早共复青毡。

点绛唇 贺女人生日新筭

重午日才过，又经四日逢华旦。月娥降诞。春早桃花嫩。

许字方筭，金雀屏开半。东床选。门楣壮观。偕老行如愿。

贺新郎 赵娶温氏

路入蓝桥境。忆当年、云英来会，玄霜捣尽。争似温公风流婿，一笑欢传玉镜。便胜似、琼浆玉饮。自是振振佳公子，冰肌玉骨相辉映。一对儿，好厮称。

夜深银烛交红影。雀屏开、凤帷拥绣，鸳衾铺锦。雨意云情应多少，梦到巫山一枕。好语向、耳边频听。但愿来春青云路，管一枝、青桂嫦娥近。闻早寄，凤楼信。

百字谣 贺人娶姑女

太真姑女，问新来、谁与欢传玉镜。莫

全宋词 无名氏

恨无人伸好语，人在蓝桥仙境。一笑樽前，欢然相与，便胜琼浆饮。殷勤客意，耳边说与君听。

长记旧日君家，门阑喜动，绣褥芙蓉隐。回首龙门人得意，又报凤楼芳信。只是相传，房奁中物，好事駉駉近。管教人道，一双冰玉清润。

鹊桥仙 贺王姓人新婚

风流仙客，文章逸少，复见当年佳婿。夤缘端不数琼姬，向林下、亲逢道气。

屏开金雀，床铺绣褥，多羨豪家深意。凭谁说阿戎，剩觅取、缠头利市。

清平乐 贺人娶宗女

繁弦急管。喜色门阑满。应是雀屏曾中选。新近东床禁脔。

功名有分非难。休因女婿求官。幸与嫦娥为伴，直须仙桂新攀。

杏花天 贺人三兄弟皆娶赵氏

弟兄旧说河东凤。怎得似、君家伯仲。一双白璧殷勤种。齐向金屏选中。

乘龙去、门阑喜动。管取早叶、熊罴吉梦。儿孙不与尘埃共。总是龙驹凤种。

朝中措 贺周姓娶祝氏

几年弱水望蓬莱。心事喜同谐。佳婿欣逢公瑾，新婚喜近英台。

豪家深意，芙蓉褥隐，金雀屏开。但愿门阑多喜，凤楼早寄书来。

满庭芳

金贴鼓腰，绣妆檐额，吾宗自昔豪奢。椒馨兰馥，烟雾霭横斜。吹管聒天今夜，香风度、罗绮光华。看双美，郎君俊秀，玉女更宜家。

繁华。歌宴处，金盘撒果，银烛烧花。任芙蓉帐掩，翡翠屏遮。更看名传桂籍，蓬瀛近、隐泛仙槎。归来去，双亲绿鬓，相对饮流霞。

临江仙

乐奏箫韶花烛夜，风流玉女才郎。同心结上桂枝香。如鸾如凤友，永效两双双。

莫把画堂深处负，笙歌引入兰房。满斟玉斝醉何妨。南山堪作誓，福祿应天长。

柳梢青 贺陈姓娶田氏

孺子风流。孟尝门地，合下相当。俏似

全宋词 无名氏

年时，送他织女，来嫁牛郎。

满堂珠履飞觞。看花烛、迎归洞房。海誓山盟，从今结了，永效鸾凰。

少年游

上苑莺调舌。暖日融融媚节。秦晋新婚，人间天上真奇绝。傅粉烟霄，倾国神仙列。彼此和鸣，凤楼一处明月。

歌喉佳宴设。鸳帐炉香对爇。合卺杯深，少年相睹欢情切。罗带盘金缕，好把同心结。终取山河，誓为夫妇欢悦。

喜迁莺

早梅天气，正绣户乍启，琼筵才展。鹊渡河桥，云游巫峡，溪泛碧桃花片。翠娥侍女来报，莲步已离仙苑。待残漏，鸳帐深处，同心双绾。

欢宴。当此际，红烛影中，檀麝飘香篆。掷果风流，谪仙才调，佳婿想应堪羨。少年俊雅狂荡，蓦有人言拘管。镇携手，向花前月下，重门深院。

点绛唇

仙子仙郎，两情今是欢娱会。莲花池内。好个鸳鸯对。

一自芳容，一自才华最。真佳配。荣华

全宋词 无名氏

富贵。寿考千秋岁。

鹧鸪天 集曲名

烛影摇红玉漏迟。鹊桥仙子下瑶池。倾
杯乐处笙歌沸，苏幕遮阑笑语随。

醉落魄，阮郎归。传言玉女步轻移。凤
凰台上深深愿，一日和鸣十二时。

卜算子 姓彭

半破玉梅春，小簇金莲炬。结褵风流倜
傥郎，直入阳台去。

休诧鹊桥仙，说甚缙山侣。便合齐眉八
百年，个是真仙子。

鹧鸪天

绛蜡银台晃绣帟。一帘香雾拥金猊。人
间欢会于飞宴，天上佳期乞巧时。

倾合卺，醉淋漓。同心结了倍相宜。从
今把做嫦娥看，好伴仙郎结桂枝。

水调歌头 贺真西山

人道孰为大，尚小易咸常。厥初皇极中
建，扶世有三纲。仁义阴阳道立，父母乾坤
位正，六子发辉光。一日不容缓，此意久弥
昌。

全宋词 无名氏

杯举庆，天作合，月探囊。十年不字以正，乃字便惟良。推阐家人一卦，迤邐齐家治国，鼎鼎得姬姜。旧物中书令，玉润继汾阳。

沁园春 冬至日娶

姑射琼仙，论人间世，学宫样妆。费精神刺绣，裁成云锦，今朝喜遇，弱线添长。收拾云情，铺张雨态，来嫁朱门趁一阳。真还是，两情鱼水，并颈鸳鸯。

登科人道无双。问小底何如大底强。幸洞房花烛，得吹箫侣，短檠灯火，伴读书郎。办苦工夫，求生富贵，要折丹枝天上香。来秋也，看载鹰鹗荐，载弄之璋。

西江月

银烛晓催春漏，珠帘暮卷东风。乃翁相对玉楼中。不枉当年冰梦。

花意似随人好，酒香难比情浓。夜深欲睡海棠红。密密骖鸾驾凤。

满江红

雪意垂垂，算天为、风流酝酿。便催得、蕊宫仙子，队移仙仗。明月珠连湘浦合，清风佩过秦楼响。带天香、郁郁碾云辇，通宵降。

全宋词 无名氏

温玉枕，销金帐。花烛下，狨毡上。这英才美貌，一双不枉。鸾凤镜明栖彩翼，鸳鸯被阔翻新浪。祝君莫学画眉痴，如张敞。

贺新郎

贺鹊冰檐绕。伴华堂、两催妆束，音传青鸟。瑞气沈烟金鸭袅。脆管繁弦迭奏。拥出个、仙娥窈窕。秋水芙蓉相映照。算人间、天上真希少。肌玉润，臂金瘦。

仙郎况是青春调。向鸳鸯、彩丝结就，同心巧。料想梅花先得了。昨夜一枝开早。无地著、许多欢笑。准拟计台魁鹔表。著青衫、跃马长安道。一百岁，一双好。

沁园春

柳眼偷金，梅肌晕玉，春信已催。正浅寒天气，嫩晴日色，雨收巫峡，烟卷蓬莱。青鸟衔音，彩鸾迎驾，白昼传呼王母来。屏帏里，看合欢杯尽，连理花开。

笙歌上下楼台。更罗绮丛中薰麝煤。想雪香酥暖，粉娇翠软，风流乐事，慰惬情怀。花帽兰袍，皂鞋槐简，谁似何郎年少才。人偕老，类鸳鸯匹偶，鸾凤和谐。

贺新郎

瑞霭笼晴晓。正小春时候，和气十分撩

全宋词 无名氏

绕。月姊精神还窈窕。甚似星郎年少。同共入、蓬莱仙岛。鸾凤锵锵风缥缈。算一双、两好真奇妙。天上有、世间少。

桥门名姓掀张了。更那堪、榜下新婚，才名表表。便好相成勤夙夜，莫使脱簪遗笑。且早趁，青春才调。向去功名成就后。到恁时节风流好。胜今日，登科小。

水调歌头 贺人再娶

阿谁煎凤髓，续此玉琴弦。依然音调清婉，律吕互相宣。天使彭城姝丽，来配鲁邦才子，永作地行仙。况有盈门礼，百两拥骈阗。

更临鸾，看举案，两无偏。从此欢谐千岁，月下与花前。剩长芝兰玉树，俱作蟾宫佳客，声誉振螺川。仍看明年去，平步上青天。

鹧鸪天 送人出赘

喜气乘龙步步春。梅花影里送君行。君行直到蓝桥处，一见云英便爱卿。

鸾鹤舞，凤凰鸣。群仙簇拥绿衣人。我嗔有句叮咛话，千万时思望白云。

青玉案 送刘置宠

青螺江上梅花暮。有姑射、神仙侣。剩

全宋词 无名氏

把明珠倾满斛。老仙源委，玉妃风韵，真是欺蛮素。

彩鸾齐跨山中去。浑似天台旧时路。试问风流春几许。芳心嫩叶，如今时候，好景才三五。

踏莎行 贺友人娶宠

金鼎休翻，玉壶休到。为伊弹彻求凰操。歌台舞榭没长情，不如相伴文园老。

荆里钗宜，布边裙好。有缘封国还他到。端能一意谢红尘。归来便带宜男草。

水调歌头 贺人生子

尧历庆良月，嶰管换新冬。玉成西爽，五云拂晓画楼东。人指谢家庭砌，眼底猗兰奕叶，特地茁新丛。不是善根种，争得占春风。

步鹏程，名虎榜，早收功。建安衣钵，定知他日属奇童。且说而今胜事，珠履三千称贺，相对醉颜红。拜贺无他语，相庆黑头公。

百字谣 叔庆妣生子

金秋行令，恰清晨、白露初交中节。勿怪西窗传好事，生个他年英杰。吉梦既符，知如徐子，冰玉为神骨。吾家有庆，阶兰喜

又新发。

如今早已生男，清樽华宴，且好延佳客。
更自承师勤问道，门外不妨立雪。抗志云霄，
留心简册，听我叮咛说。駉駉月殿，桂枝取
次高折。

减字木兰花 十一月娶，后十一月生子

向来梅发。雪袂仙裳回绛阙。今又梅开。
已领熊罴好梦来。

试将梅比。才著阳和争结子。梅子生成。
早晚须调鼎鼐羹。

西江月 贺人生子

绛蜡攒宝炬，碧刍香衬金卮。东风吹下
玉龙儿。融就满堂和气。

此日兰汤新浴，他年桂苑同携。小词聊
代弄璋诗。剩与犀钱利市。

鹧鸪天 秋榜将开得子

菊蕊萸残玉未颓。文星喜趁梦熊回。预
传鲲拟南溟去，亲送魁从北斗来。

真间世，定奇材。满堂欢笑动春雷。明
年郎罢蟾宫近，更把丹枝为我栽。

长相思 贺生子、其弟又新婚

潇洒江梅春早处，天然一种两般奇。开

全宋词 无名氏

花结子，何事恰同时。

昨夜北枝开雪里，朝来青子又南枝。这般好事，消得付新词。

虞美人 和人生子

归心正似三春柳。试著莱衣小。橘怀几日向翁开。怀祖已嗔文度、不归来。

禅心已断人间爱。只有平交在。笑论瓜葛一枰同。看取灵光新赋、有家风。

沁园春

萱草阑干，杨花庭院，夜景澄虚。望庚星昴宿，荧荧照室，祥烟瑞霭，郁郁充闾。白鹿入胎，黄龟献梦，果应君家生凤雏。真英物，似昆山片玉，沧海明珠。

玳筵丝竹□□。有多少犀钱分座隅。念谢堂冷落，久无神语，淮淝骚扰，谁定边谟。天产英雄，地钟秀气，振起家声今有余。□□□，看宫袍加鹄，玉带悬鱼。

水仙子 贺生孙生子

晚节寒花犹带蕊。隐映老人星瑞世。绿衣初是政成归，真盛事。谁可比。那更新来孙又子。

烟细金炉香旖旎。想像瑶池生绿蚁。酿成佳气郁葱葱，当此际。将一醉。百岁从交

今日始。

喜迁莺 贺生双子

物中双美。惟邺县双凫，禹门双鲤。太华双莲，蓝田双璧，剑丰城而已。争是一门双秀，又是一朝双喜。人总道，机云双陆，同年弧矢。

希耳。会见这，双桂连芳，双鹤冲霄举，鱼诏双金，带横双玉，惟道无双国土。但愿双英双戏彩，且直与、双亲儿齿。愿岁岁，见东风双燕，满城桃李。

鹊桥仙 贺生双子

银河星汉，夜凉如洗。要轩豁、君家庆瑞。果闻两两获骊珠，天付与、精神秋水。

好是今朝，同逢盛事。无限欢欢喜喜。他年二陆看成名，方表得、此时双美。

玉楼春 贺生双子

天上双星欢迢迢。报道一门双喜。果庆双弧矢，双桂连芳，双璧光华起。

看取他时双彩戏。双堕号、机云才子。更带横双玉，鱼佩双金，作个无双字。

沁园春 贺生第二子

蛮柳眠风，妃棠醉日，春意方浓。怪凌

晨乾鹊，欢声啧啧，充闾瑞霭，佳气葱葱。
白鹿效灵，黄龟献梦，还应君生第二龙。兰
房里，想犀帷晕翠，锦褙裁红。

五峰。秀气攸钟。更头玉皎皎天性聪。
自谪仙芳歇，久尘赋颂，江西派冷，谁嗣宗
风。骨脉尤香，云仍载诞，袞袞公侯从此封。
三朝满，好平分犀玉，满泛金钟。

又 贺生第二子

明月呈规，祥烟非雾，载符梦铃。记前
时已庆，人间鸞鹭，今番再见，天上麒麟。
知是于门，功标紫府，夜半仙官勅五丁。亲
送与，向君家作个，难弟难兄。

绝奇不数徐卿。看他日名登千佛经。正
翁翁鬢铄，婆婆老福，薰修觉海，结果初成。
自愧空词，不酬杯水，汤饼难充堂上宾。无
功也，这犀钱玉果，敢望平分。

西江月 贺生第二子

积玉堆金闲事，惊天动地虚名。算来二
足是人生，有子方为吉庆。

莫道一夔足矣，也须学著徐卿。我翁休
笑又添丁。这个孩儿好命。

桃源忆故人 贺生第二子

庭槐沐雨翻新翠。叠雪香罗初试。铃响
彩旗天坠。忽报徐卿二。

帘帟坐客欢声沸。脱紫须烦半臂。借问

月娥知未。速长蟾宫桂。

喜迁莺 贺生第三子

古今三绝。惟郑国三良，汉家三杰。三俊才名，三儒文学，更有三君清节。争似一门三秀，三子三孙奇特。人总道，赛蜀郡三苏，河东三薛。

庆惬。况正是，三月风光，杯好倾三百。子并三贤，孙齐三少，俱笃三余事业。文既三冬足用，名即三元高揭。亲俱庆，看宠加三命，礼膺三接。

剔银灯 庆生第五子

古来五子伊谁，有唐室、五王称首。窦氏五龙，柳家五马，西晋室、陶家五柳。英名不朽。更东汉、马良并秀。

君今也、五男还又。应是五星孕就。腹笥五经，身膺五福，指日继、五侯之后。个般非偶。好与醉、刘伶五斗。

鹊桥仙 五十八岁方得子

元家道保，白家阿雀，俱生在、五旬有八。喜君得子与同年，怪檐外、鹊□嘲哳。

我疑释老，携来付与，人尽说、眉如翠刷。龙门种定入龙门，且早做、韩縠生活。

全宋词 无名氏

木兰花 兄螟乃弟子

花间棠棣。匹似人间兄与弟。一种花枝。
底事当年却盛衰。

中藏蜾蠃。忽遇螟蛉真类我。换叶移根。
要与相辉映一门。

瑞鹧鸪 贺人螟子

试问谢庭兰与芝。根花何似接花奇。琼
蕤不自香闺种，桂种当从月地移。

须信祝螟成蜾蠃，那须梦虺及熊羆。夜
来梦报蟾宫籍，新注江家五岁儿。

水调歌头 和韵谢人贺生子

玉琯届良月，璇极炳明星。适当季舍，
有梦应麒麟。但愧衡门深隐，偶尔玉川添累，
还解振家声。乐章歌一阕，笔阵扫千军。

羨君侯，为学富，焕文清。青云咫尺要
路，曳紫更腰金。顾我荆榛虽茂，其奈栋材
无用，何似八千椿。君王行赐宴，礼重敬如
宾。

酹江月 谢人贺生子

天高气爽，正金风玉露，安排秋节。株
守蓬窗无寸效，自愧才非人杰。那更家贫，

全宋词 无名氏

又添丁累，料想无奇骨。新章褒美，天然好语还发。

堪羨力薄无储，宾庖萧索，乏礼延佳客。多谢诸公来宠贲，虽有一瓿春雪。玉果未圆，犀钱须办，早早为君说。恐辜珠玉，小词聊且权折。

虞美人 侄贺叔生女

春风吹到深深院。添个人针线。莫言生女不妒儿。□□二郎不做、有门楣。

一家姊妹盈盈地。兄弟同欢喜。彩丝从此不须添。看取碧纱帐内、有人牵。

柳梢青 贺人生女

玉宇无尘，银蟾低转，渐觉缤纷。还是仙娥，厌游天阙，来降蓬瀛。

分明秋水精神。好嘱取、红叶殷勤。觅个檀郎，屏开金雀，玉润冰清。

鹧鸪天 贺人生女

象榻香篝冷宝猊。虺蛇吉梦寤惊时。缙綵生下虽无益，谢女他年或解围。

花骨髓，雪肤肌。飞琼抱送下瑶池。弄璋错写何妨事，爱女从来甚爱儿。

清平乐 贺友人生双女

梅兄梅弟。桃姊并桃妹。争似月临双女位。吉梦重占蛇虺。

小乔应嫁周郎。云英定遇裴航。会有九男事帝，谁夸七子成行。

柳梢青 贺生第三女。全用三女事

家近闽南。三姑姊妹，秀揖仙岩。须女精神，玉卮标格，谪下尘凡。

他时佳婿成双，红丝应牵第三。倚看樽前，团栾六子，三女三男。

一剪梅 贺生孙

太华峰头□□莲。闻十丈，藕大如船。晓来佳气蔼飞烟。彩戏盈门。弧矢盈门。

共把长生酒一樽。殷勤祝愿，耳畔低言。从今流庆更源源。子既生孙。孙又生孙。

临江仙 贺生孙（此首按调乃南歌子）

祖德绵绵盛，家声烨烨传。流光重庆子生贤。想见朝来庭户、起非烟。对客延汤饼，呼童散彩钱。休夸骨瘦与神全。看取犀庭玉角、已朝天。

全宋词 无名氏

满江红 贺生孙

月淡风轻，凉意在、碧梧修竹。极目际，澄空似水，素秋新沐。夜看庚星飞下界，晓传子舍生兰玉。

想充闾、佳气郁葱葱，香芬馥。

裁锦褙，铺金褥。沈水暖，金盆浴。向画堂深处，拥红斟绿。况是天潢真相宅，定知丰采惊凡目。看他年、槐馆振家声，飞腾速。

沁园春 贺生孙

喜见于门，子月阳生，子舍春回。想释丘抱送，绝奇神骨，暂参授受，忠恕胚胎。跨灶参先，撞楼踵后，鼎样一门三秀才。应不数，那窦家五桂，王氏三槐。

南丰门户奇哉。他日一声平地雷。若非是河东，名传三凤，也应天上，光映三台。莫道后时，方为贺客，且把犀钱玉果来。却还取，这长生一曲，富贵三杯。

水调歌头 贺人生侄

燕分炳箕宿，鲁野照奎星。天开岳渎，储瑞重见吐书麟。人道兰庭生谢，我羨竹林得阮，中夜沸欢声。奇称符百药，童号迈终军。

全宋词 无名氏

姿稟厚，骨骼异，气神清。好把一经为教，切莫诧籛金。击瓮画图休展，对日有言可听，材大等庄椿。年欲临志学，上国早充宾。

瑞鹧鸪 贺宗室子满月

璇源一派接天流。秀毓君家公共侯。满月佳时近重九，生朝令节踵千秋。旦评指日腾佳誉，蟾苑他年快壮游。气宇如今复何似，相应十倍虎窥牛。

西江月 贺人女中秋日满月

八月秋中玉律，十分月满瑶台。芳姿谪下佛宫来。疑是东方世界。

黛绿旋闻香发，桃红新晕芳腮。春风满面笑容开。长似观音自在。

清平乐 贺赵宅子晬

天潢佳气。钟作人间瑞。坐对满堂珠玉贵。此日还当周晬。

手持金印金戈。知他壮志如何。将相终须大用，姓名早掇巍科。

木兰花 贺人女试晬

小春良月。尧砌萸开三数叶。瑞启三躔。

全宋词 无名氏

此夕人间诞女仙。

寿期百岁。今日欢娱初庆晬。喜事重重。
亦有嘉祥应梦熊。

杏花天 贺人女晬

画堂帘幕香风细。郁郁南阳佳气。欢传
吉梦占蛇虺。此日还当一岁。

华筵外、初随彩戏。早已似、文姬聪慧。
伫看色动门阑喜。便有乘龙佳婿。

沁园春

袞绣堂前，福星开度，寿星入垣。有建
隆臣普，上天宰辅，绍兴臣鼎，平地神仙。
入秉钧衡，出分藩屏，托住东南半壁天。年
来好，甚烽消万里，尘静三边。

紫宸几度传宣。刚不肯归班押讲筵。纵
云台勋业，已登盟府，金城筹策，犹念中原。
好袖山河，更扶日月，色正三台第一躔。王
韩去，愿齐休社稷，于万斯年。

六州歌头 寿徐枢密

扬休玉色，山立秉鸿枢。圣天子、方有
志，会东都。得真儒。身佩安危寄，本兵柄，
修军政，朝野庆，钧衡任，赖诗谟。天上麒
麟挺，徐卿子，坐肃俭夫。向六阳时候，佳
瑞纪门弧。炳炳阶符。照蓬壶。

全宋词 无名氏

看兄枢使，弟元帅，真盛事，世间无。
筹密边烽息，凜羌胡。玉音俞。伫正三槐位，
散膏泽，福寰区。河如带，山如砺，巩皇图。
金鼎调元远大，中书考，致主唐虞。想公门
桃李，应不弃山樗。愿借嘘枯。

好事近 寿郭宪

春信到梅梢，欲雪又还晴早。趁得绣衣
初度，作霜天清晓。

乡来事直有天知，行拜玉皇诏。稳上神
仙官府，听履声云杪。

念奴娇 寿陈运使

素娥不老，才胜赏中秋、无边月色。又
报仙翁来桂苑，连庆生申佳节。玉宇无尘，
金茎有露，对景成三绝。重阳近也，黄花香
入瑶席。

尽说湖海元龙，裕民堂上，几度吟梅雪。
满眼阴阴甘棠树，消得寿同南极。八桂难留，
九芝促觐，早露真消息。星辰听履，好看明
岁今日。

临江仙 寿赵守

香雾菲微笼薄晓，帘栊爱日如春。谪仙
游戏到寰瀛。金枝推独秀，宝籍著长生。

锦轴疏恩怡寿母，朱轮光映难兄。会看

全宋词 无名氏

家庆日增荣。雁联鸳序立，彩戏袞衣新。

沁园春 寿黄守

皂盖朱幡，玉节虎符，宏开大藩。把济川舟楫，试横碧水，擎天柱石，小驻丹山。麦秀两歧，棠隲千里，治最当今黄颍川。平章看、文词坡谷，人品欧韩。

謁来游戏人间。况雅量汪汪海样宽。适弧垂门外，香凝燕寝，□星对照，两地交欢。自有青州，活民阴德，不用延年九转丹。人皆祝，愿黑头黄阁，绿鬓朱颜。

满江红 寿宪幕（此首按调乃念奴娇）

长风送月，近中秋、更无一点尘俗。绛阙真仙来瑞世，昨夜翔鸾飞鹄。奕世登科，诸昆竞秀，名盖天南北。持心恬退，更能韞椟藏玉。

须信宪幕平反，据经议狱，全活阴功足。川泳云飞宾主意，荐剡新翻浓墨。一路欢声，几多和气，吹作长生曲。赐环促召，清班两鬓长绿。

又 寿李侯

银漏穿花，星河浅、窗牖曙色。烧蜜炬、锦帟春煦，瑞烟濛濛。堂上金钗行十二，庭前珠履三千客。捧流霞、潋滟玉东西，歌声溢。

全五福，知无敌。来百禄，知无极。抱

龙骧勋策，小劳公力。袖内光藏神武剑，他
年待正天西北。顾贱夫、何可共功名，攀麟
翼。

又 寿卢侯，旧为大将军

绿鬓将军，是人道、天生韩霍。最奇处、
虎头燕颔，龙韬豹略。卧护懒通天子诏，长
驱爱把匈奴缚。我皇家、许样大乾坤，身难
著。

试问我，青原约。君合再，青油幕。这
兵书一卷，怎生闲却。万里城边须饮马，八
公山上多鸣鹤。待归来、依旧执金吾，凌烟
阁。

水调歌头

箫鼓闾街巷，锦绣裹山川。夜来南极，
闪闪光射泰阶躔。陡觉佳祥翕集，听得闾阎
笑道，蓬岛降真仙。香满琴堂里，人在洞壶
天。

斟凿落，歌窈窕，舞蹁跹。重阳虽近，
莫把萸菊玷华筵。菲礼岂能祝寿，自有仙桃
满院，一实数千年。早晚朝元会，苍鬓映貂
蝉。

沁园春 寿赵宰

快阁春边，倚阑干外，东西晚晴。有银
潢公子，摩〔拏〕石刻，金华仙伯，主掌鸥
盟。陶柳清新，潘花红嫩，早有丰年笑语声。

全宋词 无名氏

还知道，是街头父老，竟说升平。

怪来昨夜长庚。与一道澄江月共明。但
寿烟起处，千山天远，寿杯满后，千尺泉清。
兴庆宫中，长生殿里，早踏金鳌背上行。明
年好，望紫云楼上，一点台星。

鹧鸪天 寿姑

溪水连天秋雁飞。藕花风细鲤鱼肥。阿
婆一笑知何事，怀橘郎君衣锦归。

天上月，几秋期。娟娟凉影画堂西。堂
前拜月人长健，两鬓青如年少时。

沁园春 寿冰壶刘监丞，以竹为寿

径竹扶疏，直上青霄，玉立万竿。似冰
壶潇洒，虚心直节，清标贞干，风月无边。
清荫盈庭，细香满座，凡款公门皆七贤。称
觴旦，与松梅并祝，辞表南山。

绵延。龙种儿孙。列砌森庭栖凤鸾。况
节楼辟命，管城草檄，计台瓌试，玉笋联班。
盛事重重，荐腾楛茧，渡蚁阴功须状元。燕
山乐，又使符踵至，趣赴淇园。

又 寿朱金判，以鹤为寿

有鹤东来，鸣而向余，借篇寿词。道临
皋亭下，坡仙曾梦，锦宫城里，清献常携。
山斗才名，冰霜节操，苏赵如今重见之。生
申旦，正菊花开后，橙子黄时。

自从枳棘鸾栖。何尚泛芙蓉绿水池。便

全宋词 无名氏

来归西掖，坐看红药，也应天禄，书照青藜。
顾我鸡群，来陪燕贺，且祝千年寿与齐。樽
前鹤，乃翩跹起舞，来上瑶卮。

水调歌头 寿平交五十

学易喜加数，富贵正当年。谁识晚成大
器，信道古来然。莫叹无闻不足，官政从今
艾服，知命自由天。恰合买臣愿，好著祖生
鞭。

藏学问，通今古，冠英贤。管取一名一
第，行折桂枝先。未数奉书朱穆，窃笑表微
拭镜，接武引群仙。生日年年庆，绛老愿齐
肩。

减字木兰花 弟寿兄五十

阿兄生日。屈指今年年五十。豆雨初晴。
昨夜分明见寿星。

槐黄已迫。愿言共展冲天翼。桂子飘香。
看取吾家棣萼芳。

又 寿人六十

喜逢生日。倭指今年方六十。次第回春。
甲子从头又一新。〔敬〕驰一曲。付与歌儿勤
为祝。满劝金钟。试问蟠桃几度红。

西江月 寿六十四

葭管一阳已复，萸阶五叶还留。星瞻南

极瑞光浮。知是降生时候。

算衍恰侷周卦，福多更协箕畴。绿衣戏舞捧琼舟。满劝长生寿酒。

满江红 寿人六十四

在昔尝闻，老彭祖、寿龄八百。试屈指、我公今岁，才方八八。乙百更添三十六，算来总是公年月。对梅花、时候庆生朝，真欢悦。

儿既劝，金蕉叶。孙又把，沈檀爇。喜儿孙满目，芝兰英发。笑问堂前王母看，而今几度蟠桃结。道当时、亲手共栽培，何须说。

又 寿人六十五

细读箕畴，洛书字、六旬有五。试屈指、我公今岁，恰符其数。五福备全几坎九，既言一寿还称富。乃今知、好德与康宁，皆由天与。

记当日，嵩生甫。喜今夕，逢初度。看儿孙鼎盛，贺宾旁午。炉暖博山腾麝馥，杯擎琥珀斟香醕。问千秋千岁与谁同，西王母。

又 寿季父七十

安乐窝中，庆华发、苍颜七十。生处好、十分清瘦，仙风道骨。自古天教仁者寿，只今人饮贤人德。更一年、两度腊嘉平，垂弧夕。

华堂上，灵椿匹。兰庭下，孙枝七。望芹翁次第，年超八秩。欢伯便同分玉髓，河

全宋词 无名氏

儿不用闰瑶笈。记醉时、三万六千场，从今日。

壶中天 寿赵戎母七十

古来稀有，只闻道、是个人生七十。还遇小春梅蕊绽，对景装排绮席。云帔拖霞，朱颜晕酒，瑞气明南极。瑶池欢宴，玉杯争劝琼液。

堪羨玉叶名郎，天潢毓秀，梧竹生标格。百万貔貅归总押，霸气豪无敌。藩屏皇家，荣封寿母，名著金闺籍。融融液液，共看桃结佳实。

满江红 寿陈碧山七十一

维岳生贤，天欲补、中兴袞职。奈圣世、朝无阙事，且令休逸。锦绣文章胸次贮，蓬壶岁月闲中积。羨人生、七十古来稀，今逾一。

书聚府，成东壁。身眉寿，真南极。望瑞云深处，接江山碧。人愿君如天上月，我期君似明朝日。待明朝，长至转添长，弥千亿。

最高楼 寿人七十三

蟾宫客、未老得清闲。寿算过稀年。利名缰锁非关我，浮云富贵付苍天。且归休，

全宋词 无名氏

对松菊，乐林泉。

比吕望、数犹欠七。问师旷、恰符绛一。从今遐算更绵延。称觴欣近小春候，月当明夜又团圆。愿长如，天上月，地行仙。

瑞鹤仙 庆某氏八十

正迎长佳节。宴启华筵，有谁能说。子孙尽环列。见瑞香香裊，寿星明彻。丝丝华发。记瑶池、宴班曾接。笑人间、八十春秋，漫浪风花雪月。奇绝。诗书教子，陶母等伦，曹家风烈。鼎来阴德。孙枝秀，桂枝折。便从今、一轴金花鸾锦，十藏琅函贝叶。是年年、秋月圆时，长生真诀。

壶中天 寿人母八十

人生七十古称稀，何况寿年八十。试问何时逢载凤，恰在阳生七日。鹤发盈簪，朱颜晕酒，瑞象占南极。玳筵才启，欢声喜气充溢。

好是庭下双珠，经营创置，金玉成堆积。况有孙枝争挺秀，次第飞齐鹏翼。大振家声，荣封寿母，坐看蟠桃实。年年今夕，玉杯争劝琼液。

西江月 寿人八十一

剧饮犹能鲸吸，细书仍作蝇头。人间八

十最风流。况又今年九九。

不用蒲轮加璧，不须〔磻〕石垂钩。八千春更八千秋。但愿灵椿长寿。

水调歌 寿周相子 正月初一

雪霁万山出，和气蔼王正。平园春事竞起，梅柳冻全醒。此际朝元归路，疑有真仙呈瑞，笙鹤九霄声。东阁识风度，南极粲光明。

看精神，秋夜月，玉壶冰。淳熙相业隆盛，家自得仪刑。闻道君王神武，捷报胡儿宵遁，玉殿正论兵。行奉紫泥诏，帷幄佐中兴。

沁园春 寿闽帅 正月初二

意一仙翁，自紫府中，出游戏身。看脊梁铁铸，担当社稷，精神玉炼，映照乾坤。谏省伏蒲，紫垣直笔，硬语曾惊天上人。福身去，建红牙兼纛，南海之滨。

天公偏福吾闽。遣夜锦开藩为帅臣。记前回散了，几多饭碗，如今积了，千万禾囷。心与天通，阴功无量，直待时来秉化钧。年年宴，在人正次日，寿庆千春。

水调歌 庆史守 正月初四

一札自天下，五马为民来。潜藩久须重

全宋词 无名氏

镇，帝命出蓬莱。曾侍九重笔橐，暂剖一州符竹，人谓屈公材。儒术要扬历，玉业待规恢。

庆三元，才四日，寿筵开。夜深仰视霄汉，南极映星台。休说石家父子，休说窦家昆季，乔木即三槐。归觐玉皇案，余事付盐梅。

鹧鸪天 寿江司马 正月十三

太华峰头十丈莲。春风种种锦城边。只缘仙驭来人世，要作鳌头看上元。

添宝篆，注金船，曲眉环绕侍歌筵。呼童快秣朝天马，后夜端门月正圆。

满江红 正月十六

灯火星桥，元宵过、春□新霁。潇洒处，梅梢雪暖，柳梢风细。嵩岳想储当日秀，麒麟来作人间瑞。快风流、小小住蓬瀛，千秋岁。

书万卷，儿孙贵。家万顷，生涯计。问阴功厚德，有谁能继。鬓雪人间膺上寿，椒觞且尽樽前醉。看眼前、龟鹤伴长生，莱衣戏。

庆千秋 正月十七

点检尧蓂，自元宵过了，两荚初飞。葱

全宋词 无名氏

葱郁郁佳气，喜溢庭闱。惟知降、月里姮娥，
欣对良时。但见婺星腾瑞彩，年年辉映南箕。

好是庭阶兰玉，伴一枝丹桂，戏舞莱衣。
椒觞迭将捧献，歌曲吟诗。如王母、款对群
仙，同宴瑶池。萱草茂长春不老，百千祝寿
无期。

永遇乐 庆李守 正月十九

才过元宵，又经四日，门设弧矢。信道
长庚，当年降瑞，缘是诞生李。葱葱佳气，
今朝重见，洋溢门庭多喜。这英贤、文章冠
世，取青拾芥难比。

那堪绿鬓、朱颜年少，暂试牛刀百里。
迤迤黄堂，平章风月，见说清如水。彩庭兰
玉，森然挺特，捧献椒觞归美。愿从今、增
崇福寿，川流山峙。

步蟾宫 庆正月二十一日生又二十一岁及第

垂弧门左当今日。恰过了、无宵六夕。
喜妙龄秀发步蟾宫，信富贵、荣华莫敌。

纪年甲子才三七。即翰苑、从容西掖。
便从兹、谈笑觅封侯，更管取、寿延千亿。

柳梢青 庆太守 正月廿五

爆竹声收，烧灯节过，恰又经旬。闻道
当年，长庚梦李，嵩岳生申。

全宋词 无名氏

江淮草木知名。有多少、阴功在人。只恐称觞，棠阴未徙，促覲枫宸。

满江红 寿吴守 二月初一

春色三分，才过一、韶华方好。庆初度、万家襦袴，满城欢笑。杨柳弄黄风渐软，海棠未放寒犹峭。况年丰、粒米不论钱，人皆饱。

烧绛蜡，斟清醪。歌宛转，红围绕。看风光蓬岛，乐声云杪。白粲连樯先一路，玺书增秩新颁诏。看貂蝉、长在玉皇边，应难老。

百字谣 二月初四

中和节后，云翳净、向夕新蟾飞出，月姊传声，明日是、紫府神仙诞节。彩系麒麟，瑞腾嵩岳，喜气交洋溢。魁星头上，光芒仍露消息。

好是一鶚秋风，鞭云驾雾，去作龙门客。看取长安花夹道，人在广寒宫阙。春酒千钟，秋娘一曲，大醉豪无敌。八千椿算，摩挲重见铜狄。

庆清朝 寿章丞 二月初六

点检尧阶，萸生六叶，春深桃杏花开。长庚入梦，重新产谪仙才。事业十年灯火，

文章笔下若掀雷。果然是，两字功名，唾手拿来。

又况当年强仕，得志青云路，足慰高怀。紫泥凤诏，行须非次招徕。金马玉堂风月，从容九棘面三槐。从今看，会唐九老，它日云台。

最高楼 寿翁簿 二月初十

中和节过，捻指又经旬。逢盛旦，诞生申。当年昴宿呈佳瑞，今朝南极见箕星。寿而昌，年未老，绿袍新。

宝鸭沈烟堂上袅，珠翠捧、椒觞满斟。来庆贺，尽佳宾。彩戏斑斓多桂子，更看兰玉列阶庭。桓壮椿，祝遐算，八千春。

壶中天 寿溪园 二月十三（此首按调乃满江红）

潇洒幽居，溪园上、新来卜筑。况自有、一泓流水，万竿修竹。屈指花朝才两夜，祥烟瑞气腾芳郁。问辽空、何物堕人间，长庚宿。

薰宝鸭，烧银烛。歌窈窕，倾醪醑。愿年年常恁，颜红鬓绿。长厚而为难老本，慈仁便是长生策。看芝兰、玉树早蜚英，青毡复。

青玉案 寿赵宰母 二月十四

柳阴花底春将半。吹不断、祥烟散。何

处绮罗丝竹乱。天孙星里，老人星畔，昨夜光芒现。

绿衣好把斑衣换。照新渥、金花满。酌斗深深频祝愿。凤池它日，莺花此景，春酒年年劝。

又 二月十五

红娇绿软芳菲遍。正荏苒、春方半。帘幕任垂花影乱。年年此日，月娥仙子，来赴瑶池宴。

绮罗暗帘成行满。尽酌金樽十分劝。愿指松椿为寿算。北堂深处，朱颜绿鬓，赢得此身强健。

汉宫春 庆寡妇 二月十九

四舞阶萸，花朝节后，二月阳春。观音降诞，当年对此良辰。谁知好日，固多同、重现前身。已壮门楣全四德，富将偕老卿卿。

天意不如人愿，坚柏舟节义，安富尊荣。徐君两雏，戏彩歌舞莱庭。勤教子、不厌三迁，何异轲亲。福寿麻姑伴〔侣〕，长笑傲武陵春。

西江月 二月廿三

萸褪尧阶八叶，桃翻禹浪三层。欢传嵩岳挺生申。儿女团栾争庆。

名注长生仙籍，未须仰祝龟龄。芳联子舍早蜚声。富贵荣华鼎盛。

念奴娇 二月廿三

池塘风暖，算流觞盛集，恰迟旬日。晓听儿童传好语，瑞气华堂充溢。天产英雄，封侯骨相，才气千人敌。暂游尘世，妙名已上仙籍。

争羨金紫盈门，灵椿正茂，荣庆谁能及。会展龙韬并豹略，重把山河开辟。鼻祖汾阳，佐唐勋业，管取今犹昔。名垂彝鼎，寿龄更比箕翼。

鹊桥仙 寿随宜人 二月廿六

玉叶流芳，金枝孕秀。那更婺星临照。果然谪降月宫仙，四叶蓂、留春半后。

双麟奇妙，传若速肖。彩戏萱庭右。行膺世宠更轩昂，看存锡、金花鸾诰。

满江红 寿留守 二月廿九

今日明朝，三月旦、又将来。欣岳降、宝香薰夜，玉麟颁晓。一面久劳公镇抚，三年活却人多少。幸借留、重许镇西河，新颁诏。

人共乐，春光好。环翠袖，斟清醪。记题诗宝扇，屡陪天笑。无限金陵怀古意，春寒依旧谁能道。看白头红颊本天人，真难老。

解佩令 寿李宰 二月三十

曾妙年拾芥功名易。暂栖鸾、何厌小试。迢迢哦松，便整顿、河阳桃李。寿几许、也犹固未。

归来谩、学个陶潜志。遇诞辰、昴宿降瑞。春色三分才过二。寿觞沈醉。祝等彭祖八百岁。

齐天乐 寿碧涧 三月初一

百花香里莺声好，晴日暖风天气。诗境春融，壶天昼永，今日祥开弧矢。疏帘约翠。想歌遏行云，暖薰沈水。羽扇纶巾，寿星因甚降尘世。

那堪流觞节近，一樽相庆处，何用辞醉。

管领溪山，平章风月，从此身心无累。明年此际。愿添个孙枝，伴君娱戏。举案齐眉，更同龟鹤□。

鹧鸪天 三月初二

罗袜凌波洛浦仙。谪来潭府话夤缘。应嫌曲水香尘浣，诞降兰亭禊事前。

歌窈窕，舞婵娟。芝兰满室庆团圆。殷勤试问刘郎看，阿母蟠桃种几年。

木兰花 庆女人 三月初五

萸开五叶。正是瑶池逢诞节。昨夜观星。
南极边头婺女明。

家邻九曲。寿比群仙何待祝。满劝金钟。
但问蟠桃几度红。

满江红 寿尚倅 三月初六

曲水兰亭，陪宴后、又还三日。最好是，
风檐月观，堕红堆碧。乔木故家今有数，太
平人物年几百。看扶藜、行处乱花飞，神仙
宅。

天地外，逍遥客。谈笑里，文章伯。是
富贵渊明，洞天彭泽。老鹤蹁跹摩汉翮，灵
龟燕息支床力。看一时、长傍寿星边，天南
极。

木兰花 寿制干 三月初七

晓烟生绿树，听叶底、数声莺。正节届
清明，萸开七荚，梦叶长庚。桥门旧时冠带，
念短檠、读尽夜深灯。文价乾坤推重，世纠
父子同登。

莹然玉雪做精神。野鹤见长身。算婉画
崇台，活人多少，自合长生。荆襄暂烦佐幕，
听秋风、鼓角夜连营。唤起隆中豪杰，共图盖
世功名。

满江红 三月十五

曲水流觞，又过了、良辰十二。好是融融院落，晚春天气。天上麒麟呈瑞彩，人间鸞鹭呈祥瑞。气飘飘、仙种有其人，汾阳裔。

金屋里，歌声沸。琼斝献，休辞醉。问风流人物，螺川能几。内翰兰孙衣钵富，外台桂子簪缨贵。愿双亲膝下戏斑衣，千秋岁。

虞美人 寿卫倅 三月十九

贰车领却生朝客。风月都全得。山城小试已馨香。真个相家风烈、不寻常。寿春一语和戎了。阴德知多少。年年三月近双旬。把酒祝君恩宠、一番新。

福寿千春 寿黄排岸 三月廿二

柳暗三眠，萸翻七荚，禀昴萧生时叶。信道凤毛池上种，却胜河东鸞鹭。笃志典坟，经旨素得欧阳学。妙文章，赴飞黄，姓名即登雁塔。

要成发轫勋业。便先教济川，整顿舟楫。兆朕于今，须从此超迁，荣膺异渥。它日趣装事，待还乡欢洽。颂椒觞，祝遐算，寿同龟鹤。

千秋岁 寿翁文叔 三月廿三

园林翠幄。妆点青春色。犹觉萸留七叶。崧神今日降，产此真英杰。蟾宫客，尽推一代文章伯。

富贵何心得。积善多阴德。那管青衫白发。儿孙俱满目，诗礼传衣钵。长不老，蓝桥是个神仙宅。

庆清朝 寿知县 三月廿四

节过重三，日逢四六，真贤应昴初生。元来鼻祖，降瑞应长庚。今喜重逢旧事，固宜依旧复青毡。果然是、双雕一箭，雁塔书名。

大器也须小试，鸾凤暂栖，荆棘若为荣。从容钜竹双松，足畅吟情。行种河阳桃李，即飞诏、入厕朝〔绅〕。从兹看、箕星上应，南极长明。

满江红 寿太守子 三月廿六

五五芳辰，园林遍、十分春景。见瑞香喷兽，烛摇红影。知道文星初度旦，细腰歌舞娇姿逞。颂椒觞、捧献更殷勤，君拚饮。

英雄威，风凛凛。文章腹，千机锦。看青毡复旧，父风挺挺。桂子兰孙齐彩戏，祝教寿比天难尽。况深居、潭府胜蓬莱，真仙

境。

杏花天 侄寿姑 三月廿七

婺星呈瑞，对春余几许，日临三九。正属我姑初度旦，帨设当年门右。绿鬓犹新，红颜未改，真月宫仙友。柏舟节义，富而荣贵长守。

况有诰桂青春，潜心黄卷，指日功名就。女郎乘龙全四德，未老得闲仁寿。天命方知，岁饥常赈，阴德还多有。麻姑王母，年年同宴春酒。

百字歌 寿张簿 四月初三

清和天气，月方生，报道曲江生日。一点奎星腾瑞彩，降作人间英杰。曾记当时，平分玉果，今已年多历。才华拔萃，早宜仙桂高折。

自是鸛表连登，功收三箭，人羨真无敌。雁塔题名方惬意，暂作鸾栖枳棘。整顿籍书，紫泥封〔下〕，即召归西掖。寿膺五福，请君长对箕翼。

步蟾宫 庆友人 四月初四

萸开四叶祥光发。又还是、清和时节。昴星呈瑞夜来明，庆此日、挺生英杰。

少年玉树神清澈。未说到、龟龄鹤发。

全宋词 无名氏

愿言鹦荐早蜚声，任丹桂、一枝高折。

千秋岁 四月初九

麟垂绂秀。天纵今司寇。朱明景，清和候。缙云开帝乐，括苍钟神秀。人争羨，昨生一佛今朝又。

璧水声华茂。玉殿天香袖。姑小试，陶甄手。行为黄阁老，屹立丹墀右。名不朽，斯文名脉从君寿。

归朝欢 寿监丞 四月初十

才鼓虞弦薰早入。昴日三分今恰一。清和时节天气佳，绿树莺簧巧调律。祥云舒好色。瑞气珑葱满簾室。又争知、长庚叶梦，太白生今夕。

快上星辰听履舄。州县劳人空役役。暂辞朱皂养冲和，绿野堂延蓬岛客。华筵倾玉液。难老细听歌永锡。寿何其，松椿不数，自可齐箕翼。

沁园春 寿庄寺丞 四月十一

申伯嵩神，李白长庚，萧何昴精。恰先公三日，金仙氏降，后公三日，吕洞宾生。五百仙班，一千佛号，喜听胪声传集英。君恩重，早升华监寺，扬厉朝廷。

金瓯已覆香名。正天下苍生须太平。看

全宋词 无名氏

黄麻一命，难留五马，蟠桃三熟，会庆千龄。
一尉凄凉，有官守者，莫到公堂称寿觥。三
熏沐，但焚香清夜，遥拜台星。

千秋岁引 寿徐直院 四月十二

词赋伟人，当代一英杰。信独步儒林蟾
宫客。名登雁塔正青春，更不历郡县徒劳力。
即趋朝，典文衡，居花掖。

得侑词科推第一。便掌丝纶天上尺。见
说庆生辰，当此日。翠萸三四叶方新，朱明
正属清和节。行作个，黑头公，专调燮。

好事近 寿〔章〕〔障〕宰 四月十六

记紫极真人，前日是他生日。颖水有兹
风骨，弥诞当今夕。

等闲来现宰官身，任鳧飞双鷁。治狱阴
功多少，是长生妙术。

满庭芳 寿真玉堂 四月十九

仙吕已生，真才方产，较迟五日差强。
谁知天意，孕秀待储祥。秋水精神玉骨，向
妙龄、富妙文章。高轩过，儒林独步，腾踏
趁飞黄。

玉堂。金马客，蓬莱事业，花掖圭璋。
更词科卓冠，时号无双。大展经纶有日，须
恬退、待趣曹装。称觞处，西山风月，南极

老人昌。

临江仙 寿赵簿 四月廿一

结夏駸寻逾六日，蓬壶纪瑞生辰。祥烟葱郁蔼门庭。骖鸾双女侍，毓凤二雏新。

暂尔勾稽淹大手，声名已彻枫宸。行膺当路荐章荣。璇源添喜庆，椿算祝遐龄。

百字歌 寿徐帅 四月廿二

清和天气，正风入舜弦，七飞萸叶。见说蓝田曾产玉，骨骼瓌奇卓萃。志气虹霓，丰姿熊凤，文足倾三峡。皇朝伟器，济川有待舟楫。

要知发轫亲民，栖鸾展骥，五马归台阁。退省谦尊防锐进，谁识终南径捷。笑傲东山，从容南极，兰桂同欢洽。称觞未老，绛人须共年甲。

水仙子 寿贩米运舟人 四月廿三

浮家泛宅生涯好。聚米堆盐多积宝。烟波得趣乐江湖，宜乘兴，寻安道。不负轩辕当日造。

初度喜逢维夏早。孔释昔曾亲送抱。下弦良日是生朝，称觞献，金樽倒。惟愿寿筵长不老。

念奴娇 寿司户 四月廿六

绿云雾雨，倚晴空千尺，长江澄霁。十里薰低、绣幕四叶，其余华屋。怪得清都，奔云拥鹤，环佩声相续。朝来无是，有人初降仙篆。

且与小试民曹，梅花岭外，雪片三冬足。眼底承家人物在，楚楚圭璋兰玉。雾阁云窗，翠眉红颊，解唱长生曲。壶中难老，定应两鬓长绿。

贺新郎 庆新婚又生日 四月廿七

鸾凤初成匹。想桃源、刘郎仙女，新欢稠密。昨夜文星从天降，孕作非凡器质。却正属、梅黄时日。三九良辰佳气蔼，听重重相贺欢声溢。又复见，嘉宾集。

满堂笑语罗筵席。道称觴、宴你双庆，有谁能及。好事鼎来惬人意，看看功名在即。况先得、凤楼消息。祈遂与君偕老愿，劝樽前且饮长生液。增福寿，至千□。

满庭芳 庆生日又生子 五月初一

律转蕤宾，星流大火，尧阶蓂莢初开。当年此日，降下谪仙才。见说鸾池荐瑞，蚌珠又、复产渊崖。真堪羨，龙生龙子，双庆甚奇哉。

全宋词 无名氏

寄言，汤饼客，好称觞索，玉果倾杯。
无新亦无旧，事事俱谐。他日同筵为寿，彩
戏处、酬酢樽罍。瞻南极，灵椿丹桂，相继
践公台。

水调歌头 寿赵阆州五月初五 调名
原误作念奴娇。

玉斧折丹桂，锦绣拂银河。蟠胸虹气千
丈，捧砚唤宫娥。三度花攒五马，一笑毫挥
万字，何处不恩波。试问老仙寿，铜狄几摩
挲。舞槐龙，垂艾虎，弄清和。湖山风月，
且与吟笑侧金荷。明岁端阳时节，人在薰风
殿阁，凉意入赓歌。宣劝滟昌歆，叠雪赐香
罗。

柳梢青 寿人母 五月初六

荷绽花繁。萸开六荚，喜溢门阑。好是
骖鸾，特离月殿，来驻人间。

儿童歌舞衣班。接踵升堂视笑颜。祝颂
勤拳，将何比况，只个南山。

酹江月 庆母在作生日 五月初七

仙翁初度，遇端阳佳节，又还两日。怪
得箕星光倍正，凌晓独辉南极。料想当年，
储祥荐瑞，兆见开先吉。称觞此旦，华堂佳
气葱郁。

好看编戏庭前，芬芳双桂，行作蟾宫客。
况有瑶池王母在，重庆举杯欢恻。络秀赐觞，
孟光举案，姑妇贤相敌。与君品寿，蓬壶长
见仙集。

鹧鸪天 五月初十

饮了蒲觞五日期。彩丝还系玉麟儿。台
云荐瑞生香褱，菡萏飘香入寿卮。

占骨相，孕清奇。秋风雁序看齐飞。卿
家奕世青毡在，况是双亲未老时。

醉蓬莱 庆女人 五月十一

后端阳六日，梅雨收晴，乍炎天气。阿
母当年，罢瑶池佳会。排遣双成，屏除青羽，
自降居尘世。为帝生贤，储祥孕秀，作文章
瑞。

自古人言，陶孟母贤，文行曹家，衣冠
苗裔。谁似夫人，子龙头鼎贵。此去相从，
道山蓬岛，镇长生久视。却笑问平反，但不
作，汉家严吏。

乳燕飞 庆被书 五月十二

垛翠云峰远。日乌高、炎官直午，暑风
微扇。二六尧蓂开秀荚，跨海冰轮待满。怪
院落、笙箫如剪。太乙燃藜天际下，庆卯金
仙子生华旦。依日月，近云汉。

全宋词 无名氏

经时持橐明光殿。问江乡、年来有几，
只君方见。入座夫人难老甚，炯炯金霞照眼。
笑指点、琼觞教劝。但得调元勋业就，为江
泉石磴轻轩冕。归共作，赤松伴。

踏莎行 庆将赴上生日 五月十四

花县来迎，瓜期欣至。大贤初度今朝是。
蕤宾律应又将中，明宵圆月光腾瑞。

兰玉称觞，斑斓舞戏。椒浆聊壮君行志。
看看人已在鹏程，趋朝指日为舟济。

菩萨蛮 寿女人 五月十五

宫样迎春髻。玉步金莲细。初度是今朝。
嫦娥降九霄。兰玉行荣贵。德备共姜义。夏
半月团圆。称觞祝寿筵。

念奴娇 侄庆叔 五月十七

垂弧纪节，正尧天日永，冀飞双绿。岳
渎钟灵来瑞世，孕出精神冰玉。九曲溪山，
一船烟雨，物外谁拘束。钓头香饵，只愁牵
动周卜。

好是红藕池边，双房毓秀，瑞霭浮昆轴。
记得君家流庆远，几见祥开陆续。来岁花时，
西湖十里，叶映恩袍绿。竹林小阮，不妨傍
借余馥。

壶中天 五月十九

乘鸾驾鹤，问神仙何日，崧高生甫。飞下琼台，因报道，恰是今年夏五。饮了蒲觞，才经半月，昴宿行初度。荣华富贵，一时都由分付。

曾记三月春浓，花风烂熳，吹散鸳鸯侣。虽则烧香遥祝寿，争似手斟香醕。便驾云骈，去登绣阁，说个诚心语。蟠桃熟未，请伊亲问王母。

望远行 寿商人 五月廿一

青钱流地，更积满籛金玉。斡运营谋，无过是、老郎惯熟。利收万倍，归来喜色津津，家道从兹，十分富足。

好庆生辰，正属蕤宾月半余。六飞萸荚庭除。举盞祝寿，何如子孙，荣贵须臾。长是赖你，作个陆地仙客，行乐蓬壶。

感皇恩 寿宗室 五月廿二

天水浴英姿，精神清彻。偏向蕤宾奈炎热。瑞萸飘飘，却是生贤吉日。凌云志气，飘飘无敌。

头角轩昂，作霖在即。谁识功名待时立，一朝腾踏，国赖维城力。庆萱堂齐寿，延千亿。

全宋词 无名氏

满江红 五月廿三

万甲胸中，问谁似、延安范老。当家事，出藩入相，黑头俱了。绿野徜徉聊雅志，紫宸寤寐思英表。向修门、何日袞衣归，天教早。

诶吉卜，维熊兆。徵瑞梦，长庚耀。正尧蓂仲夏，八飞叶小。千日早从菑疾退，一觴恰趁笙歌绕。算灵椿、何似栢堂春，他犹少。

点绛唇 寿王宰 五月廿四

五月如秋，日临四六都无暑。列仙初度。听足商岩雨。

三载都曹，利泽留南浦。崆峒路。种花无数。行对延英主。

谒金门 寿士人 五月廿五

文章士。秀气岳神钟聚。看雕鹏、秋风高举。上青天平步。

五五日临夏五。堂上称觴笑语。桂子兰孙齐彩舞。祝寿同彭祖。

朝中措 寿太守 五月廿八

天休令节庆生申。喜动满城民。十万一

童踊跃，祝公寿等庄椿。

人生最贵，荣登五马，千里蒙恩。只恐促归廊庙，去思有脚阳春。

喜迁莺 庆陈丞在任 五月三十

生贤时协。正炎官直午，日周三浹。门左垂弧，眉间喜色，尽道降神嵩岳。百里葱葱和气，总向蓝田会合。称庆旦，见吏民鼓舞，欢声和洽。

玉叶。斟劝处，一饮流霞，红艳生双颊。钜竹槐松吟哦乐，指日荣膺异渥。皇上渴思经济，环召为霖作楫。快人望，愿长生，须与绛人同甲。

庆清朝 寿吴宪 六月初三

朏月生西，杓星建未，画堂昼景偏长。天生英杰，独向此炎光。超卓凡尘表物，精神秋水自清凉。真奇特，清沟挺秀，敌国传芳。

好是少年折桂，唾手功名就，腾踏飞黄。君王眷厚，皇华绣斧还乡。士贵姜谟盛事，未容专美独夸唐。称觞处，颂闽境，编戏公堂。

临江仙 寿友人 六月初七

六月炎天收火伞，南薰洗尽烦蒸。尧蓂

七萼又争青。问知陈仲举，元是此时生。

别驾功名清暇日，题兴尚带屏星。黑头非晚到公卿。且倾浮蚁酒，来听祝龟龄。

贺圣朝 寿主簿 六月初九

阶萸八叶当炎赫。此际公生日。金炉香爇起祥烟，气佳哉葱郁。

称觴兰玉真无敌。尘簪纓世袭。鸾栖枳棘暂淹留，即黄扉召入。

满庭芳 寿丞相出守 六月十三

喜镇龙藩，厌调金鼎，薄言衣锦为荣。天生申甫，欣对此良辰。自是神清气爽，风姿潇洒却炎蒸。称觴日，双叶翠萸，犹未展尧庭。

幷幪知有赖，国家柱石，须待扶倾。暂留公燕逸，抚及瓯闽。君念旧人共政，即环召、再秉钧衡。平章了，佑王万岁，齐寿永康宁。

百字歌 庆潭帅兼平寇 六月十四

庚金入伏，细推来，明日又还三五。见说帅垣佳气蔼，天降崧神生甫。礼乐词章，甲兵韬略，素备文兼武。称觴华旦，颂声交赞台府。

好是比启元戎，剿除逋寇，不许奸偷侮。

全宋词 无名氏

有此奇功高渤海，足慰湖湘生聚。暂统十连，折冲万里，行即驱残虏。九重环召，万年永佐天子。

水调歌头 六月十六

律纪林钟月，兔魄夜来圆。彩麟入梦，天教英物出人间。志气平生浩荡，欲试经纶大手，赞画向名藩。见说齐瓜熟，鹏路快扶持。

称寿处，歌齿皓，戏衣斑。辉联甥馆，那堪一笑共团栾。好看蜚声霹雳，使有蒲轮迎召，催入侍龙颜。却待功成后，归伴幔亭仙。

满庭芳 寿张教 六月十八

昴宿储祥，奎星荐瑞，元来天产英姿。都缘鼻祖，织女与支机。自是流芳垂庆，仙风道骨果清奇。称觞旦，任从伏暑，三荚看萸飞。

文章，谁与敌，欲成大器，殊未为迟。况年方强仕，政入官时。暂领广文庠序，即超身入凤凰池。同经济，云龙风虎，千载庆休期。

西江月 寿黄帅干 六月十九

隆暑正当三伏，明朝又是双旬。

全宋词 无名氏

崧高孕秀降生申。再捧瑶觞称庆。
督府赞猷英俊，难淹大展经纶。倚需召
入秉洪钧。上佐万年明圣。

临江仙 寿何察推 六月廿一

六月翠萸飞六荚，流空大火将西。当年
名世间生时。似光风霁月，神爽更精奇。
三十成名登上第，芙蓉照水真犀。难淹
逸步造丹墀。经纶须大手，谈笑入黄扉。

如意令 寿新恩人 六月廿二

炎暑尚余八日。火老金柔时节。闻道间
生贤，储秀降神崧极。无敌。无敌。当代人
伦准的。
射策当为第一。高跃龙门三级。荣著绿
袍新，帝渥必加宠锡。良弼。良弼。真个国
家柱石。

百字歌 寿张提干 六月廿三

乾坤孕秀，正人间六月，下弦时节。生
此清奇潇洒客，秋水精神玉骨。才吐天芳，
毫挥月颖，更彬彬文质。图南得志，抟风高
展鹏翼。

好是大器难淹，暂陪庾使，赞画光原隰。
台省即须登袞袞，黄阁平章有日。崔室称觞，
莱庭戏彩，中外欢声溢。祝君延寿，箕星上

应南极。

念奴娇 六月廿六

神钟峻极，节庆诞弥。来天上之麒麟，生人间之鸞鹭。涂歌蔼蔼，岳颂洋洋。某辄撰芜辞，仰祝椿算。得蒙览擢，尤切欣荣。

先秋四日，正祥开弧矢，生申佳节。天上彩麟曾入梦，钟作人间英杰。袭庆盘坡，流芳星渚，家世绵簪绂。昨宵凝眺，老人星现天阙。

鼎创庭馆连云，宴仙停棹，咫尺尘凡隔。好把蟠桃庭外种，坐看花开花结。秀长孙枝，辉联子舍，蟾桂行攀折。它年称寿，满堂朱紫罗列。

水晶帘 上定齐 六月廿七

谁道秋期远，正句浹、双星相见。雨足西帘，正玉井莲开，寿筵初展。麈尾呼风祥暑净，那更著、纶巾羽扇。殢清歌，不记杯行，任深任浅。

湖边小池苑。渐苔痕竹色，青青如染。辨橘中荷屋，晚芳自占。蜗角虚名身外事，付骰子、纷纷戏选。喜时平、公道开明，话头正转。

满江红 六月廿八

风露轻清，更十日、却逢七夕。庆初度、

全宋词 无名氏

槐阴初静，藕花凉湿。太乙真人曾夜伴，青莲居士何年谪。□双皂、游戏宰花封，恩波溢。

甘雨酿，丰年得。和气满，弦歌室。向烛花光里，且斟醺醑。菊水清于天水净，寿山高似东山峙。看诏归天上侍虚皇，骑箕翼。

满庭芳 庆隐士 六月廿九

诗礼传家，不名则利，谁能袖手安常。惟君宽厚，无较短论长。且自深居简出，清闲处、管甚炎凉。年未老，方逾强仕，家富更平康。

秋声，风欲作，萸留一荚，伏暑将藏。大贤初度日，对此称觞。叹凤帟虽冷落，喜御兰、得宠专房。见说宁馨少长，螟雏箕、学更高强。得闲趣，山中宰相，何必事侯王。

鹧鸪天 上女人 六月三十

此夕薰风息舜弦。明朝早振蓐收权。鹊饶喜舌喧华屋，烛富祥光耀绮筵。

宣玉旨，勅炎官。月宫催诞跨鸾仙。福如沧海无穷极，寿比灵椿过八千。

壶中天 庆刘孺人 七月初三

秋才三日，听画檐外，数声乌鹊。元是嫦娥迎巧夕，预驾横空仙鹤。翠鬓生云，朱

全宋词 无名氏

颜晕酒，□□难描摸。优游渤海，玉琴重理弦索。

曾记乃祖刘晨，天台归后，留得长生药。兼有蟠桃三五颗，尽付女孙收著。分了仙翁，更分儿息，同作蓬莱约。年年今日，大家欢笑为乐。

满江红 七月初四

一叶知秋，正玉律、新吹夷则。迟三日、双星齐会，又逢七夕。先送天孙来乞巧，姓氏已在长生籍。喜华堂、今日庆生辰，排筵席。

歌金缕，斟琼液。听祝寿，环佳客。看寿星明灿，祥烟葱郁。剩种庭萱春不老，年年嘉会如今日。办一词、一岁一称觞，期千百。

蓦山溪 寿友人 七月初七

填河鹊喜，巧夕来时候。深院瑞烟浓，隐隐听、梨园清奏。兰车玉佩，飞下蕊宫仙，春鬓绿，醉颜红，不减年时旧。

金杯争劝，尽是闺房秀。试问寿何如，与天孙、相为长久。看看子舍，添个捧觞人，从此去，尽欢娱，庆事年年有。

鹊桥仙 寿女人 七月初八

星桥才罢，嫩凉如水，一夕祥烟萦绕。

全宋词 无名氏

欢传玉母宴西池，正绿发、斑衣称寿。

儿孙鼎贵，弟兄同相，辉映貂蝉前后。
六宫宣劝锡金桃，看盛事、明年重又。

临江仙 寿祝丞 七月初十

天佑炎图生国瑞，蓝田暂屈英僚。始知
昴宿降璇宵。中元前五日，七夕后三朝。

江教风流临此政，少年潇洒奇标。行看
峻擢相熙朝。功名前稷契，寿算等松乔。

千秋岁 寿江东帅 七月十一

金陵秋早。四日中元到。天降诞，真英
表。长庚腾瑞气，箕宿增辉耀。膺帝渥，十
连镇抚民多少。

莫〔惜〕椒觞倒。祝寿称难者。分帅阃，
江东小。看看飞诏下，早趣黄扉召。平章了，
长生学取神仙道。

水调歌 寿徐枢 七月十二

稳彼兕觥后，三日是中元。地官较善，
龙章玉佩压仙班。自是德星孕秀，直与寿星
争耀，茨福正绵绵。堂已富金玉，屣踪视王
官。

趣清闲，心洒落，在花间。桃培万岁，
千年仙种又栽莲。静对秋香菊耐，长共岁寒
松老，生意满西园。待看椿同桂，洗馥迈燕

山。

临江仙 寿判府 七月十四

长记秋来多好处，清凉遍满人间。天教收拾孕真贤。何时初度日，明日是中元。

喜与莱公同盛旦，官居鼎鼐相传。未应此地借蕃宣。来年开宴处，人在凤池边。

瑞鹧鸪 七月十八

中元过后恰三朝，因甚庭闱喜气飘。李谪若非当此夕，申生应是在今宵。

满斟绿醕歌檀口，慢拍红牙舞柳腰。富贵荣华谁得似，祝公千岁乐逍遥。

满庭芳 寿枢密孙 七月廿六

彭郡宗盟，屏山德裔，儒科闻望流传。不贪世禄，雁塔占先登。锦绣文章瑞彩，若披云、快睹青天。称觞日，萸留四叶，葵菽正宜烹。

星枢，方上应，推君甲子，好问绛人年。更遐龄多祝，五福兼全。此去沙堤步稳，调金鼎、袞绣貂蝉。人皆仰，一门相业，清白子孙贤。

鹧鸪天 七月廿七

秋至人间灏气清。萸余三荚映阶庭。挺

全宋词 无名氏

生豪杰为时瑞，来至簪纓亨世荣。

天付与，寿康宁。不须举酒祝椿龄。楼头昨夜瞻南极，偏向梅峰分外明。

折丹桂 七月廿八

初秋两两留萸荚。算恰是、生申佳节。祝君寿阅八千秋，岁岁对、长空皓月。

威宣比部推刚决。气凛凛、秋霜争烈。滩头双鹢看飞来，便有诏、催归天阙。

水调歌 寿史相 七月廿九

两只补天手，一片济时心。信道相门再相，现此宰官身。涤洗乾坤都了，填压华戎既定，治世庆升平。中外为冠冕，闻望耸簪纓。

星昴降，蓬矢挂，属芳辰。黄阁一秋来早，明日又三旬。庭戏莱衣双桂，砌列谢兰无数，廊庙会风云。愿衍庄椿算，长沛傅岩霖。

西江月 为妻寿 七月卅日

伴我鹿车鱼釜，从伊裙布钗荆。年年七月甫三旬，今日生朝资庆。

二女长俱麻绩，三男俱读书声。吾年五十不多争，好事且宜少等。

蝶恋花 八月初六

透户凉生初暑退。正是尧蓂，六叶方开砌。昴宿腾辉来瑞世。华堂清晓笙歌沸。锦幕花裯生舞袂。妙态殊姿，祝寿眉峰翠。从此玉觞拚一醉。功成名遂千秋岁。

瑞鹤仙 庆生日又娶妻 八月初七

朔朝逾六后。正音调南吕，迎寒时候。香薰瑞烟袅。见门阑喜色，荣生多少。元来仙子，拥骖鸾、月宫飞到。会人间庆诞，风流俊杰，结成佳偶。

官好。班簪玉笋，名播中都，宠加宸诏。金瓯覆。黄扉青琐须环召。待平章事了，归来养浩，齐眉相对祝寿。愿长如、庆会双星，千秋偕老。

满庭芳 庆尚书恬退 八月初八

西掖南宫，黄扉青琐，年来有分终须。从容曳履，衣锦赋归欤。暂乐终南佳处，供笑傲、松菊庭除。行看取，一封诏下，装趣入潭居。

称觞，逢谷旦，千秋节过，三叶蓂舒。且冷眼嗤笑，笼鸟池鱼。识破林泉朝市，经行处、等是蘧庐。知谁似，一杯寿酒，一卷养生书。

洞仙歌 寿宫教 八月初九

桂风高处，渐近中秋节。屈指推来先六日。对芳辰、符吉梦，知降神、崧极应诞，主作人间英杰。

文章逾晁董，学擅卿云，高揭声猷缙绅列。上瀛洲册府，师表宗藩，推第一、即黄扉召入。佐君王、经邦整顿乾坤，愿寿等广成，更延千百。

壶中天 寿太守子 八月十一

才经四日，是中秋，次第月圆如玉。一点光浮南极上，储作人间五福。长厚慈仁，清高恬澹，爱水清山绿。溪园竹里，日来新就华屋。

好是五马传家，芝兰挺秀，早勉群经读。将相公侯绵袞袞，重见当年符竹。富贵荣华，康宁寿考，聪我殷勤祝。更祈王母，共看桃结桃熟。

水调歌 庆龙图 八月十三

八月秋欲半，后夜月将圆。天潢当日流润，余派落人寰。尘扫长淮千里，威振南蛮八郡，梓里绣衣还。芳毓燕山桂，庆衍谢庭兰。

小山阴，长松下，白云间。壶中自有天

全宋词 无名氏

地，闻早挂蓬冠。笑指横空丹坚。闲倚拿云竹杖，佳处日跻攀。山色既无尽，公寿亦如山。

鹧鸪天 八月十九

宴罢中秋恰四朝。金炉因甚把香烧。若非金母生今日，应是麻姑降此宵。

歌窈窕，舞娇娆。迭将寿酒酌金蕉。椿龄柏算何须祝，名列仙班亦孔昭。

好事近 庆母寿子中举 八月二十

王母庆生辰，方过中秋五日。子舍文场鏖战，想功名来逼。

看看喜德捷音传，果信名登桂籍。行拜君恩爵赏，寿萱堂永锡。

如意令 寿王学老 八月廿一

久羨庞眉鹤发。闻望孔堂烜赫。信得彭乔仙，秘授长生真诀。奇特。奇特。吕望师周时节。

才过中秋六日。对此称觞欣悻。双凤戏莱衣，金缕轻调莺舌。难得。难得。九九算犹千百。

壶中天 寿朋友 八月廿二

清凉天气，正中秋过后，恰才七日。岳

降生申逢令旦，听得欢声洋溢。戏彩堂前，两行珠翠，酒劝杯浮碧。祝君遐算，寿星长对南极。

仰羨性地宽闲，平生酷爱，占断倾城色。好展少年攀桂手，同作蟾宫□客。料想嫦娥，一枝留待，已得真消息。馨香满袖，凤楼人尽怜惜。

百字歌 寿父子同日 八月廿五

萸飞十荚，觉九分秋色，六分将极。桂子风高时更好，天产英贤同日。桥梓齐芳，一慈一孝，奋建真奇特。称觴华旦，但将老少分别。

且看戏彩堂前，酒须双献，饮侍严君侧。清赏阿戎防跨灶，大小欧□相敌。疏曰贤哉，古云有是，作个家家声烈。无先无后，寿齐延应□翼。

水调歌头 寿王枢密，又得子 八月廿六

谷旦垂弧矢，兰闾梦熊罴。称觴内外相庆，同日又同时。有此重重盛事，未羨石门奋建，韦氏信名齐。珠履赴汤饼，玉果酌琼卮。

斗枢转，金瓯覆，筑沙堤。争推是父是子，相继入黄扉。方叔歌猷元老，复见少年黄琬，前后拜丹墀。今日寿星现，再祝寿庞眉。

寿星明 庆黄宰秩满 八月廿七

玉露迎寒，金风荐冷，正兰桂香。觉秋光过半，日临三九，葱葱佳气，蔼蔼琴堂。见说当年，申生谷旦，梦叶长庚天降祥。文章伯，英声早著，腾踏飞黄。

双凫暂驻东阳。已种得春阴千种棠。有无边风月，几多事业，安排青琐，入与平章。百里民歌，一樽春酒，争劝殷勤称寿觞。愿此去，龟龄难老，长侍君王。

满庭芳 庆生日入新屋

北斗将移，西风已半，萸余一叶阶前。左弧呈瑞，非雾亦非烟。见说长庚入梦，当年此际产英贤。谁知得，平生高尚，五福自然全。

肯堂，夸盛事，一新轮奂，适际荣迁。有重重喜庆，贺客骈阗。从此燕居笑语，称觞处，好展华筵。频祝愿，室家相庆，富寿百千年。

应天长 庆新恩母 八月三十

萱堂积庆，桂苑流芳，于门瑞蔼佳气。正属仲秋弥月，称觞对此际。西王母、来人世。拥佩从、尽皆珠翠。彩庭下，急看褊袍，衬遍斓戏。

全宋词 无名氏

富贵有谁同，四德躬全，五福由来备。
况善断机迁教，轲亲实无异。看看仕无淹滞。
即召入、佐君经济。愿延寿，鸾轴金花，年年加赐。

满庭芳 寿包宰 九月初四

露白风清，菊黄萸紫，重阳五日先期。
煌煌郎宿，南极两交辉。天上飞凫仙伯，当
初度、开宴瑶池。民谣里，劝分阴德，百姓
饱无饥。

画帘，香篆永，城山堂上，红袖蛾眉。
任满斟高唱，祝寿新词。况是辟书到也，乘
别驾、直上横蜚。青毡在，看看复见，孝肃
旧家时。

醉蓬莱 寿邑宰 九月初五

正香茱试紫，嫩菊敷黄，九秋佳致。峻
岳生申，运启千龄瑞。玉宇澄清，金盘沆瀣，
融结钟冲粹。地位须还，粉垣薇省，木天蓬
秘。

锦政慈祥，琴堂安静，万里丰年，一同
和气。斗大雷封，难久蒙私惠。半刺平分，
剡书交上，逸驾开骅骝。来岁称觴，人归清
禁，班联丹陛。

风入松 寿刘倅 九月初九

晓来凉气满芙蓉。日到竹阴东。称觴歌

袖三千指，屏星畔、绕绿围红。茱糝百杯秋色，桂华十里西风。

生朝对饮菊花丛。九日一樽同。文章欲向家声旧，便应去、黄阁从容。唤起仙翁为寿，种成千岁椿松。

满江红 寿傅府尹 九月初十

瑞霭长安，京城里、非烟非雾。须信道、岳钟神秀，再生商傅。节过重阳才一日，祥开蓬岛群仙聚。见箕星、昴宿辉文昌，欣初度。

五马贵，荣朝著。人品异，多文富。况清廉如水，襦歌督府。伫想君正烦燮理，一封召入为霖雨。指庄椿、祝寿八千春，从今数。

又 寿官员 九月十二

一片秋光，看天宇、修眉浮绿。都怪问、今朝爽气，十分堪掬。梅岳仙翁来瑞世，年年好景人间足。醉黄花、三日却称觞，钟天禄。

不用把，香为祝。身自有，长生篆。只宽平六考，几多戩谷。袖手珍祠为足计，急流勇退宁随俗。把庄椿、从此计春秋，无穷福。

瑞鹤仙 寿宫观待制 九月十三

正秋高气肃。过重阳四日，蓝田生玉。

钟英自川渚。果文章锦绣，琅玕披腹。从容启沃。侍甘泉、无用推毂。急流勇退，向琳宫养浩，无荣无辱。

享福。欣逢华旦，对此倾觞，满倾醺醑。西园晚菊。尚堪摘、取余馥。有仙风道骨，康强仁寿，长生何待更祝。愿谢公、复起经纶，曹装已促。

满江红 寿妇人三子皆贵 九月十四

王母当年，瑶池会、曾充坐客。对良辰为寿，复逢佳节。屈指重阳才五，明朝月已圆如璧。这夫人、真与柏舟姜，同年德。

佳气霭，看葱郁。称觞处，多欣色。更萱庭编戏，桂芳品列。未逊轲亲机教力，且如络秀声〔煊〕问金花、锡宠自谁加，河东薛。

贺新郎 庆生日子纳妇 九月十六

喜动神仙屋。正三秋、长空月满，又逾一宿。传道垂弧当此日，缘是蓝田生玉。更子舍、新归婉淑。好事重重欣逢遇，合称觞、宴席倾醺醑。拚一醉，欢娱足。

桃源庆媾歌新曲。想蓬莱、仙洞又献，长生真箓。看一点、老人照耀，牛女莱庭祝福。合长幼、芝兰满目。总向来秋高折桂，麻衣换取蓝袍绿。永遇乐，食天禄。

千秋岁 庆生日女受聘 九月十七

律调无射。月望才逾日。昴宿呈祥南极。
称觴祈五福，膺聘陈双璧。彩堂上，老人婺
宿光交集。

龟鹤年相敌。孔雀屏开侧。喜与寿，俱
逢吉。门楣〔他〕日作，椒觴歌今日。看父
子，乘龙跨鹤皆仙匹。

鹊桥仙 寿王驸马又将亲迎 九月二十

龙山宴罢，又经旬日，还报生辰来也。
今年祝寿胜年时，须满劝、十分玉斝。

鱼书已报，凤帟知道，已备鸾骖鹤驾。
不须寻药访桃源，且做个、风流驸马。

生查子 九月廿一

才生申十日，便小春时候。硕果已含生，
一缕微阳透。

贞固见天机，寿脉滋培厚。菊后早梅前，
不尽长生酒。

满江红 寿命妇 九月廿二

万里无云，天同色、祥光满目。见婺星
一点，辉联箕宿。果是月宫仙子降，诞生乐
国人如玉。六飞萸、正属九秋高，清霜肃。

全宋词 无名氏

丹桂盛，蓝袍绿。芝兰秀，森如簇。庆簪纓几代，家毡欣复。萱草长春殊未老，君恩加锡金花轴。款陪王母宴瑶池。

蓦山溪 集曲名 九月廿四

菊花新过，秋蕊香犹媚。三八燕山亭，贺圣朝、申生明世。肃霜天晓，正快活年时，庆新寿，万年欢，人醉蓬莱里。

红衫儿歌，水调夸多丽。仰祝寿星明，指黄河、清年可拟。欢同鱼水，永遇乐倾杯，风流子、洞仙歌，曲唱千秋岁。

满朝欢 寿韩尚书出守 九月廿五

一点箕星，近天边，光彩辉耀南极。竹马儿童，尽道使君生日。元是凤池仙客。曾曳履、持荷簪笔。称觞处，晚节花香，月周犹待五夕。

谁道久拘禁掖。任双旌五马，暂从游逸。九棘三槐，都是等闲亲植。见说玉皇侧席。但早晚、促归调燮。功成了，笑傲南山，寿如南山松柏。

瑞鹤仙 寿王侍郎 九月廿七

过重阳三九。正日行析木，方移旦柳。天公爱黔首。念整顿乾坤，须还大手。蚌珠才剖。玉麒麟、世间希有。想当年，玉燕投

怀，瑞气应冲牛斗。

非偶。节逢庆会，华渚虹流，北枢电绕。明良须偶。盈月第、分前后。念元鸟生商，嵩神孕甫，两听管弦新奏。愿年年、主圣臣贤，与天长久。

醉蓬莱 寿张宰 九月廿八

望秋高梨岭，星下莆阳，庆生贤哲。问瑞萸留两荚。小试宏才，暂劳雕邑，布阳春仁泽。庭有驯禽，村无吠犬，稻黄连陌。

最是邦人，合掌顶戴，萱草年华，蟠桃春色。却笑仙翁，觅丹砂金诀。德满人间，诏来天上，看寿名俱得。岁岁霞觞，凤凰池畔，贺生辰节。

真珠帘 庆游讷斋以梅为寿 九月三十

隔云一雁衔秋去。苏堤上、听得游人相语。疏影暗香中，谁与花为主。满目有山无限意。跨白鹤、云霄飞舞。飞舞。正断桥流水，苍苔生处。

应羨地暖江南，近小春时节，南枝先吐。人似此花清，人比花尤苦。移向樽前须识取。只许与、松篁为侣。为侣。待金鼎调羹，百花红紫。

上阳春 寿人夫妻二子同日 十月初二

两日梅开，先占阳春小。鸾凤偶雁行，

全宋词 无名氏

飞舞画堂交绕。称觴盛旦，二老同年少。夫
劝妇，弟酬兄，四喜人希有。

灵椿萱草，青翠俱长久。棠棣戏徧斓，
对立齐上长生酒。有亲有序，慈孝兼恭友。
登科日，未老时，共享南山寿。

西江月 十月初三

才入冬来三日，人都道小春来。生生一
脉早胚胎。消息南枝大。

好向腊前冬后，贞元接处滋培。调羹手
段栋梁材。直待文明嘉会。

又 寿刘公子 十月初四

良月才经四日，彭城庆诞真贤。从来斗
酒百诗篇。锦绣文章灿烂。

自合宰官身现，谁知富贵由天。但教福
寿喜双全。直看子孙荣显。

满庭芳 十月初五

瑞霭非烟，小春良月，翠开五叶阶蓂。
补陀现相，今日庆生辰。江夏芳流秀国，芝
兰茂、世袭簪纓。天恩厚，金花屡锡，偕老
共卿卿。

画堂，歌舞处，香浮宝鸭，寿酒频斟。
愿朱颜绿鬓，常似青春。待得蟠桃三熟，与
群仙、会宴西清。台星照，婺星箕耀，南极
镇长明。

鱼水同欢 庆两子同日 十月初六

棣萼楼前佳气蔼。欣遇称觞，正斗杓移
亥。三两日来连庆会。贺宾喜色增加倍。
未逊徐雏分小大。好比晋朝，二陆休声
在。更祝灵椿颜不改。三苏相继居台宰。

一箩金 甥寿舅公 十月十一

新冬十叶萸添一。良辰喜是翁生日。金
鸭爇沈香。祥烟绕画堂。
遐龄方五十。厚福犹千百。看取小甥孙。
年年捧寿樽。

满江红 十月十二

好景欣逢，须记取、小阳春暖。算夜来
浹日，今朝生旦。对此称觞春酒献，郁葱佳
气琴堂满。问使君、记纪绛人年，耆颐半。
天付与，文章灿。牛刀试，风流县。笑
陶情松菊，主人懒散。谁识东山真捷径，银
章博取新貂裘。愿潭居、槐府展经纶，延椿
算。

感皇恩 寿翰林 十月十四

明夜月团圆，小春霜早。今日由来佳气
好。都城传道，翰苑称觞欢笑。知是当年，

诞生元老。

新来曾见，金莲送到。一任芳樽频醉倒。判花西掖，独挾春华词藻。召归紫闼，永为师保。

沁园春 寿冰壑 十月十七

冰壑平生，如伯伦狂，似希乐豪。喜观书不用、菊茶明眼，登山不倩、藜杖扶腰。豆粥萍齏，鲙羹鳞脯，湖海人常折简招。谁云老，有满怀风月，藏在诗瓢。

凌晨向鹄冲霄。道昴宿于今又应萧。记垂弧令节，恰当后日，下元好景，正属前朝。冷胆如天，刚肠如剑，须把千杯寿酒浇。那堪更，是梅花时月，烂熳溪桥。

水调歌头 寿隐士 十月十八

橘记一年景，梅泄小春英。见说彭成仙隐，对此庆生辰。寿比太公欠一，年并楚丘逾九，益壮异常人。细数称觞日，信宿两弥旬。

戏莱衣，桥梓列，桂兰荣。一门盛事难得，一子两层孙。休论若儿渠父，差胜杨椿黄琬，四代眼前亲。积善有余庆，享福百千春。

玉楼春 寿太守 十月十九

姑苏台上春光泄。菊老寒轻香未歇。人

全宋词 无名氏

言太守是龚黄，天为吾君生稷契。

明良庆会俱良月。万岁千秋同瑞节。明朝仙领趣持螯，十万人家齐卧辙。

满庭芳 寿幕官 十月廿四

良月霜晴，小春寒浅，瑞萸九叶朝飞。岭梅香度，初发向南枝。此际高门袭庆，真贤降、金璧争辉。传瀛海，向歆父子，相望姓名垂。

广寒，仙籍在，笔驱造化，文照虹霓。暂徘徊莲幕，名誉英驰。行筮夔龙步武，蓬山静，玉宇春熙。当清夜，神交太乙，相对照青藜。

蓦山溪 寿李学士 十月廿六

月惟四日。又转黄钟律。好景会生辰，是天降、真儒无敌。称觞设席，香雾腾葱郁。霜天晓，笙歌彻，玉斝倾仙液。

当年桂子，元是蓬莱客。任留宿蓬莱，道山试、玉堂翰墨。一封飞下，趣召入黄扉，台星照。寿星明，相映居南极。

洞仙歌 寿丞相夫人 十月廿八

潭潭仙隐，婺宿光联地。喜见门阑蔼佳气。对芳辰，诮一似、王母会瑶池，又却是、夫人诞生明世。

普陀见真相，〔淑〕德温柔，更比嫦娥又何异。小春吉月，日数推来，成七四好景，杯觞须记。况荣贵，见青紫满门，争戏舞莱衣，祝千秋岁。

水调歌头 寿刘枢甥 十月廿九

今日小春月，后日是周正。瑞蔼挹仙堂上，崧岳喜生申。文物师垣宅相，诗礼枢庭世胄，冰骨玉精神。浩气凌〔牛〕斗，胸次复凡尘。

郭中书，广成子，李长庚。勋业词章福寿，直上等三人。松菊亭前诗酒，梅竹园中翰墨，时复萃嘉宾。人指屏山下，双桂一灵椿。

临江仙 贺人寿有父有兄弟 十一月初三

三叶翠萸开子月，九天降诞文星。满堂佳气蔼祥云。称觞椒有颂，介寿酒浮春。

强仕宜为攀折客，须知富贵催人。看看雁塔即联名。一门夸盛事，棠棣对灵椿。

醉蓬莱 寿龙图有父母 十一月初四

正霜融日暖，两两萸开，阳生时候。喜见文星，上有箕星照。须信岳神，储降诞作儒林秀。一举登科，蟾宫稳步，桂香满袖。

天赋麒麟，奇骨尽美，德耀宗盟，有谁

全宋词 无名氏

居右。宠擢珍图，龙序褒勋厚。两郡棠阴，
一封芝检，飞来到如。结束曹装，入居黄阁，
双亲未老。

鱼水同欢 庆两子同日 十月初六

棣萼楼前佳气蔼。欣遇称觞,正斗杓移
亥。三两日来连庆会。贺宾喜色增加倍。
未逊徐雏分小大。好比晋朝,二陆休声
在。更祝灵椿颜不改。三苏相继居台宰。

一箩金 甥寿舅公 十月十一

新冬十叶萸添一。良辰喜是翁生日。金
鸭爇沉香。祥烟绕画堂。
遐龄方五十。厚福犹千百。看取小甥孙。
年年捧寿樽。

满江红 十月十二

好景欣逢,须记取、小阳春暖。算夜来浹
日,今朝生旦。对此称觞春酒献,郁葱佳气琴
堂满。问使君、记纪绛人年,耆颐半。
天付与,文章灿。牛刀试,风流县。笑陶
情松菊,主人懒散。谁识东山真捷径,银章博
取新貂袞。愿潭居、槐府展经纶,延椿算。

感皇恩 寿翰林 十月十四

明夜月团圆,小春霜早。今日由来佳气
好。都城传道,翰苑称觞欢笑。知是当年,诞
生元老。

全宋词 无名氏

新来曾见 ,金莲送到。一任芳樽频醉倒。
判花西掖 ,独挾春华词藻。召归紫闼 ,永为师
保。

沁园春 寿冰壑 十月十七

冰壑平生 ,如伯伦狂 ,似希乐豪。喜观书
不用、菊茶明眼 ,登山不倩、藜杖扶腰。豆粥萍
齏 鲙羹鳞脯 ,湖海人常折简招。谁云老 ,有满
怀风月 ,藏在诗瓢。

凌晨向鹄冲霄。道昴宿于今又应萧。记
垂弧令节 ,恰当后日 ,下元好景 ,正属前朝。冷
胆如天 ,刚肠如剑 ,须把千杯寿酒浇。那堪更 ,
是梅花时月 ,烂熳溪桥。

水调歌头 寿隐士 十月十八

橘记一年景 ,梅泄小春英。见说彭成仙
隐 ,对此庆生辰。寿比太公欠一 ,年并楚丘逾
九 ,益壮异常人。细数称觞日 ,信宿两弥旬。

戏莱衣 ,桥梓列 ,桂兰荣。一门盛事难得 ,
一子两层孙。休论若儿渠父 ,差胜杨椿黄琬 ,
四代眼前亲。积善有余庆 ,享福百千春。

玉楼春 寿太守 十月十九

姑苏台上春光泄。菊老寒轻香未歇。人
言太守是龚黄 ,天为吾君生稷契。

明良庆会俱良月。万岁千秋同瑞节。明

朝仙领趣持螯 ,十万人家齐卧辙。

满庭芳 寿幕官 十月廿四

良月霜晴 ,小春寒浅 ,瑞萸九叶朝飞。岭梅香度 ,初发向南枝。此际高门袞庆 ,真贤降、金璧争辉。传瀛海 ,向歆父子 ,相望姓名垂。

广寒 ,仙籍在 ,笔驱造化 ,文照虹霓。暂徘徊莲幕 ,名誉英驰。行筮夔龙步武 ,蓬山静 ,玉宇春熙。当清夜 ,神交太乙 ,相对照青藜。

蓦山溪 寿李学士 十月廿六

月惟四日。又转黄钟律。好景会生辰 ,是天降、真儒无敌。称觞设席 ,香雾腾葱郁。霜天晓 ,笙歌彻 ,玉斝倾仙液。

当年桂子 ,元是蓬莱客。任留宿蓬莱 ,道山试、玉堂翰墨。一封飞下 ,趣召入黄扉 ,台星照。寿星明 ,相映居南极。

洞仙歌 寿丞相夫人 十月廿八

潭潭仙隐 ,婺宿光联地。喜见门阑蔼佳气。对芳辰 ,诮一似、王母会瑶池 ,又却是、夫人诞生明世。

普陀见真相 [淑]德温柔 ,更比嫦娥又何异。小春吉月 ,日数推来 ,成七四好景 ,杯觞须记。况荣贵 ,见青紫满门 ,争戏舞莱衣 ,祝千秋岁。

水调歌头 寿刘枢甥 十月廿九

今日小春月 ,后日是周正。瑞蔼挹仙堂
上 ,崧岳喜生申。文物师垣宅相 ,诗礼枢庭世
胄 ,冰骨玉精神。浩气凌[牛]斗 ,胸次躐凡尘。

郭中书 ,广成子 ,李长庚。勋业词章福寿 ,
直上等三人。松菊亭前诗酒 ,梅竹园中翰墨 ,
时复萃嘉宾。人指屏山下 ,双桂一灵椿。

临江仙 贺人寿有父有兄弟 十一月初三

三叶翠蕙开子月 ,九天降诞文星。满堂佳
气蔼祥云。称觞椒有颂 ,介寿酒浮春。

强仕宜为攀折客 ,须知富贵催人。看看雁
塔即联名。一门夸盛事 ,棠棣对灵椿。

醉蓬莱 寿龙图有父母 十一月初四

正霜融日暖 ,两两蕙开 ,阳生时候。喜见
文星 ,上有箕星照。须信岳神 ,储降诞作儒林
秀。一举登科 ,蟾宫稳步 ,桂香满袖。

天赋麒麟 ,奇骨尽羨 ,德耀宗盟 ,有谁居
右。宠擢珍图 ,龙序褒勋厚。两郡棠阴 ,一封
芝检 ,飞来到如。结束曹装 ,入居黄阁 ,双亲未
老。

木兰花慢 寿主簿 十一月初五

腊前冬至后 ,报春意、动南坡。见葭管浮

灰梅英缀玉，漏泄阳和。阶萸呈瑞五叶，祥开崧岳耸嵯峨。笑拥两行珠翠，欢腾一曲笙歌。

试将铜狄细摩挲。问寿富如何。道寿等冈陵，富连阡陌，福禄多多。德门最堪羨处，有乔松丹桂映婆娑。管取脱身簿领，即登奕世儒科。

水调歌头 寿王制置 十一月初六

宝历契昌运，岳渎启珍符。汾阳忠义勋阅，此际挂蓬弧。正属阳生子月，始见萸敷六荚，宝剑出昆吾。芒射斗牛分，光彩照坤舆。

备文武，宏器量，足谋谟。世传韬略，出专阃制誓平胡。尽〔护〕貔貅百万，仰副九重委注，指日复舆图。祝寿如山阜，进位陟洪枢。

鹧鸪天 寿尊长 十一月初十

月琯循环届仲冬。萸生十叶气葱葱。梅花香里开华宴，柏酒樽前拜寿翁。檀乍爇，烛微笼。儿孙罗列劝金钟。点头更问儿孙看，慈母蟠桃几度红。

临江仙 寿妇人七十 十一月十一

鲁观书云方在候，颍川家庆非常。望前四日上椒觞。北堂人未老，南极夜增光。

借问遐龄今几许，希年恰喜相当。愿同王母寿延长。蟠桃看屡熟，萱草镇长芳。

百字谣 寿张推官 十一月十二

一阳来复 ,正日临三四 ,梅英露白。玉燕当年曾入梦 ,瑞应果生人杰。金玉文章 ,圭璋闻望 ,早作蟾宫客。来趋莲幕 ,片言珍重能决。

自知阴德居多 ,仕途应显 ,州县何劳力。况有儿孙俱挺特 ,管取桂枝高折。桥梓齐芳 ,芝兰并秀 ,甚盛家声籍。祝君长寿 ,一门荣贵无极。

临江仙 十一月十三

要问南枝消息早 ,一阳恰喜方回。望前二日验云台。祥光呈五色 ,瑞彩上三台。

生机一脉何尝息 ,正看用世真才。调羹手段此胚胎。文明观盛会 ,直待六阳来。

满庭芳 寿赵判院有父有子 十一月十四

阳复今朝 ,月圆明日 ,渭溪改观风光。金枝孕秀 ,馀庆衍天潢。诞降真英间世 ,群仙贺、喜萃华堂。那堪见 ,灵椿未老 ,丹桂两芬芳。

烛摇 ,香雾拥 ,翠娥歌舞 ,齐上椒觞。且殷勤仰祝 ,华算等天长。况蕴智谋韬略 ,维城志、屏翰君王。待收取、平戎功业 ,军国赖平章。

满江红 寿富者七十 十一月十七

阳律方回 ,月圆后、又逾两日。想当年 ,秀

全宋词 无名氏

钟峻岳 ,复生申□。重庆蓬弧呈瑞旦 ,盈门喜气先洋溢。羨璇穹、箕宿动祥光 ,辉南极。

延遐算 ,希年及。康宁富 ,无亏一。论箕畴五福 ,总全天锡。鹤发未教垂雪彩 ,凤毛行展冲霄翼。愿彩庭、岁岁捧霞觞 ,倾仙液。

水调歌头

寿太守傅侍郎 ,前三日冬至十一月十八

关中有萧相 ,江左见夷吾。中兴帝赉良弼 ,休运应乾符。百五期过一日 ,十万声号半夜 ,南极灿晴虚。崧岳生申甫 ,河洛出图书。

领坡仙 ,陪橐从 ,镇潜都。九重昨夜有梦 ,问到北岩无。须信建溪桃李 ,难驻商川舟楫 ,归去伴都俞。岁伴南山寿 ,日拱北辰居。

万年欢 寿侍郎 十一月二十

律应黄钟 ,蓂飞六荚 ,今朝是、嵩岳生申。似山堂里 ,氤氲瑞气先春。笙歌度曲 ,依然在、紫府黄庭。拥出癯仙冰玉洁 ,梅花个样精神。堪羨处 ,行藏信道 ,出处无心。

莫把闲中日月 ,替了调元公案。袖手经纶。黄扉虚左 ,休顾平泉花石盟。好看来年八帙 ,渭川叟、故事重新。寿星与、三台齐色 ,政地拜生辰。

鹊桥仙 寿侍郎 十一月廿一

朱门列戟。华堂鼎食。那更康强八十。

渭川遇主恰年同，怎得似、累朝良弼。

冬殷仲律。六萸飞日。一点星辉南极。
祝公经济出调元，遍寰宇、同跻寿域。

瑞鹤仙 寿妇人七十三 十一月廿二

正迎长时节。细数来、两旬已浹，两朝方越。画堂人笑悦。见瑞烟香袅，寿星明彻。丝丝华发。问瑶池会客，几见桃结。才经八十，春秋不记，绛人年月。

奇绝。诗书教子，陶母等伦，曹家风烈。鼎来□德。儿孙尽、蓝袍客。便从今，一轴金花鸾锦，十藏琅函贝叶。愿常如、秋月圆时，长生真诀。

临江仙 庆寿日趋朝 十一月廿三

律按黄钟余七日，左扉弧矢呈祥。好看一点上眉黄。台星还又照，相映寿星光。

今岁生辰应迥别，趋朝已趣曹装。姓名稳稳造鸳行。来年三四月，衣锦早还乡。

菩萨蛮

寿侄 十一月廿六（按调此乃虞美人）

萸留四叶书云后。此日孙枝秀。爱他风味似吾人。却是笔头能篆、又能文。

青青两鬓年方壮。儿女俱成长。要添富寿共荣华。教取一庭兰玉，共成家。

江神子 寿监镇 十一月廿七

一阳来复气回新。对芳辰。庆生申。月满惟迟、三日又三旬。入仕致身知是早，年弱冠，正青春。

文章笔下扫千军。擢铨衡。袭簪纓。荣捧宸恩，来镇此邦民。行历华途须烜赫，添寿酒，祝椿龄。

上阳春 寿邹魁侄 十一月廿八

疏梅点白，漏泄先春信。律欲变黄钟，但两日、一阳月尽。龙头望族，挺挺振家声，窗下业，月中枝，雁塔书名姓。

琴堂拟步，早发梅仙轂。台阁待风生，想咫尺、天颜已近。壮行未老，便作黑头公，还未定，祝千春，看子孙昌盛。

醉蓬莱 寿特奏官 十二月初二

看梅腮妆腊，柳眼缄春，小寒交候。萸荚双开，庆生贤毓秀。早著蜚声，荣登鹗表，正是当年少。大器能藏，待当富贵，功名还就。

暂试鸾栖，需期瓜约，未试经纶手。料想黄扉须有分，看玺书飞到。州县无劳，沙堤已筑，跃马长安道。岁岁今朝，斑斓品戏，举觞称寿。

临江仙 庆梁孺人 十二月初三

数朵寒梅方破腊 ,良宵新月初生。晓来闺阁庆生辰。天孙应降诞 ,德迈孟光贤。

喜配伯鸾真得耦 ,乘龙产凤齐名。称觞岁岁祝长年。瑶池桃未熟 ,南极婺星明。

满庭芳 寿胡簿方三十 十二月初四

梅拆数枝 ,萸舒四荚 ,二阳始觉来临。五云呈瑞 ,渤海复生申。信道当年庆诞 ,人推天上石麒麟。果然是 ,名驰雁塔 ,弱冠绿袍新。

鸾栖 ,虽小试 ,仕途发轫 现宰官身。信倚需一札 ,飞下天庭。自是调羹大手 ,环召也、快展经纶。称觞处 ,彩堂具庆 ,芳桂对萱椿。

壶中天 寿伯母 十二月初六

嘉平时候 ,算尧阶萸叶 ,才方开六。婺女当年曾降瑞 ,产作仙姿清淑。金玉满堂 ,儿孙满目 ,心事今都足 ,嘻嘻嗃嗃 ,一门和气可掬。

何幸诞节称觞 ,湖山堂上 ,燕集皆亲族。犹子不能歌盛美 ,但借湖山为祝。福比湖深 ,寿齐山耸 ,岁岁颜如玉。好陪王母 ,共看几度桃熟。

临江仙 十二月初八

称觞喜对二阳临。况当弦月上 ,一醉祝千

全宋词 无名氏

春。

千秋岁 十二月初九

斗杓建丑。萸叶初开九。贤哲降，千龄
偶。

满江红 十二月初十

十荚尧萸开翠羽，一番潘貌蒸红颊。

临江仙 十二月十三日

欣遇月圆先两日，称觴对二阳来。

水调歌头 十二月十四日

今日雪飞六出，明夜月圆三五，梅腊正传
芳。恰值生申节，共献椒觞。

壶中天 十二月十五

霜月团圆天似水，还是神仙诞日。

鹧鸪天 十二月十六

腊月初开一荚萸。祥开崧岳庆生申。

全宋词 无名氏

满江红 十二月十八

雪压梅欹 ,写不就、岁寒清绝。正阆苑、五
分里过了 ,三分腊月。

乳燕飞 十二月十九日

问讯绂麟何日是 ,腊月生辰十九。

瑞鹤仙 十二月廿二

户庭浮瑞气。八日余寒 ,新春来至。

水调歌头 十二月二十四

瑞溢飞猿峤 ,秀毓凤凰山。腊余六日春
到 ,人间世庆生贤。

又 十二月廿六

应三元 ,先五日 ,庆生申。

又 十二月廿六

年春里 ,归去凤凰池上 ,国号恰新颁。玉
立诸郎秀 ,丹桂看齐樊。

小木兰花 寿亲戚 十二月廿七

日逢三九。相对梅花倾寿酒。次第回春。
甲子从头又一新。

全宋词 无名氏

敬翻一曲。付与歌儿勤为祝。为问仙翁。
今岁蟠桃几度红。

沁园春 寿刘常州 十二月廿九

淮海知名,今日刘郎,胜如旧时。记当年
幕府,从容赞画,云从万骑,电掣千麾。威震新
塘,气吞涟楚,涤扫妖氛但指期。论功处,载驂
鸾鹤,衣锦赋荣归。

九重诏已封泥。看稳上青云万丈梯。况
平生慷慨,闻鸡起舞,中原事业,不付公谁。昨
夜颁春。明朝献岁,且对椒盘奉寿卮。功名
事,不输前辈,行到凤凰池。

千秋岁 十二月三十

欢盈万屋。声杂当庭竹。腾宝篆,辉银
烛。东君将到处,祇隔邮亭宿。谁知道,此时
诞个人如玉。

红叶题宫墨。流入人间曲。天香在,犹芬
馥。满斟眉寿醕,共劝千龄福。情未足,来朝
更把酴酥祝。

贺新郎 张县尹美任

父老持杯水。叹世间、公论无情,是非易
位。来饯花封贤令尹,籍籍攀辕耳语。留不
住、青原抚字。蓦地风波平地起,算十常、八九
乖人意。无处著,不平气。

全宋词 无名氏

浩然一曲歌归去。问城郭田园,曾荒尤未。亲旧过从同一笑,不羨浮云富贵。任造物、小儿厮戏。失马安知非是福,况庙庭、侑祀方思魏。天定也,诏书至。

蝶恋花 贺领乡举

名播乡间人素许。科诏相催,又趁槐花举。谈笑挥成金玉句。贤书果见登天府。阔步青霄今得路。脚底生云,拥入蟾宫去。好是来年三月暮。琼林宴处人争睹。

桂枝香 贺及第

恩袍草色。望满目青青,光动阡陌。拂拂鞭丝散漫,锦鞞玉勒。君王赐与琼林宴,玩丹桂、香浮仙籍。舜韶清雅,尧觞泛溢,欢意何极。

湛露久、需云未饰。更星使传呼,天上消息。槐幄阴移,上苑淡烟凝碧。归来渐近平康路,骤香尘、倒载连璧。马蹄轻驶,宫花半绽,艳欺斜日。

西江月 赠友

忆昔钱塘话别,十年社燕秋鸿。今朝忽遇暮云东。对坐旗亭说梦。

破帽手遮西日,练衣袖卷寒风。芦花江上两衰翁。消得几番相送。

全宋词 无名氏

少年游 题锦标社疏

新竿界断一天游。万弩向云头。彩羽飞星，红心破日，胜集总名流。

好手业中施好，利物敢轻酬。捧杆箭多，旗花钱少，快请办头筹。

浣溪沙 题赠飞竿簇

谁识飞竿巧艺全。儿童群戏艳阳天。十分险处却安然。

海燕舞空萦弱絮，岭猿连臂下层颠。算来真个肉飞仙。

菩萨蛮 题刀镊行簇

宝刀迎面摇寒雪。琼梳掠鬓横新月。红颊驻长春。绿鬟轻绾云。

解飘并括敛。到处题名遍。飞诏待追还。荣居供奉班。

满江红 贺人开酒店药铺

旧日皆春气象、又重妆束。做得新丰酒肆，济康堂局。老杜误传人酝酿，许公手种时科目。自两公、一去已经年，君今续。

商家醴，须君麴。怀英笼，须君蓄。且饶人大卖，呼么喝六。佶倬家人三两辈，药王菩

全宋词 无名氏

萨丹青轴。更于中、添得个当炉，十分足。

失调名

燕子重来寻旧巢。

贺新郎 黄州赤壁

苏子秋七月。向凉宵、扁舟与客，共游赤壁。清吹徐来波不动，举酒诵诗属客。白露与、水光相接。万顷茫茫风浩浩，飘飘乎、遗世而独立。棹兰桨，溯空阔。

正襟危坐而言曰。客知夫、天地之间，久长无物。惟有清风与明月，万古用之不竭。寓耳目、为声为色。客笑欣然重酌酒，忽盘肴既尽杯狼籍。□□□东方白。

又

十月临皋暮。客从予、黄泥之坂，凜然霜露。相与行歌而言曰，月白风清如许。念无酒、归谋诸妇。妇曰斗酒藏之已久，可携为、赤壁之游否。江水落，出洲渚。

登龙踞虎幽宫俯。啸一声、山鸣谷应，寂寥四顾。有鹤东来西去也，梦道士、揖予而语。赤壁之游乐乎否，问其名、不答予惊悟。开户视，不知处。

满江红 严州钓台

不作三公，归来钓、桐庐江侧。刘文叔、眼

全宋词 无名氏

青不改 , 故人头白。风节傥能关社稷 , 云台何必图颜色。使阿瞞、临死尚称臣 , 伊谁力。

登钓石 , 初相识。鱼竿老 , 羊裘窄。除江山风月 , 更谁消得。烟雨一川双桨急 , 转头不忿青山隔。叹鼻端、不省利名醒 , 京华客。

踏莎行 寄妹

孤馆深沈 , 晓寒天气。解鞍独自阑干倚。暗香浮动月黄昏 , 落梅风送沾衣袂。

待写红笺 , 凭谁与寄。先教觅取嬉游地。到家正是晚春时 , 小桃花下拚沈醉。

青玉案 送别

征鞍不见邯郸路。莫便匆匆去 秋风萧条何以度。明窗小酌 , 暗灯清话 , 最好留连处。

相逢各自伤迟暮 , 犹把新诗诵奇句。盐絮家风人所许。如今憔悴 , 但余衰泪 , 一似黄梅雨。

沁园春 庆云山创屋

法从西清 , 雅志山东 , 超然燕怡。笑洛城卢老 , 贫来屋破 , 花溪杜叟 , 雨里床移。晚乃经营 , 欢言结架 , 天矫晴虹朝已跻。开山了 , 一灯灯相续 , 第一宗师。

乘闲小隐幽栖。天与人谋应此时。算春霆震响 , 不教龙蛰 , 甘霖布润 , 待倩云飞。宥密

全宋词 无名氏

思贤 明谟经远 ,共指神州克复归。归来也 ,更
身名烜赫 ,锦绣光辉。

水调歌头 贺新居

躡足半天下 ,作意赋归欤。燕申经始不
日 ,胸次出规模。千古神峰拥护 ,万古横江缭
绕 ,佳致足方壶。一饮一词美 ,还得似君无。

十步楼、五步阁 ,恣安居。薰蒸和气 ,袭人
盎盎觉春如。况是庄椿不老 ,那更徐鸡并秀 ,
父子看名俱。驷马高车盖 ,不减汉之于。

又 贺新居

三径当松竹 ,五亩足烟霞。个中卜宅 ,蓬
山佳致足君家。前有书江环绕 ,后有横岗翠
嶂 ,万象总森罗。轮奂翬飞处 ,此屋岂无华。

绿窗开 ,朱户敞 ,绣帘遮。燕闲自适 ,百篇
斗酒是生涯。种善善根未绝 ,延桂桂枝可待 ,
谁子为君夸。佳嗣一夔足 ,荣耀必多嘉。荣耀
必多嘉。

金缕衣 贺云溪建楼

帝遣司花女。炯琼琚瑶佩 ,新来满空飞
舞。飞到水晶宫阙处 ,还被六丁迎住。唤月
娣、天孙说与。道是云溪新洞府 ,粲玉虹、拥出
神仙宇。齐星汉 ,切云雾。

朝来细把虹梁举。命日兄、催上金鸦 ,高
高腾翥。云母卷帘三万数 ,不碍风斤月斧。真
个是、去天尺五。恰则紫皇香案近 ,那砖花、院

柳宜年少。双鬓绿 朝天去。

失调名

金猊香冷。

又

宝鸭香凝袖。

又

梅传春信

又

海棠著雨透胭脂。

又

碧玉堂前金粟斗。

又

王孙去后多芳草。

江城梅花引 和赵制机赋梅

逋仙千载独知心。别无人。泪痕深。长是自开自落自成阴。白石后来疏影句，饶绮丽，总输他、清浅吟。

伤情。伤情。角中声。夜沈沈。更捣砧。欲雪未雪、天欲老，云气昏昏。梦绕西湖路渐不堪行。人已骑驴毡笠去，留恨也，仗梅花、说与君。

全宋词 无名氏

踏莎行 和赵制机赋梅

瘦影横斜 ,断桥路小。如今梦断孤山了。
冷魂趁鹤不归来 ,荒山没尽深深草。

月下罗浮 ,一樽自笑。旧枝尚记幽禽抱。
王令人梦里说相思 ,被谁惊破霜天晓。

满江红 梅

雪后郊原 ,烟林静、梅花初拆。春初半、犹
自探春消息。一眼平芜看不尽 ,夜来小雨催新
碧。笑去年、携酒折花时 ,君应识。

兰舟漾 ,城南陌。云影淡 ,天容窄。绕风
漪十顷 ,遥浮晴色。恰似槎头收钓处 ,坐中仍
有江南客。试与问、何如两桨下苕溪 ,吞梦泽。

失调名

月宫仙桂、被嫦娥试手 移来山谷。

献仙桃

献仙桃

元宵嘉会赏春光。盛事当年忆上阳。尧
颡喜瞻天北极，舜衣深拱殿中央。欢声浩荡连
韶曲，和气氤氲带御香。壮观大平何以报，蟠
桃一朵献千祥。

献天寿慢

日暖风和春更迟。是太平时。我从蓬岛
整容姿。来降贺丹墀。

幸逢灯夕真佳会，喜近天威。神仙寿算远
无期。献君寿、万千斯。

献天寿令 嗷子

阆苑人间虽隔，遥闻圣德弥高。西离仙境
下云霄。来献千岁灵桃。

上祝皇龄齐天久，犹舞蹈、贺贺圣朝。梯
航交凑四方遥，端拱永保宗祧。

全宋词 无名氏

金盏子慢

丽日舒长 ,正葱葱瑞气 ,遍满神京。九重天上 ,五云开处 ,丹楼碧阁峥嵘。盛宴初开 ,锦帐绣幕交横。应上元佳节 ,君臣际会 ,共乐升平。

广庭。罗绮纷盈。动一部、笙歌尽新声。蓬莱宫殿神仙景 ,浩荡春光 ,迢迢王城。烟收雨歇 ,天色夜更澄清。又千寻火树 ,灯山参差 ,带月鲜明。

金盏子令 嗷子

东风报暖 ,到头嘉气渐融怡。巍峨凤阙 ,起鳌山万仞 ,争耸云涯。

梨园弟子 ,齐奏新曲 ,半是埙篪。见满筵、簪绅醉饱 ,颂鹿鸣诗。

瑞鹧鸪慢

海东今日太平天。喜望龙云庆会筵。尾扇初开明黼座 ,画帘高卷罩祥烟。梯航交凑端门外 ,玉帛森罗殿陛前。妾献皇龄千万岁 ,封人何更祝遐年。

又 慢嗷子

北暴东顽 ,纳款慕义争来。日新君德更明

全宋词 无名氏

哉。歌咏载衢街。

清宁海宇无余事，乐与民同燕春台。一年一度上元回。愿醉万年杯。

寿延长

中腔令

彤云映彩色相映，御座中、天簇簪纓。万
花铺锦满高庭。庆敞需宴欢声。千龄启统乐
功成。同意贺、元圭丰擎。宝觞频举侠群英。
万万载、乐升平。

破字令

青春玉殿和风细。奏箫韶络绎。瑞绕行
云飘飘曳。泛金尊、流霞艳溢。

瑞日晖晖临丹扆。广布慈德宸遐迩。愿
听歌声舞缀。万万年、仰瞻宴启。

五羊仙

步虚子令

碧烟笼晓海波闲。江上数峰寒。佩环声里异香飘落人间。弭绛节、五云端。

宛然共指嘉禾瑞，开一笑、破朱颜。九重
晓阙，望中三祝高天。万万载、对南山。

破字令

缥缈三山岛。十万岁、方分昏晓。春风开遍碧桃花，为东君一笑。

祥飙暂引香尘到。祝高龄、后天难老。瑞烟散碧，归云弄暖，一声长啸。

抛球乐

折花令 三台词

翠幕华筵 ,相将正是多欢宴。举舞袖、回旋遍。罗绮簇宫商 ,共歌清羨。当琼浆泛泛满金尊 ,莫惜沈醉 ,莫惜沈醉 ,永日长游衍。愿乐嘉宾 ,嘉宾式燕。

水龙吟令

洞天景色常春 ,嫩红浅白开轻萼。琼筵镇起 ,金炉烟重 ,香凝锦幄。窈窕神仙 ,妙呈歌舞 ,攀花相约。彩云月转 ,朱丝网徐在 ,语笑抛球乐。

绣袂风翻凤举 ,转星眸、柳腰柔弱。头筹得胜 ,欢声近地 ,光容约。满座嘉宾 ,喜听仙乐 ,交传觥爵。龙吟欲罢 ,彩云摇曳 ,相将归去寥廓。

小抛球乐令

两行花窍占风流。缕金罗带系抛球。玉纤高指红丝网 ,大家著意胜头筹。

失调名

满庭箫鼓簇飞球。丝竿红网总台头。

又

频歌覆手抛将过，两行人待看回筹。

又

五花心里看抛球。香腮红嫩柳烟稠。

又

清歌叠鼓连催促，这里不让第三头。

又

箫鼓声声且莫催。彩球高下意难裁。

又

恐将脂粉均妆面，羞被狂毫抹污来。

清平令破子

满庭罗绮流粲。清朝画楼开宴。似初发
芙蓉正灿熳。金尊莫惜频劝。近看柳腰似折。
更看舞回流雪。是欢乐、宴游时节。且莫催、
欢歌声阕。

惜奴娇 曲破

春早皇都冰泮。宫沼东风布轻暖。梅粉
飘香 柳带弄色 瑞霭祥烟凝浅。正值元宵、行

乐同民总无闲。肆情怀 ,何惜相邀 ,是处里容款。

不算仗委东君遍。有风光、占五陵闲散。从把千金 ,五夜继赏 ,并彻春宵游玩。借问花灯 ,金琐琼瑰果曾罕。洞天里 ,一掠蓬瀛 ,第恐今宵短。

夸帝里。万灵咸集 ,永卫紫陌青楼 ,富臻既庶矣。四海升平 ,文武功勋盖世。赖圣主 ,兴贤佐 ,恁致理。

气绪凝和 ,会景新、访雅致。列群公锡宴在迩。上元循典 ,胜古高超荣异。望绛霄、龙香飘飘旖旎。

景云披靡。露浥轻寒若水。尽是游人美。陌尘润、宝沈递。笑指扬鞭 ,多少高门胜会。况是。只有今夕誓无寐。

盛日凝理。羽巢可窥。阆苑金关启扉。烬连宵、宁防避。暗尘随马 ,明月逐人无际。调戏。相歌秣李未阑已。

骋轮纵勒 ,翠羽花钿比织。并雅同陪 ,共越九衢遍 ,尽邀逸。料峭云容 ,香惹风、萦怀袂。遍寓目 ,几处瑶席绣帘。

莫如胜概 ,景压天街际。彩鳌举、百仞耸倚。凤舞龙骧 ,满目红光宝翠。动霁色 ,余霞曛散成绮。

渐灼兰膏 ,覆满青烟罩地。簇宫花、擗荡纷委。万姓瞻仰 ,苒苒云龙香细。共稽首 ,同乐与 ,众方纪。

楼起宵宫里。五福中天纷绛瑞。弦管齐谐 ,清宛振逸天外。万舞低回纷绕 ,罗紈摇曳。顷刻转轮归去 ,念感激天意。

全宋词 无名氏

幸列熙台 ,洞天遥遥望圣梓。五夕华胥 ,
鱼钥并开十二。圣景难逢无比。人间动且经
岁。媿媿踌躇 ,再拜五云迤邐。

万年欢慢

禁籞初晴 ,见万年枝上 ,工啜莺声。藻殿
连云 ,萍曦高照檐楹。好是帘开丽景 ,袅金炉、
香暖烟轻。传呼道、天蹕来临 ,两行拱引簪纓。

看看筵敞三清。洞宝玉杯中 ,满酌犀觥。
烂漫芳葩 ,斜簪庆快春情。更有箫韶九奏 ,簇
鱼龙、百戏俱呈。吾皇愿、永保洪图 ,四方长乐
升平。

当今圣主 ,理化感四塞 ,永减狼烟。太平
朝野无征战 ,国内晏然。风调雨顺歌声喧。箫
韶韵 ,九奏钧天。愿王永寿 ,比南山、更奏延
年。

倬妁要肢轻婀娜。学内样、深深梳果。如
五凤双鸾相对舞 ,随腰带、乍游琐。莺幕、满头
花 ,见绿杨摸藪。金阶献 ,一庭细管繁弦里 ,谁
把撾抛过。

舞鸾双翥 ,香兽低。散瑞景烟微。投袂翩
翩 ,趁拍迟迟。按曲度瑶池。曲遍新声 ,敛绣
衣跪。彩袖高捧琼卮。指月中丹桂。春难老 ,
祝仙寿维祺。

忆吹箫慢

血洒霜罗 ,泪薄艳锦 ,伊方教我成行。渐
望断、斜桥暮柳 ,曲水归云。月暗风高露冷 ,独

全宋词 无名氏

自才抵孤城。江南远 ,今夜就中 ,愁损行人。

愁人。旧香遗粉 ,空淡淡余暖 ,隐隐残痕。
到这里、思量是我 ,忒煞无情。水更无情似我 ,
催画航、一日三程。休烦恼 相见定约新春。

月华清慢

雨洗天开 ,风将云去 ,极目都无纤翳。当
遇中秋夜 ,静月华如水。素光晃、金屋楼台 ,清
气彻、玉壶天地。此际。比无常三五 ,婵娟特
异。

因念玉人千里。待尽把愁肠 ,分付沈醉。
只恐难当漏尽 ,又还经岁。最堪恨、独守书帙 ,
空对景、不成欢意。除是。问姮娥觅取 ,一枝
仙桂。

感皇恩令

和袖把金鞭 ,腰如束素 ,骑介驴儿过门去。
禁街人静 ,一阵香风满路。凤鞋宫样小 ,弯弯
露。

蓦地被他 ,回眸一顾。便是令人断肠处。
愿随鞭鞚 ,又被名缰勒住。恨身不做个 ,闲男
女。

醉太平

厌厌闷着。厌厌闷着。奴儿近日听人咬 ,
把初心忘却。

全宋词 无名氏

教人病深谩摧拙。凭谁与我分说破 ,仔细
思量怎奈何 ,见了伏些弱。

还宫乐

喜贺我皇 ,有感蓬莱 ,尽降神仙。到乘鸾
驾鹤御楼前。来献长寿仙丹。玉殿阶前排筵
会 ,今宵秋日到神仙。笙歌寥亮呈玉庭 ,为报
圣寿万年。

清平乐

真主玉历成康。德睿宁安国中良。时和
岁丰稔 ,民阜乐、何情泚、瑞木呈日五色 ,月华
重有光。更羽鹤来仪凤凰。万邦乡。齐供明
皇。祝遐龄、圣寿无疆。

荔子丹

斗巧宫妆扫翠眉。相唤折花枝。晓来深
入艳芳里 ,红香散 ,露浥在罗衣。盈盈巧笑咏
新词。舞态画娇姿。袅娜文回迎宴处 ,簇神
仙、会赴瑶池。

水龙吟慢

玉皇金阙长春 ,民仰高天欣载。年年一度
定佳期 ,风情多感慨。绮罗竞交会。争折花枝
两相对。舞袖翩翩歌声妙 ,掩粉面、斜窥翠黛。

全宋词 无名氏

锦额门开彩架 ,球儿裳、先秀神仙队。融香拂
席霓裳动 ,铿锵环佩。宝座巍巍五云密 ,欢呼
争拜退。管弦众作欲归去 ,愿吾皇、万年恩爱。

太平年慢 中腔唱

皇州春满群芳丽。散异香旖旎。鳌宫开
宴赏佳致。举笙歌鼎沸。

永日迟迟和风媚。柳色烟凝翠。唯恐日
西坠。且乐欢醉。

金殿乐慢 踏歌唱

驾紫鸾辇。乘风缥缈游仙。红霓蘸影 ,近
瑶池、鹤戏芝田。

临蕙圃、饮琼泉。上萧台、遥瞻九天。对
真人蕊书亲授 ,已向南宫住长年。

安平乐

开琼筵 ,庆佳辰。彩帘当中月华明。笙歌
乐、如梦幻 ,望丹山彩凤 ,飞舞邃庭。

遐艳异、寿杯同斟。拊舞讴歌浹欢声。方
今永永太平。更衍多男 ,共集锦昌寿恩。

爱月夜眠迟慢

禁鼓初敲 ,觉六街夜悄 ,车马人稀。暮天
澄淡 ,云收雾卷 ,亭亭皎月如珪。冰轮碾出遥

全宋词 无名氏

空 ,无私照临千里。最堪怜、有情风 ,送得丹桂香微。

唯愿素魄长圆 ,把流霞对饮 ,满泛觥卮醉凭栏处、赏玩不忍、辜却好景良时。清歌妙舞连宵 踟蹰懒入罗帏。任佳人、尽嗔我 ,爱月每夜眠迟。

惜花春起早慢

向春来 ,睹林园 ,绣出满槛鲜萼。流莺海棠枝上弄舌 ,紫燕飞绕池阁。三眠细柳 ,垂万条、罗带柔弱。为思量 ,昨夜去看花 ,犹自斑驳。

须拌尽日樽前 ,当媚景良辰 ,且恁欢谑。更阑夜深秉烛 ,对花酌、莫辜轻诺。邻鸡唱晓 ,惊觉来、连忙梳掠。向西园、惜群葩 ,恐怕狂风吹落。

千秋岁令

想风流态 ,种种般般媚。恨别离时大容易。香笺欲写相思意。相思泪滴香笺字。画堂深 ,银烛暗 ,重门闭。

似当日、欢娱何日遂。愿早早相逢重设誓。美景良辰莫轻拌 ,鸳鸯帐里鸳鸯被。鸳鸯枕上鸳鸯睡。似恁地 ,长恁地 ,千秋岁。

风中柳令

爱鬓云长 ,惜眉山 ,寻乍相见 ,一时眠起。

为伊尚验 ,未欲将言相戏。早樽前、会人深意。

霎时间阻 ,眼儿早巴巴地。便也解、封题
相寄。怎生是款曲 ,终成连理。管胜如、旧来
识底。

汉宫春慢

春日迟迟。称游人、尽日赏燕芳菲。新荷
泛水 ,渐入夏景云奇。炎光易息 ,又早是、零落
风西。白露点 ,黄金菊蕊 ,朝云暮雪霏霏。

光阴迅速如飞。邀酒朋共欢 ,且恁开眉。
清歌妙舞 ,更兼玉管瑶篴。人生易老 ,遇太平、
且乐嬉嬉。莫待解 ,朱颜顿觉 ,年来不似当时。

花心动慢

[暑]逼芳襟 ,甚全无因依 ,便教人恶。赖
有枕溪百尺 ,朱楼映日 ,数重香箔。驮冰围定
犹嫌暖 ,红日绽、雨收残脚。漫试取 ,红绡弄
雪 ,碎琼推削。

妆罢低云未掠。叶叶地仙衣 ,剪轻裁薄。
汗洒泪珠 ,急捧金盘 ,向前颗颗盛却。凤凰双
扇相交扇 ,越搵就、越腰肢弱。待做个、青纱罩
儿罩著。

行香子慢

瑞景光融。换中天霁烟、佳气葱葱。皇居
崇壮丽 ,金碧辉空。彤霄外、瑶殿深处 ,帘卷花

影重重。迎步辇、几簇真仙，贺庆寿新宫。

方逢。圣主飞龙。正休盛大宁，朝野欢同。何妨宴赏，奉宸意慈容。韶音按、露觞将进，薰炉飘馥香浓。长愿承颜，千秋万岁，明月清风。

雨中花慢

宴阁倚栏郊外，乍别芳姿，醉登长陌。渐觉联绵离绪，淡薄秋色。宝马频嘶，寒蝉晚、正伤行客。念少年踪迹。风流声价，泪珠偷滴。

从前与、酒朋花侣，镇赏画楼瑶席。今夜里、清风明月，水村山驿。往事悠悠似梦，新愁苒苒如织。断肠望极。重逢何处，暮云凝碧。

迎春乐令

神州丽景春先到。看看是、韶光早。园林深处东风过，红杏里、莺声好。漠漠青烟远远道。触目是、绿杨芳草。莫惜醉重游，逡巡又、年华老。

西江月慢

烟笼细柳，映粉墙、垂丝轻袅。正岁稍暖，律风和，装点后苑台沼。见乍开、桃若燕脂染，便须信、江南春早。又数枝、零乱残花，飘满地、未曾扫。

幸到此、芳菲时渐好。恨间阻、佳期尚杳。

全宋词 无名氏

听几声、云里悲鸿 ,动感怨愁多少。谩送目、层阁天涯远 ,甚无人、音书来到。又只恐、别有深情 ,盟言忘了。

游月宫令

当今圣主座龙楼 ,圣寿应天长 ,实钱喷香烟 ,玄宗游月宫。

海晏河清 ,盛朝侍 ,群臣喜呼万岁 ,万人民 ,开乐业 ,愿吾皇、增福寿。

桂枝香慢

暖风迟日 ,正韶阳时节 ,淑景明媚。一霎雨打红桃 ,花落满地。〔□〕闺独坐帘高卷 ,困春容、懒临香砌。自从檀郎 ,金门献赋 ,不绝朱翠。

闻上国、才有书回 ,应贤良明庭 ,已擢高第。拆破香笺 ,离恨却成新喜。早教宴罢琼林苑 ,愿归来、永同连理。这回良夜 ,从他桂枝 ,香惹鸳被。

庆金枝令

莫惜金缕衣。劝君惜、少年时。花开堪折直须折。莫待折空枝。

一朝杜宇才鸣后 ,便从此、歇芳菲。有花有酒且开眉。莫待满头丝。

全宋词 无名氏

百宝 原误作“实”收

一抹弦器 ,初宴画堂 ,琵琶人把当头。髻云腰素 ,仍占绝风流。轻拢慢捻 ,生情艳态 ,翠眉黛颦 ,无愁谩似愁。变新声曲 ,自成获索 ,共听一奏梁州。弹到遍急敲颖 ,分明似语 ,争知指面纤柔。坐中无语 ,惟断续金虬。曲终暗会王孙意 ,转步莲、徐徐卸凤钩。捧瑶觞 ,为喜知音 ,劝佳人、沉醉迟留。

满朝欢令

未央宫阙丹霞住。十二玉楼挥锦绣。云开雉扇卷珠帘 ,烟粉龙香添瑞兽。瑶觞一举箫韶奏。环佩千官齐拜首。南山翠应北华高 ,共献君王千万岁。

天下乐令

寿星明久。寿曲高歌沈醉后。寿烛荧煌。手把金炉 ,燃一寿香。

满斟寿酒。我意殷勤来祝寿。问寿如何。寿比南山福更多。

感恩多令

罗帐半垂门半开。残灯孤月照窗台。北斗渐移天欲曙、漏更催。

全宋词 无名氏

携手劝君离别酒 ,泪和红粉滴金杯。呜咽
问君今夜去、几时回。

解佩令

脸儿端正。心儿峭俊。眉儿长、眼儿入
鬓。鼻儿隆隆 ,口儿小、舌儿香软。耳垛儿、就
中红润。

项如琼玉 ,发如云鬓。眉如削、手如春笋。
奶儿甘甜 ,腰儿细、脚儿去紧。那些儿、更休要
问。

沁园春

道过江南 ,泥墙粉壁 ,石具在前。述某州
某县 ,某乡某里 ,住何人地 ,佃何人田。气象萧
条 ,生灵憔悴 ,经略从来未必然。惟何甚 ,为官
为己 ,不把人怜。思量几许山川。况土地分张
又百年。正西蜀巉岩 ,云迷鸟道 ,两淮清野 ,日
警狼烟。宰相弄权 ,奸人罔上 ,谁念干戈未息
肩。掌大地 ,何须经理 ,万取千焉。

糖多令

天上谪星班。青牛初度关。幻出蓬莱新
院宇 ,花外竹 ,竹边山。

轩冕傥来闲。人生闲最难。算真闲、不到
人间。一半神仙先占取 ,留一半、与公闲。

长相思

去年秋。今年秋。湖上人家乐复忧。西湖依旧流。

吴循州。贾循州。十五年前一转头。人生放下休。

祝英台近

掩琵琶，临别语，把酒泪如洗。似恁春时，仓卒去何意。牡丹恰则开园，荼[⊕]麝厮句，便下得、一帆千里。

好无谓。复道明日行呵，如何恋得你。一叶船儿，休要更沈醉。后梅子青时，杨花飞絮，侧耳听，喜鹊□哩。

汉宫春

横吹声沈，倚危楼红日，江转天斜。黄尘边火瀕洞，何处吾家。胎禽怨夜，半乘风、玄露丹霞。先生笑，飞空一剑，东风犹自天涯。

情知道山中好，早翠罽含隐，瑶草新芽。青溪故人信断，梦逐飙车。乾坤星火，归来兮、煮石煎砂。回首处、幅巾蒲帐，云边独笑桃花。

水调歌头

握虎符，持玉节，佩金鱼。三十正当方面，

全宋词 无名氏

此事世间无。寄语东淮父老，夺我诗书元帅，
于汝抑安乎。早早归廊庙，天下尽欢娱。

失调名

夜深青女湿微妆。

又

曾教入夜月添白。

又

自有松篁为伴侣。

忆秦娥

烟漠漠。水天摇荡蓬莱阁。蓬莱阁，朱甍
碧瓦，半浸寥廓。

三山谩有长生药。茫茫云海风涛恶。风
涛恶。仙槎不见，暮沙潮落。

失调名

汉宫梳罢女真妆，望金仙、朝朝暮暮。

又

愁烟恨粉。

又

三生春梦。

全宋词 无名氏

减字木兰花 木芙蓉

舞台歌院。雨后西风寒翦翦。翠掩屏风。
花与残霞一样红。

宫茵隐绣。香软巧随莲步绉。不怕露寒。
日日拚教醉画栏。

虞美人 极目楼观芙蓉

秋深犹带秋初热。未放秋香发。爱他楼下木芙蓉。
妆罢三千美女、出唐宫。西湖虽小风光胜。分得钱塘景。
这些林木这些山。恰似三贤堂后、凭阑干。

念奴娇 咏剪花词

晓来雨过，见三点两点，催花开却。满目园林如锦绣，
低亚阑干西角。魏紫风流，姚黄妖艳，桃李皆粗俗。
金刀翦下，燕莺窥妒惊愕。

雅称似玉人人，淡妆才罢，粉衬胭脂薄。
蝉翼轻笼云鬓巧，斜插一枝红萼。睡足杨妃，醉沈西子，
娇困铅华落。多情风蝶，晚来犹更随著。

望江南

左右字，从古不曾闻。未必书生能点墨，
安知荫子不能文。尔汝今朝。除去了，多谢圣

全宋词 无名氏

明恩。既不可高谈阔论 ,又不敢藐视同群。但
请换头巾。

朝中措

会郡西斋 ,欢甚 ,以词示 ,调朝中措
与君同是饱菑盐。先达后何淹。任玉东
西醉倒 ,明朝病酒厌厌。

后年三月 ,凤池春满 ,雁塔名添。记取西
风桂影 ,一枝先上银蟾。

忆秦娥

花溪侧。秦楼夜访金钗客。金钗客。江
梅风韵 ,野棠颜色。

尊前醉倒君休惜。不成去后空相忆。空
相忆。山长水远 ,几时来得。

失调名

往来与月为俦 ,舒展和天也蔽。

倚西楼

禁鼓初传时下打。虚过清风明月夜。眼
如鱼目几曾干 ,心似酒旗终日挂。银汉低垂星
斗斜。院宇空寥烛卸。西楼萧洒有谁知 ,教我
独自上来、独自下。

全宋词 无名氏

捣练子 春恨

云鬓乱 晚妆残。带恨眉儿远岫攒。斜托
香腮春笋懒 为谁和泪倚阑干。

长相思

花满枝。柳满枝。眼底春光似旧时。燕
归人未归。

泪沾衣。酒沾衣。烦恼长多欢事稀。此
情风月知。

乌夜啼

都无一点残红。夜来风。底事东君归去、
太匆匆。

桃花醉。梨花泪。总成空。断送一年春
在、绿阴中。

又

一弯月挂危楼。似藏钩。醉里不知黄叶、
报新秋。

征鸿断。归云乱。远峰愁。愁见绿杨凝
恨、在江头。

捣练子

林下路 水边亭。凉吹水面散余醒。小藤

全宋词 无名氏

床、随意横。

暗记得、旧时经。翠荷闹雨做秋声。恁时节、不怕听。

生查子 闺情

闲倚曲屏风，试写相思字。不道极多情，却是浑无思。

笑近短墙阴，抛个青梅子。苔上印钩弯，邂逅难忘此。

贺圣朝影 冬

雪满长安酒价高。度寒宵。身轻不要鹔鹕袍。醉红娇。

花月暗成离别恨，梦无繆。起来春信惹梅梢。又魂消。

莫思归

花满名园酒满觞。且开笑口对秣芳。秋千风暖鸾钗颤，绮陌春深翠袖香。莫惜黄金贵，日日须教赏酒尝。

点绛唇

蹴罢秋千，起来慵整纤纤手。露浓花瘦。薄汗轻衣透。

见客入来，袜划金钗溜。和羞走。倚门回

全宋词 无名氏

首。却把青梅嗅。

减字木兰花

春融酒困。一寸横波千里恨。著处芳菲。
蝶与莺情醉自迷。

敲云妥翠。冷落金屏山十二。低抱琵琶。
月向黄昏日又斜。

菩萨蛮 讽词

昔年曾伴花前醉。今年空洒花前泪。花
有再荣时。人无重见期。

故人情义重。不忍营新宠。日月有盈亏。
妾心无改移。

谒金门

山无数。遮断故人何处。见说兰舟独系
住。溪边红叶树。

忆著前时欢遇。惹起今番愁绪。怎得西
风吹泪去。阳台为暮雨。

更漏子

解语花 ,断肠草。谙尽风流烦恼。欢会
少 ,别离多。此情无奈何。

帐前灯 ,窗间月。记得那(□)时节。绣被
剩 ,画屏空。如今在梦中。

镜中人

柳烟浓 梅雨润。芳草绵绵离恨。花坞风来几阵。罗袖沾春粉。

独上小楼迷远近。不见浣溪人信。何处笛声飘隐隐。吹断相思引。

眼儿媚

惨云愁雾罩江天。呵手卷帘看。濛茸柳絮 , 万千蝴蝶 , 飞过危栏。

后庭一树瑶华缀 , 零乱暗香残。今番桂影 , 也应寒重 , 不放新弯。

又

忆从溪上得相逢。樽酒两心同。梅缄香雪 , 竹摇寒月 , 柳探春风。而今总是消魂处 , 冷落半床空。梦迷狂蝶 , 喜占乾鹊 , 愁望飞鸿。

又

平生几度怨长亭。不似这番深。霜收水瘦 , 风流帆饱 , 怎忍轻分。

栏干倚遍慵归去 , 独自个黄昏。荷横钗股 , 柳垂裙带 , 总是销魂。

乌夜啼 西湖

水漫汀洲新绿 , 云开崦嶂微青。残红不见成阴后 , 鸚鵡寂无声。

全宋词 无名氏

笑傲坡诗一梦 ,风流杜牧三生。西湖依旧
人中意 ,来去竟难凭。

与团圆

绞绡雾縠 ,没多重数 ,紧拟偷怜。孜孜觑
着 ,算前生、只结得眼因缘。

眼是心媒 ,心为情本 ,里外勾连。天还有
意 ,不违人愿 ,与个团圆。

花前饮

雨余天色渐寒渗。海棠绽、胭脂如锦。告
你休看书 ,共我花前饮。

皓月穿帘未成寝。篆香透、鸳衾双枕。似
恁天色时 ,你道是、好做甚。

转调贺圣朝

渐觉一日 浓如一日 ,不比寻常。若知人、
为伊瘦损 ,成病又何妨。

相思到了 ,不成模样 ,收泪千行。把从前
泪 ,来做水流 ,也流到伊行。

西江月 邮亭壁上词

昨夜轺车宿处 ,乱山深锁邮亭。烟溪霜叶
颤秋声。不管愁人不听。

枕(冷)安排难稳 ,衾寒重叠犹轻。凭谁说

全宋词 无名氏

与那人人。报道衾寒枕冷。

望江南 谕新及第友人

这痴騃，休恁泪涟涟。他是霸陵桥畔柳，
千人攀了到君攀。刚甚别离难。荷上露，莫把
作珠穿。水性本来无定度，这边圆了那边圆。
终是不心坚。

鹧鸪天 车中

紫陌朱轮去似流。丁香初结小银钩。凭
阑试问秦楼路，瞥见纤纤十指柔。金约腕，玉
搔头，尽教人看却佯羞。欲题红叶无流水，别
是桃源一段愁。

又 离别

镇日无心扫黛眉。临行愁见理征衣。樽
前只恐伤郎意，阁泪汪汪不敢垂。停宝马，捧
瑶卮。相斟相劝忍分离。不如饮待奴先醉，图
得不知郎去时。

遍地花 妓行七小石调

元是竹林旧伴侣。去人日、偶相遇。笑卢
仝、狂怪尝茶，问子建、诗成几步。忆去年、乞
巧同欢，把琴弦、细细与说。伤你爱四勾三，生
下五男二女。

红窗迥

富春坊 ,好景致。两岸尽是、歌姬舞妓。
引调得、上界神仙 ,把凡心都起。内有丙丁并
壬癸。这两尊神、为你争些口气。火星道 ,我
待逞些神通 ,不怕你是水。

小重山

络纬声残织翠丝。金风剪不断、雁来时。
梦回緘泪寄征衣。寒到早 ,应怪寄衣迟。

心事有谁知。黄昏常立尽、暗萤飞。秋来
无处不生悲。情脉脉 ,月转辘轳西。

撷芳词

风摇荡 ,雨濛茸。翠条柔弱花头重。春衫
窄。香肌湿。记得年时 ,共伊曾摘。

都如梦。何曾共。可怜孤似钗头凤。关
山隔。晚云碧。燕儿来也 ,又无消息。

拨棹子

烟姿媚 ,冰容薄。芳蕖嫩、隐映新萍池阁。
撷英人去后 ,清香微绽 ,透真珠帘幕。

似无语含情垂彩佩 ,戏芳阴 ,渐许纤鲜相
托。西风直须爱惜 ,看看浓艳 ,伴秋光零落。

香山会

向神前发愿 ,烧香做咒。断了去、娼家吃酒。果子钱早是遭他毒手。更一个、瓶儿渗漏。

才斟两盏三盏 ,早斟不勾。又添和、薄漓半斗。奴哥有我 ,奴哥道有。有我时、当面荡酒。

品令

急雨惊秋晚。今岁较、秋风早。一觞一咏 ,更须莫负、晚风残照。可惜莲花已谢 ,莲房尚小。

汀苹岸草。怎称得、人情好。有些言语 ,也待醉折 ,荷花向道。道与荷花 ,人比去年总老。

御街行

霜风渐紧寒侵被。听孤雁、声嘹唳。一声声送一声悲 ,云淡碧天如水。披衣起。告雁儿略住 ,听我些儿事。

塔儿南畔城儿里。第三个、桥儿外。濒河西岸小红楼 ,门外梧桐凋砌。请教且与 ,低声飞过 ,那里有、人人无寐。

惜寒梅

看尽千花 ,爱寒梅暗与、雪期霜约。 雅态香肌 ,迥有天然淡泊。 五侯园囿恣游乐。 凭阑处、重开绣幕。 秦娥妆罢 ,遥相纵 ,艳过京洛。

天涯再见素萼。 似凝然向人 ,玉容寂寞。 江上飘零 ,怎把芳心付托。 那堪风雨夜来恶。 便减动、一分瘦削。 直须沈醉 ,尤香殢云 ,莫待改落。

古阳关

渭城朝雨 ,一霎裊轻尘。 更洒遍、客舍青青。 弄柔凝、千缕柳色新。 更洒偏 ,客舍青青 ,千缕柳色新。

休烦恼。 劝君更尽一杯酒 ,人生会少。 自古富贵功名有定分。 莫遣容仪瘦损。 休烦恼 ,劝君更尽一杯酒 ,只恐怕、西出阳关 ,旧游如梦 ,眼前无故人。 只恐怕、西出阳关 ,眼前无故人。

永遇乐 寄所思新第者

孤衾不暖 ,静闻银漏 ,敲枕难稳。 细想多情 ,多才多貌 ,总是多愁本。 而今幽会难成 ,佳期顿阻 ,只恁萦方寸。 知他莫是 ,今生共伊 ,此欢无分。

寻思断肠肠断 ,珠泪搵了 ,依前重搵。 终

待临岐 ,分明说与 ,我这厌厌闷。得伊知后 教人成病。万种断也无限。只恐他、恁不分晓 , 谩劳瘦损。

一萼红

断云漏日 ,青阳布 ,渐入融和天气。糝缀天桃 ,金绽垂杨 ,妆点亭台佳致。晓露染、风裁雨晕 ,是牡丹、偏称化工美。向此际会 ,未教一萼 ,红开鲜蕊。

迤邐。渐成春意。放秀色妖艳 ,天真难比。粉惹蝶翅 ,香上蜂须 ,忍把芳心萦碎。争似便 移归深院 ,将绿盖青帟护风日。恁时节 ,占断与、偎红倚翠。

霜叶飞

故宫秋晚余芳尽 ,轻阴闲淡池阁。凤泥银暗玳纹花 ,卷断肠帘幕。渐砌菊、遗金谢却 ,芙蓉才共清霜约。半弄蕊、冰绡波浅 ,拂胭脂、翠琼连并雕萼。

应是曾倚东君 ,纵艳姿轻盈 ,映损丹杏红药。旋成深妒 ,判与西风 ,任从开落。况衰晚、渊明意薄。重阳羞对吟酌。待说与江梅 ,早傅粉匀香 ,慰伊萧索。

檐前铁

悄无人 ,宿雨厌厌 ,空庭乍歇。听檐前、铁

全宋词 无名氏

马戛叮咛 敲破梦魂残结。丁年事 天涯恨 又
早在心头咽。

谁怜我、绮帘前 镇日鞋儿双跌。今番也、
石人应下千行血。拟展青天 写作断肠文 难
尽说。

娇木笏

酒入愁肠 谁信道、都做泪珠儿滴。又怎
知道恁他忆。再相逢、瘦了才信得。

林钟商小品

正天气凄凉 鸣幽砌 向枕畔、偏恼愁心 ,
尽夜苦吟。

又

戴花殢酒 酒泛金樽 花枝满帽。笑歌醉
拍手 戴花殢酒。

鹧鸪天 佳人

全似丹青搵染成。更将何物斗轻盈。雪
因舞态羞频下 云为歌声不忍行。螺髻小 凤
鞋轻。天边斗柄又斜横。水晶庭柱琉璃帐 客
去同谁看月明。

甘露滴乔松

沙堤露近 喜五年相遇 朱颜依旧。尽道

全宋词 无名氏

名世半千 ,公望三九。是今日、富民侯。早生聚、考堂户口。谁欵兼致 ,文章燕许 ,歌辞苏柳。

更饶万卷图书 ,把藤笈芸编 ,遍题青镂。一经传得 ,旧事韦平先后。试袞袞、数英游。问好事、如今能否。曲车正满 ,自酌太和春酒。

满江红

雪共梅花 ,念动是、经年离拆。重会面、玉肌真态 ,一般标格。谁道无情应也妒 ,暗香埋没教谁识。却随风、偷入傍妆台 ,萦帘额。

惊醉眼 ,朱成碧。随冷暖 ,分青白。叹朱弦冻折 ,高山音息。怅望关河无驿使 ,剡溪兴尽成陈迹。见似枝而喜对杨花 ,须相忆。

念奴娇 温州平阳灵峰摩崖词

我蜷兹石 ,嵯峨天然。爰赋斯作 ,与山俱传。

天工谬巧 ,恁平地、推出峻嶒岩壁。虎跃龙骧飞凤翥 ,疑道补天余石。洞壑穿云 ,来今往古 ,知是谁开辟。千年兰若 ,林峦隐映金碧。

我兴邱壑尤长 ,謁来此境 ,惯躐登山屐。适意人生随处好 ,何必岷南阳峰。谢傅东山 ,裴公绿野 ,俯仰俱陈迹。何如轻举 ,廓寥云外横笛。

醉落魄

红牙板歇。韶声断、六么初彻。小槽酒滴

全宋词 无名氏

真珠竭。紫玉瓿圆，浅浪泛春雪。香芽嫩蕊清
心骨。醉中襟量与天阔。夜阑似觉归仙阙。
走马章台，踏碎满街月。

满江红

浪蕊浮花，当不住、晚风吹了。微雨过，池
塘飞絮，一帘晴昼。寂寂山光春似梦，依依草
色薰如酒。近新来、怕上小红楼，凭阑眺。

心事阻，诗情少。东皇去，良辰杳。想故
园闲趣，水村烟柳。此日鹃声天不管，当年燕
子人何有。叹江南、离别酒初醒，频回首。

西江月 赠画士

三级掀腾波浪，一堂庆会风云。快乘霹雳
化龙门。头角人中有分。

谁状个中佳致，须还笔扫千军。是他画手
亦通神。同向来春奋迅。

又 赠术士

身禀五行正气，此心如鉴光明。不从龟鹤
问年龄。万物有衰有盛。

多谢道人著眼，我于身世常轻。任从性巧
与心灵，此事从来分定。

谒金门 赠歌妓

真个美。水墨观音难比。闻道观音谁不
害。见来须顶礼。

全宋词 无名氏

徐步金莲满地。那更兰心聪慧。一曲清
歌离皓齿。梁尘飞不已。

水龙吟 寿李府尹

邦人前世条缘 福星遇得长庚李。光芒初
照 ,一声霹雳 ,重开天地。试问年来 ,民间安
枕 ,伊谁之赐。有青天白日 ,和风甘雨 ,公如
父、氏如子。

今度虎牌重到 ,感皇恩、欢声千里。袞归
未晚 ,纱笼人物 ,御屏名字。碧嶂长春 ,清江不
尽 ,棠阴堪憩。愿年年把酒 ,庆公初度 ,祝公千
岁。

永遇乐 四首

个个修行 ,人人咽纳 ,谁悟真道。曲径多
岐 ,旁门小法 ,误了人多少。容成岂是 ,神仙究
竟 ,采药谩多炉灶。忽一朝 ,脱却桶底 ,性根坏
倒。

争如内观 ,无为清净 ,学取本来庄老。匹
配阴阳 ,抽添铅汞 ,八卦为端表。人生如梦 ,流
年似箭 ,回首也须闻早。贪迷恋 ,春花秋月 ,何
时是了。

又

万法由心 ,应观法界 ,一切心造。老子瞿
昙 ,同归去揆 ,不离心是道。自从识得 ,坎离交
济 ,炼药粗知昏晓。云腾雨飞 ,蟾宫兔走 ,丹阙
更无烦恼。

气中真液 ,液中真气 ,和合不多不少。种
出黄芽 ,炼成赤水 ,龙虎交围绕。七返九还 ,工
夫到后 ,还我旧时年少。待三千、功圆行满 ,恁
时是了。

又

学道修心 ,存神炼性 ,直要轻举。补脑还
精 ,流水不腐 ,户枢终不蠹。日魂月魄 ,转归炉
鼎 ,真炁自然流聚。把心猿缚住 ,意马追回 ,迥
无尘虑。

定中明有 ,阳龙阴火 ,水火透时为度。八
段奇文 ,千口活法 ,向上有一路。吕公高尚 ,未
离人世 ,有分也须相遇。约十洲三岛 ,骖鸾跨
鹤 ,大家同去。

又

养水养精 ,养神养血 ,先须养气。日月阴
阳 ,六爻八卦 ,细看参同契。灵躯灵宝 ,千言万
语 ,不过坎离两字。向昆仑顶上 ,返本還元 ,要
明终始。

一身虽小 ,如同天地 ,八万四千余里。玄
牝之门 ,生生万化 ,都在冲和内。此真真外 ,别
无真谛 ,方信道一而已。异时见钟吕 ,如有未
明 ,请师指示。

渔家傲 四首

至道不遥只在迩。毫厘差失如千里。道
是难来元却易。如相契。一超直入如来地。

水火交时为既济。三尸六贼都回避。只
此长生仍久视。身口意。化成一点冲和气。

又

神是性兮气是命。神不外驰气自定。幸有崔公入药镜。如究竟。全真固蒂归根静。

主客内明方外应。灵台粲发天光莹。两个壶中一片景。急修省。莫待临渴去掘井。

又

精养灵根神守气。天然子母何曾离。昼夜六时长在意。三田内。温温天地中和水。

十二楼前白雪腻。九宫台畔黄芽遂。日月山头朝上帝。神光起。腾身直出烟霄外。

又

我有光珠无买价。光明常照芝田下。更没之乎并者也。知音寡。世间谁是能行者。

一万精光浑守舍。四百四病都齐罢。透出火龙归造化。回仙驾。更无一点尘随马。

促拍满路花 三首

抱元能守一 ,四大自轻安。心中须返照 ,几曾闲。金乌衔耀 ,飞入烂银盘。心心心是道 ,只在心心 ,更于何处求仙。

又何须衣冕 ,燕处欲超然。荣华能几日 ,便凋残。修真甚易 ,积行累功难。劝君强为善 ,五浊三途 ,便为云岛神山。

又

人能常清静 ,天地悉皆归。一真含众妙 ,入希夷。昭文不会 ,气候有成亏。妄心寂灭

尽 困睡饥餐 ,更无作用施为。

自然 炉鼎就 ,光彩透帘帏。玉池神水涌 ,
上生肥。如人饮水 ,冷暖自家知。自家性命
事 ,自家了得 ,自家性命便宜。

又

若论修养事 ,知有几多门。谛当归宿处 ,
是灵根。至真至道 ,简易合乾坤。坎离并水
火 ,止是筌蹄 粹然一点长存。

个中如荐得 ,悟了五千言。

金晶飞肘后 ,透昆仑。清江九曲 ,一棹破
烟昏。水击三千里 ,九万鹏程 ,化成元是冥鲲。

沁园春

一粒金丹 ,大如黍米 ,定中降胎。运阴阳
根本 ,东龙西虎 ,结凝金水 ,择地深栽。九载无
亏 ,三田功满 ,卦气周圆炉鼎开。偷元化 ,用自
然宗祖 ,全在灵台。

真才。休恋尘埃。况颖悟明堂 婴未孩。
幸淮滨相遇 ,灵丹付了 ,亲留玄旨 ,期进仙阶。
此去何时 ,水云高会 ,更上烟霞岐路哉。人间
世 ,任王侯贵显 ,同委蒿莱。

明马嘉松《花镜隼声》所附《花镜韵语》、李
廷机评《草堂诗余评林》、清孙致弥《词鹄初编》
等载有宋无名氏词断句或全篇 ,其未见于他书
者 ,汇录于左 :

欲知相忆时 ,但看裙带余几许。

桃脸自羞心自爱。微酣后 ,记取夜来题
目。

门掩映 人寂静 风弄一枝花影。
风袅篆烟不卷帘 雨打梨花深闭门。
恹恹两泪流 界破残妆面。

嘹嘹唳唳雁南还。

金炉香烬漏声残。

影转西楼十二层。

情绪厌厌。

微蟾残照挂墙头。

金猊宝篆香馥郁。

掌握貔貅十万兵。

广寒宫未闭 独折一枝芳。

数声啼鸟不堪闻。

一溪流水绿湾环。

琼瑶堆满径。

溶泄冰渐逐水流。

衣薄不禁寒。

三竿日上醉初醒。

徘徊无语倚南楼。目送归鸿泪转流。罗带缓 倩谁收。

人情惟有相思切 乍去还来无尽头。争似水 只东流。

轻暖吹香 薰风涨绿 此窗添得琅玕玉。
新粉微含 翠浪明如玉。

珠泪偷弹 纤腰减束 天涯劳我危楼目。
燕子无情 斜语阑干曲。此外另有有撰人姓名之断句：

王安石词 露金靛、篱边笑。

张舜民调笑令 日永帘垂春色妙。

周濂溪(敦颐)词 涟漪新绿小池塘。

顾恺词 渐醉入佳境。

全宋词 无名氏

《草堂诗余评林》注不一定可信，而《词鹄》所载亦未知所本（“碧玉箫”一首亦见《历代诗余》卷十九，不知何代人作）。周敦颐词未必为其所作，顾恺亦未知其人，似是晋人顾恺之语，内中可疑者甚多。

鹧鸪天

抛却功名弃却诗。从教身染气毬泥。侵晨打鞞齐云会。际暮演筹落魄归。园苑里，粉墙西。佳人偷揭绣帘窥。高侵云汉垂肩久，低拂花梢下脚迟。

西江月

健体安身可美，喜笑化食堪夸。更言一事实为佳。肥痴瘦癆都罢。

兼且时光似箭，更加景色难赊。名园等处乐奢华。一任佳人玩耍。

鹧鸪天

不贪名利乐优游。收转心猿踢气球。日享三餐朋友饭，夜眠一宿玉人楼。真快活，度春秋。从它乌兔走无休。或时戏耍名园里，或把长竿湖上游。

西江月

蹴鞠场中年少，秋千架上佳人。三三两两

全宋词 无名氏

趁芳辰。玩赏风光美景。

日暖风和明媚 ,更加花草香馨。红颜移步
出闺门。偷揭绣帘相认。

鹧鸪天

虎掌葵花一锭银。全凭巧匠弄精神。里
外跨知高下 ,遍拐挑尖月一轮。欺强汉 ,灭
村人。其间奥妙岂堪论。不问贵戚并公子。
曾与区区并马行。

又

巧匠园缝异样花。身轻体健实堪夸。能
令公子精神爽 ,善诱王孙礼义加。宜富贵 ,逞
奢华。一团和气遍天涯。宋祖昔日皆曾习 ,占
断风流第一家。

西江月

请知诸郡子弟 ,尽是湖海高朋。今年神首
赛齐云。别是一般风韵。

来时向前参圣 ,然后疏上挥名。香金留下
仿花人 ,必定气球取胜。

鹧鸪天

轩辕起置号齐云。社祖西川妙道君。
□□亲自裁成就 ,万古流传作玩珍。江湖客 ,
听原因。今朝出岳见其真。来到圣前必撞案 ,
诚将实艺向前呈。

全宋词 无名氏

苏幕遮

水中金 冲牛斗。玉锁金关 护法灵童守。
赤水丹台龙虎走。万象森罗 勃勃投珠口。

饮灵源 明火候。太乙炉开 丹熟神光透。
浮名浮利终不久。下手速修。穷取无中有。

无名氏

柘枝行

将军奉命即须行。塞外领强兵。闻道烽
烟动，腰间宝剑匣中鸣。

无名氏

点绛唇

美满生离 ,据鞍兀兀离肠痛。旧欢新宠。
变作高唐梦。

回首孤城 ,依约青山拥。西风送。戍楼寒
重。初品梅花弄。

无名氏

步蟾宫

徐卿二子文章妙。秋风来应兴贤诏。双双折取桂枝归，乡闾自此增荣耀。浪暖三月春来绕。翻身并跳龙门晓。绿衣共立彩莱衣，那更是、双亲年少。

临江仙

入手功名如拾芥，文章得力须知。蟾宫丹桂折高枝。姮娥爱年少，博换绿罗衣。
初筮民曹姑小试，駸駸相及瓜时。双亲未老十年期。飞黄腾踏去，身到凤凰池。

昼夜乐

西川自古繁华地。正芳菲、景明媚。园林锦绣妆成，杂遝香车宝骑。弦管声中，绮罗丛里，盈盈多少佳丽。才子逞疏狂，不惜千金醉。
彼此相看总留意，浮云浪雨尤殢。羨甚楚馆秦楼，长是偎红倚翠。濯锦江头，恶风翻雨，无情落花流水，谁念凤帏人，闲却鸳鸯被。

鹧鸪天

淡画眉儿斜插梳。不忺拈弄绣工夫。云窗雾阁深深处，静拂云笺学草书。多艳丽，更清姝。神仙标格世间无。当时只说梅花似，细看梅花却不如。

南乡子

怎见一僧人。犯滥铺摸受典刑。案款已成招状了，遭刑。棒杀髡囚示万民。

沿路众人听。犹念高王观世音。护法喜神齐合掌，低声。果谓金刚不坏身。

眼儿媚

登楼凝望酒阑□。与客论征途。饶君看尽，名山胜景，难比西湖。

春晴夏雨秋霜后，冬雪□□□。一派湖光，四边山色，天下应无。

缕缕金

几回见你帘儿下。佯不采、把人斜抹。问着他、插地推聋哑。到学三郎改话。不也。不和我巧时休，和我巧时、都不怕。

又

这几日、言语夹袄。只推道、娘的扭把。

全宋词 无名氏

常言道、官不容针 ,又何况、私同车马。不也。
不和我巧时休 和我巧时、都不怕。

卜算子

幽花带露红 ,湿柳拖烟翠。花柳分春各自
芳 ,惟有人憔悴。

寄与手中书 ,问肯归来未。正是东风料峭
寒 ,如何独自教人睡。

水调歌头

屏开金孔雀 ,褥隐绣芙蓉。洞房花烛夜 ,
玳筵席、蔼香风。盈耳笙歌缭绕 ,满眼绮罗交
错 ,银烛影摇红。佳期今夕里 ,谈笑画堂中。

皓齿歌 细腰舞 ,乐无穷。朱帘高卷 ,金炉
香喷瑞烟浓。仙子将临凤阁 ,玉女下离蓬岛 ,
同会蕊珠宫。门阑多喜色 ,女婿近乘龙。

朝中措

凤凰归去碧云空。衰草乱茸茸。三国六
朝一梦 ,茫茫二水倾东。

龙蟠虎踞 ,亭台望里 ,鸳瓦重重。玉女吹
箫何在 ,断肠泪洒西风。

叠青钱 作垒

夏日正长 ,无奈如焚天气。火云耸、奇峰

天外。未雨先雷。畏日流金 ,六龙高驾火轮
飞。纹簟纱厨 ,风车谩搅 ,月扇空挥。

金炉烟细。午风轻转 ,堪避炎威。渐凉生
池阁 ,卷起帘幕珠玑。娇娥美丽。天然秀色冰
肌。玉栏深径 ,荷香旖旎。玉筦声齐。

鹧鸪天

城中酒楼高入天。烹龙煮凤味肥鲜。公
孙下马闻香醉 ,一饮不惜费万钱。招贵客 ,引
高贤。楼上笙歌列管弦。百般美术珍羞味 ,四
面阑干彩画檐。

忆瑶姬

姑射真人 ,宴紫府、双成击破琼苞。零珠
碎玉 ,被蕊宫仙子 ,撒向空抛。乾坤皓彩中宵。
海月流光色共交。向晓来 ,银压琅玕 ,数枝斜
坠玉鞭梢。

荆山隈 ,碧水曲 ,际晚飞禽 ,冒寒归去无
巢。檐前为爱成簪箸 ,不许儿童使杖敲。待效
他、当日袁安谢女 ,才调咏嘲。

夜游宫

四百四病人皆有。只有相思难受。不疼
不痛在心头 ,魑魅地教人瘦。

愁逢花前月下 ,最怕黄昏时候 ,心头一阵
痒将来 ,一两声咳嗽咳嗽。

临江仙

快活无过庄家好 ,竹篱茅舍清幽。春耕夏
种及秋收。冬间观瑞雪 ,醉倒被蒙头。

门外多栽榆柳树 ,杨花落满溪头。绝无闲
闷与闲愁。笑他名利客 ,役役市廛游。

西江月

是水归于大海 ,闲汉总入京都。三都捉事
马司徒。衫袴难为作主。

盗了亲王玉带 ,剪除大尹金鱼。要知闲汉
姓名无。小月旁边疋土。

又

白发苏堤老妪 ,不知生长何年。相随宝驾
共南迁 ,往事能言旧汴。

前度君王游幸 ,一时询旧凄然。鱼羹妙制
味犹鲜。双手擎来奉献。

临江仙

自古钱塘难比。看潮人、成群作队。不待
中秋 相随相趁 ,尽往江边游戏。沙滩畔 ,远望
潮头 ,不觉侵天浪起。

头巾如洗。斗把衣裳去挤。下浦桥边 ,一
似奈何桥畔 ,裸体披头如鬼。入城里 ,烘好衣
裳 ,犹问几时起水。

行香子

雨后风微。绿暗红稀。燕巢成、蝶绕残枝。杨花点点，永日迟迟。动离怀，牵别恨，鹧鸪啼。

辜负佳期。虚度芳时。为甚褪尽罗衣。宿香亭下，红芍栏西。当时情，今日恨，有谁知。

鹧鸪天 泪

碎似真珠颗颗停。清如秋露脸边倾。洒时点画湘江竹，感处曾摧数里城。思薄倖，忆多情。玉纤弹处暗销魂。有时看了鲛绡上，无限新痕压旧痕。

西江月

年少争夸风月，场中波浪偏多。有钱无貌意难和。有貌无钱不可。

就是有钱有貌，还须著意揣摩。知情识趣俏哥哥。此道谁人赛我。

上楼春

名花绰约东风里。占断韶华都在此。芳心一片可人怜，春色三分愁雨洗。玉人尽日恹恹地。猛被笙歌惊破睡。起临妆镜似娇羞，近

全宋词 无名氏

日伤春输与你。

鹧鸪天

凛冽严凝雾气昏。空中瑞雪降纷纷。须
臾四野难分别,顷刻山河不见痕。银世界,玉
乾坤。望中隐隐接昆仑。若还下到三更后,直
要填平玉帝门。

无名氏宋媛

踏莎行

玉臂宽环 ,纱衫缓扣。绣窗针线无心久。
豹头枕冷麝兰轻。虾须帘静尘埃厚。

紫燕风头 ,黄梅雨后。柳条乱拂长江口。
但言幂幂柳如烟 ,谁知摇曳愁如柳。

又

红叶空传 ,朱绳未绾。天涯可见人难见。
绿窗病起落梅繁。玉箫梦断行云短。

波眼将穿 ,柳腰似划。寂寥偏与东风管。
水仙愁绝翠围寒 ,春云空谷兰香远。

又

香罢宵薰 ,花孤昼赏。粉墙一丈愁千丈。
多情春梦苦抛人 ,寻郎夜夜离罗幌。

好句刊心 ,佳期束想。甫愁春到还愁往。
销魂细柳一时垂 ,断肠芳草连天长。

又

佳约易乖 ,韶光难驻。柳絮飞尽江头树。
朝来为甚不钩帘 ,残花正满帘前路。

春赏未阑 ,春归何遽。问春归向何方去。

全宋词 无名氏宋媛

有情燕子不同归 ,呢喃独伴春愁住。

蝶恋花

梳罢晓妆屏上倚。欲把金针 ,玉腕娇无比。轻卷珠帘窥竹里。翠禽飞下栏杆嘴。
步向荷缸闲弄水。荷叶田田 ,觉有清香起。照面水中心自喜。芙蓉四月先开矣。

全宋词 无闻翁

无闻翁

沁园春 题樟镇清江桥

埋冤姐姐 ,衔恨婆婆。

吴编修

贺新凉 自寿

出处男儿事。甚从前、说著渊明，放高头地。点检柴桑无剩粟，未肯低头为米。算此事、非难非易。三十年间如昨日，秀才瞞、撰到专城贵。饱共暖，已不翅。

旁人问我归耶未。数痴年、平头六十，更须三岁。把似如今高一著，更好闻鸡禁市。总不似、长伸脚睡。六月荷风芡州路，北螺山、别是般滋味。今不去，视江水。

八声甘州 吴编修解任

系酒船、夜入古江楼，浑莫辨西东。叹从前眼底，一丁不识，四海曾空。老去休休莫莫，谁识旧元龙。尚解被襟去，赋大王雄。

回首演仙高处，问赤松无恙，舍子何从。便不然学稼，犹有相牛翁。小婆娑、东家故舍，也著依、四下二之中。芡州外，溪风山月，鸥鹭盟同。

摸鱼儿 又

予何人、此何时节，驾言我欲行志。青原煮豆然萁后，谁豢龙蛇赤子。心为碎。宽底是、翻疑又怕严底是。吾方左计。冷眼别人看，畏首畏尾，身复尚余几。

陶元亮，自古真奇男子。督邮尚若人耳。秋风一曲柴桑路，新秫炊香正美。黄鹄起。见说道、山光潭影皆欢喜。晴窗静倚。还我向来高，仙人羽客，别有一天地。

吴城小龙女

清平乐令

原无调名 据唐宋诸贤绝妙词选卷十补

帘卷曲栏独倚。江展暮天无际。泪眼不曾晴。家在吴头楚尾。

数点雪花乱委。扑漉沙鸥惊起。诗句欲成时。没入苍烟丛里。

吴大有

点绛唇 送李琴泉

江上旗亭，送君还是逢君处。酒阑呼渡。
云压沙鸥暮。

漠漠萧萧，香冻梨花雨。添愁绪。断肠
柔橹。相逐寒潮去。

吴德远

失调名

过平康巷陌绮罗丛。赢得佳人 ,妙舞艳
歌 ,争劝金钟。

吴芾

水调歌头 寿徐大参九月二十六

九月二十六,公相纪生辰。橙黄橘绿时候、天气暖于春。奎画有堂辉焕,中著台星一点,长伴寿星明。衮衮有家庆,未羡古徐卿。

谢元枢,营绿野,避洪名。六年裁判国事、曾费几精神。歇了傅岩霖雨,闲了孤舟野渡,旒冕合知心。吾道苟尊尚,元不在蒲轮。

吴 感

折红梅 梅花馆小鬟

喜冰澌初泮，微和渐入、东郊时节。春消息，夜来顿觉，红梅数枝争发。玉溪仙馆，不是个、寻常标格。化工别与、一种风情，似匀点胭脂，染成香雪。

重吟细阅。比繁杏夭桃，品格真别。只愁共、彩云易散，冷落谢池风月。凭谁向说。三弄处、龙吟休咽。大家留取，时倚阑干，闻有花堪折，劝君须折。

吴季子

醉蓬莱 寿友人母

正淡烟疏雨，梅子黄时，清和天气。阿母当年，暂辍瑶池会。霞帔星冠，霓旌羽纛，下碧霄云际。恰与瞿昙，同时共日，降人间世。

褫寝开祥，斑衣祝寿，一种灵椿，两枝仙桂。满引玻璃，且向今宵醉。待看阶庭，蓝袍交映，奉板舆游戏。到得蟠桃，熟时归去，已三千岁。

念奴娇 寿朋友

雪罗初试，过赐衣时节，才三四日。记得延陵公子宅，麟角当年新绂。半刺名家，一经奥学，是青云人物。如何华发，蒲轮未聘遗逸。

问讯怨鹤惊猿，不妨俱隐，且逍遥丈室。有子传家经可教，况有东皋种秫。醉里乾坤，闲中日月，便是长生术。瑶池宴后，剩看几度桃实。

吴 景 伯

沁园春 登凤凰台

再上高台，访谪仙兮，仙何所之。但石城西踞，潮平白鹭，浮图南峙，云淡乌衣。凤鸟不来，长安何处，惟有碧梧三数枝。兴亡事，对江山休说，谁是谁非。

庭花飘尽胭脂。算结绮、繁华能几时。问何人重向，新亭挥泪，何人更到，别墅围棋。笑拍阑干，功名未了，宁肯绿蓑寻钓矶。深深饮，任玉山醉倒，明月扶归。

吴儆

念奴娇 寿程致政

凉生秋早 ,正梧桐院落 ,风清月白。帘卷
香凝人笑喜 ,应是瀛洲仙谪。云绕画梁 ,花明
彩服 ,中有人华发。恩袍蓝绿 ,高年况已逾百。

最是有子宜家 ,兰阶方竞 ,珠履延佳客。
好唤凌波来洛浦 ,醉促霓裳仙拍。玉井开莲 ,
金茎承露 ,莫惜金尊侧。试占弧兆 ,祥光已映
南极。

蓦山溪 效樵歌体

清晨早起 ,小阁遥山翠。颡面整冠巾 ,问
寝罢、安排菽水。随家丰俭 ,不羨五侯鯖 ,软煮
肉 ,熟炊粳 ,适意为甘旨。

中庭散步 ,一盞云涛细。迤邐竹洲中 ,坐
息与、行歌随意。逡巡酒熟 ,呼唤社中人 ,花下
石 ,水边亭 ,醉便颓然睡。

满庭芳 寄叶蔚宗

宿雨滋兰 ,轻风飏柳 ,新来随处和融。幽

兰曲径 ,花气巧相通。燕子才飞又语 ,带芹泥、
时点芳丛。微中酒 ,日长睡起 ,心事在眉峰。

年年 ,春好处 ,联镳荡桨 ,拾翠挈红。任金
貂醉脱 ,不放杯空。谁信风流一别 ,当时事、已
逐飞鸿。云檣山晚 ,阑干罢倚 ,烟寺起疏钟。

又 用前韵并寄

水满池塘 ,莺啼杨柳 ,燕忙知为泥融。桃
花流水 ,竹外小桥通。又是一春憔悴 ,摘残英、
绕遍芳丛 ,长安远 ,平芜尽处 ,叠叠但云峰。

西湖 ,行乐处 ,牙樯漾鹢 ,锦帐翻红。想年
时桃李 ,应已成空。欲写相思寄与 ,云天阔、难
觅征鸿。空凝想 ,时时残梦 ,依约上阳钟。

虞美人 送兄益章赴会试

银屏一夜金风细。便作中秋意。碧天如
水月如眉。已有征鸿摩月、向南飞。金尊满酌
蟾宫客。莫促阳关拍。须知丹桂擅秋天。千里婵娟指日、十分圆。

又 七夕

飞桥驾鹊天津阔。云驭看看发。相思惟
恨不相逢。及至相逢还是、去匆匆。垂丝插竹
真堪笑。欲乞天孙巧。天孙多巧漫多愁。巧
得千般争解、劝郎留。

又

双眸翦水团香雪。云际看新月。生绡笼
粉倚窗纱。全似瑶池疏影、浸梅花。金翘翠靥
双蛾浅。敛袂低歌扇。羞红腻脸语声低。想

见流苏帐掩、烛明时。

西江月

竹里全无暑气，溪边长有清风。荷花落日照酣红。雨过遥山翠重。

老作宫祠散汉，本来田舍村翁。腰缠三万禄千钟。也是一场春梦。

浣溪沙 题星洲寺

十里青山溯碧流。夕阳沙晚片帆收。重重烟树出层楼。

人去人来芳草渡，鸥飞鸥没白苹洲。碧梧翠竹记曾游。

又 次范石湖韵

歙浦钱塘一水通。闲云如幕碧重重。吴山应在碧云东。

无力海棠风淡漾，困眠宫柳日葱茏。眼前春色为谁浓。

又 题余干传舍

画楯朱栏绕碧山。平湖徙倚水云宽。人家杨柳带汀湾。

目力已随飞鸟尽，机心还逐白鸥闲。萧萧微雨晚来寒。

又 登镇远楼

寒日孤城特地红。瘦藤扶我上西风。一川平远画图中。

江海一身真客燕，云天万里看归鸿。吴山
应在白云东。

又 竹洲七夕

秋到郊原日夜凉。黍禾高下已垂黄。荷
花犹有晚来香。

天上佳期称七夕，人间好景是秋光。竹洲
有月可徜徉。

又

风入枯藜衣袂凉。江枫园柳半青黄。洗
车飞雨带天香。

世事一场真大梦，宦情都薄似秋光。竹洲
有酒可徜徉。

又 和前镇远楼韵

斜阳波底湿微红。朱栏翠袖倚轻风。平
平山色有无中。

俯首微官真自缚，高飞远举羨冥鸿。何时
一艇大江东。

又 咏梅

茅舍疏篱出素英。临风照水眩精神。娟
娟新月又黄昏。

削约寒枝香未透，细看频嗅独消魂。为谁
消瘦不禁春。

减字木兰花 中秋独与静之饮

碧梧秋老。满地琅玕纷不扫。门掩黄昏。
惟有年时月照人。

凄凉满眼。肯作六年灯火伴。莫说凄凉。
来岁如今天一方。

又 朱子渊见和 次韵为谢

思君欲老。一榻尘生谁与扫。禄仰晨昏。
同是迟迟去鲁人。

行当洗眼。看子青藜来夜伴。莫变炎凉、
斩马还须请上方。

又

少陵未老。曾把千人军独扫。发白眇昏。
却作天涯流落人。

只堪合眼。夜直谁能潜入伴。斗酒西凉。
何似卑栖且远方。

又

此身已老。三径都荒长却扫。面目尘昏。
怕著朝章揖贵人。

难瞒明眼。只有青山堪作伴。触事心凉。
无病何劳更觅方。

念奴娇 寿陈尚书母夫人

东风着急 ,正群芳未放 ,蟠桃初缀。王母
当年亲手种 ,来作人间上瑞。婺女星躔 ,金华
福地 ,聊驻千千岁。恰才八十 ,百分未及一二。

况是间生英贤 ,名高日月 ,未说文昌贵。
今日凝香称寿 ,来岁袞衣当发。黄贴天香 ,
太白珍膳 ,押赐传中旨。戏拈金果 ,嫦娥应是
争取。

又 寿吴宰

延州积庆,到如今千载,芳传遗绪。世袭簪纓来旧治,依约棠阴如故。百里休声,三年遗爱,若迹高今古。邑人尽道,郎君福过渠父。

州县岂久徒劳,汉家密令,须作三公去。今入花城称寿处,他日荣归禁路。黄贴天有,上尊名酒,押赐传天语。朱颜绿鬓,腰黄袖蹙金缕。

又

相逢恨晚,人谁道、早有轻离轻折。不是无情,都只为、离合因缘难测。秋去云鸿,春深花絮,风雨随南北。絮飞鸿散,问谁解、留得得。

君自举远高飞,知他此去、萍梗何时息。雅阁幽窗欢笑处,回首翻成陈迹。小楷缄题,细行针线,一一重收拾。风花雪月,此生长是思忆。

西江月

山色不随春老,竹枝长向人新。桃蹊李径已成阴。深院莺啼人静。

尘世白驹过隙,人情苍狗浮云。不须计较谩劳神。且恁随缘任运。

浣溪沙 春题别墅

暖日和风并马蹄。畦秧陇麦绿新齐。人家桑柘午阴迷。

山色解随春意运 ,残阳还傍远山低。晚风
归路杜鹃啼。

又 和前次范石湖韵

帘额风微紫燕通。楼头柳暗碧云重。玉
人争劝玉西东。

醉拥雕鞍金蹀躞 ,夜归花院玉葱茏。归心
何事与山浓。

又 代作

已是青春欲暮天。酒愁离恨不禁添。尊
前休说见郎难。

别后要知还有意 ,生前莫道便无缘。雁来
频寄小蛮笺。

又 戏陈子长

汗褪香红雪莹肌。装余静丽雾裁衣。晚
凉新浴倚栏时。

帘卷轻风斜蚕发 ,林深新月堕蛾眉。此时
风味许谁知。

朝中措 代宋仲温上德操

文章声价擅南州。人物更风流。岂久徒
劳州县 ,看看催上瀛洲。

朱颜绿鬓 ,画堂标王宝带垂繆。睡起八砖
影转 ,归来双烛光浮。

吴 琚

念奴娇 题浮玉石簾山

我来浮玉，似凭陵沧海，蹑金鳌背。又若骑鲸游汗漫，飞入八荒之外。钟鼓传声，楼台倒影，不类人间世。徘徊吟眺，恨无陶谢酬对。

今古潮落潮生，问英雄多少，与江俱逝。直欲乘风归阆苑，疑是三生习气。未辨鱼蓑，先盟鸥鹭，奈卜邻无地。从今清夜，梦魂应绕空翠。

柳梢青 元月立春

彩仗鞭春。鹅毛飞管，斗柄回寅。拂面东风，虽然料峭，毕竟寒轻。

戴花折柳心情。怎捱得、元宵放灯。不是今朝，有些残雪，先去踏青。

浪淘沙

云叶弄轻阴。屋角鸠鸣。青梅著子欲生仁。冷落江天寒食雨，花事关情。

池馆昼盈盈。人醉寒轻。一川芳草只销凝。时有入帘新燕子，明日清明。

又

岸柳可藏鸦。路转溪斜。忘机鸥鹭立汀沙。咫尺钟山迷望眼，一半云遮。

临水整乌纱。两鬓苍华。故乡心事在天涯。几日不来春便老，开尽桃花。

水龙吟

紫皇高宴萧台，双成戏击琼包碎。何人为把，银河水翦，甲兵都洗。玉样乾坤，八荒同色，了无尘翳。喜冰销太液，暖融鸕鹚，端门晓、班初退。

圣主忧民深意。转鸿钧、满天和气。太平有象，三宫二圣，万年千岁。双玉杯深，五云楼迥，不妨频醉。细看来、不是飞花，片片是、丰年瑞。

酹江月

玉虹遥挂，望青山隐隐，一眉如抹。忽觉天风吹海立，好似春霆初发。白马凌空，琼鳌驾水，日夜朝天阙。飞龙舞凤，郁葱环拱吴越。

此景天下应无，东南形胜，伟观真奇绝。好是吴儿飞彩帜，蹴起一江秋雪。黄屋天临，水犀云拥，看击中流楫。晚来波静，海门飞上明月。

吴 康

失调名

试问海棠健否，海棠虽似，减清香。

又

凌空蜂翼递香来，惊破蜜房幽梦。

吴礼之

浣溪纱 橄榄

南国风流是故乡。红盐落子不因霜。于中小底最珍藏。

荐酒荐茶些子涩，透心透顶十分香。可人回味越思量。

喜迁莺 闰元宵

银蟾光彩。喜稔岁闰正，元宵还再。乐事难并，佳时罕遇，依旧试灯何碍。花市又移星汉，莲炬重芳人海。尽勾引，遍嬉游宝马，香车喧隘。

晴快。天意教、人月更圆，偿足风流债。媚柳烟浓，夭桃红小，景物迥然堪爱。巷陌笑声不断，襟袖馀香仍在。待归也，便相期明日，踏青挑菜。

丑奴儿 秋别

金风颤叶，那更饞别江楼。听凄切、阳关声断，楚馆云收。去也难留。万重烟水一

全宋词 吴礼之

扁舟。锦屏罗幌，多应换得，蓼岸苹洲。

凝想恁时欢笑，伤今萍梗悠悠。谩回首、妖饶何处，眷恋无由。先自悲秋。眼前景物只供愁。寂寥情绪，也恨分浅，也悔风流。

杏花天 春思

闷来凭得栏干暖。自手引、朱帘高卷。
桃花半露胭脂面。芳草如茵乍展。

烟光散、湖光潋滟。映绿柳、黄鹂巧啭。
遥山好似宫眉浅。人比遥山更远。

雨中花

眷浓恩重，长离永别，凭谁为返香魂。
忆湘裙霞袖，杏脸樱唇。眉扫春山淡淡，眼裁秋水盈盈。便如何忘得，温柔情态，恬静天真。

凭栏念及，夕阳西下，暮烟四起江村。
渐入夜、疏星映柳，新月笼云。酝造一生清瘦，能消几个黄昏。断肠时候，帘垂深院，人掩重门。

瑞鹤仙 秋思

风传秋信至。颤叶叶庭梧，飘零阶砌。
年华迅流水。况荣枯翻手，存亡弹指。谁编故纸。论古往、英雄斗智。在当时、唤做功名，到此尽成闲气。

全宋词 吴礼之

何谓。生为行客，死乃归人，世同驿邸。
十步九计。空捞攘，谩儿戏。忍都将、有限
光阴萦绊。趁逐无穷天地。我直须、跳出樊
笼，做个俏底。

蓦山溪 感旧

刘郎老矣，倦入繁华地。触目愈伤情，
念陈迹、人非物是。共谁携手，落日步江村，
临远水，对遥山，闲看烟云起。

买牛卖剑，便作儿孙计。朋旧自荣华，
也怜我、无名无利。箠瓢钟鼎，等是百年身，
空妄作，枉迂回，贪爱从今止。

风入松 江景

苹汀蓼岸荻花洲。占断清秋。五湖景物
供心眼，几曾有，一点闲愁。梦里翩翩胡蝶，
觉来叶叶渔舟。

谢郎随分总优游。信任沈浮。恬然云水
无贪吝，笑腰缠、骑鹤扬州。只恐丹青妙笔，
写传难尽风流。

渔家傲 闺思

红日三竿莺百啭。梦回鸳枕离魂乱。料
得玉人肠已断。眉峰敛。晓妆镜里春愁满。

绿琐窗深难见面。云笺谩写教谁传。闻
道笙歌归小院。梁尘颤。多因唱我新词劝。

蝶恋花 春思

睡思厌厌莺唤起。帘卷东风，犹未忺梳洗。眼细眉长云拥髻。笑垂罗袖熏沈水。媚态盈盈闲举止。只有江梅，清韵能相比。诗酒琴棋歌舞地。又还同醉春风里。

又 别恨

急水浮萍风里絮。恰似人情，恩爱无凭据。去便不来来便去。到头毕竟成轻负。帘卷春山朝又暮。莺燕空忙，不念花无主。心事万千谁与诉。断云零雨知何处。

又 春思

满地落红初过雨。绿树成阴，紫燕风前舞。烟草低迷萦小路。昼长人静扃朱户。沈水香销新剪苧。敲枕朦胧，花底闻莺语。春梦又还随柳絮。等闲飞过东墙去。

桃源忆故人 春暮

画桥流水飞花舞。柳外斜风细雨。红瘦绿肥春暮。肠断桃源路。欢随仙子乘鸾去。镂月裁云何处。唯有病和愁绪。肯伴刘郎住。

谒金门 春晚

风乍扇。帘外落红千片。飞尽落花春不

全宋词 吴礼之

管。斗忙莺与燕。

往事上心撩乱。睡起日高犹倦。料得伊家情眷眷。近来长梦见。

霜天晓角 王生陶氏月夜共沈西湖，赋此吊之

连环易缺。难解同心结。痴騃佳人才子，情缘重、怕离别。

意切。人路绝。共沈烟水阔。荡漾香魂何处，长桥月。断桥月。

又 秋景

西风又急。细雨黄花湿。楼枕一篙烟水，兰舟漾、画桥侧。

念昔。空泪滴。故人何处觅。魂断菱歌凄怨，疏帘卷、暮山碧。

生查子 浙江

吴山与越山，相对摩今古。袅缆浙江亭，回首西兴渡。

区区名利人，无分香闺住。匆遽促征鞍，又入临平路。

失调名

我不成、心酸眼软。

好事近 秋日席上

金菊间芙蓉，秋意未为萧索。临水见山庭院。伴玉人杯酌。

携炉终日袅沈烟，氤氲篆文□。可惜被风吹散，把袖儿笼著。

柳梢青 席上

板约红牙。歌翻白雪，杯泛流霞。苏小情多，潘郎年少，欢计生涯。

轩窗临水人家。更门掩、青春杏花。百万呼卢，十千沽酒，不负韶华。

吴 龙 翰

喜迁莺

微雨后，落花天。娇态病恹恹。怕人猜
著是相思，成日不开帘。

宝钗横，蝉鬓乱。院宇待人归尽。缓移
莲步玉阑前。纤手掐花钿。

全宋词 吴蒙庵

吴 蒙 庵

失调名

忽忽早睡。

全宋词 吴敏德

吴 敏 德

失调名

御符争带，更有天师神咒。

吴某

失调名

剪罗幡儿，斜插真珠髻。

南乡子

楼台里、东风淡荡。

又

乍卷珠帘新燕入。

多丽

几声天外归鸿。

渔家傲

鸚鵡一声初报晓。

吴穆仲

醉蓬莱

见处即已，无心即了。

吴 淇

南乡子 寿牟国史 三月二十

十日借春留。芍药荼蘼不解愁。检点笙歌催酿酒，西州。有谪仙人烂熳游。
白鹭自芳洲。咫尺红云最上头。万古沧江波不尽，风流。谁似监州旧姓牟。

吴 千 能

水调歌头

澹氏人安在，缥缈九霄间。我来唯有石屋，周览百寻宽。一曲中分夷险，两牖空光平布，满洞贮清寒。高歌自堪仰，何必论金丹。

周贤士，知此意，薄秦官。一床一枕，依然犹伴白云闲。门外俗尘如海，门里道心如水，谈笑足回澜。此事无今古，不信叩嵒山。

吴 潜

满江红

送李御带琪（按原作“珙”，据《订补续记》改）

红玉阶前，问何事、翩然引去。湖海上、一汀鸥鹭，半帆烟雨。报国无门空自怨，济时有策从谁吐。过垂虹亭下系扁舟，鲈堪煮。

拚一醉，留君住。歌一曲，送君路。遍江南江北，欲归何处。世事悠悠浑未了，年光冉冉今如许。试举头、一笑问青天，天无语。

又 送陈方伯上襄州幕府

露驿星程，又还控、西风征辔。原自有、孔璋书檄，元龙豪气。蜀道尚惊鼙鼓后，神州正在干戈里，佐元戎、一柱稳擎天，襄之水。

功名事，山林计。人易老，时难值。看新丝一发，甚吾衰矣。转首从游十五载，关心契阔三千里。便秋空、边雁落江南，书来未。

又 齐山绣春台

十二年前，曾上到、绣春台顶。双脚健、

不烦筇杖，透岩穿岭。老去渐消狂气习，重来依旧佳风景，想牧之、千载尚神游，空山冷。

山之下，江流永。江之外，淮山暝。望中原何处，虎狼犹梗。句蠹规模非浅近，石符事业真俄顷。问古今、宇宙竟如何，无人省。

又 豫章滕王阁

万里西风，吹我上、滕王高阁。正槛外、楚山云涨，楚江涛作。何处征帆木末去，有时野鸟沙边落。近帘钩、暮雨掩空来，今犹昨。

秋渐紧，添离索。天正远，伤飘泊。叹十年心事，休休莫莫。岁月无多人易老，乾坤虽大愁难著。向黄昏、断送客魂消，城头角。

又 金陵乌衣园

柳带榆钱，又还过、清明寒食。天一笑、满园罗绮，满城箫笛。花树得晴红欲染，远山过雨青如滴。问江南、池馆有谁来，江南客。

乌衣巷，今犹昔。乌衣事，今难觅。但年年燕子，晚烟斜日，抖擞一春尘土债，悲凉万古英雄迹。且芳尊、随分趁芳时，休虚掷。

又 和吕居仁侍郎东里先生韵

拟卜三椽，问何处、水回山曲。朝暮景、清风当户，白云藏屋。更得四时瓶贮酒，未

输一品腰围玉。待千章、手种木成阴，周遮绿。

且休殢，陶令菊。也休羨，子猷竹。算百年一梦，谁荣谁辱。唤客烹茶闲话了，呼童取枕佳眠足。但晨香、一炷愿天公，时丰熟。

又 寄赵文仲、南仲领淮东帅宪

岳后湘灵，曾孕个、擎天人物。临古岷、纶巾羽扇，笑驱胡羯。护塞十年高叔子，出师一表侔诸葛。有孤忠、分付与佳儿，真衣钵。

刘家骥，驰空阔。薛家凤，飞横绝。比君家兄弟，可能豪杰。草木声名如电扫，毡裘心胆闻风折。待安排、江汉一篇诗，归来说。

又

细阅浮生，为甚底、区区碌碌。算只是、信缘随分，早寻归宿。造物小儿忺簸弄，翻云覆雨难攫触。谩一堆、岁月鬓边来，跳丸速。

田二顷，非无粟。官四品，非无禄。更不知足后，待何时足。恰好园池原自有，近来新创三椽屋，且饥时、吃饭困时眠，平为福。

又 送吴叔永尚书

举世悠悠，何妨任、流行坎止。算是处、鲜鱼羹饭，吃来都美。暇日扁舟清霅上，倦时一枕薰风里。试回头、堆案省文书，徒劳

尔。

南浦路，东溪水，离索恨，飘零意。况星星鬓影，近来如此。万事尽由天倒断，三才自有人撑抵。但多吟、康节醉中诗，频相寄。

又 九日郊行

岁岁登高，算难得、今年美景，尽敛却、雨霾风障，雾沈云暝。远岫四呈青欲滴，长空一抹明于镜。更天教、老子放眉头，边烽静。

数本菊，香能劲。数朵桂，香尤胜。向尊前一笑，几多清兴。安得便如彭泽去，不妨且作山翁酩。尽古今、成败共兴亡，都休省。

又 禾兴月波楼和友人韵

日薄寒空，正泽国、一汀霜叶。过万里、西风塞雁，数声哀咽。耿耿有怀天可讯，悠悠此恨谁能说。倚阑干、老泪落关山，平芜隔。

提短剑，腰长铗。昔壮志，今华发。有江湖征棹，水云深阔。要斩鼂鼃埋九地，可怜乌兔驰双辙。羨渠侬、健笔扫磨崖，文章别。

又 和吴季永侍郎见寄

乍雨还晴，正轻暖轻寒帘幕。时怅望、故人烟水，鹭翻鸥落。老去可堪离恨结，新来转觉吟情薄。况等闲、客里送年华，成挥霍。

天一顾，西南角。人万里，风埃阔。笑长卿归蜀，锦衣徒著。不是等闲螳臂怒，也休刚道鸡声恶。但千年、往事误平凉，今番莫。

又 刘长翁右司席上

痴靄顽阴，风扫尽、安排今夕。便放出、一轮金镜，皎然虚碧。照彻肺肝明似水，是中空洞无他物。倚亭皋、搔首问天公，天应识。

人共景，都非昔。君共我，俱成客。且相逢一笑，笙歌箫笛。老去可怜杯酒减，醉来谩把阑干拍。便明朝、烟水挂征帆，还相忆。

又 姑苏灵岩寺涵空阁

客子愁来，闲信马、到涵空阁。谁为我、敛云收雾，青天为幕。八万顷湖如镜静，波神护断东南角。望孤帆、杳杳度微茫，山邀却。

三塞外，纷狐貉。三径里，悲猿鹤。笑鸱夷老子，占他头著。正使百年能几许，看来万事难描摸。问吴王、池馆复何如，霜枫落。

又 梅

试马东风，且来问、南枝消息。正小墅、几株斜倚，数花轻拆。自有山中幽态度，谁知世上真颜色。叹君家、五岭我双溪，俱成客。

长塞管，孤城笛。天未晓，人犹寂。有

几多心事，露清月白。好把寒英都放了，莫教春讯能占得。问竹篱、茅舍景如何，惟渠识。

又

京口凤凰池和芦川“春水连天”韵。池、苏魏公旧游也

借问如何，春能好、客怀偏恶。消遣底、闲言闲语，近都慵作。岁月从今休点检，江湖自古多流落。倚危亭、目断野云边，孤舟泊。

人事改，人情薄。退后步，争先著。且开尊洗盏，为君斟酌。拂拭凤凰池上景，凄凉猿鹤山中约。更东阳、憔悴到腰围，浑如削。

哨遍 括兰亭记

在晋永和，癸丑暮春，初作兰亭会。集众贤，临峻岭崇山，有茂林修竹流水。畅幽情，纵无管弦丝竹，一觴一咏佳天气。于宇宙之中，游心骋目，此娱信可乐只。念人生相与放形骸。或一室晤言襟抱开。静躁虽殊，当其可欣，不知老至。

然倦复何之。情随事改悲相系。俯仰间遗迹，往往俱成陈矣。况约境变迁，终期于尽，修龄短景都能几。谩古换今移，时消物化，痛哉莫大生死。每临文吊往一兴嗟。亦自悼不能喻于怀。算彭殇、妄虚均尔。今之视昔如契，后视今犹昔。故聊叙录时人所述，

概想世殊事异。后之来者览斯文，将悠然、有感于此。

水调歌头 焦山

铁瓮古形势，相对立金焦。长江万里东注，晓吹卷惊涛。天际孤云来去，水际孤帆上下，天共水相邀。远岫忽明晦，好景画难描。

混隋陈，分宋魏，战孙曹。回头千载陈迹，痴绝倚亭皋。惟有汀边鸥鹭，不管人间兴废，一抹度青霄。安得身飞去，举手谢尘嚣。

又 霁川溪亭

皎月亦常有，今夜独娟娟。浮云万里收尽，人在水晶奁。矫首银河澄澈，搔首金风浩荡，毛发亦冷然。宇宙能空阔，磨蚁正回旋。

倩渔翁，撑舴艋，柳阴边。垂纶下饵，须臾钓得两三鲜。唤客烹鱼酹酒，伴我高吟长啸，烂醉即佳眠。何用骖鸾去，已是地行仙。

又 送赵文仲龙学

宛水才停棹，一舸又澄江。岩花篱蕊开遍，时节正重阳。唤起沙汀渔父，揽取一天秋色，无处不潇湘。有酒时鲸吸，醉里是吾乡。

济时心，忧国志，问穹苍是非得失，成败何用苦论量。年事飞鸟奔兔，世事崩崖惊

浪，此别意茫茫。但愿身强健，努力报君王。

又 送叔永文昌

才惜季方去，又更别元方。惊心天上双凤，接翅下高冈，万里瞿塘烟浪，一片昭亭云月，渺渺正相望。夜雨连风壑，此意独凄凉。

杜鹃声，犹不住，搅离肠。黄鸡白酒，吾亦归兴动江乡。人事纷纷难料，世事悠悠难说，何处问穹苍。肯落儿曹泪，一笑付沧浪。

又 江淮一览

勋业竟何许，日日倚危楼。天风吹动襟袖，身世一轻鸥。山际云收云合，沙际舟来舟去，野意已先秋。很石痴顽甚，不省古今愁。

郗兵强，韩舰整，说徐州。但怜吾衰久矣，此事恐悠悠。欲破诸公磊块，且倩一杯浇酹，休要问更筹。星斗阑干角，手摘莫惊不。

沁园春 多景楼

第一江山，无边境界，压四百州。正天低云冻，山寒木落，萧条楚塞，寂寞吴舟。白鸟孤飞，暮鸦群注，烟霭微茫锁戍楼。凭阑久，问匈奴未灭，底事菟裘。

回头。祖敬何刘。曾解把功名谈笑收。算当时多少，英雄气概，到今惟有，废垒荒丘。梦里光阴，眼前风景，一片今愁共古愁。

人间事，尽悠悠且且，莫莫休休。

又 江西道中

落雁横空，乱鸦投树，孤村暮烟。有渔翁拖网，牧儿戴笠，行从水畔，唱过山前。雨阁还垂，云低欲堕，何处行人唤渡船。萧萧处，更柴门草店，竹外松边。

凄然。倚马停鞭。叹客袂征衫岁月迁。既不缘富贵，功名系绊，非因妻子，田宅萦牵。只有寸心，难忘斯世，磊块轮裼知者天。愁无奈，且三杯浊酒，一枕酣眠。

贺新郎 送吴季永侍郎

说著成凄楚。正尘飞、岷峨滟预，兔嗥狐舞。颇牧禁中留不住，弹压征西幕府。便一舸、月汀烟渚。四塞三关天样险，问何人、自辟豺豕路。成败事，几今古。

荼蘼芍药春将暮。最无情、飘零柳絮，搅人离绪。屈指秋风吹雁信，应忆西湖夜雨。漫岁月、消磨如许。上下四方男子志，肯临歧、昵昵儿曹语。呼大白，为君举。

又 吴中韩氏沧浪亭和吴梦窗韵

扑尽征衫气。小夷犹、尊罍杖履，踏开花事。邂逅山翁行乐处，何似乌衣旧里。叹芳草、舞台歌地。百岁光阴如梦断，算古今、兴废都如此。何用洒，儿曹泪。

江南自有渔樵队。想家山、猿愁鹤怨，问人归未。寄语寒梅休放尽，留取三花两蕊。待老子、领些春意。皎皎风流心自许，尽何

妨、瘦影横斜水。烦翠羽，伴醒醉。

又 寓言

可意人如玉。小帘栊、轻匀淡泞，道家装束。长恨春归无寻处，全在波明黛绿。看冶叶、倡条浑俗。比似江梅清有韵，更临风、对月斜依竹。看不足，咏不足。

曲屏半掩青山簇。正轻寒、夜来花睡，半敲残烛。缥缈九霄光里梦，香在衣裳剩馥。又只恐、铜壶声促。试问送人归去后，对一奁、花影垂金粟。肠易断，倩谁续。

又 用赵用父左司韵送郑宗丞

又是春残去。倚东风、寒云淡日，堕红飘絮。燕社鸿秋人不问，尽管吴笙越鼓。但短发、星星无数。万事惟消彭泽醉，也何妨、袖卷长沙舞。身与世，只如许。

阑干拍手闲情绪。便明朝、苍鸥白鹭，北山南浦。笑指午桥桥畔路，帘幕深深院宇。尚趁得、柳烟花雾。我亦故山猿鹤怨，问何时、归棹双溪渚。歌一曲，恨千缕。

又 寄赵南仲端明

烟树瓜洲岸。望旌旗、猎猎摇空，故人天远。不似沙鸥飞得渡，直到雕鞍侧畔。但徙倚、危阑目断。自古钟情须我辈，况人间、万事思量遍。涛似雪，风如箭。

扬州十里朱帘卷。想桃根桃叶，依稀旧家庭院。谁把青红吹到眼，知有醉翁局段。便回首、舟移帆转。渺渺江波愁未了，正淮山、日暮云撩乱。阁酒盏，倚歌扇。

又 春感

笑口开能几。把年年、芳情冶思，总抛闲里。桃杏枝头春才半，寒食清明又是。但岁月、飘飞川逝。回首秦楼双燕语，到如今、目断斜阳外。将往事，试重记。

香罗尚有相思泪。算人生、新愁易积，旧欢难继。水上流红无觅处，还隔关山万里。但赢得、新来憔悴。昨夜东风颠狂后，想余芳、尽是飘零底。词写就，倩谁寄。

满庭芳 春感

漠漠春阴，疏疏春雨，鸂鶒唤起春眠。小园人静，独自倚秋千。又见飘红堕雪，芳径里、都是花钿。年年事，闲愁闲闷，挂在绿杨边。

寻思，都遍了，功名竹帛，富贵貂蝉。但身为利锁，心被名牵。争似依山傍水，数椽外、二顷良田。无萦绊，炊粳酿秫，长是好花天。

又 西湖

春水溶溶，春山漠漠，淡烟浅罩轻笼。危楼阑槛，掠面小东风。又是飞花落絮，芳草暗、万绿成丛。闲徙倚，百年人事，都在画船中。

故园，无恙否，一溪翠竹，两径苍松。更有鱼堪钓，有秫堪舂。底是尘驱物役，空回首、社燕秋鸿。功名已，萧骚短鬓，分付与青铜。

酹江月 瓜洲会赵南仲端明

红尘飞骑，报元戎小队，踏青南陌。雪浪堆边呼晓渡，吴楚半江分坼。岁月惊心，风埃眯目，相对头俱白。杨花撩乱，可怜如此春色。

谁道燕燕莺莺，多情犹自，认得年时客。重唱江南肠断句，为我满倾云液。画鼓舟移，金鞍人远，一饷烟波隔。斜阳冉冉，依然无限凄恻。

又 梅

晓来窗外，正南枝初放，两花三蕊。千古春风头上立，羞退秣桃繁李。姑射神游，寿阳妆褪，色界尘都洗。竹扉松户，平生所寄聊耳。

堪笑强说和羹，此君心事，指高山流水，陇驿凄凉，却怕被、哀角城头吹起。此处关情，为他凝伫，淡月清霜里。巡檐何事，岁寒相誓而已。

又

暇日登新楼，望扬州于云烟缥缈之间，寄赵南仲端明

半空楼阁，把江山图画，一时收拾。白鸟孤飞飞尽处，最好暮天秋碧。万里西风，百年人事，谩倚阑干拍。凝眸何许，扬州烟树历历。

应念老子年来，浮名浮利，已作虚空掷。三径才寻归活计，又是飘零为客。回首平生，

惊心双鬓，容易成凄恻。尊前一笑，且由醉帽敲侧。

八声甘州 和魏鹤山韵

任渠依、造物自儿嬉。安能止吾归。有秋来竹径，春时花坞，夏里荷漪。何事东涂西抹，空遣鬓毛稀。矫首看鸿鹄，远举高飞。

点检人间今古，问谁为赢局，底是输棋。谩区区成败，蚁阵与蜗围，便掀天卷地勋业，怕山中、拍手笑希夷。如何是，一尊相属，万事休知。

又 寿吴叔永文昌、季永侍郎

记高冈、两凤揽朝晖，翩翻万里来。向槐厅深处，松厅紧里，却立徘徊。一舸风帆烟浪，拟竖锦江桅。聊为玄晖老，共拂尘埃。

我亦归来岩壑，正不妨散诞，笑口频开。算人间成败，何用苦惊猜。便江南、求田问舍，把岁寒、三友一圈栽。今宵酒，只消鲸吸，不要论杯。

二郎神

小楼向晚，正柳锁、一城烟雨。记十里吴山，绣帘朱户，曾学宫词内舞。浪逐东风无人管。但脉脉、岁移年度。嗟往事未尘，新愁还织，怎堪重诉。

凝伫。问春何事，飞红飘絮。纵杜曲秦川，旧家都在，谁寄音书说与。野草凄迷，

全宋词 吴 潜

暮云深黯，浑自替人无绪，珠泪滴，应把寸肠万结，夜帷深处。

解连环

彩桡芳苑。嗟东风梦断，燕残莺懒。谩记得、标格精神，正云涨暮天，雨荒闲馆。嫩绿殷红，但回首、一川波暖。想娇情慧态，倚褪淡妆，画楼帘卷。

吴歌数声冉冉。料移商变羽，人共天远。须信道、飞絮游丝，尽春去春来，景色偷换。扫罢蛮笺，难寄我、浓愁深怨。且如今，问龟问卜，望伊意转。

汉宫春 吴中齐云楼

楼观齐云，正霜明天净，一雁高飞。江南倦客徙倚，目断双溪。凭阑自语，算从来、总是儿痴。青镜里，数丝点鬓，问渠何事忘归。

幸有三椽茅屋，更小园随分，秋实春菲。几多清风皎月，美景良时。陶贤乐圣，尽由他、歧路危机。须信道，功名富贵，大都磨蚁醯鸡。

祝英台近

和（原作“送”，从吴讷本履斋诗余）吴叔永文昌韵

碧云开，红日丽，宫柳碎繁影。犹记朝

回，马兀梦频醒。天教一舸江湖，数椽涧壑，渐摆脱，世间尘境。

已深省。添买竹坞千畦，荷漪两三顷。鹤引禽伸，日月峤壶永。不须瓮里思量，隙中驰骛，也莫管、玉关风景。

又 和辛稼轩“宝钗分”韵

雾霏霏，云漠漠，新绿涨幽浦。梦里家山，春透一犁雨。伤心塞雁回来，问人归未，怎知道、蜗名留住。

镜中觑。近年短发难簪，丝丝不禁数。蕙帐尘侵，凄切共谁语。被他轻暖轻寒，将人憔悴，正闷里、梅花残去。

又

旋安排，新捻合，莺谷共烟浦。好处偏悭，一向风和雨。今朝捱得晴明，拖条藜杖，一齐把、春光黏住。

且闲觑。水边行过幽亭，修竹净堪数。百舌楼罗，渐次般言语。从今排日追游，留连光景，但管取、笼灯归去。

摸鱼儿

满园林、瘦红肥绿，休休春事无几。杜鹃唤起三更梦、窗外露澄风细。浑不寐。但目看、一帘夜月移花未。推衾自起。念岁月如流。容颜不驻，镜里留无计。

人间事。休说贱贫富贵。天公长把人戏。萧裴曹郭今何在，空有旧闻千纸。君谩试。数青史荣名，到底三无二。浮生似寄。争似

得江湖，烟蓑雨笠，不被蜗蝇系。

喜迁莺

良辰佳节。问底事，十番九番为客。景物春妍，莺花日闹，自是情怀今别。只有思归魂梦，却怕杜鹃啼歇。消凝处，正丝杨冉冉，寸肠千折。

谩说。临曲水，修竹茂林，人境成双绝。俯仰俱陈，彭殇等幻，何计世殊时隔。倚楼碧云日暮，漠漠远山千叠。沈醉好，又城头画角，一声声咽。

千秋岁

水晶宫里，有客闲游戏。溪漾绿，山横翠。柳纾阴不断，荷递香能细。撑小艇，受风多处披襟睡。

回首看朝市，名利人方醉。蜗角上，解荣悴。大都由命分，枉了劳心计。归去也，白云一片秋空外。

声声慢 和吴梦窗赋梅

挨晴拶暖，载酒呼朋，夷犹东圃西园，绿萼枝头，两三初破轻寒。平生自甘寂寞，占冷妆、不为人妍。林逋去，问影疏香暗，谁赋其间。

空想故山奇事，正烟横岭曲，月浸溪湾。

杏错桃讹，那时青子都圆。惟饶梦窗知处，
对翠禽、依约神仙。休引角，怕征人、泪落
塞边。

青玉案

黄昏先自无情绪。更几阵、风和雨。闲
把楼头更点数。挑残灯尽，装成香缕。此际
凭谁诉。

新词旧曲歌还住。欲说相思渺无处。围
定寒炉人不语。暗蛩啾唧，征鸿嘹唳，憔悴
都如许。

又 和刘长翁右司韵

人生南北如歧路。惆怅方回断肠句。四
野碧云秋日暮。苇汀芦岸，落霞残照，时有
鸥来去。

一杯渺渺怀今古。万事悠悠付寒暑。青
箬绿蓑便野处。有山堪采，有溪堪钓，归计
聊如许。

江城子 示表侄刘国华

家园十亩屋头边。正春妍。酿花天。杨
柳多情，拂拂带轻烟。别馆闲亭随分有，时
策杖，小盘旋。

采山钓水美而鲜。饮中仙。醉中禅。闲
处光阴，赢得日高眠。一品高官人道好，多
少事，碎心田。

鹧鸪天 和古乐府韵送游景仁将漕夔门

去日春山淡翠眉。到家恰好整寒衣。人
归玉垒天应惜，舟过松江月半垂。

千万绪，两三卮。送君不忍与君违。书
来频寄西边讯，是我江南肠断时。

南柯子

池水凝新碧，阑花驻老红。有人独立画
桥东。手把一枝杨柳、系春风。

鹊绊游丝坠，蜂拈落蕊空。秋千庭院小
帘栊。多少闲情闲绪、雨声中。

踏莎行

红药将残，绿荷初展。森森竹里闲庭院。
一炉香尽一瓯茶，隔墙听得黄鹂啭。

陌上春归，水边人远。尽将前事思量遍。
流光冉冉为谁忙，小桥伫立斜阳晚。

糖多令 湖口道中

白鹭立孤汀。行人长短亭。正垂杨、芳
草青青。岁月尽抛尘土里，又隔日、是清明。

日暮碧云生。魂伤老泪横。算浮生、较
甚浮名。万事不禁双鬓改，谁念我、此时情。

谒金门 霁上秀邸溪亭

溪边屋。不浅不深团簇。野树平芜秋满目。有人闲意足。

旋唤一尊醺醖。菱芡煮来新熟。归去来辞歌数曲。醉时无检束。

又

东风恶。一片梅花吹落。独上小楼闲澹索。云垂天四角。

春自于人如昨。人自于春难托。惆怅光阴虚过却。情怀无处著。

又

庭垂箔。数点杨花飞落。倚遍阑干人寂寞。闲铺棋一角。

客里春寒偏觉。睡起春衫偏薄。想得故山猿共鹤。笑人身计错。

鹊桥仙

扁舟昨泊，危亭孤啸，目断闲云千里。前山急雨过溪来，尽洗却、人间暑气。

暮鸦木末，落鳧天际，都是一团秋意。痴儿骏女贺新凉，也不道、西风又起。

更漏子

柳初眠，花正好。又被雨催风恼。红满

全宋词 吴 潜

地，绿垂堤。杜鹃和恨啼。

对残春，消永昼。乍暖乍寒时候。人独自，倚危楼。夕阳多少愁。

海棠春 郊行

天涯芳草迷征路。还又是、匆匆春去。乌兔里光阴，莺燕边情绪。

云梢雾末，溪桥野渡，尽是春愁落处。把酒劝斜阳，小向花间驻。

卜算子

春事到西湖，处处梅花笑。抖擞长安车马尘，眼底青山好。

身世两悠悠，岁月闲中老。极目烟波万顷愁，此意谁知道。

又

苔霁水能清，更有人如水。秋水横边簇远山，相对盈盈里。

溪上有鸳鸯，艇子频惊起。何似收归碧玉池。长在阑干底。

忆秦娥

娇滴滴。婵娟影里曾横笛。曾横笛。一声肠断，一番愁织。

隔墙频听无消息。龙吟海底难重觅。难重觅。梅花残了，杏花消得。

长相思

要相逢。恰相逢。画舫朱帘脉脉中，霎时烟霭重。

怨东风。笑东风。落花飞絮两无踪。分付与眉峰。

又

燕高飞。燕低飞。正是黄梅青杏时。榴花开数枝。

梦归期。数归期。想见画楼天四垂。有人攒黛眉。

又

上帘钩。下帘钩。夜半天街灯火收。有人曾倚楼。

思悠悠。恨悠悠。只有西湖明月秋。知人如许悠。

柳梢青

衬步花茵，穿帘柳絮，堆地榆钱。乍暖仍寒，欲晴还雨，春事都圆。

午窗睡起厌厌。屋角外、初啼杜鹃。百种凄凉，几般烦恼，没个人怜。

又

断续残虹，翩飞去鸟，别岸孤村。傍水楼台，满城钟鼓，又是黄昏。

悠悠岁月如奔。正目断、边尘塞云。两

鬓秋风，百年人事，无限消魂。

阮郎归

软风轻霭弄晴晖。鹁鸠相应啼。画堂人静画帘垂。阑干独倚时。

闲拾句，困寻棋。沈吟心是非。荼蘼开遍柳花飞。惜春春不知。

诉衷情

几回相见见还休。说著泪双流。又听画角鸣咽，都和作、一团愁。

云似絮，月如钩。忆凭楼。蕙兰情性，梅竹精神，长在心头。

霜天晓角

云收雾辟。万里天空碧。舟过蛾眉亭下，景似旧、人非昔。

年事如梭掷。世事如棋弈。抚掌扣舷一笑，今古恨、问谁得。

点绛唇

禁鼓三敲，参旗初挂栏干角。浅屏疏箔。夜气侵衣薄。

欵乃吴歌，艇子当溪泊。休休莫。五湖烟浪，不是鸱夷错。

蝶恋花 吴中赵园

野树梅花香似扑。小径穿幽，乐意天然足。回首人间名利局。大都一觉黄梁熟。别墅谁家屏簇簇。绮户疏窗，尚有藏春屋。镜断钗分何处续。伤心芳草庭前绿。

又

客枕梦回闻二鼓。冷落青灯，点滴空阶雨。一寸愁肠千万缕。更听切切寒蛩语。世事翻来还覆去。造物儿嬉，自古无凭据。利锁名缰空自苦。星星鬓影今如许。

天仙子 舟行阻风

百舌搬春春已透。长驿短亭芳草昼。家山肠断欲归人，风宿留。船津侯。一夜朱颜烦恼瘦。

不用寻思闲宇宙。倦鸟入林云返岫。小园自有四时花，铺锦绣。钟醇酎。尽胜累累悬印绶。

如梦令

插遍门前杨柳。又是清明时候。岁月不饶人。鬓影星星知否。知否。知否。且尽一杯春酒。

又

昨日春衫初试。今日春寒犹殢。待得晚

风收，独上危楼闲倚。闲倚。闲倚。目断半空烟水。

又

江上绿杨芳草。想见故园春好。一树海棠花，昨夜梦魂飞绕。惊晓。惊晓。窗外一声啼鸟。

又

楼外残阳将暮。江上孤帆何处。搔首立东风，又是少年情绪。凝伫。凝伫。一抹淡烟轻雾。

又

枝上蝶纷蜂闹。几树杏花残了。幽鸟亦多情，片片衔归芳草。休扫。休扫。管甚落英还好。

又

镇日春阴漠漠。新燕乍穿帘幕。睡起不胜情，闲拾瑞香花萼。寂寞。寂寞。没个人人如昨。

又

庭院深深春寂。还是他乡寒食。闲利与闲名，谩把光阴虚掷。虚掷。虚掷。知道几时归得。

又

闲向园林点检。又见小桃开遍。切莫便飘零，且为春光留恋。留恋。留恋。待我持杯深劝。

又

一饷园林绿就。柳外莺声初透。轻暖与轻寒，又是牡丹花候。花候。花候。岁岁年年人瘦。

又

雨过远山如洗。云散落霞如绮。嫩绿与残红，又是一般春意。春意。春意。只怕杜鹃催里。

望江南

家山好，好处是三春。白白红红花面貌，丝丝袅袅柳腰身。锦绣底园林。

行乐事，都付与闲人。挈榼携壶从笑傲，踏青挑菜恣追寻。赢得个天真。

又

家山好，好是夏初时。习习薰风回竹院，疏疏细雨洒荷漪。万绿结成帷。

呼社友，长日共追随。澹茗空时还酌酒，投壶罢了却围棋。多少得便宜。

又

家山好，好处是秋来。绿橘黄橙随市有，岩花篱菊逐时开。管领付尊罍。

新筑就，别馆共闲台。摇手出离名利窟，掉头摆脱簿书堆。只在念头灰。

又

家山好，好处是三冬。梨栗甘鲜输地客，

鲂鳢肥美献溪翁。醉滴小槽红。

识破了，不用计穷通。下泽车安如驷马，
市门卒稳似王公。一笑等鸡虫。

又

家山好，结屋在山椒。无事琴书为伴侣，
有时风月可招邀。安乐更相饶。

伸脚睡，一枕日头高。不怕两衙催判事，
那愁五鼓趣趋朝。此福要人消。

又

家山好，底事尚忘归。但我辞荣还避辱，
从渠把是却成非。跳出世关机。

将五十，老相已相催。争得气来有甚底，
更加官后亦何为。奉劝莫痴迷。

又

家山好，一室白云中。时唤道人谈命蒂，
也呼和尚说禅宗。孔佛老和同。

淘汰尽，八面总玲珑。欲捉时无把捉，
道虚空后不虚空。且问主人公。

又

家山好，负郭有田园。蚕可充衣天赐予，
耕能足食地周旋。骨肉尽团圆。

旋五福，岁岁乐丰年。自养鸡豚烹腊里，
新抽韭芥荐春前。活计不须添。

又

家山好，有底尚萦牵。马后乐听余十载，
眼前赤看也多年。滋味只如然。

身外事，不用强探拈。自古几番成与败，

从来百种丑和妍。细算不由贤。

又

家山好，好处是安居。无事不须干郡县，
有余但管济乡间。及早了王租。

随日力，也著几般书。静里精神偏爽快，
闲中光景越舒徐。腊月尽工夫。

又

家山好，无事挂心怀。早课畦丁勤种菜，
晚科园户漫浇花。只此是生涯。

尘世里，扰扰正如麻。散复聚来膾上蚁，
左还右旋壁间蜗。只为那纷华。

又

家山好，百事尽如如。渴饮饥餐都属我，
倒横直立总由渠。更不要贪图。

三径里，恰好小茅庐。种竹梅松为老伴。
养龟猿鹤助清娱。扣户有樵渔。

又

家山好，不是撰虚名。世上盛衰常倚伏，
天家日月也亏盈。退步是前程。

且恁地，卷索了收绳。六宇五胡生口面，
三言两语费颜情。赢得鬓星星。

又

家山好，凡事看来轻。一壑尽由侬佃订，
三才不欠你称停。有耳莫闲听。

静地里，点检这平生。著甚来由为皎皎，
好无巴鼻弄醒醒。背后有人憎。

浪淘沙 和吴梦窗席上赠别

家在敬亭东。老桧苍枫。浮生何必寄萍蓬。得似满庭芳一曲，美酒千钟。

万事转头空。聚散匆匆。片帆稳挂晓来风。别后平安真信息，付与飞鸿。

又

长记去年时。雪满征衣。佳人携手画楼西。今日关山千里外，此恨谁知。

想见绿窗低。依旧空闺。惜春还是惜花飞。纵有游蜂偷得去，争似帘帷。

小重山

溪上秋来晚更宜。夕阳西下处，碧云堆。谁家舟子采莲归。双白鹭。惊起背人飞。

烟水渐凄迷。渔灯三数点，乍明时。西风一阵白苹湄。凝伫久，心事有谁知。

昭君怨

小雨霏微如线。人在暮秋庭院。衣袖带轻寒。睡初残。

脉脉此情何限。惆怅光阴偷换。身世两沈浮。泪空流。

南乡子

去岁牡丹时。几遍西湖把酒卮。一种姚黄偏韵雅，相宜。薄薄梳妆淡淡眉。

回首绿杨堤。依旧黄鹂紫燕飞。人在天涯春在眼，凄迷。不比巫山尚有期。

虞美人

美人一舸横秋水。冉冉烟波里。绿杨也解织离愁。故向东风摇曳、不能休。

是非得失都休计。只有抽身是。橙黄蟹熟正当时。想见双溪风月、待人归。

生查子

谁家白面郎，画舫朱帘挂。十二列金钗，一局文楸罢。

歌舞不知休，醉倒荷花下。归棹踏烟波。灯火芜城夜。

武陵春

惨惨凄凄秋渐紧，风雨更潇潇。强把炉薰寄寂寥。无语立亭皋。

客路十年成底事，水国更停桡。苍鸟横飞过野桥。人不似、汝逍遥。

二郎神

小亭徙倚，慢一步、立秋千影。渐夕照林梢，晚风池上，缟缟轻寒嫩冷。又是将他春倜傥。酿一种、花愁花病。空客鬓岁迁，征衫人老，倚楼看镜。

还省。故园多少，紫殷红凝。窗上晓莺啼，拂墙金缕，烟柳慵眠乍醒。挑菜踏青，趁蜂随蝶，长负清明时景，凝伫久，暮听棋边落子，一声声静。

满江红

为问人生，□要足、何时是足。这个底、蜗名蝇利，但添拘束。便使积官居鼎鼐，假饶累富堆金玉。似浮埃、抹电转头空，休迷局。

分已定，心能服。宛句畔，昭亭曲。有水多于竹，竹多于屋。闲看白云归岫去，静观倦鸟投林宿。那借来、拍板与门槌，休掀扑。

瑞鹤仙

小亭山半枕。又一番园林，春事整整。微阴护轻冷。早蜂狂蝶浪，褪黄消粉。阑干日永。数花飞、残崖断井。仗何人、说与东风，莫把老红吹尽。

休省。烟江云嶂，楚尾吴头，自来多景。愁高怅远。身世事，但难准。况禁他，东兔西乌相逐，古古今今不问。算鸥夷、办却扁舟，个中杀稳。

贺新郎

一笑春无语。但园林、阴阴绿树，老红三数。底事东风犹自妒，片片狂飞乱舞。便燕懒、莺残初起。芍药荼蘼还又是，仗何人、说与司花女。将岁月，浪如许。

悠悠倦客停江渚。寄扁舟、浮云荡月，棹烟帆雨。留得闲言闲语在，可是卿卿记取。待尽把、愁肠说与。泛梗浮萍无定准，怕吴鳞、楚雁成离阻。歌未了，恨如缕。

水调歌头

每怀天下士，要与共艰危。谁知暗里摸索，得此世间奇。却笑当年坡老，过眼翻迷五色，遇合古难之。访我鸳湖上，真足慰心期。

醉谈兵，愁论世，夜阑时。自怜磊块，近来鬓底两三丝。目送云帆西去，肠断风尘北起，老泪欲垂垂。骐骥思长坂，好鸟择高枝。

青玉案

十年三过苏台路。还又是、匆匆去，迅

全宋词 吴 潜

景流光容易度。鹭洲鸥渚，苇汀芦岸，总是消魂处。

苍烟欲合斜阳暮。付与愁人砌愁句。为问新愁愁底许。酒边成醉，醉边成梦，梦断前山雨。

水调歌头 闻子规

榆塞脱忧责，兰径遂游嬉。吾年逾六望七，休退已称迟。日日登山临水，夜夜早眠晏起，岂得不便宜。有酒数杯酒，无事一枰棋。

休更□，世途恶，宦久羈。□深林密，去处人物两忘机。昨日既盟鸥鹭，今日又盟猿鹤，终久以为期。蜀魄不知我，犹道不如归。

又 题烟雨楼

有客抱幽独，高立万人头。东湖千顷烟雨，占断几春秋。自有茂林修竹，不用买花沽酒，此乐若为酬。秋到天空阔，浩气与云浮。

叹吾曹，缘五斗，尚迟留。练江亭下，长忆闲了钓鱼舟。矧更飘摇身世，又更奔腾岁月，辛苦复何求。咫尺桃源隔，他日拟重游。

满江红 鸟衣园

唤出山来，把鸥鹭、盟言轻食。依旧是、

江涛如许，雨帆烟笛。歌罢莫愁檀板缓，杯倾白堕琼酥滴。但惊心、十六载重来，征埃客。

秋风鬓，应非昔。夜雨约，聊相觅。叹主恩未报，无多来日。故国千年龙虎势，神州万里鼙鼓迹。笑谢儿、出手便呼卢，携蒲擲。

又 雨花台前韵

玛瑙冈头，左酹酒、右持螯食。怀旧处，磨东冶剑，弄清溪笛。望里尚嫌山是障，醉中要卷江无滴。这一堆、心事总成灰，苍波客。

叹俯仰，成今昔。愁易揽，欢难觅。正平芜远树，落霞残日。自笑频招猿鹤怨，相期早混渔樵迹。把是非、得失与荣枯，虚空擲。

沁园春 丙辰十月十日

夜雨三更，有人敲枕，晓檐报晴。算顽云痴雾，不难扫荡，青天白日，元自分明。权植油幢，聊张皂纛，坐听前驺鼓角鸣。君休诧，岂宣申南翰，成旦东征。

鸿冥。哽噎秋声。正万里榆关未罢兵。幸扬州上督，为吾石友，荆州元帅，是我梅兄。约束鲸鲵，奠安鼯鼠，更使岷夷海晏清。连宵看，怕天狼隐耀，太白沈枪。

又 戊午自寿

笑指颓龄，循环雌甲，卦数已圆。叹蜀

公高洁，休官去岁，温公耆旧，入社今年。
底事崎岖，苍颜白发，犹拥貔貅护海堧。君
恩重，算何能报国，未许归田。

遥怜。宛句山前。正水涨溪肥系钓船。
纵葵榴花闹，菖蒲酒美，都成客里，争似家
边。寄语儿曹，若为翁寿，只把鸥盟更要坚。
翁还祝，愿橈枪日静，稷稷云连。

又 己未翠山劝农

二十年前，君王东顾，诏牧此州。念昔
时豪杰，犹难辟阖，如今老大，却更迟留。
四载相望，三春又半，邂逅劬农得纵游。田
畴事，是桑条正长，麦含初抽。

悠悠。身世何求。算七十迎头合罢休。
谩绕堤旌纛，牵连鹢棹，喧天鼓吹，断送龙
舟。翠巘层边，碧云堆处，一担担来天外愁。
如何好，且同斟绿醕，自课清讴。

宝鼎现 和韵己未元夕

晚风微动，净扫天际，云裾霞绮。将海
外、银蟾推上，相映华灯辉万砌。看舞队、
向梅梢然昼，丹焰玲珑玉蕊。渐陆地、金莲
吐遍，恰似楼台临水。

老子欢意随人意。引红裙、钗宝钿翠。
穿夜市、珠筵玳席，多少吴讴联越吹。绣幕
卷、散缤纷香雾，笼定团圆锦里。认一点、
星球挂也，士女桃源洞里。

闻说旧日京华，般百戏、灯棚如履。待
端门排宴，三五传宣禁侍。愿乐事、这回重

全宋词 吴 潜

见，喜庆新开起。瞻圣主、齐寿南山，势拱东南百二。

昼锦堂 己未元夕

绮縠团成，珠玑搦就，极目灯火楼台。七子八仙三教，耍队相挨。管箫笙簧相间斗，远如声韵碧霄来。环千炬，宝棚绛纱，云球雾袞交加。

千里人笑乐，游妓合、脂尘香霭笼街。尽道今宵节物，天与安排。晚来风阵全收了，夜阑还放月儿些。休辞醉，长愿每年时候，一样情怀。

贺新郎 丁巳岁寿叔氏

未是全衰暮。但相思、昭亭数曲，水村烟墅。只比儿儿额上寿，尚有时光如许。况坎子、常交离午，须信火龙能陆战，更驱他、水虎蟠沧浦。昆仑顶，时飞度。

东皇暮向昆仑遇。道如今、金阶玉陛，待卿阔步。犹恐荆人攀恋切，未放征帆高举。怕公去、狐狸嗥舞。江汉一时谁作者，想声声、赞祝明良聚。天下久，望霖雨。

又 和翁处静桃源洞韵

拍手阑干外。想回头、人非物是，不知何世。万事情知都是梦，聊复推迁梦里。也幻出、云山烟水。白白红红虽褪尽，尽倡条、浪蕊皆春意。时可醉，醉扶起。

瀛洲旧说神仙地。奈江南、猿啼鹤唳，
怨怀如此。三五阿婆涂抹遍，多少残樱剩李。
又过雨、亭皋初霁。惭愧故人相问讯，但一
回、一见苍颜耳。谁念我，鹤鹤志。

又 再和

宇宙原无外。问当年、渠缘底事，强逃
人世。争似刘郎栽种后，长恁玄都观里。何
用羨、武陵溪水。一见桃花还一笑，领春工、
千古无穷意。儿女恨，且收起。

洞中空阔多闲地。但人间、羊肠九折，
未能知此。我已衰翁君渐老，那复颠张醉李。
看翻覆、雨阴风霁。捱得清和时候了，舣扁
舟、只待归来耳。惟处静，解吾志。

又 三和

了却儿痴外。撰园林、亭台馆榭，谩当
吾世。红榭朱桥相映带，人在百花丛里。更
依约、垂杨衬水。桧柏芙蓉橙桂菊，也还须、
收拾秋冬意。闲坐久，忽惊起。

繁华寂寞千年地。便渊明、桃源记在，
几人知此。双手上还银菟印，趁得东风行李。
看鄮岭、鄞江澄霁。从此归欤无一欠，但君
恩、天大难酬耳。嗟倦鸟，投林志。

又 和赵丞相见寿

雪鬓难重绿。但翛然、黄庭境界，抱藏
龟六。也向无何乡里去，白堕舟边漾绿。算
种种、尘缘都足。争那名缰犹系绊，尽辜他、
猿鹤双溪曲。时又夏，暑将溽。

虚舟飘瓦何烦歎。奈羊肠、千歧万折，

近来纯熟。怅望老仙烟水外，惟把江云送目。想裴墅、碧梧金竹。安得结庐相近傍，买闲田、数亩躬耕筑。已梦断，大槐国。

又

夜来梦游一所，园林台榭甚饰，数羽流在焉。余与语，相酬酢，有言诗者，有言词者。须臾。以酒见酌。中有一人举令云：各和古词一首。且目余云：相公和叶石林睡起流莺语。余素熟此词成诵，遂援笔赅之，掷笔而寤。枕上记忆，不遗一字，亦异矣。以词意详之，余三上丐归之疏，君父其从欲乎。因录呈同官诸丈，恐可为他时一段佳话云

燕子呢喃语。小园林、残红剩紫，已无三数。绿叶青枝成步障，空有蜂旋蝶舞。又宝扇、轻摇初暑。芳沼拳荷舒展尽，便回头、乱拥宫妆女。惊岁月，能多许。

家山占断鳧鸥渚。最相宜、岚烟水月，雾云霏雨。三岛十洲虽铁铸，难把归舟系取。且放我、渔樵为与。从此细斟昌歜酒，况神仙洞府无邀阻。何待结，长生缕。

又

因梦中和石林贺新郎，并戏和东坡乳燕飞华屋
碧沼横梅屋。水平堤、双双翠羽，引雏偷浴，倚户无人深院静，犹忆棋敲嫩玉。还又是、朱樱初熟。手绾提炉香一炷，黯消魂、伫立阑干曲。闲转步，数修竹。

新来有个眉峰蹙。自王姚、后魏都褪，只成愁独。凤带鸾钗宫样巧，争奈腰圈倦束。谩困倚、云鬟堆绿。淡月帘栊黄昏后，把灯花、印约休轻触。花烬落，泪珠簌。

又 和刘自昭俾寿之词

宝扇驱纤暑。又凄凉、蒲觞菰黍，异乡重午。巧索从来无人系，惟对榴花自语。也何用、讴秦舞楚。生愧孟尝揜一日，叹三千、客汗挥成雨。如伯始，谩台傅。

循环浩劫无终古。但坤牛、乾马抽换，是长生谱。安得笺天天便许，归炼金翁木父。问海运、争如穴处。一笑流行还坎止，算陈陈、往事俱灰土。南墅鹤，相思主。

暗 香

犹记己卯、庚辰之间，初识尧章于维扬。至己丑嘉兴再会，自此契阔。闻尧章死西湖，尝助诸丈为殓之，今又不知几年矣。自昭忽录示尧章暗香、疏影二词，因信手酬酢，并赓潘德久之诗云

晓霜一色。正恁时陇上，征人横笛。驿使不来，借问孤芳为谁折。休说和羹未晚，都付与、逋仙吟笔。算只是，野店疏篱，樵子共争席。

寒圃，众籁寂。想暗里度香，万斛堆积。恼他鼻观，巡索还无最堪忆。萼绿堂前一笑，封老干、苔青莓碧。春漏也，应念我、要归未得。

疏影

佳人步玉。待月来弄影，天挂参宿。冷透屏帟，清入肌肤，风敲又听檐竹。前村不

管深雪闭，犹自绕、枝南枝北。算平生、此段幽奇，占压百花曾独。

闲想罗浮旧恨，有人正醉里，姝翠蛾绿。梦断魂惊，几许凄凉，却是千林梅屋。鸡声野渡溪桥滑，又角引、戍楼悲曲。怎得知、清足亭边，自在杖藜巾幅

暗香 再和

雪来比色。对澹然一笑，休喧笙笛。莫怪广平，铁石心肠为伊折。偏是三花两蕊，消万古、才人骚笔。尚记得，醉卧东园，天幕地为席。

回首，往事寂。正雨暗雾昏，万种愁积。锦江路悄，媒聘音沈两空忆。终是茅檐竹户，难指望、凌烟金碧。憔悴了、羌管里，怨谁始得。

疏影

寒梢砌玉。把胆瓶顿了，相伴孤宿。寂寞幽窗，筛影横斜，宜松更自宜竹。残更蝶梦知何处，□只在、昭亭山北。问平生、雪压霜欺，得似老枝擎独。

何事胭脂点染，认桃与辨杏，枝叶青绿。莫是冰姿，改换红妆，要近金门朱屋。繁华艳丽如飞电，但宛转、断歌零曲。且不如、藏白收香，旋学世间边幅。

暗 香

仪真去城三数里东园，梅花之盛甲天下。嘉定庚辰、辛巳之交，余犹及歌酒其下，今荒矣。园乃欧公记、君谟书，古今称二绝。犹忆其词云：高甍巨桷，水光日影，动摇而下上，其宽间深靓，可以答远响而生清风，此前日之颓垣断堑而荒墟也。嘉时令节，州人士女，啸歌而管弦，此前日之晦冥风雨、黜黜鸟兽之噪音也。令人慨然

澹然绝色。记故园月下，吹残龙笛。怅望楚云，日日归心大刀折。犹怕冰条冷蕊，轻点污、丹青凡笔。可怪底，屈子离骚，兰蕙独前席。

院宇，深更寂。正目断古邗，暮霭凝积。何郎旧梦，四十余年尚能忆。须索梅兄一笑，但矫首、层宵空碧。春在手、人在远，倩谁寄得。

疏影

啮琼笑玉。向画堂可肯。风露边宿。耐冻禁寒，便瘦宜枯，前生莫是孤竹。从来不上春工谱，梦不到、沈香亭北。算只消、澹影疏香，伴个幽栖人独。

莫待痴蜂憨蝶，倩青女捺住，多少红绿。落雁寒芦，翠鸟冰枝，近傍三间茅屋。□□□□□□□，□□□、□□□□。想这般，夷旷襟怀，渺视乾员坤幅。

暗香 用韵赋雪

九垓共色。想洛滨剑客，吹呼长笛。貔豸老松，别树平欺烂柯折。应是千官鹤舞，腾贺表、谁家椽笔。赐宴也，内劝宣来，真个是瑶席。

休怪，巷陌寂。有一种可人，扫了还积。悲饥闭户，僵卧袁安我偏忆。凝望天童列嶂，谁大胆、偷藏遥碧。待问讯、清友看，怕难认得。

疏影

千门委玉。是个人富贵，才隔今宿。冒栋摧檐，都未商量，呼童且伴庭竹。千蹊万径行踪灭，渺不认、溪南溪北。问白鸥，此际谁来，短艇钓鱼翁独。

偏爱山茶雪里，放红艳数朵，衣素裳绿。兽炭金炉，羔酒金钟，正好笙歌华屋。敲冰煮茗风流衬，念不到、有人回曲。但老农、欢笑相呼，麦被喜添全幅。

水龙吟 戊午元夕

十洲三岛蓬壶，是花锦、一团装就。轻车细鞚，绮罗香里，夜光如昼。朱户笙箫，画楼帘幕，有人回首。想金莲灿烂，星球缥缈，那风景、年时旧。

应念白头太守。怎红旗、六街穿透。铺排玳席，追陪珠履，且酹春酌。楚舞秦讴，半慵莺舌，叠翻鸳袖。把千门喜色，万家和气，祝君王寿。

永遇乐 己未元夕

和气熏来，这般光景，管无风雨。画栋朱甍，锦坊绣巷，娘子将嫖母。星球高挂，灯楼趲出，良夜正消增五。遨头事，牙旗铁马，且还那时勤府。

甘泉见说，捷书频奏，渐次不烦鞞鼓。双凤云间，六鳌海上，祝赞齐手舞。三呼声里，君王万寿，岁岁传柑笑语。便都把、升平旧曲，腔儿旋补。

又 再和

天上人间，这般光景，管无风雨。绣户珠帘，锦坊花巷，戏队将嫖母。月扇团圆，星球灿烂，路遍市三街五。升平事，牙旗铁马，且还旧家藩府。

三陲见说，凯歌频奏，渐次不烦鞞鼓。双凤云间，六鳌尘外，想见都人欢舞。火城春近，金莲地匝，消夜果边曾语。如今但，梅花纸帐，睡魔欠补。

又 三和

祝告天公，放灯时节，且收今雨。万户千门，六街三市，绽水晶云母。香车宝马，珠帘翠幕，不怕禁更敲五。霓裳曲，惊回好梦，误游紫宫朱府。

沈思旧日京华，风景逗晓，犹听戏鼓。
分镜圆时，断钗合处，倩笑歌与舞。如今闲
院，蜂残蛾褪，消夜果边自语。亏人嗔，梅
花纸帐，权将睡补。

隔浦莲 和叶编修士则韵

兰桡环城数叠。雾雨侵帘箔。翠竹交苍
树，幽鸟声声如答。苇岸游绿鸭。暮山合。
天际浓云罨，水周匝。

提携一醉，浊贤清圣欢洽。瀛洲美景，
尽道东南都压。今日愁颜回笑颊。飞屐。且
将萱草归插。

又 会老香堂，和美成

扇荷偷换羽葆。院宇人声窈。独步亭皋
下，阑干并、栖幽鸟。新雨抽嫩草。檐花闹。
一片萍铺沼。燕雏小。

书空底事，那堪手版持倒。今来古往，
几见北邙人晓。乡号无何但日到。休觉。陶
然身世尘表。

水调歌头 出郊玩水

小队旌旗出，画鹢倚篙行。青秧白水无
际，中有一犁耕。听得田翁相语，今岁时年
恰好，眨眼是秋成。老守何能解，持此报皇
明。

望家山，千里外，楚云平。良田二顷，
非村非郭枕柴扃。况有苍林香透，更有杨堤

阴合，魂梦每宵征。巴得西风起，吾亦问前程。

又 小憩袁氏园用前韵

老圃无关锁，放客意中行。颇欣天地开阔，烟钓与云耕。荷长亭亭翠盖，竹长森森翠葆，景致闹装成。几树榴花发，映水色偏明。

绮楼空，金屋静，恨难平。鼓笙箫笛，谁怜冷落暗尘扃。回首百年人事，转眼几番今古，日迈月俱征。且尽一杯酒，退步是前程。

又

夜来月佳甚，呈景回、自昭二兄。戊午八月十八日

过了中秋后，今夜月方佳。看来前夜圆满，才自阙些些。扫尽乌云黑雾，放出青霄碧落，恰似我情怀。把酒自斟酌，脱略到形骸。

问渠侬，分玉镜，断金钗。少年心事，不知容易鬓边华。千古天同此月，千古人同此兴，不是旋安排。安得高飞去，长以月为家。

又 戊午九月，偕同官延庆阁过碧沚

重九先三日，领客上危楼。满城风雨都住，天亦相邀头。右手持杯满泛，左手持螯大嚼，萸菊互相酬。徙倚阑干角，一笑与云浮。

望平畴，千万顷，稻粱收。江澄海晏无

事，赢得小迟留。但恨流光抹电，假使年华七十，只有六番秋。戏马台休问，破帽已飕飕。

又 再用前韵

天宇正高爽，更躡最高楼。长风为我驱驾，极目海山头。不用牛山孟浩，不用齐山杜牧，人景自堪酬。举酒酹空阔，汗漫与为游。

捻黄花，怜白首，恨难收。颓龄使汝能制，何待更封留。眼底朱甍画栋，往往人非物是，蟋蟀自鸣秋。万里一搔首，无处著萧飕。

又 喜晴赋

屯结海云阵，奋系藉雷公。忽然天宇轩豁，杲日正当空。照出榴花丹艳，映出栀花玉色。生意与人同。闭纵一翻手，造化不言功。

想平畴，禾穞穞，黍芄芄。老农拍手相问，相劳笑声中。办取黄鸡白酒，演了山歌村舞，等得庆年丰。此际莼鲈客，倚楫待西风。

二郎神 己未自寿

古希近也，是六十五翁生日。恰就得端阳，艾人当户，朱笔书符大吉。卦气周来从新起，怕白发、苍颜难必。随见定性缘，餐饥眠困，喜无啾唧。

盈溢。书生做到，能高官秩。况碌碌儿

曹，望郎名郡，叨冒差除不一。积世主恩。满家天禄，婚嫁近来将毕。还自祝，愿早悬车里社，始为收拾。

又 再和

近时厌雨，喜午日、放开天日。不用辟兵符，从今去也，管定千祥万吉。已报甘泉新捷到，况更是、年丰堪必。任景物换来，蛙鸣蝉噪，耳边嘽唧。

洋溢。尽教愿乞，兵厨闲秩。看恰好园池，随宜亭树，人道瀛洲压一。且恁浮沈，奈何衰悴，惟怕牧之名毕。安得去，占却三神绝顶，瑞芝同拾。

传言玉女 己未元夕

众绿庭前，都是郁葱佳气。越姬吴媛，粲珠钿翠珥。红消粉褪，几许粗桃凡李。连珠宝炬，两行缦骑。

自笑衰翁，又行春锦绣里。禁肴宫酝，记当年宣赐。休嫌拖逗，且向画堂频醉。从今开庆，万欢千喜。

满江红 戊午二月十七日四明窗赋

芳景无多，又还是、乱红飞坠。空怅望、昭亭深处，家山桃李。柳眼花心都脱换，蜂须蝶翅难沾缀。谩相携、一笑竞良辰，春醪美。

金兽爇，香风细。金凤拍，歌云腻。尽

秦箫燕管，但逢场尔。只恐思乡情味恶。怎禁寒食清明里。问此翁、不止四宜休，翁归未。

又 再和

聊把芳尊，殷勤劝、斜阳休坠。吾老矣，难从仙客，采丹丘李。且趁风光一百五，园林尚有残红缀。更怱怱、百舌对般春，声能美。

鸾钗绊，游丝细，鸳袖惹，香尘腻。想吴姬越女，踏青才尔。争似江南樗枏社，俚歌声拂行云里。又枝头、梅子正酸时，莺知未。

又 戊午二月二十四日，会碧沚，三用韵

楼观峥嵘，浑疑是、天风吹坠。金屋窃，几时曾贮，粗桃凡李。镜断钗分人去后，画阑文砌苍苔缀。想当年、日日醉芳丛，侯鯖美。

春水涨，鳞鳞细。春草暗，茸茸腻。算流连光景，古犹今尔。椿菌鸠鹏休较计，倚空一笑东风里。喜知时、好雨夜来稠，秧青未。

又 碧沚月湖、四用韵

一笑相携，且休管、兔升乌坠。那更是，可人宾客，未饶崔李。金叵罗中醺醪莹，玉玲珑畔歌珠缀。望湖光、一片浸韶光，真双美。

云絮襞，能纤细。云彩聚，能黏腻。料出山归岫，等闲间尔。碧沚风流人去后，石

窗春景物深里，算邯郸、客梦几惊残，炊犹未。

又 二园花卉仅有海棠未谢，五用韵

问海棠花，谁留恋、未教飘坠。真个好，一般标格，聘梅奴李。怯冷拟将苏幕护，怕惊莫把金铃缀。望铜梁、玉垒正春深，花空美。

非粉饰，肌肤细。非涂泽，胭脂腻。恐人间天上，少其伦尔。西子颦收初雨后，太真浴罢微暄里。又明朝、杨柳插清明，鹃归未。

又

景回计院行有日，约同官数公，酌酒于西园，取吕居仁满江红词“对一川平野，数间茅屋”九字分韵，以饯行色，盖反骚也。余得对字，就赋

把手西园，有山色、波光相对。金马客，明朝飞棹，水肥帆驶。问我年华旬并七，异乡时景春巴二。最堪怜、游子送行人，垂杨外。

聊小小，旌旗队。聊且且，笙歌载。正冥蒙烟雨，许多情态。南北枝头犹点缀，东西玉畔休辞避。待莼鲈、归思动西风，相携未。

又

苍云堂后有桂树，为冬青遮蔽，低垂将陨矣。戊午八月，呼梓人为伐而去之，赋□

斫却凡柯，放岩桂、出些头地。从此去，引风披露，畅条昌蕊。待得清香千万斛，且饶老子为知己。趁今宵、新月驾空来，浮觞

里。

刘安笑，淹留耳。吴猛约，何时是。想故山深处，翠垂金缀。须信人生归去好，他乡未必江山美。问钗头、十二意如何，非吾事。

又

戊午秋半，偕胡景回，刘自昭二兄小饮待月
试问平生，几番见、中秋明月。今老矣，一年紧似，一年时节。底事层阴生障碍，不教玉界冰壶彻。莫姮娥、嫌此白头翁，心肠别。

风动处，浮云揭。云绽处，清光泄。倩何人扫荡，大家澄澈。且掉悲欢离合事，相逢只怕尊中竭。放儿童、今夜上青霄，探蟾穴。

又 戊午八月二十七日进思堂赏第二木稚

丹桂重开，向此际、十分香足。最好处，云为幕护，雨为膏沐。树杪层层如宝盖，枝头点点犹金粟。算人间、天上更无花，风流独。

玉坛畔。仙娥簇。玉梁上，仙翁掬。叹吾今老矣，两难追逐。休把淹留成感慨，时闲赏玩时闲福。怕今宵、芳景便雕零，高烧烛。

又 戊午九月七日，碧沚和制几韵

岁岁重阳，何曾是、两般时景。人自有、悲欢离合，晦明朝暝。日月湖边来往艇，楼台水底参差影。又何妨、时暂狎沧波，轻鸥

并。

闲顿放，朱门静。新结裹，朱帘整。尽百年人事，移场换境。欲插黄花身已老，强倾绿醕心先醒。羡游鱼、有钓不能收，钩空饼。

又 郑园看梅

安晚堂前，梅开尽、都无留萼。依旧是、铁心老子，故情堪托。长恐寿阳脂粉污，肯教摩诘丹青摸。纵沈香、为榭彩为园，难安著。

高节耸，清名邈。繁李俗，粗桃恶。但山矾行辈，可来参错。六出不妨添羽翼，百花岂愿当头角。尽暗香、疏影了平生，何其乐。

又 再用韵怀安晚

犹记长安，共攀折、琼林仙萼。人已去。年年梅放，怨怀谁托。和靖吟魂应未醒，补之画手何能摸。更堪怜、老子此时来，愁难著。

云昼晚，烟宵邈。春欲近，风偏恶。早阑干片片，飘零相错。邂逅聊拚花底醉，迟留莫管城头角。且起居、魏卫国夫人，闻安乐。

又 戊午八月十二日赋后圃早梅

问信江梅，渐推出、红苞绿萼。堪爱处，平生怀抱，岁寒为托。瘦骨皱皮犹老硬，孤标独韵难描摸。怕东君、压往等春来，鞭先著。

止渴事，风烟邈。和羹事，风波恶。想翠禽啁哳，笑他都错。争似花开颓醉玉，月天更引霜天角。便一年、强作十年人，山中乐。

又 上巳后日即事

寒食清明，叹人在、天涯海角。饶锦绣，十洲装就，只成离索。岁去已空莺燕侣，年来尽负鸥鳧约。想南溪、溪水一篙深，孤舟泊。

天向晚，东风恶。春向晚、花容薄。又荼蘼架底，绿阴成幄。舴艋也闻钲鼓闹，秋千半当笙歌乐。问山公、倒载接甌无，都休却。

又 己未四月九日会四明窗

钉短残花，也随分、红红白白。缘底事，春才好处，又成轻别。芳草凄迷归路远，子规更叫黄昏月。倚阑干、触处是浓愁，凭谁说。

我不厌，尊罍挈。君莫放，笙歌彻。自河南丞相，有兹宾客。一笑何曾千古换，半醺便觉乾坤窄。怕转头、天际望归舟，江山隔。

又 己未庚李制参直翁俾寿之词

午枕神游，晓鸡唱、城关偷度。俄倾里、笋舆伊轧，征夫前路。路入江南天地阔，黄云翠浪千千亩。有皤翁、三五喜相迎，邻田父。

旋策杖，寻幽圃。旋挈榼，陈高俎。疑

此身归去，朱陵丹府。布谷数声惊梦断，纱窗小阵梅黄雨。把人间、万事一般看，投芳醕。

又 和刘右司长翁俾寿之词

回首家园，竹多屋、水还多竹。那更是，千峰凝翠，一溪凝绿。多谢故人相问讯，奚奴步步收珠玉。叹暮林、飞鸟也知还，寻归宿。

遍历了，岳与牧。享过了，官与禄。算平生万事，尽无不足。争奈乞身犹未可，只缘欠种清闲福。想瞿硎、仙子亦相思，山之隈。

念奴娇 咏白莲用宝月韵

一般妙质，笑乐天、夸诧小蛮樊素。万柄参差罗翠扇，全队西方靓女。不假施朱，也非涂碧，所乐惟幽浦。神仙姑射，算来合共游处。

一任冶妓秣姬，采莲歌里，尽是相思苦。花气荷馨清入骨，长傍银河东注。月澹风轻，雾晞烟细，忽洒霏微雨。此时心事，美人泽畔停伫。

又 再和

为嫌涂抹，向万红丛里，澹然凝素。非粉非酥能样别，只是凌波仙女。隋沼浓妆，汉池冶态，争似沧浪浦。净鸥洁鹭，有时飞到佳处。

梦绕太华峰巅，与天一笑，不觉跻攀苦。

十丈藕船游汗漫，何惜浮生孤注。午鼓惊回，依然尘世，扑簌疏窗雨。起来寂寞，倚阑一饷愁伫。

又 三和

白苹影里，向何人可话，平生心素。月魄冰魂凝结就，犹薄湘妃洛女。吴沼芙蓉，陈陂菡萏，散入玄珠浦。采花蜂蝶，雾深都忘归去。

堪笑并蒂霞冠，双头酡脸，只为多情苦。空遣隔江游冶子，撩乱心飞目注。同出泥涂，独标玉质，不是曼陀雨。风清露冷，有人长自迟伫。

又 四和

天然皓质，想当年此种，来从太素，一点红尘都不染，罗列蟾宫玉女。色压苍林，香欺兰畹，肯向闻筝浦。灵龟千岁，有时游漾其处。

应念社结庐山，翻嗤靖节，底事攒眉苦。纽叶为盘花当盏，有酒何妨频注。太液波边，昆明池上，岂必沾金雨。从教同辈，为他皦皦凝伫。

又 戏和仲殊 己未四月二十七日

午飙褪暑，向绿阴深处，引杯孤酌。啼鸟一声庭院悄，日影偷移朱箔。杏落金丸，荷抽碧筒，景物挨排却。虚檐长啸，世缘菌蕈箕箒。

休问雪藕丝蒲，佩兰钿艾，旧梦都高阁。惟有流莺当此际，舌弄笙簧如约。短棹双溪，

么锄三径，归计犹难托。料应猿鹤，近来多怨离索。

八声甘州 麋叶编修俾寿之词

向鄞江、面熟是薰风，吹燕麦皂莢。赖君王洪福，河清海晏，物阜人熙。想见褰帷使者，随处采声诗。羨高禽矰弋，离贴天飞。

飞到苍云深处，便敛收毛羽，望暮林归。可以人不若，划地挂征衣。且招呼、曲生为友，对槐阴、时唱两三卮。今宵好，如钩佳月，放出光辉。

感皇恩 和广德知军韵

老去最难禁，流光如水。甲子从头试□指。年年生日，怕被旁人拈起。若攀儿额，颓龄犹未。

方丈瀛洲，蓝溪碧沚。转眼鲈莼便秋意。君王定许，整顿江头行李。角巾归去也，休里第。

谒金门 枕上闻鹃赋

纱窗晓。杜宇数声声悄。真个不如归去好。天涯人已老。

敲枕欲眠还觉。犹有青灯残照。谩道惜花春起早。家山千里杳。

又 和赵参谋

停画鹢。天外水澄烟碧。莫看遨头人似

织。今年都老色。

最苦今朝离夕。未卜今年归日。生怕晚风消酒力。愁城难借一。

又 和刘制几

山客野。新把朝衙书写。应想江南樵枥下。踏歌鸡黍社。

休问坤牛乾马。大率人生且且。聊唤玉人斟玉斝。莫辞沈醉也。

又 和自昭木香

风韵彻。满架平平铺雪。贾女何郎盟共结。睡浓香更冽。

春去情怀怎说。却喜不闻啼鴂。月夜时来闲蹀躞。故园三载别。

浣溪沙 己未元夕

庆赏元宵只愿情。天公每事秤能平。管教檐溜便收声。

三市海巡那惜夜，九街社火亦争名。权将歌酒作工程。

又 和谦山

春岸春风荻已芽。推排春事到芦花。只应推上鬓边华。

投老未归真左计，久阴得霁且舒怀。红红白白有残葩。

又 再用韵

海棠已绽牡丹芽。犹有东君向上花。不

须惆怅怨春华。

装缀园林新景物，推敲风月旧情怀。也饶浪蕊与浮葩。

又 三用韵

正好江乡笋蕨芽。他乡却看担头花。只将蝶梦付南华。

万事纷纭都入幻，一杯邂逅且忘怀。年年秋卉与春葩。

又 四用韵

雨过池塘水长芽。放开晴日正宜花。十洲三岛撰繁华。

水畔丽人唐客恨，山阴佳客晋人怀。可怜云蕊与风葩。

又 己未三月二十五日赏茶蘼

最好茶蘼白间黄。消他蜂蝶采花忙。春残红粉厌梳妆。

毕卓正思身夜瓮，刘章底用令秋霜。今宵帟枕十分香。

又 再赋

宫额新涂一半黄。蔷薇空自效颦忙。澹然风韵道家妆。

可惜今宵无皓月，尚怜向晓有繁霜。何妨手捻一枝香。

海棠春 己未清明对海棠有赋

海棠亭午沾疏雨。便一饷、胭脂尽吐。

老去惜花心，相对花无语。

羽书万里飞来处。报扫荡、狐嗥兔舞。
濯锦古江头，飞景还如许。

又 再用韵

嫩晴还更宜轻雨。最好处、欲开未吐。
一点聘梅心，千古凭谁语。

脸霞晕锦娇人处。肯浪逐、红围翠舞。
银烛莫高烧，春梦无多许。

又 三用韵

苍龙天矫停今雨。正不待、云吞雾吐。
绝笑大夫松，今古闲言语。

清光冷艳侵人处。漏月影、婆娑自舞。
拟作岁寒人，此愿天应许。

霜天晓角 和叶检阅仁叔韵

倚花傍月。花底歌声彻。最好月筛花影，
花月浸、香奇绝。

双溪秋月洁。桂棹何时发。客里明朝送
客，多少事，且休说。

又

此花此月。一段风流彻。更好参横斗转，
更漏断、人声绝。

有谁秋共洁。篱菊相将发。留取岁寒心
事，待此际、向君说。

又 和刘架阁自昭韵

杯中吸月。桂树飞琼屑。莫道胡床老子，

怕风露、向凄冽。

回首云娥折。老大成痴绝。且醉今宵光景，莫容易、向人说。

又

为花问月。谁把金瑰屑。犹有残英剩蕊，秋向老、香逾冽。

且莫都攀折。有个人愁绝。纵使姮娥念旧，星星鬓、如何说。

又 和赵教授韵

新词唱彻。字字珠玑屑。更有张颠草圣，何止是、成双绝。

金粟如霏雪。扫地为芳席。且令诸公一笑，怕明夜、无此月。

又

小山幽彻。遍地堆香雪。只恐今宵入梦，梦到处、魂孤绝。

八公头已雪。淮南分半席。莫道淹留何事，且长啸、对佳月。

又 戊午十二月望安晚园赋梅上银烛

梅花一簇。花上千枝烛。照出靓妆姿态，看不足、咏不足。

便欲和花宿。却被官身局。借问江南归未，今夜梦、难拘束。

又

己未五月九日，老香堂送监簿侄归，和自昭韵
秋凉佳月。扫尽轻衫热。便欲乘风归去，冰玉界、琼林阙。

全宋词 吴 潜

不须持寸铁。孤吟风措别。且唱东坡水调，清露下、满襟雪。

又 再和

举杯吸月。一洗烦襟热。想见摩诃池上，星斗转、挂银阙。

金吾传漏铁。此时滋味别。阶砌寒蛩声细，携手处、人如雪。

蝶恋花 和处静木香

澹白轻黄纯雅素。一段风流，敲枕疏窗户。夜半香魂飞欲去。伴他月里霓裳舞。

消得留春春且住。不比杨花，轻作沾泥絮。况是环阴成幄处。不愁更被红妆妒。

朝中措 和自昭韵

春空一鸟落云干。只遣客心酸。芍药牡丹时候，午窗轻暖轻寒。

流光冉冉，清尊易倒，青镜难看。谩道华堂深院，谁怜凤只鸕单。

又 再用韵

可人想见倚庭干。嚼句有甘酸。休问沈腰潘鬓，何妨岛瘦郊寒。

时光转眼，兔葵燕麦，又是看看。谁念衰翁衰处，春衫晚际尤单。

又 三用韵

杨花撩乱与云干。春事可悲酸。况是雨

荒院落，江南但有春寒。

莺残燕懒，蜂慵蝶褪，谩等闲看。不是无情描貌，奚奴且放安单。

又 四用韵

夜来梦绕宛溪干。啼鸠梦中酸。过了他乡寒食，白鸥划地盟寒。

云溪雨壑，月台风榭，借与人看。得似野僧无系，孤藤杖底挑单。

又 五用韵戏呈

兰皋彻夜树旂干。战渴望梅酸。想有歌姬半臂，更深自可麈寒。

敲门寄曲，惊回蝶梦，旋篝灯看。坛下已收降将，火牛不用田单。

又 老香堂和刘自昭韵

衰翁老大脚犹轻。行到净凉亭。近日方忧多雨，连朝且喜长晴。

谩寻欢笑，翠涛杯满，金缕歌清。况有兰朋竹友，柳词贺句争鸣。

虞美人 和刘制几舟中送监簿韵

东风催客呼前渡。宿鸟投林暮。欲归人送得归人。万叠青山罗列、是愁城。

谁家台榭当年筑。芳草垂杨绿。云深雾暗不须悲。只缘盈虚消息、少人知。

秋霁 己未六月九日雨后赋

阶砌吟蛩，正竹外萧萧，雨骤风驶。凉

浸桃笙，暑消葵扇，借伊一些秋意。枕边茉莉。满尘奁、贮香能腻。也不用，玉骨冰肌，人伴佳眠尔。

谁信此境，渐入华胥，旷然不知，庄蝶谁是。笑邯郸、羈魂客梦，贪他荣贵暂时里。飞鼠扑灯还自坠。展转惊寤，才听禁鼓三敲，夜声寥阒，又般滋味。

洞仙歌

□□□□，□□□□瘦。□□□□□□
酒。□□深，碎蕊残萼都收，归簟枕，谁道
梳囊敢就。

月边偏爱惜，冰玉肌肤，应对姮娥共搔首。疑怪得中原，讹道天花，胡尘后、可堪怀旧。且海国、浮沈醉花心，喜近日烽烟，渐消亭候。

又 三用韵

冠儿遍簇，那时人消瘦。玉笋琼卮劝君酒。是清凉境界，露湿烟凝，香更重，非是沈檀合就。

四窗花满砌，争似家山，橙蟹将肥重回首。花亦为君怜，草木禽鱼，相思处、莫如乡旧。更西风、溪莼与江鲈，想别墅樵渔，费他侦候。

小重山 己未六月十四日老香堂前月台玩月

碧霄如水月如钲。今宵知为我，特分明。

全宋词 吴 潜

冰壶玉界两三星。清露下，渐觉湿衣轻。
高树点流萤。秋声还又动，客心惊。吾
家水月寄昭亭。归去也，天岂太无情。

醉桃源

东风阑槛两三亭。游人步晚晴。蜂回蝶
转得能轻。忽然春意生。
花未老，酒须倾。劝君休独醒。古来我
辈最钟情。举头百舌声。

青玉案 己未三月六日四明窗会客

流芳只怕春无几。拚夜饮、更才二。不
用追他欢乐事。绮窗朱户，燕帷莺馆，多少
人憔悴。
踏歌梦想江南市。管春尽、扁舟放行李。
寒食休倾游子泪。归去来兮，不如归去，铁
定知今是。

点绛唇 己未三月末浣木香亭赋

岸舫扁舟，江南有个人归老。簇新亭沼。
分付还他了。
凝伫晴空，一抹天边鸟。嗟潦倒。去多
来少。莫问钟昏晓。

清平乐 和刘制几

轻轻却暑。只是些儿雨。喜看新抽麻与

芒。他家烟水墅。

晚山放出青青。是谁簸弄阴晴。老子何时去也，只应露湿金茎。

渔家傲 和刘制几

每日困慵当午昼。出来便解双眉皱。一带朦胧烟雨岫。山翁瘦。林泉纵好他园囿。

一见此君如话旧。玉版老师呼唤候。万立琅玕争劝酒。踌躇久。清风收拾归怀袖。

又 再用前韵

遍阅芳园闲半昼。残花尚有榴裙皱。倦鸟投林云返岫。人影瘦。可怜身世为他囿。

燕子飞来还忆旧。回头又是梅黄候。且尽一杯昌歜酒。凝睇久。晚风细雨沾衫袖。

柳梢青 戊午十二月十五日安晚园和刘自昭

绿野平泉，古来人事，空里飞花。月榭风亭，荷漪藓石，说郑公家。

老梅傍水茶牙。人那得、光阴似他。万种思量，百年倒断，付与残霞。

又 己未元夕

好把元宵。良辰美景，暮暮朝朝。万盏华灯，一轮明月，燕管秦箫。

何人帕坠鲛绡。有玉凤、金鸾绣雕。目下欢娱，眼前烦恼，只在今宵。

贺圣朝 己未三月六日

捷书夜半甘泉去。报天骄膏斧。摩空铜
垒，阗流瞿滟，扫清云雾。

楼兰飞馘，焉耆授首，谩夸称前古。须
知开庆，太平千载，方从今数。

浪淘沙 戊午中秋和刘自昭

望月眼穿东。云幕千重。有时推出赖他
风。恰似玉环犹未寤，得恁玲珑。

谁在华山峰。一半天中。君逾五十我成
翁。未必明年如此夜，笑口难逢。

贺新郎 玩月

汲水驱炎热。晚些儿、披衣露坐，待他
凉月。俄顷银盘从海际，推上璇霄壁阙。尽
散作、满怀冰雪。万里河潢收卷去，掩长庚、
弧矢光都灭。一大片，琉璃揭。

玉兔捣药何时歇。几千年、阴晴隐现，
团圆亏缺。月缺还圆人但老，重换朱颜无诀。
想上日、嫦娥心别。且吸琼浆斟北斗，尽今
来、古往俱休说。香茉莉，正清绝。

又

月绽浮云里。未须臾、长风扫荡，碧空
如水。谁在冰壶玉界上，眇视征蛮战蚁。便
弃掷、尘寰脱屣。絺葛清冷襟袖冷，露华浓、

全宋词 吴 潜

暗袭人肌理。和酷暑，争些气。

谯楼漏转三更二。夜沈沈、经星纬宿，
换垣移市。万籁渐生秋意思，时节那堪屈指。
奈投老、未酬归计。矫首高天天不应，忽林
梢、睡鹊惊飞起。同一梦，我与尔。

鹊桥仙 己未七夕

银河半隐，玉蟾高挂，已觉炎光向后。
穿针楼上未眠人，应自把、荷花揉揉。

双星缥缈，霎时聚散，肯向鹊桥回首。
原来一岁一番期，却捱得、天长地久。

又

馨香饼饵，新鲜瓜果，乞巧千门万户。
到头人事控抟难，与拙底、无多来去。

痴儿妄想，夜看银汉，要待云车飞度。
谁知牛女已尊年，又那得、欢娱意绪。

秋夜雨 和韵刘制几立秋夜观月，喜雨

不嫌天上云遮月。雨来正是双绝。雷公
驱电母，尽收卷、十分袞热。

三更又报初秋了，少待他、西风凄冽。
灵悟话头莫说。且唱饮、刘郎一阕。

又

客有道秋夜雨古词，因用其韵，而不知角之为
阁也。并付一笑

云头电掣如金索。须臾天尽帷幕。一凉
恩到骨，正骤雨、盆倾檐角。

桃笙今夜难禁也，赖醉乡、情分非薄。
清梦何处托。又只是、故园篱落。

又 再和

单于系颈须长索。捷书新上油幕。尽沈
边柝也，更底问、悲笳哀角。

衰翁七十迎头了，先自来、声利都薄。
归计犹未托。又一叶、西风吹落。

又 己未八月二日新桃源和韵

吴翁里第还巾角。不妨天地席幕。家僮
归报道，快酿酒、休教醺薄。

相逢聚散应搔首，且趁时、一笑为乐。
人世大都濩落。更莫问。是非今昨。

又

西风半入孤城角。人生归燕巢幕。倦翁
衰甚也，又不是、官卑禄薄。

收绳卷索今番稳，尽一丘一壑足乐。还
是远空雁落。报宛句、溪光犹昨。

又

晚来小雨鸣檐角。又还烟障云幕。四明
窗透荡，渐夜永、练衫轻薄。

候虫但要吟教老，不管人、老欠欢乐。
闲看烛花烬落。浮世事、转头成昨。

生查子 己未八月二日四明窗和韵

坐临芳沼边，荷气侵衣湿。唧唧暗蛩鸣，
点点流萤入。

人生歧路中，底用杨朱泣。一笑倚阑干，
颓玉当风立。

又

夜夜云气浮，带得香烟湿。万籁本无情，
一一秋声入。

须臾离合间，应笑儿曹泣。新雨涨鄞江，
明日桅樯立。

西河 和旧韵

都会地。东南盛府堪记。蓬莱缥缈十洲
中，雉城拥起，凭高一盼大江横，遥连沧海
无际。

壁甬众山翠倚。赤龙、白鹞争系。风帆
指顾便青齐，势雄万垒。越栖吴沼古难凭，
兴亡都付流水。

画堂绮屋锦绣市。是洛阳、耆旧州里。
富贵荣华当世。问昔年、贺老疏狂，何事轻
寄平生、烟波里。

桂枝香

三年海国。又荏苒素秋，天净如沐。凄
砌寒蛩暗语，杵声相续。梧桐一叶西风里，
对斜阳、好个团簇。老香堂畔，苍然古桧，
无限心曲。

叹石室、棋方半局。便时换人非，光景
能蹙。千古鸱夷，尚恐欠些归宿。倚空笑把
轮云事，付坤牛、乾马征逐。且巴重九，昭

亭句溪，杖藜巾幅。

南乡子 和韵，己未八月十日郊行

野思浩难收。坐看渔舟度远洲。芦苇已
雕荷已败，风飏。桂子飘香八月头。

归计这回酬。犹及家山一半秋。虽则家
山元是客，浮休。有底欢娱有底愁

又

野景有谁收。只在苍鸥白鹭洲。风树飘
摇云树暗，衣飏。目断青天天际头。

壮志世难酬。丹桂红渠又晚秋。多少心
情多少事，都休。载取江湖一片愁。

行香子

开庆己未八月十夜，同官小饮逸老堂，李直翁
制参出示东坡题钓台行香子，走笔和韵

世事尘轻。宠辱何惊。□不须、更问君
平。一帆客棹，几曲渔汀。正年华晚，露华
澹，月华明。

休论烟阁，莫说云屏。算惟堪、瓜种东
陵。驹阴短景，蜗角浮名。但岁难留，身难
健，鬓难青。

秋夜雨 依韵戏赋傀儡

腰棚傀儡曾悬索。粗瞞凭一层幕。施呈
精妙处，解幻出、蛟龙头角。

全宋词 吴 潜

谁知鲍老从旁笑，更郭郎、摇手消薄。
歧路难准托。田稻熟、只宜村落。

糖多令 答和梅府教

鸥鹭水中洲。夕阳天际流。倚西风、底
处危楼。若使中秋无好月，虚过了、一年秋。

举眼望云头。蟾光一线不。想嫦娥、自
古多愁。安得仙师呼鹤驾，将我去、广寒游。

南乡子 答和惠计院

黄耳讯初收。为说鸥汀与鹭洲。争问主
人归近远，飕飕。定是登高九月头。

有酒且相酬。莫管西风满鬓秋。今日是
今明日古，休休，转首鄞江总别愁。

诉衷情 和韵

今宵分破鹊沦秋。孤客兴何悠。要向云
中邀月，真个是呆头。

风阵紧，电光流。雨声飕。嫦娥应道，
未卜明年。是乐还愁。

水调歌头 己未中秋无月

今岁月和桂，不肯作中秋。一年惟此佳
节，底事白教休。我已侵寻七秩，况复轮謁
万感，合恨更分愁。先自无聊赖，雨意得能

稠。

天柱峰，知何处，老难游。痴云如妒，不知弦管可吹不。安得风姨扫荡，推出团圆月姊，便遣桂香浮。世事十常九，不使展眉头。

又

和梅翁韵预赋山中乐，己未中秋中浣书于老香堂

已是三堪乐，更是百无忧。山朋溪友呼酒，互劝复争酬。钓水肥鲜鳊鳊，采树甘鲜梨栗，稷秠一齐收。树底飞轻盖，溪上放轻舟。

笑鸱夷，名已谢，利还谋。蜗蝇些小头角，何事被渠钩。春际鹭翻蝶舞，秋际猿啼鹤唳，物我共悠悠。倚棹明当发，归梦落三洲。

又

老子百般足，无事可闲忧。几年思返林壑，今日愿方酬。潦倒戏衫舞袖，郎讲门槌拍板，端的这回收。日月两浮毂，身世一虚舟。

想鹤鹤，与鸿鹄，不相谋。惊鳞万里深逝，谁肯更吞钩。醉则北窗高卧，醒则南园行乐，莫莫更悠悠。云在山中谷，月在水中洲。

又

若说故园景，何止可消忧。买邻谁欲来住，须把万金酬。屋外泓澄是水，水外阴森

是竹，风月尽兜收。柳径荷漪畔，灯火系渔舟。

且东皋，田二顷，稻粱谋。竹篱茅舍，窗户不用玉为钩。新擘黄鸡肉嫩，新斫紫螯膏美，一醉自悠悠。巴得春来到，芦笋长沙洲。

又

且尽一杯酒，莫问百年忧。胸中多少磊块，老去已难酬。见说旄头星落，半夜天骄陨坠，玉垒阵云收。世运回如此，稳泛辋川舟。

鸥鹭侣，猿鹤伴，为吾谋。主人归也，正是重九月如钩。便把三程为两，更趲两程为一，尚恐是悠悠。旁有渔翁道，肯负白苹洲。

又

处处羊肠路，归路是安便。从头点检身世，今日岂非天。未论分封邦国，未论分符乡国，晚节且圆全。但觉君恩重，老泪忽潸然。

谢东山，裴绿野，李平泉。从今许我，攀附诸老与齐肩。更得十年安乐，便了百年光景，不是谩归田。谨勿伤离别，聊共醉觥船。

浣溪沙 和桃源韵

半饷西风暖换凉。岩花月魄衬云裳。一杯旋擘翠橙香。

旧酝不妨排日醉，新筍尚可去时尝。无
何乡里是吾乡。

谒金门 老香堂和韵

秋已老。又是败荷衰草。客子安排归棹
了。回头烟树渺。

檀板休教歌杳。金兽且教香绕。一醉秋
堂秋夜悄。从他露漏晓。

又 和韵赋茶

汤怕老。缓煮龙芽凤草。七碗徐徐撑腹
了。卢家诗兴渺。

君岂荆溪路杳。我已泾川梦绕。酒兴茶
酣人语悄。莫教鸡聒晓。

又

休怨老。更替北邙荒草。勘破人生都已
了。江湖归兴渺。

盘谷深深杳杳。曲水弯弯绕绕。啼鸟空
山山更悄。钟昏钟又晓。

水调歌头 开庆己未秋社维舟逸老堂口占

倚舵秋江浒，明日片帆轻。从头点检身
世，百事已圆成。及第曾攀龙首，仕宦曾居
鸱阁，衣锦更光荣。若又不知止，天道恐亏
盈。

借称呼，遮俗眼，便归耕。但余心愿，
朝暮香火告神明。一愿君王万寿，次愿干戈

永息。三愿岁丰登。四愿老安乐，疾病免相萦。

又 奉别诸同官

便作阳关别，烟雨暗孤汀。浮屠三宿桑下，犹自不忘情。何况情钟我辈，聚散匆匆草草，真个是云萍。上下四方客，后会渺难凭。

愿诸公，皆衮衮，喜通津。老夫从此归隐，耕钓了余生。若见江南苍舸，更遇江东黄耳，莫惜寄音声。强阁儿女泪，有酒且频倾。

贺新郎 和惠检阅惜别

晚打西江渡。便抬头、严城鼓角，乱烟深处。无限珠玑双手接，颇觉奚囊暴富。强载月、空舟回去。劝子不须忧百草，四周维、自著灵鳌柱。亘今古，只如许。

杭州直北还乡路。想山中、猿呼鹿啸，鹭翔鸥舞。尽道翁归真个也，只怕容颜非故。愿从此、耕云钓雨。盘谷幽深空谷杳，但书来、时寄相思句。千里外，镇延伫。

吴 申

七娘子 贺人子晬

君家诸子燕山盛。去年两见门弧庆。银
蜡烧花，宝香熏炷。晬盘珠玉还相映。耳边
好语凭君听。此儿不与群儿并。右执金戈，
左持金印。功名当似王文正。

吴师孟

蜡梅香

锦里阳和，看万木凋时，早梅独秀。珍馆琼楼畔，正绛跗初吐，秾华将茂。国艳天葩，真澹伫、雪肌清瘦。似广寒宫，铅华未御，自然妆就。

凝睇倚朱阑，喷清香暗度，易袭襟袖。好与花为主，宜秉烛、频观泛湘酎。莫待南枝，随乐府、新声吹后。对赏心人，良辰好景，须信难偶。

吴 势 卿

沁园春 寿董宪使

碧瓦霜融，绣阁寒经，春浮寿杯。羨华年七帙，人生稀有，新阳七日，天意安排。丹凤门开，黄麾仗立，此际应须召促回。人道是，却暂时绣斧，索笑盐梅。盱江假守非才。犹记得当时传庾台。算良机再会，抠衣来久，归鞭何速，祝寿方才。应与邦人，传为佳话，只为先生诞日来。明年看，是依方九曲，公已三台。

吴 氏

定风波

待得明年重把酒。携手。那知无雨又无
风。

吴氏

好事近 妻寿夫

腊近渐知春,已有早梅堪折。况是诞辰佳
宴,拥笙簧罗列。

玉杯休惜十分斟,金炉更频爇。连理愿同
千岁。看蟠桃重结。

全宋词 吴叔

吴叔

声声慢

烟横山腹，雁点秋容。

吴淑姬

小重山 春愁

谢了荼蘼春事休。无多花片子，缀枝头。
庭槐影碎被风揉。莺虽老，声尚带娇羞。
独自倚妆楼。一川烟草浪，衬云浮。不
如归去下帘钩。心儿小，难著许多愁。

惜分飞 送别

岸柳依依拖金缕。是我朝来别处。惟有多
情絮。故来衣上留人住。
两眼啼红空弹与。未见桃花又去。一片
征帆举。断肠遥指苕溪路。

祝英台近 春恨

粉痕销，芳信断，好梦又无据。病酒无
聊，敲枕听春雨。断肠曲曲屏山，温温沈水，
都是旧、看承人处。
久离阻。应念一点芳心，闲愁知几许。
偷照菱花，清瘦自羞觑。可堪梅子酸时，杨
花飞絮，乱莺闹、催将春去。

全宋词 吴淑姬

失调名

尘满妆台。

吴淑姬

长相思令

烟霏霏。雪霏霏。雪向梅花枝上堆。春
从何处回。

醉眼开。睡眼开。疏影横斜安在哉。从
教塞管催。

吴 淑 真

霜天晓角

塞门桂月。蔡琰琴心切。弹到笳声悲处，
千万恨、不能雪。

愁绝。泪还北。更与胡儿别。一片关山
怀抱，如何对、别人说。

吴舜选

蓦山溪

园林何有 ,修竹摇苍翠。春到小桃蹊 ,看
绿满、一池春水。花开日暖 ,儿侄竞追随 ,挑野
蕨 ,网溪鱼 ,有酒多且旨。

去来聚散 ,无必亦无意。说地或谈天 ,更
休问、语言粗细。谁强谁弱 ,谁是又谁非 ,过去
事 ,未来事 ,一枕腾腾睡。

吴文英

琐窗寒

无射商，俗名越调，犯中吕宫，又犯正宫 玉
兰

绀缕堆云，清腮润玉，汜人初见。蛮腥未洗，海客一怀凄惋。渺征槎、去乘阆风，占香上国幽心展。□遗芳掩色，真姿凝澹，返魂骚畹。

一盼。千金换。又笑伴鸱夷，共归吴苑。离烟恨水，梦杳南天秋晚。比来时、瘦肌更销，冷薰沁骨悲乡远。最伤情、送客咸阳，佩结西风怨。

尉迟杯 夹钟商，俗名双调 赋杨公小蓬莱

垂杨径。洞钥启，时见流莺迎。涓涓暗谷流红，应有缃桃千顷。临池笑靥，春色满、铜华弄妆影。记年时、试酒湖阴，褪花曾采新杏。

蛛窗绣网玄经，才石砚开奁，雨润云凝。小小蓬莱香一掬，愁不到、朱娇翠靥。清尊伴、人闲永日，断琴和、棋声竹露冷。笑从

全宋词 吴文英

前、醉卧红尘，不知仙在入境。

渡江云三犯

中吕商，俗名小石调 西湖清明

羞红颦浅恨，晚风未落，片绣点重茵。
旧堤分燕尾，桂棹轻鸥，宝勒倚残云。千丝怨碧，
渐路入、仙坞迷津。肠漫回，隔花时见，背面楚腰身。

逡巡。题门惆怅，堕履牵萦，数幽期难准。
还始觉、留情缘眼，宽带因春。明朝事与孤烟冷，
做满湖、风雨愁人。山黛暝，尘波澹绿无痕。

三部乐 黄钟商，俗名大石调 赋姜石帚渔隐

江帆初飞，荡万里素云，际空如沐。咏情吟思，
不在秦筝金屋。夜潮上、明月芦花，傍钓蓑梦远，
句清敲玉。翠罽汲晓，欸乃一声秋曲。

越装片篷障雨，瘦半竿渭水，鹭汀幽宿。那知
暖袍挟锦，低帘笼烛。鼓春波、载花万斛。帆鬣转、
银河可掬。风定浪息，苍茫外、天浸寒绿。

霜叶飞 黄钟商 重九

断烟离绪。关心事，斜阳红隐霜树。半壶秋水荐
黄花，香噀西风雨。纵玉勒、轻飞

迅羽。凄凉谁吊荒台古。记醉蹋南屏，彩扇
咽、寒蝉倦梦，不知蛮素。

聊对旧节传杯，尘笺蠹管，断阙经岁慵
赋。小蟾斜影转东篱，夜冷残蛩语。早白发、
缘愁万缕。惊飙从卷乌纱去。漫细将、茱萸
看，但约明年，翠微高处。

瑞鹤仙 林钟羽，俗名高平调

泪荷抛碎璧。正漏云筛雨，斜捎窗隙。
林声怨秋色。对小山不迭，寸眉愁碧。凉欺
岸帻。暮砧催、银屏翦尺。最无聊、燕去堂
空，旧幕暗尘罗额。

行客。西园有分，断柳凄花，似曾相识。
西风破屐。林下路，水边石。念寒蛩残梦，
归鸿心事，那听江村夜笛。看雪飞、苹底芦
梢，未如鬓白。

又

晴丝牵绪乱。对沧江斜日，花飞人远。
垂杨暗吴苑。正旗亭烟冷，河桥风暖。兰情
蕙盼。惹相思、春根酒畔。又争知、吟骨萦
销，渐把旧衫重翦。

凄断。流红千浪，缺月孤楼，总难留燕。
歌尘凝扇。待凭信，拌分钿。试挑灯欲写，
还依不忍，笺幅偷和泪卷。寄残云、剩雨蓬
莱，也应梦见。

又 赠丝鞋庄生

藕心抽莹茧。引翠针行处，冰花成片。
金门从回辇。两玉皂飞上，绣绒尘软。丝绠

侍宴。曳天香、春风宛转。傍星辰、直上无声，缓蹑素云归晚。

奇践。平康得意，醉踏香泥，润红沾线。良工诧见。吴蚕唾，海沈檀。任真珠装缀，春申客屐，今日风流雾散。待宣供、禹步宸游，退朝燕殿。

又 丙午重九

乱云生古峤。记旧游惟怕，秋光不早。人生断肠草。叹如今摇落，暗惊怀抱。谁临晚眺。吹台高、霜歌缥缈。想西风、此处留情，肯著故人衰帽。

闻道。萸香西市，酒熟东邻，浣花人老。金鞭骖袞。追吟赋，倩年少。想重来新雁，伤心湖上，销减红深翠窈。小楼寒、睡起无聊，半帘晚照。

又 寿史云麓

记年时茂苑。正画堂凝香，璇奎初焕。天边岁华转。向九重春近，仙桃传宴。银罍翠管。宝香飞、蓬莱小殿。荷玉皇、恩重千秋，翠麓峻齐云汉。

须看。鸿飞高处，地阔天宽。弋人空羡。梅清水暖。苕溪上，几吟卷。算金门听漏，玉墀班早，赢得风霜满面。总不如、绿野身安，镜中未晚。

又 癸卯岁寿方蕙岩寺簿

辘轳春又转。记旋草新词，江头凭雁。乘槎上银汉。想车尘才踏，东华红软。何时赐见。漏声移、深宫夜半。问莼鲈、今几西

风，未觉岁华迟晚。

一片。丹心白发，露滴研朱，雅陪清宴。班回柳院。蒲团底，小禅观。望罍罍明月，初圆此夕，应共婵娟茂苑。愿年年、玉兔长生，耸秋井干。

又 钱郎纠曹之严陵

夜寒吴馆窄。渐酒阑烛暗，犹分香泽。轻帆展为翮。送高鸿飞过，长安南陌。渔矶旧迹。有陈蕃、虚床挂壁。掩庭扉，蛛网黏花，细草静摇春碧。

还忆。洛阳年少，风露秋繁，岁华如昔。长吟堕帻。暮潮送，富春客。算玉堂不染，梅花清梦，宫漏声中夜直。正逋仙、清瘦黄昏，几时觅得。

又 赠道女陈华山内夫人

彩云栖翡翠。听凤笙吹下，飞辇天际。晴霞翦轻袂。澹春姿雪态，寒梅清泚。东皇有意。旋安排、阑干十二。早不知、为雨为云，尽日建章门闭。

堪比。红绡纤素，紫燕轻盈，内家标致。游仙旧事。星斗下，夜香里。□华峰□□，纸屏横幅，春色长供午睡。更醉乘、玉井秋风，采花弄水。

满江红 夷则宫、俗名仙吕宫 澱山湖

云气楼台，分一派、沧浪翠蓬。开小景、玉盆寒浸，巧石盘松。风送流花时过岸，浪摇晴练欲飞空。算蛟宫、祇隔一红尘，无路

通。

神女驾，凌晓风。明月佩，响丁东。对两蛾犹锁，怨绿烟中。秋色未教飞尽雁，夕阳长是坠疏钟。又一声、欸乃过前岩，移钓篷。

又 甲辰岁盘门外寓居过重午

结束萧仙，啸梁鬼、依还未灭。荒城外、无聊闲看，野烟一抹。梅子未黄愁夜雨，榴花不见簪秋雪。又重罗、红字写香词，年时节。

帘底事，凭燕说。合欢缕，双条脱。自香消红臂，旧情都别。湘水离魂菰叶怨，扬州无梦铜华阙。倩卧箫、吹裂晚天云，看新月。

解连环 夷则商，俗名商调

暮檐凉薄。疑清风动竹，故人来邈。渐夜久、闲引流萤，弄微照素怀，暗呈纤白。梦远双成，凤笙杳、玉绳西落。掩綌帷倦入，又惹旧愁，汗香阑角。

银瓶恨沈断索。叹梧桐未秋，露井先觉。抱素影、明月空闲，早尘损丹青，楚山依约。翠冷红衰，怕惊起、西池鱼跃。记湘娥、绛绡暗解，褪花坠萼。

又 留别姜石帚

思和云结。断江楼望睫，雁飞无极。正岸柳、衰不堪攀，忍持赠故人，送秋行色。岁晚来时，暗香乱、石桥南北。又长亭暮雪，

点点泪痕，总成相忆。

杯前寸阴似掷。几酬花唱月，连夜浮白。省听风、听雨笙箫，向别枕倦醒，絮扬空碧。片叶愁红，趁一舸、西风潮汐。叹沧波、路长梦短，甚时到得。

夜飞鹊 黄钟商 蔡司户席上南花

金规印遥汉，庭浪无纹。清雪冷沁花薰。天街曾醉美人畔，凉枝移插乌巾。西风骤惊散，念梭悬愁结，蒂翦离痕。中郎旧恨，寄横竹、吹裂哀云。

空剩露华烟彩，人影断幽坊，深闭千门。浑似飞仙入梦，袜罗微步，流水青苹。轻冰润□，怅今朝、不共清尊。怕云槎来晚，流红信杳，萦断秋魂。

一寸金 中吕商 赠笔工刘衍

秋入中山，臂隼牵卢纵长猎。见骇毛飞雪，章台献颖，臞腰束缟，汤沐疏邑。篔管刊琼牒。苍梧恨、帝娥暗泣。陶郎老、憔悴玄香，禁苑犹催夜俱入。

自叹江湖，雕龙心尽，相携蠹鱼篋。念醉魂悠扬，折钗锦字，黠髯掀舞，流觞春帖。还倚荆溪楫。金刀氏、尚传旧业。劳君为、脱帽篷窗，寓情题水叶。

又

秋压更长，看见姮娥瘦如束。正古花摇

落，寒蛩满地，参梅吹老，玉龙横竹。霜被芙蓉宿。红绵透、尚欺暗烛。年年记、一种凄凉，绣幌金圆挂香玉。

顽老情怀，都无欢事，良宵爱幽独。叹画图难仿，橘村砧思，笠蓑有约，莼洲渔屋。心景凭谁语，商弦重、袖寒转轴。疏篱下、试觅重阳，醉擘青露菊。

绕佛阁

黄钟商 与沈野逸东皋天街卢楼追凉小饮

夜空似水，横汉静立，银浪声杳。瑶镜奁小。素娥乍起、楼心弄孤照。絮云未巧。梧韵露井，偏借秋早。晴暗多少。怕教彻胆，蟾光见怀抱。

浪迹尚为客，恨满长安千古道。还记暗萤、穿帘街语悄。叹步影归来，人鬓花老。紫箫天渺。又露饮风前，凉堕轻帽。酒杯空、数星横晓。

又 赠郭季隐

茜霞艳锦，星媛夜织，河汉鸣杼。红翠万缕。送幽梦与、人闲绣芳句。怨宫恨羽。孤剑漫倚，无限凄楚。□□□□。赋情缥缈、东风扬花絮。

镜里半髯雪，向老春深莺晓处。长闭翠阴、幽坊杨柳户。看故苑离离，城外禾黍。短藜青屨。笑寄隐闲迫，鸡社歌舞。最风流、垫巾沾雨。

拜星月慢

林钟羽 姜石帚以盆莲数十置中庭，宴客其中
绛雪生凉，碧霞笼夜，小立中庭芜地。
昨梦西湖，老扁舟身世。叹游荡，暂赏、吟
花酌露尊俎，冷玉红香爨洗。眼眩魂迷，古
陶洲十里。

翠参差、澹月平芳砌。砖花滉、小浪鱼
鳞起。雾盎浅障青罗，洗湘娥春腻。荡兰烟、
麝馥浓侵醉。吹不散、绣屋重门闭。又怕便、
绿减西风，泣秋檠烛外。

水龙吟 无射商 惠山酌泉

艳阳不到青山，古阴冷翠成秋苑。吴娃
点黛，江妃拥髻，空蒙遮断。树密藏溪，草
深迷市，峭云一片。二十年旧梦，轻鸥素约，
霜丝乱、朱颜变。

龙吻春霏玉溅。煮银瓶、羊肠车转。临
泉照影，清寒沁骨，客尘都浣。鸿渐重来，
夜深华表，露零鹤怨。把闲愁换与，楼前晚
色，棹沧波远。

又 用见山韵饯别

夜分溪馆渔灯，巷声乍寂西风定。河桥
径远，玉箫吹断，霜丝舞影。薄絮秋云，澹
蛾山色，宦情归兴。怕烟江渡后，桃花又泛，
宫沟上、春流紧。

新句欲题还省。透香煤、重牒误隐。西

园已负，林亭移酒，松泉荐茗。携手同归处，玉奴唤、绿窗春近。想骄骢、又踏西湖，二十四番花信。

又 赋张斗墅家古松五粒

有人独立空山，翠髯未觉霜颜老。新香秀粒，浓光绿浸，千年春小。布影参旗，障空云盖，沈沈秋晓。骝苍虬万里，笙吹凤女，骖飞乘、天风袅。

般巧。霜斤不到。汉游仙、相从最早。皴鳞细雨，层阴藏月，朱弦古调。问讯东桥，故人南岭，倚天长啸。待凌霄谢了，山深岁晚，素心才表。

又 寿嗣荣王

望中璇海波新，泛槎又匝银河转。金凤细袅，龙枝声奏，钧箫秋远。南极飞仙，夜来催驾，祥光重见。紫霄承露掌，瑶池荫密，蟠桃秀、螽莲绽。

新栋晴翠凌汉。半凉生、兰檠书卷。绣裳五色，昆台十二，香深帘巷。花萼楼高处，连清晓、千秋传宴。赐长生玉字，鸾回凤舞，下蓬莱殿。

又 寿尹梅津

望春楼外沧波，旧年照眼青铜镜。炼成宝月，飞来天上，银河流影。绀玉钩帘处，横犀麈、天香分鼎。记殷云殿锁，裁花翦露，曲江畔、春风劲。

槐省。红尘昼静。午朝回、吟生晚兴。春霖绣笔，莺边清晓，金狨旋整。阆苑芝仙

貌，生绡对、绿窗深景。弄琼英数点，宫梅信早，占年光永。

又 送万信州

几番时事重论，座中共惜斜阳下。今朝翦柳，东风送客，功名近也。约住飞花，暂听留燕，更攀情话。问千牙过阙，一封入奏，忠孝事、都应写。

闻道兰台清暇。载鸱夷、烟江一舸。贞元旧曲，如今谁听，惟公和寡。儿骑空迎，舜瞳回盼，玉阶前借。便急回暖律，天边海上，正春寒夜。

又 过秋壑湖上旧居寄赠

外湖北岭云多，小园暗碧莺啼处。朝回胜赏，墨池香润，吟船系雨。霓节千妃，锦帆一箭，携将春去。算归期未卜，青烟散后，春城咏、飞花句。

黄鹤楼头月午。奏玉龙、江梅解舞。薰风紫禁，严更清梦，思怀几许。秋水生时，赋情还在，南屏别墅。看章台走马，长堤种取，柔丝千树。

又 癸卯元夕

澹云笼月微黄，柳丝浅色东风紧。夜寒旧事，春期新恨，眉山碧远。尘陌飘香，绣帘垂户，趁时妆面。钿车催去急，珠囊袖冷，愁如海、情一线。

犹记初来吴苑。未清霜、飞惊双鬓。嬉游是处，风光无际，舞葱歌茜。陈迹征衫，老容华镜，欢惊都尽。向残灯梦短，梅花晓

角，为谁吟怨。

又 寿梅津

杜陵折柳狂吟，砚波尚湿红衣露。仙桃宴早，江梅春近，还催客句。宫漏传鸡，禁门嘶骑，宦情熟处。正黄编夜展，天香字暖，春葱翦、红蜜炬。

宫帽鸾枝醉舞。思飘扬、矍仙风举。星罗万卷，云驱千阵，飞毫海雨。长寿杯深，探春腔稳，江湖同赋。又看看、便系金狨莺晓，傍西湖路。

玉烛新 夹钟商

花穿帘隙透。向梦里销春，酒中延昼。嫩篁细掐，相思字、堕粉轻黏练袖。章台别后，展绣络、红蔫香旧。□□□，应数归舟，愁凝画阑眉柳。

移灯夜语西窗，逗晓帐迷香，问何时又。素纨乍试，还忆是、绣懒思酸时候。兰清蕙秀。总未比、蛾眉螭首。谁诉与，惟有金笼，春簧细奏。

解语花 林钟羽 梅花

门横皱碧，路入苍烟，春近江南岸。暮寒如翦。临溪影、一一半斜清浅。飞霏弄晚。荡千里、暗香平远。端正看，琼树三枝，总似兰昌见。

酥莹云容夜暖。伴兰翘清瘦，箫凤柔婉。

冷云荒翠，幽栖久、无语暗申春怨。东风半面。料准拟、何郎词卷。欢未阑，烟雨青黄，宜昼阴庭馆。

又 立春风雨中钱处静

檐花旧滴，帐烛新啼，香润残冬被。澹烟疏绮。凌波步、暗阻傍墙挑荠。梅痕似洗。空点点、年华别泪。花鬓愁，钗股笼寒，彩燕沾云腻。

还斗辛盘葱翠。念青丝牵恨，曾试纤指。雁回潮尾。征帆去、似与东风相避。泥云万里。应翦断、红情绿意。年少时，偏爱轻怜，和酒香宜睡。

庆春宫 无射商 越中钱得闲园

春屋围花，秋池沿草，旧家锦藉川原。莲尾分津，桃边迷路，片红不到人间。乱篁苍暗，料惜把、行题共删。小晴帘卷，独占西墙，一镜清寒。

风光未老吟潘。嘶骑征尘，只付凭阑。鸣瑟传杯，辟邪翻烬，系船香斗春宽。晚林青外，乱鸦著、斜阳几山。粉消莫染，犹是秦宫，绿扰云鬟。

又

残叶翻浓，余香栖苦，障风怨动秋声。云影摇寒，波尘销腻，翠房人去深扃。昼成凄黯，雁飞过、垂杨转青。阑干横暮，酥印痕香，玉腕谁凭。

菱花乍失娉婷。别岸围红，千艳倾城。

全宋词 吴文英

重洗清杯，同追深夜，豆花寒落愁灯。近欢成梦，断云隔、巫山几层。偷相怜处，熏尽金篝，销瘦云英。

塞垣春 丙午岁旦

漏瑟侵琼管。润鼓借、烘炉暖。藏钩怯冷，画鸡临晓，邻语莺啭。殢绿窗、细咒浮梅盏。换蜜炬、花心短。梦惊回，林鸦起，曲屏春事天远。

迎路柳丝裙，看争拜东风，盈灞桥岸。髻落宝钗寒，恨花胜迟燕。渐街帘影转。还似新年，过邮亭、一相见。南陌又灯火，绣囊尘香浅。

宴清都

夹钟羽，俗名中吕调饯荣王仲亨还京

翠羽飞梁苑。连催发，暮檣留话江燕。尘街堕珥，瑶扉乍钥，彩绳双贯。新烟暗叶成阴，效翠妩、西陵送远。又趁得、蕊露天香，春留建章花晚。

归来笑折仙桃，琼楼宴萼，金漏催箭。兰亭秀语，乌丝润墨，汉宫传玩。红斝醉玉天上，倩凤尾、时题画扇。问几时、重驾巫云，蓬莱路浅。

又 连理海棠

绣幄鸳鸯柱。红情密，膩云低护秦树。芳根兼倚，花梢钿合，锦屏人妒。东风睡足

交枝，正梦枕、瑶钗燕股。障滟蜡、满照欢丛。
螿冷落差度。

人间万感幽单，华清惯浴，春盎风露。连鬟并暖，同心共结，向承恩处。凭谁为歌长恨，暗殿锁、秋灯夜语。叙旧期、不负春盟，红朝翠暮。

又 寿荣王夫人

万壑蓬莱路。非烟霁。五云城阙深处。璇源媲凤，瑶池种玉，炼颜金姥。长虹梦入仙怀，便洗日、铜华翠渚。向瑞世、独占长春，蟠桃正饱风露。

殷勤汉殿传卮，隔江云起，暗飞青羽。南山寿石，东周宝鼎，千秋巩固。何时地拂龙衣，待迎入、玉京阊圃。看□□、剩拥湖船，三千彩御。

又 寿秋壑

翠匝西门柳。荆州昔，未来时正春瘦。如今剩舞，西风旧色，胜东风秀。黄梁露湿秋江，转万里、云樯蔽昼。正虎落、马静晨嘶，连营夜沈刁斗。

含章换几桐阴，千官邃幄，韶凤还奏。席前夜久，天低宴密，御香盈袖。星槎信约长在，醉兴渺、银河赋就。对小弦、月挂南楼，凉浮桂酒。

又 送马林屋赴南宫，分韵得动字

柳色春阴重。东风力，快将云雁高送。书檠细雨，吟窗乱雪，井寒笔冻。家林秀橘霜老，笑分得、蟾边桂种。应茂苑、斗转苍

龙，唯潮献奇吴凤。

玉眉暗隐华年，凌云气压，千载云梦。名笺澹墨，恩袍翠草，紫骝青鞵。飞香杏园新句，眩醉眼、春游乍纵。弄喜音、鹊绕庭花，红帘影动。

又

万里关河眼。愁凝处，渺渺残照红敛。天低远树，潮分断港，路回淮甸。吟鞭又指孤店。对玉露金风送晚。恨自古、才子佳人，此景此情多感。

吴王故苑。别来良朋雅集，空叹蓬转。挥毫记烛，飞觞赶月，梦销香断。区区去程何限。倩片纸、丁宁过雁。寄相思，寒雨灯窗，芙蓉旧院。

齐天乐

黄钟宫，俗名正宫 与冯深居登禹陵

三千年事残鸦外，无言倦凭秋树。逝水移川，高陵变谷，那识当时神禹。幽云怪雨。翠萍湿空梁，夜深飞去。雁起青天，数行书似旧藏处。

寂寥西窗久坐，故人慳会遇，同翦灯语。积藓残碑，零圭断壁，重拂人间尘土。霜红罢舞。漫山色青青，雾朝烟暮。岸锁春船，画旗喧赛鼓。

又 白酒自酌有感

芙蓉心上三更露，茸香漱泉玉井。自洗银舟，徐开素酌，月落空杯无影。庭阴未暝。

度一曲新蝉，韵秋堪听。瘦骨侵冰，怕惊纹
簟夜深冷。

当时湖上载酒，翠云开处共，雪面波镜。
万感琼浆，千茎鬓雪，烟锁蓝桥花径。留连
暮景。但偷觅孤欢，强宽秋兴。醉倚修篁，
晚风吹半醒。

又 齐云楼

凌朝一片阳台影，飞来太空不去。栋与
参横，帘钩斗曲，西北城高几许。天声似语。
便阖阖轻排，虹河平溯。问几阴晴，霸吴平
地漫今古。

西山横黛瞰碧，眼明应不到，烟际沈鹭。
卧笛长吟，层霾乍裂，寒月溟蒙千里。凭虚
醉舞。梦凝白阑干，化为飞雾。净洗青红，
骤飞沧海雨。

又

新烟初试花如梦，疑收楚峰残雨。茂苑
人归，秦楼燕宿，同惜天涯为旅。游情最苦。
早柔绿迷津，乱莎荒圃。数树梨花，晚风吹
堕半汀鹭。

流红江上去远，翠尊曾共醉，云外别墅。
澹月秋千，幽香巷陌，愁结伤春深处。听歌
看舞。驻不得当时，柳蛮樱素。睡起恹恹，
洞箫谁院宇。

又

毗陵两别驾招饮丁园索赋（题据订补续记》增
补）

竹深不放斜阳度，横披澹墨林沼。断莽平烟，残莎剩水，宜得秋深才好。荒亭旋扫。正著酒寒轻，弄花春小。障锦西风，半围歌袖半吟草。

独游清兴易懒，景饶人未胜，乐事长少。柳下交车，尊前岸帻，同抚云根一笑。秋香未老。渐风雨西城，暗敲客帽。背月移舟，乱鸦溪树晓。

又 会江湖诸友泛湖

曲尘犹沁伤心水，歌蝉暗惊春换。露藻清啼，烟萝澹碧，先结湖山秋怨。波帘翠卷。叹霞薄轻绡，汜人重见。傍柳追凉，暂疏怀袖负纨扇。

南花清斗素靥，画船应不载，坡静诗卷。泛酒芳筒，题名蠹壁，重集湘鸿江燕。平芜未翦。怕一夕西风，镜心红变。望极愁生，暮天菱唱远。

又

烟波桃叶西陵路，十年断魂潮尾。古柳重攀，轻鸥聚别，陈迹危亭独倚。凉飈乍起。渺烟碛飞帆，暮山横翠。但有江花，共临秋镜照憔悴。

华堂烛暗送客，眼波回盼处，芳艳流水。素骨凝冰，柔葱蘸雪，犹忆分瓜深意。清尊未洗。梦不湿行云，漫沾残泪。可惜秋宵，乱恐疏雨里。

又 寿荣王夫人

玉皇重赐瑶池宴，琼筵第二十四。万象

澄秋，群裾曳玉，清澈冰壶人世。鳌峰对起。许分得钧天，凤丝龙吹。翠羽飞来，舞鸾曾赋曼桃字。

鹤胎曾梦电绕，桂根看骤长，玉干金蕊。少海波新，芳茅露滴，凉入堂阶彩戏。香霖乍洗。拥莲媛三千，羽裳风佩。圣姥朝元，炼颜银汉水。

又 赠姜石帚

余香才润鸾绡汗，秋风夜来先起。雾锁林深，蓝浮野阔，一笛渔蓑鸥外。红尘万里。就中泐银河，冷涵空翠。岸觜沙平，水杨阴下晚初舣。

桃溪人住最久，浪吟谁得到，兰蕙疏绮。砚色寒云，签声乱叶，蕲竹纱纹如水。笙歌醉里。步明月丁东，静传环佩。更展芳塘，种花招燕子。

丹凤吟 无射商 赋陈宗之芸居楼

丽景长安人海，避影繁华，结庐深寂。灯窗雪户，光映夜寒东壁。心雕鬓改，镂冰刻水，缥筒离离，风签索索。怕遣花虫蠹粉，自采秋芸熏架，香泛纤碧。

更上新梯窈窕，暮山澹著城外色。旧雨江湖远，问桐阴门巷，燕曾相识。吟壶天小，不觉翠蓬云隔。桂斧月宫三万手，计元和通籍。软红满路，谁聘幽素客。

扫花游 夹钟商 西湖寒食

冷空澹碧，带翳柳轻云，护花深雾，艳

晨易午。正笙箫竞渡，绮罗争路。骤卷风埃，半掩长蛾翠妩。散红缕。渐红湿杏泥，愁燕无语。

乘盖争避处。就解佩旗亭，故人相遇。恨春太妒。溅行裙更惜，凤钩尘污。酌入梅根，万点啼痕暗树。峭寒暮。更萧萧、陇头人去。

又 春雪

水云共色，渐断岸飞花，雨声初峭。步帷素袅。想玉人误惜，章台春老。岫敛愁蛾，半洗铅华未晓。舫轻棹。似山阴夜晴，乘兴初到。

心事春缥缈。记遍地梨花，弄月斜照。旧时斗草。恨凌波路钥，小庭深窈。冻涩琼箫，渐入东风郢调。暖回早。醉西园、乱红休扫。

又 赠芸隐

草生梦碧，正燕子帘帏，影迟春午。倦茶荐乳。看风签乱叶，老沙昏雨。古简蟬篇，种得云根疗蠹。最清楚。带明月自锄，花外幽圃。

醒眼看醉舞。到应事无心，与闲同趣。小山有语。恨逋仙占却，暗香吟赋。暖通书床，带草春摇翠露。未归去。正长安、软红如雾。

又 送春古江村

水园沁碧，骤夜雨飘红，竟空林岛。艳春过了。有尘香坠钿，尚遗芳草。步绕新阴，

渐觉交枝径小。醉深窈。爱绿叶翠圆，胜看花好。

芳架雪未扫。怪翠被佳人，困迷清晓。柳丝系棹。问阊门自古，送春多少。倦蝶慵飞，故扑簪花破帽。酹残照。掩重城、暮钟不到。

又 赋瑶圃万象皆春堂

暖波印日，倒秀影秦山，晓鬟梳洗。步帷艳绮。正梁园未雪，海棠犹睡。藉绿盛红，怕委天香到地。画船系。舞西湖暗黄，虹卧新霁。

天梦春枕被。和风筑东风，宴歌曲水。海宫对起。灿骊光乍湿，杏梁云气。夜色瑶台，禁蜡初传翡翠。唤春醉。问人间、几番桃李。

应天长 夷则商 吴门元夕

丽花斗靛，清麝溅尘，春声遍满芳陌。竟路障空云幕，冰壶浸霞色。芙蓉镜，词赋客。竞绣笔、醉嫌天窄。素娥下，小驻轻镳，眼乱红碧。

前事顿非昔，故苑年光，浑与世相隔。向暮巷空人绝，残灯耿尘壁。凌波恨，帘户寂。听怨写、堕梅哀笛。仁立久，雨暗河桥，谯漏疏滴。

风流子 黄钟商 芍药

金谷已空尘。薰风转、国色返春魂。半

敲雪醉霜，舞低鸾翅，绛笼蜜炬，绿映龙盆。
窈窕绣窗人睡起，临砌脉无言。慵整堕鬟，
怨时迟暮，可怜憔悴，啼雨黄昏。

轻桡移花市，秋娘渡、飞浪溅湿行裙。
二十四桥南北，罗荐香分。念碎劈芳心，
萦思千缕，赠将幽素，偷翦重云。终待凤池归
去，催咏红翻。

又 前题

温柔酣紫曲，扬州路、梦绕翠盘龙。似
日长傍枕，堕妆偏髻，露浓如酒，微醉敲红。
自别楚娇天正远，倾国见吴宫。银烛夜阑，
暗闻香泽，翠阴秋寂，重返春风。

芳期嗟轻误，花君去、肠断妾若为容。
惆怅舞衣叠损，露绮千重。料绣窗曲理，
红牙拍碎，禁阶敲遍，白玉盂空。犹记弄花相
谑，十二阑东。

过秦楼 黄钟商 芙蓉

藻国凄迷，曲澜澄映，怨入粉烟蓝雾。
香笼麝水，腻涨红波，一镜万妆争妒。湘女
归魂。佩环玉冷无声，凝情谁愬。又江空月
堕，凌波尘起，彩鸳愁舞。

还暗忆、钿合兰桡，丝牵琼腕，见的更
怜心苦。玲珑翠屋，轻薄冰绡，稳称锦云留
住。生怕哀蝉，暗惊秋被红衰，啼珠零露。
能西风老尽，羞趁东风嫁与。

法曲献仙音 黄钟商 秋晚红白莲

风拍波惊，露零秋觉，断绿衰红江上。

艳拂潮妆，澹凝冰靥，别翻翠池花浪。过数点斜阳雨，啼绡粉痕冷。

宛相向。指汀洲、素云飞过，清麝洗、玉井晓霞佩响。寸藕折长丝，笑何郎、心似春荡。半掬微凉，听娇蝉、声度菱唱。伴鸳鸯秋梦，酒醒月斜轻帐。

又 放琴客，和宏庵韵

落叶霞翻，败窗风咽，暮色凄凉深院。瘦不关秋，泪缘轻别，情消鬓霜千点。怅翠冷搔头燕，那能语恩怨。

紫箫远。记桃根、向随春渡，愁未洗、铅水又将恨染。粉缟涩离箱，忍重拈、灯夜裁剪。望极蓝桥，彩云飞、罗扇歌断。料莺笼玉锁，梦里隔花时见。

还京乐

黄钟商 友人泛湖，命乐工以箏、笙、琵琶方响迭奏

宴兰渚，促奏丝絃管裂飞繁响。似汉宫人去，夜深独语，胡沙凄哽。对雁斜玫柱，琼琼弄月临秋影。凤吹远，河汉去杳，天风飘冷。

泛清商竟。转铜壶敲漏，瑶床二八青娥，环佩再整。菱歌四碧无声，变须臾、翠翳红暝。叹梨园、今调绝音希，愁深未醒。桂楫轻如翼，归霞时点清镜。

塞翁吟 黄钟商 赠宏庵

草色新宫绶，跨紫陌骄骢。好花是，晚

开红。冷菊最香浓。黄帘绿幕萧萧梦，灯外换几秋风。叙往约，桂花宫。为别翦珍丛。

雕栊。行人去、秦腰褪玉，心事称、吴妆晕浓。向春夜、闺情赋就，想初寄、上国书时，唱入眉峰。归来共酒，窈窕纹窗，莲卸新蓬。

又 钱梅津除郎赴阙

有约西湖去，移棹晓折芙蓉。算才是，称心红。染不尽薰风。千桃过眼春如梦，还认锦叠云重。弄晚色，旧香中。旋撑入深丛。

从容。情犹赋、冰车健笔，人未老、南屏翠峰。转河影、浮槎信早，素妃叫、海月归来，太液池东。红衣卸了，结子成莲，天劲秋浓。

丁香结 夷则商 秋日海棠

香袅红霏，影高银烛，曾纵夜游浓醉。正锦温琼膩。被燕踏、暖雪惊翻庭砌。马嘶人散后，秋风换、故园梦里。吴霜融晓，陡觉暗动偷春花意。

还似。海雾冷仙山，唤觉环儿半睡。浅薄朱唇，娇羞艳色，自伤时背。帘外寒挂澹月，向日秋千地。怀春情不断，犹带相思旧子。

六么令 夷则宫 七夕

露蛩初响，机杼还催织。婺星为情慵懒，

伫立明河测。不见津头艇子，望绝南飞翼。
云梁千尺。尘缘一点，回首西风又陈迹。

那知天上计拙，乞巧楼南北。瓜果几度
凄凉，寂寞罗池客。人事回廊缥缈，谁见金
钗擘。今夕何夕。杯残月堕，但耿银河漫天
碧。

蕙兰芳引

林钟商，俗名歇指调赋藏一家吴郡王画兰

空翠染云，楚山迥、故人南北。秀骨冷
盈盈，清洗九秋润绿。奉车旧畹，料未许、
千金轻价。浅笑还不语，蔓草罗裙一幅。素
女情多，阿真娇重，唤起空谷。弄野色烟姿，
宜扫怨蛾澹墨。光风入户，媚香倾国。湘佩
寒、幽梦小窗春足。

隔浦莲近 黄钟商 泊长桥过重午

榴花依旧照眼。愁褪红丝腕。梦绕烟江
路，汀菰绿薰风晚。年少惊送远。吴蚕老、
恨绪萦抽茧。

旅情懒。扁舟系处，青帘浊酒须换。一
番重午，旋买香蒲浮盏。新月湖光荡素练。
人散。红衣香在南岸。

垂丝钓近

夷则商 云麓先生以画舫载洛花宴客

听风听雨，春残花落门掩。乍倚玉阑，

旋翦天艳。携醉靛。放溯溪游缆。波光撼。映烛花黯澹。

碎霞澄水，吴宫初试菱鉴。旧情顿减。孤负深杯滢。衣露天香染。通夜饮。问漏移几点。

荔枝香近 黄钟商 送人游南徐

锦带吴钩，征思横雁水。夜吟敲落霜红，船傍枫桥系。相思不管年华，唤酒吴娃市。因话、驻马新堤步秋绮。

淮楚尾。暮云送、人千里。细雨南楼，香密锦温曾醉。花谷依然，秀靛偷春小桃李。为语梦窗憔悴。

又 七夕

睡轻时间，晚鹊噪庭树。又说今夕天津，西畔重欢遇。蛛丝暗锁红楼，燕子穿帘处。天上、未比人间更情苦。

秋鬓改，妒月姊、长眉妩。过雨西风，数叶井梧愁舞。梦入蓝桥，几点疏星映朱户。泪湿沙边凝伫。

西河 中吕商 陪鹤林登袁园

春乍霁。清涟画舫融泄。螺云万叠暗凝愁。黛蛾照水。漫将西子比西湖，溪边人更多丽。

步危径、攀艳蕊。掬霞到手红碎。青蛇细折小回廊。去天半咫。画阑日暮起东风，

棋声吹下人世。

海棠藉雨半绣地。正残寒、初御罗绮。
除酒销春何计。向沙头更续，残阳一醉。双
玉杯和流花洗。

浪淘沙慢 夷则商 赋李尚书山园

梦仙到、吹笙路杳，度岫云滑。溪谷冰
绡未裂。金铺昼锁乍掣。见竹静、梅深春海
阔。有新燕、帘底低说。念汉履无声跨鲸远，
年年谢桥月。

曲折。画阑尽日凭热。半屋起玲珑楼阁
畔，缥缈鸿去绝。飞絮飏东风，天外歌阕。
睡红醉缬。还是催、寒食看花时节。

花下苍苔盛罗袜。银烛短、漏壶易竭。
料池柳、不攀春送别。倩玉兔、别捣秋香，
更醉蹋、千山冷翠飞晴雪。

西平乐慢

中吕商 过西湖先贤堂，伤今感昔，泫然出涕
岸压邮亭，路敲华表，堤树旧色依依。
红索新晴，翠阴寒食，天涯倦客重归。叹废
绿平烟带苑，幽渚尘香荡晚，当时燕子，无
言对立斜晖。追念吟风赏月，十载事，梦惹
绿杨丝。

画船为市，天妆艳水，日落云沈，人换
春移。谁更与、苔根洗石，菊井招魂，漫省
连车载酒，立马临花，犹认蔫红傍路枝。歌
断宴阑，荣华露草，冷落山丘，到此徘徊，

细雨西城，羊昙醉后花飞。

瑞龙吟

黄钟商，俗名大石调，犯正平调蓬莱阁

堕虹际。层观翠冷玲珑，五云飞起。玉虬萦结城根，澹烟半野，斜阳半市。

瞰危睇。门巷去来车马，梦游宫蚁。秦鬟古色凝愁，镜中暗换，明眸皓齿。

东海青桑生处，劲风吹浅，瀛洲清泚。山影泛出琼壶，碧树人世。枪芽焙绿，曾试云根味。岩流溅、涎香惯搅，娇龙春睡。露草啼清泪。酒香断到，文丘废隧。今古秋声里。情漫黯、寒鸦孤村流水。半空画角，落梅花地。

又 送梅津

黯分袖。肠断去水流萍，住船系柳。吴宫娇月娆花，醉题恨倚，蛮江豆蔻。

吐春绣。笔底丽情多少，眼波眉岫。新园锁却愁阴，露黄漫委，寒香半亩。

还背垂虹秋去，四桥烟雨，一宵歌酒。犹忆翠微携壶，乌帽风骤。西湖到日，重见梅钿皱。谁家听、琵琶未了，朝骢嘶漏。印剖黄金籀。待来共凭，齐云话旧。莫唱朱樱口。生怕遣、楼前行云知后。泪鸿怨角，空教人瘦。

又 德清清明竞渡

大溪面。遥望绣羽冲烟，锦梭飞练。桃花三十六陂，蛟宫睡起，娇雷乍转。

去如箭。催趁戏旗游鼓，素澜雪溅。东风冷湿蛟腥，澹阴送昼，轻霏弄晚。

洲上青苹生处，斗春不管，怀沙人远。残日半开一川，花影零乱。山屏醉缣，连棹东西岸。阑干倒、千红妆靛，铅香不断。傍暝疏帘卷。翠涟皱净，笙歌未散。簪柳门归懒。犹自有、玉龙黄昏吹怨。重云暗阁，春霖一片。

大酺 无射商 荷塘小隐

峭石帆收，归期差，林沼年销红碧。渔蓑樵笠畔，买佳邻翻盖，浣花新宅。地凿桃阴，天澄藻镜。聊与渔郎分席。沧波耕不碎，似蓝田初种，翠烟生壁。料情属新莲，梦惊春草，断桥相识。

平生江海客。秀怀抱、云锦当秋织。任岁晚、陶篱菊暗，逋冢梅荒，总输玉井尝甘液。忍弃红香叶。集楚裳、西风催著。正明月、秋无极。归隐何处，门外垂杨天窄。放船五湖夜色。

解蹀躞 夷则商

醉云又兼醒雨，楚梦时来往。倦蜂刚著梨花、惹游荡。还作一段相思，冷波叶舞愁红，送人双桨。

暗凝想。情共天涯秋黯，朱桥锁深巷。会稀投得轻分、顿惆怅。此去幽曲谁来，可怜残照西风，半妆楼上。

倒犯 夹钟商 赠黄复庵

茂苑、共莺花醉吟，岁华如许。江湖夜雨。传书问、雁多幽阻。清溪上，惯来往扁舟、轻如羽。到兴懒归来，玉冷耕云圃。按琼箫、赋金缕。

回首词场，动地声名，春雷初启户。枕水卧漱石，数间屋，梅一坞。待共结、良朋侣。载清尊、随花追野步。要未若城南，分取溪隈住。昼长看柳舞。

花犯 中吕商 谢黄复庵除夜寄古梅枝

翦横枝，清溪分影，恹然镜空晓。小窗春到。怜夜冷孀娥，相伴孤照。古苔泪锁霜千点，苍华人共老。料浅雪、黄昏驿路，飞香遗冻草。

行云梦中认琼娘，冰肌瘦，窈窕风前纤缟。残醉醒，屏山外、翠禽声小。寒泉贮、绀壶渐暖，年事对、青灯惊换了。但恐舞、一帘胡蝶，玉龙吹又杳。

又 郭希道送水仙索赋

小娉婷，清铅素靥，蜂黄暗偷晕。翠翘敲鬓。昨夜冷中庭，月下相认。睡浓更苦凄风紧。惊回心未稳。送晓色、一壶葱茜，才知花梦准。

湘娥化作此幽芳，凌波路，古岸云沙遗恨。临砌影，寒香乱、冻梅藏韵。熏炉畔、

旋移傍枕，还又见、玉人垂绀鬢。料唤赏、清华池馆，台杯须满引。

蝶恋花 题华山道女扇

北斗秋横云髻影。莺羽衣轻，腰减青丝剩。一曲游仙闻玉磬。月华深院人初定。
十二阑干和笑凭。风露生寒，人在莲花顶。睡重不知残酒醒。红帘几度啼鸦暝。

又 九日和吴见山韵

明月枝头香满路。几日西风，落尽花如雨。倒照秦眉天镜古。秋明白鹭双飞处。
自摘霜葱宜荐俎。可惜重阳，不把黄花与。帽堕笑凭纤手取。清歌莫送秋声去。

浣溪沙 仲冬望后，出迓履翁，舟中即兴

新梦游仙驾紫鸿。数家灯火灞桥东。吹箫楼外冻云重。
石瘦溪根船宿处，月斜梅影晓寒中。玉人无力倚东风。

又 题李中斋舟中梅屏

冰骨清寒瘦一枝。玉人初上木兰时。懒妆斜立澹春姿。
月落溪穷清影在，日长春去画帘垂。五湖水色掩西施。

又 观吴人岁旦游承天

千盖笼花斗胜春。东风无力扫香尘。尽

沿高阁步红云。

闲里暗牵经岁恨，街头多认旧年人。晚钟催散又黄昏。

又 琴川慧日寺蜡梅

蝶粉蜂黄大小乔。中庭寒尽雪微销。一般清瘦各无聊。

窗下和香封远讯，墙头飞玉怨邻箫。夜来风雨洗春娇。

又

门隔花深梦旧游。夕阳无语燕归愁。玉纤香动小帘钩。

落絮无声春堕泪，行云有影月含羞。东风临夜冷于秋。

又

波面铜花冷不收。玉人垂钓理纤钩。月明池阁夜来秋。

江燕话归成晓别，水花红减似春休。西风梧井叶先愁。

又 题史菊屏扇

门巷深深小画楼。阑干曾识凭春愁。新蓬遮却绣鸳游。

桃观日斜香掩户，苹溪风起水东流。紫萸玉腕又逢秋。

又 桂

曲角深帘隐洞房。正嫌玉骨易愁黄。好花偏占一秋香。

夜气清时初傍枕，晓光分处未开窗。可

怜人似月中孀。

玉楼春 京市舞女

茸茸狸帽遮梅额。金蝉罗翦胡衫窄。乘肩争看小腰身，倦态强随闲鼓笛。

问称家住城东陌。欲买千金应不惜。归来困顿殢春眠，犹梦婆娑斜趁拍。

又 为故人母寿

华堂夜宴连清晓。醉里笙歌云窈窕。酿来千日酒初尝，过却重阳秋更好。

阿儿早晚成名了。玉树阶前春满抱。天边金镜不须磨，长与妆楼悬晚照。

点绛唇

推枕南窗，楝花寒入单纱浅。雨帘不卷。空碍调雏燕。

一握柔葱，香染榴巾汗。音尘断。画罗闲扇。山色天涯远。

又

时霎清明，载花不过西园路。嫩阴绿树。正是春留处。

燕子重来，往事东流去。征衫贮。旧寒一缕。泪湿风帘絮。

又 试灯夜初晴

卷尽愁云，素娥临夜新梳洗。暗尘不起。酥润凌波地。

辇路重来，仿佛灯前事。情如水。小楼熏被。春梦笙歌里。

秋蕊香 和吴见山落桂

宝月惊尘堕晓。愁锁空枝斜照。古苔几点露萤小。销减秋光旋少。

佩丸尚忆春酥袅。故人老。断香忍和泪痕扫。魂返东篱梦窅

又 七夕

懒浴新凉睡早。雪靥酒红微笑。倚楼起把绣针小。月冷波光梦觉。

怕闻井叶西风到。恨多少。粉河不语堕秋晓。云雨人间未了。

诉衷情

阴阴绿润暗啼鸦。陌上断香车。红云深处春在，飞出建章花。

春此去，那天涯。几烟沙。忍教芳草。狼藉斜阳，人未归家。

又

柳腰空舞翠裙烟。尽日不成眠。花尘浪卷清昼，渐变晚阴天。

吴社水，系游船。又经年。东风不管，燕子初来，一夜春寒。

又

片云载雨过江鸥。水色澹汀洲。小莲玉

惨红怨，翠被又经秋。

凉意思，到南楼。小帘钩。半窗灯晕，
几叶芭蕉，客梦床头。

又 七夕

西风吹鹤到人间。凉月满缙山。银河万里
秋浪，重载客槎还。

河汉女，巧云鬟。夜阑干。钗头新约，
针眼娇颦，楼上秋寒。

夜游宫

竹窗听雨，坐久隐几就睡，既觉，见水仙娟娟
于灯影中

窗外捎溪雨响。映窗里、嚼花灯冷。浑
似潇湘系孤艇。见幽仙，步凌波，月边影。

香苦欺寒劲。牵梦绕、沧涛千顷。梦觉
新愁旧风景。绀云敲，玉搔斜，酒初醒。

又

春语莺迷翠柳。烟隔断、晴波远岫。寒
压重帘幔挖绣。袖炉香，倩东风，与吹透。

花讯催时候。旧相思、偏供闲昼。春澹
情浓半中酒，玉痕销，似梅花，更清瘦。

醉桃源 荷塘小隐赋烛影

金丸一树带霜华。银台瑶艳霞。烛阴树
影两交加。秋纱机上花。

飞醉笔，驻吟车。香深小隐家。明朝新
梦付啼鸦。歌阑月未斜。

又 赠卢长笛

沙河塘上旧游嬉。卢郎年少时。一声长笛月中吹。和云和雁飞。

惊物换，叹星移。相看两鬓丝。断肠吴苑草凄凄。倚楼人未归。

又 芙蓉

青春花姊不同时。凄凉生较迟。艳妆临水最相宜。风来吹绣漪。

惊旧事，问长眉。月明仙梦回。凭阑人但觉秋肥。花愁人不知。

又 会饮丰乐楼

翠阴浓合晓莺堤。春如日坠西。画图新展远山齐。花深十二梯。

风絮晚，醉魂迷。隔城闻马嘶。落红微沁绣鸳泥。秋千教放低。

如梦令

春在绿窗杨柳。人与流莺俱瘦。眉底暮寒生，帘额时翻波皱。风骤。风骤。花径啼红满袖。

又

秋千争闹粉墙。闲看燕紫莺黄。啼到绿阴处，唤回浪子闲忙。春光。春光。正是拾翠寻芳。

望江南 赋画灵照女

衣白苧，雪面堕愁鬟。不识朝云行雨处，
空随春梦到人间。留向画图看。

慵临镜，流水洗花颜。自织苍烟湘泪冷，
谁捞明月海波寒。天澹雾漫漫。

又 茶

松风远，莺燕静幽坊。妆褪宫梅人倦绣，
梦回春草日初长。瓷碗试新汤。

笙歌断，情与絮悠飏。石乳飞时离凤怨，
玉纤分处露花香。人去月侵廊。

定风波

密约偷香□踏青。小车随马过南屏。回
首东风销鬓影。重省。十年心事夜船灯。

离骨渐尘桥下水，到头难灭景中情。两
岸落花残酒醒。烟冷。人家垂柳未清明。

月中行 和黄复庵

疏桐翠井早惊秋。叶叶雨声愁。灯前倦
客老貂裘。燕去柳边楼。

吴宫寂寞空烟水，浑不认、旧采菱洲。
秋花旋结小盘虬。蝶怨夜香留。

虞美人

背庭缘恐花羞坠。心事遥山里。小帘愁卷月笼明。一寸秋怀、禁得几蛩声。

井梧不放西风起。供与离人睡。梦和新月未圆时。起看檐蛛结网、又寻思。

菩萨蛮

落花夜雨辞寒食。尘香明日城南陌。玉靥湿斜红。泪痕千万重。

伤春头竟白。来去春如客。人瘦绿阴浓。日长帘影中。

又

绿波碧草长堤色。东风不管春狼藉。鱼沫细痕圆。燕泥花唾乾。

无情牵怨抑。画舸红楼侧。斜日起凭阑。垂杨舞晓寒。

贺新郎 湖上有所赠

湖上芙蓉早。向北山、山深雾冷，更看花好。流水茫茫城下梦，空指游仙路杳。笑萝障、云屏亲到。雪玉肌肤春温夜。饮湖光、山绿成花貌。临涧水。弄清照。

著愁不尽宫眉小。听一声、相思曲里，赋情多少。红日阑干鸳鸯枕，那枉裙腰褪了。算谁识、垂杨秋袅。不是秦楼无缘分，点吴

霜、羞带簪花帽。但殢酒，任天晓。

又 为德清赵令君赋小垂虹

浪影龟纹皱。蘸平烟、青红半湿，枕溪窗牖。千尺晴霞慵卧水，万叠罗屏拥绣。漫几度、吴船回首。归雁五湖应不到，问苍茫、钓雪人知否。樵唱杳，度深秀。

重来趁得花时候。记留连、空山夜雨，短亭春酒。桃李新栽成蹊处，尽是行人去后。但东阁、官梅清瘦。欸乃一声山水绿，燕无言、风定垂帘昼。寒正悄，骀吟袖。

江城梅花引 赠倪梅村

江头何处带春归。玉川迷。路东西。一雁不飞、雪压冻云低。十里黄昏成晓色，竹根篱。分流水、过翠微。

带书傍月自锄畦。苦吟诗。生鬓丝。半黄烟雨，翠禽语、似说相思。惆怅孤山、花尽草离离。半幅寒香家住远，小帘垂。玉人误、听马嘶。

婆罗门引

无射羽，俗名羽调为怀宁赵仇香赋

香霏泛酒，瘴花初洗玉壶冰。西风乍入吴城。吹彻玉笙何处，曾说董双成。奈司空经惯，未畅高情。

瑶台几层。但梦绕、曲阑行。空忆双蝉□翠，寂寂秋声。堂空露凉，倩谁唤、行云

来洞庭。团扇月、只隔烟屏。

又

郭清华席上为放琴客而新有所盼，赋以见喜。

风涟乱翠，酒霏飘汗洗新妆。幽情暗寄莲房。弄雪调冰重会，临水暮追凉。正碧云不破，素月微行。

双成夜笙，断旧曲、解明珰。别有红娇粉润，初试霓裳。分莲调郎。又拈惹、花茸碧唾香。波晕切、一盼秋光。

祝英台近 悼得趣，赠宏庵

黯春阴，收灯后，寂寞几帘户。一片花飞，人驾彩云去。应是蛛网金徽，拍天寒水，恨声断、孤鸿洛浦。

对君诉。团扇轻委桃花，流红为谁赋。□□□□，从今醉何处。可怜憔悴文园，曲屏春到，断肠句、落梅愁雨。

又 钱陈少逸被仓台檄行部

问流花，寻梦草，云暖翠微路。锦雁峰前，浅约昼行处。不教嘶马飞春，一衮越境，那销尽、红吟绿赋。

送人去。长丝初染柔黄，晴和晓烟舞。心事偷占，莺漏汉宫语。趁得罗盖天香，归来时候，共留取、玉阑春住。

又 春日客龟溪游废园

采幽香，巡古苑，竹冷翠微路。斗草溪根，沙印小莲步。自怜两鬓清霜。一年寒食，

又身在、云山深处。

昼闲度。因甚天也慳春，轻阴便成雨。绿暗长亭。归梦趁风絮。有情花影阑干，莺声门径，解留我、霎时凝伫。

又 上元

晚云开，朝雪霁，时节又灯市。夜约遗香，南陌少年事。笙箫一片红云，飞来海上，绣帘卷、湘挑春起。

旧游地。素娥城阙年年，新妆趁罗绮。玉练冰轮，无尘瀉流水。晓霞红处啼鸦，良宵一梦，画堂正、日长人睡。

又 除夜立春

翦红情，裁绿意，花信上钗股。残日东风，不放岁华去。有人添烛西窗，不眠侵晓，笑声转、新年莺语。

旧尊俎。玉纤曾擘黄柑，柔香系幽素。归梦湖边，还迷镜中路。可怜千点吴霜，寒销不尽，又相对、落梅如雨。

西子妆慢 湖上清明薄游

流水船尘，艳阳酩酒，画舸游情如雾。笑拈芳草不知名，乍凌波、断桥西堍。垂杨漫舞。总不解、将春系住。燕归来，问彩绳纤手，如今何许。

欢盟误。一箭流光，又趁寒食去。不堪衰鬓著飞花，傍绿阴、冷烟深树。玄都秀句。记前度、刘郎曾赋。最伤心、一片孤山细雨。

江南春 中吕商 赋张药翁杜衡山庄

风响牙签，云寒古砚，芳铭犹在棠笏。
秋床听雨，妙谢庭、春草吟笔。城市喧鸣辙。
清溪上、小山秀洁。便向此、搜松访石，葺
屋营花，红尘远避风月。

瞿塘路，随汉节。记羽扇纶巾，气凌诸
葛。青天万里，料漫忆、莼丝鲈雪。车马从
休歇。荣华事、醉歌耳热。天与此翁，芳芷
嘉名，纫兰佩兮琼玦。

梦芙蓉 赵昌芙蓉图，梅津所藏

西风摇步绮。记长堤骤过，紫骝十里。
断桥南岸，人在晚霞外。锦温花共醉。当时
曾共秋被。自别霓裳，应红销翠冷，霜枕正
慵起。

惨澹西湖柳底。摇荡秋魂，夜月归环佩。
画图重展，惊认旧梳洗。去来双翡翠。难传
眼恨眉意。梦断琼娘，仙云深路杳，城影蘸
流水。

高山流水

黄钟商 丁基仲侧室善丝桐赋咏，晓达音吕，
备歌舞之妙

素弦一一起秋风。写柔情、都在春葱。
徽外断肠声，霜霄暗落惊鸿。低颦处、翦绿
裁红。仙郎伴、新制还赓旧曲，映月帘栊。

似名花并蒂，日日醉春浓。

吴中。空传有西子，应不解、换徵移宫。兰蕙满襟怀，唾碧总喷花茸。后堂深、想费春工。客愁重、时听蕉寒雨碎，泪湿琼钟。恁风流也称，金屋贮娇慵。

霜花腴 无射商 重阳前一日泛石湖

翠微路窄，醉晚风、凭谁为整敲冠。霜饱花腴，烛消人瘦。秋光作也都难。病怀强宽。恨雁声、偏落歌前。记年时，旧宿凄凉，暮烟秋雨野桥寒。

妆靥鬢英争艳，度清商一曲，暗坠金蝉。芳节多阴，兰情稀会，晴晖称拂吟笺。更移画船。引佩环、邀下婵娟。算明朝、未了重阳，紫萸应耐看。

澡兰香 林钟羽 淮安重午

盘丝系腕，巧篆垂簪，玉隐绀纱睡觉。银瓶露井，彩笔云窗，往事少年依约。为当时、曾写榴裙，伤心红绡褪萼。黍梦光阴渐老，汀洲烟蒹。

莫唱江南古调，怨抑难招，楚江沈魄。薰风燕乳，暗雨梅黄，午镜澡兰帘幕。念秦楼、也拟人归，应翦菖蒲自酌。但怅望、一缕新蟾，随人天角。

玉京谣

陈仲文自号藏一，盖取坡诗中“万人如海一身

藏”语。为度夷则商犯无射宫控制此赠之

蝶梦迷清晓，万里无家，岁晚貂裘敝。
载取琴书，长安闲看桃李。烂绣锦、人海花
场，任客燕、飘零谁计。春风里。香泥九陌，
文梁孤垒。

微吟怕有诗声翳。镜慵看、但小楼独倚。
金屋千娇，从他鸳暖秋被。蕙帐移、烟雨孤
山，待对影、落梅清泚。终不似。江上翠微
流水。

探芳新 林钟羽 吴中元日承天寺游人

九街头，正软尘润酥，雪销残溜。袂赏
祇园，花艳云阴笼昼。层梯峭空麝散，拥凌
波、萦翠袖。叹年端、连环转，烂漫游人如
绣。

肠断回廊伫久。便写意溅波，传愁蹙岫。
渐没飘鸿，空惹闲情春瘦。椒杯香乾醉醒，
怕西窗、人散后。暮寒深，迟回处、自攀庭
柳。

凤池吟 庆梅津自畿漕除右司郎官

万丈巍台，碧罽罽外，袞袞野马游尘。
旧文书几阁，昏朝醉暮，覆雨翻云。忽变清
明，紫垣敕使下星辰。经年事静，公门如水，
帝甸阳春。

长安父老相语，几百年见此，独驾冰轮。
又凤鸣黄幕，玉霄平溯，鹊锦新恩。画省中
书，半红梅子荐盐新。归来晚，待麈吟、殿

阁南薰。

暗香

夷则宫 送魏句滨宰吴县解组，分韵得闾字

县花谁葺。记满庭燕麦，朱扉斜阖。妙手作新，公馆青红晓云湿。天际疏星趁马，帘昼隙、冰弦三叠。尽换却、吴水吴烟，桃李靓春靛。

风急。送帆叶。正雁水夜清，卧虹平帖。软红路接。涂粉闱深早催入。怀暖天香宴果。花队簇、轻轩银蜡。更问讯、湖上柳，两堤翠匝。

暗香疏影 夹钟宫 赋墨梅

占春压一。卷峭寒万里，平沙飞雪。数点酥钿，凌晓东风□吹裂。独曳横梢瘦影，入广平、裁冰词笔。记五湖、清夜推篷，临水一痕月。

何逊扬州旧事，五更梦半醒，胡调吹彻。若把南枝，图入凌烟，香满玉楼琼阙。相将初试红盐味，到烟雨、青黄时节。想雁空、北落冬深，澹墨晚天云阔。

念奴娇 赋德清县圃明秀亭

思生晚眺，岸乌纱平步，春云层绿。罨画屏风开四面，各样莺花结束。寒欲残时，

香无著处，千树风前玉。游蜂飞过，隔墙疑是金谷。

偏称晚色横烟，愁凝峨眉，澹生绡裙幅。缥缈孤山南畔路，相对花房竹屋。溪足沙明，岩阴石秀，梦冷吟亭宿。松风古涧，高调月夜清曲。

惜红衣

余从姜石帚游苕霅间三十五年矣，重来伤今感昔，聊以咏怀

鹭老秋丝，苹愁暮雪，鬓那不白。倒柳移栽，如今暗溪碧。乌衣细语，伤绊惹、茸红曾约。南陌。前度刘郎，寻流花踪迹。

朱楼水侧。雪面波光，汀莲沁颜色。当时醉近绣箔，夜吟寂。三十六矾重到，清梦冷云南北。买钓舟溪上，应有烟蓑相识。

江南好

友人还中吴，密围坐客，杯深情浹，不觉沾醉。越翼日，吾侪载酒问奇字，时斋示江南好词，纪前夕之事，辄次韵

行锦归来，画眉添妩，暗尘重拂雕栊。稳瓶泉暖，花隘斗春容。围密笼香晻霭。烦纤手、亲点团龙。温柔处，垂杨殢髻，□暗豆花红。

行藏，多是客，莺边话别，橘下相逢。算江湖幽梦，频绕残钟。好结梅兄矾弟，莫轻侣、西燕南鸿。偏宜醉，寒欺酒力，帘外

冻云重。

双双燕

小桃谢后，双双燕，悄来几家庭户。轻烟晓暝，湘水暮云遥度。帘外余寒未卷，共斜入、红楼深处。相将占得雕梁，似约韶光留住。

堪举。翩翩翠羽。杨柳岸，泥香半和梅雨。落花风软，戏促乱红飞舞。多少呢喃意绪。尽日向、流莺分诉。还过短墙。谁会万千言语。

无闷 催雪

霓节飞琼，鸾驾弄玉，杳隔平云弱水。倩皓鹤传书，卫姨呼起。莫待粉河凝晓，趁夜月、瑶笙飞环佩。正蹇驴吟影，茶烟灶冷，酒亭门闭。

歌丽。泛碧蚁。放绣帘半钩，宝台临砌。要须借东君，灞陵春意。晓梦先迷楚蝶，早风戾、重寒侵罗被。还怕掩、深院梨花，又作故人清泪。

水调歌头 赋魏方泉望湖楼

屋下半流水，屋上几青山。当心千顷明镜，入座玉光寒。云起南峰未雨，云敛北峰初霁，健笔写青天。俯瞰古城堞，不碍小阑

干。

绣鞍马，软红路，乍回班。层梯影转亭午，信手展绡编。残照游船收尽，新月画帘才卷。人在翠壶间。天际笛声起，尘世夜漫漫。

洞仙歌

方庵春日花胜宴客，为得雏庆。花翁赋词，俾属韵末

芳辰良宴，人日春朝并。细缕青丝裹银饼。更玉犀金彩，沾座分簪，歌围暖，梅靥桃唇斗胜。

露房花曲折，莺入新年，添个宜男小山枕。待枝上，饱东风，结子成阴，蓝桥去、还觅琼浆一饮。料别馆、西湖最情浓，烂画舫月明，醉宫袍锦。

秋思

夹钟商 荷塘为括苍名姝求赋其听雨小阁

堆枕香鬟侧。骤夜声、偏称画屏秋色。风碎串珠，润侵歌板，愁压眉窄。动罗篔清商，寸心低诉叙怨抑。映梦窗，零乱碧。待涨绿春深，落花香泛，料有断红流处，暗题相忆。

欢酌。檐花细滴。送故人、粉黛重饰。漏侵琼瑟。丁东敲断，弄晴月白。怕一曲、霓裳未终，催去骖凤翼。叹谢客、犹未识。漫瘦欲东阳，灯前无梦到得。路隔重云雁北。

江神子 赋碧沼小庵

长安门外小林丘。碧壶秋。浴轻鸥。不放啼红，流水通原注去声宫沟。时有晴空云过影，华镜里，翳鱼游。

绮罗尘满九衢头。晚香楼，夕阳收。波面琴高，仙子驾黄虬。清磬数声人定了，池上月，照虚舟。

又 喜雨上麓翁

一声玉磬下星坛。步虚阑。露华寒。平晓阿香，油壁碾青鸾。应是老鳞眠不得，云炮落，雨瓢翻。

身闲犹耿寸心丹。炷炉烟。暗祈年。随处蛙声，鼓吹稻花田。秋水一池莲叶晚，吟喜雨，拍阑干。

又 李别驾招饮海棠花下

翠纱笼袖映红霏。冷香飞。洗凝脂。睡足娇多，还是夜深宜。翻怕回廊花有影，移烛暗，放帘垂。

尊前不按驻云词。料花枝。妒蛾眉。丁属东风，莫送片红飞。春重锦堂人尽醉，和晓月，带花归。

又 送桂花吴宪，时已有检详之命，未赴阙

天街如水翠尘空。建章宫。月明中。人未归来，玉树起秋风。宝粟万钉花露重，催赐带，过垂虹。

夜凉沈水绣帘栊。酒香浓。雾蒙蒙。钗

列吴娃，骖袞带金虫。三十六宫蟾观冷，留不住，佩丁东。

又 十日荷塘小隐赏桂呈朔翁

西风来晚桂开迟。月宫移。到东篱。簌簌惊尘，吹下半冰规。拟唤阿娇来小隐，金屋底，乱香飞。

重阳还是隔年期。蝶相思。客情知。吴水吴烟，愁里更多诗。一夜看承应未别，秋好处，雁来时。

又 送翁五峰自鹤江还都

西风一叶送行舟。浅迟留。舫汀洲。新浴红衣，绿水带香流。应是离宫城外晚，人伫立，小帘钩。

新归重省别来愁。黛眉头。半痕秋。天上人间，斜月绣针楼。湘浪莫迷花蝶梦，江上约，负轻鸥。

沁园春 冰漕凿方泉，宾客请以名斋，邀赋

澄碧西湖，软红南陌，银河地穿。见华星影里，仙棋局静，清风行处，瑞玉圭寒。斜谷山深，望春楼远，无此峥嵘小渭川。一泓地，解新波不涸，独障狂澜。

老苏而后坡仙。继菊井嘉名相与传。试摩挲劲石，无令角折，丁宁明月，莫浣规圆。漫结鸥盟，那知鱼乐，心止中流别有天。无尘夜，听吾伊正在，秋水阑干。

又 送翁宾旸游鄂渚

情如之何，暮涂为客，忍堪送君。便江

湖天远，中宵同月，关河秋近，何日清尘。
玉麈生风，貂裘明雪，幕府英雄今几人。行
须早，料刚肠肯滞，泪眼离颦。

平生秀句清尊。到帐动风开自有神。听
夜鸣黄鹤，楼高百尺，朝驰白马，笔扫千军。
贾傅才高，岳家军在，好勒燕然石上文。松
江上，念故人老矣，甘卧闲云。

珍珠帘

春日客龟溪，过贵人家，隔墙闻箫鼓声，疑是
按舞，伫立久之

蜜沈烬暖萸烟袅。层帘卷、伫立行人官
道。麟带压愁香，听舞箫云渺。恨缕情丝春
絮远，怅梦隔、银屏难到。寒峭。有东风嫩
柳，学得腰小。

还近绿水清明，叹孤身如燕，将花频绕。
细雨湿黄昏，半醉归怀抱。蠹损歌纨人去久，
漫泪沾、香兰如笑。书杳。念客枕幽单，看
看春老。

风入松 为友人放琴客赋

春风吴柳几番黄。欢事小蛮窗。梅花正
结双头梦，被玉龙、吹散幽香。昨夜灯前歌
黛，今朝陌上啼妆。

最怜无侣伴雏莺。桃叶已春江。曲屏先
暖鸳衾惯，夜寒深，都是思量。莫道蓝桥路
远，行云只隔幽坊。

又

听风听雨过清明。愁草瘦花铭。楼前绿暗分携路，一丝柳、一寸柔情。料峭春寒中酒，交加晓梦啼莺。

西园日日扫林亭。依旧赏新晴。黄蜂频扑秋千索，有当时、纤手香凝。惆怅双鸳不到，幽阶一夜苔生。

又 桂

兰舟高荡涨波凉。愁被矮桥妨。暮烟疏雨西园路，误秋娘、浅约宫黄。还泊邮亭唤酒，旧曾送客斜阳。

蝉声空曳别枝长。似曲不成商。御罗屏底翻歌扇，忆西湖、临水开窗。和醉重寻幽梦，残衾已断熏香。

又 麓翁园堂宴客

一番疏雨洗芙蓉。玉冷佩丁东。辘轳听带秋声转，早凉生、傍井梧桐。欢宴良宵好月，佳人修竹清风。

临池飞阁乍青红。移酒小垂虹。贞元供奉梨园曲，称十香、深蘸琼钟。醉梦孤云晓色，笙歌一派秋空。

又 邻舟妙香

画船帘密不藏香。飞作楚云狂。傍怀半卷金炉烬，怕暖销、春日朝阳。清馥晴熏残醉，断烟无限思量。

凭阑心事隔垂杨。楼燕锁幽妆。梅花偏恼多情月，慰溪桥、流水昏黄。哀曲霜鸿凄断，梦魂寒蝶幽扬。

莺啼序 丰乐楼节斋新建

天吴驾云阆海，凝春空灿绮。倒银海，蘸影西城，四碧天镜无际。彩翼曳、扶摇宛转，雩龙降尾交新霁。近玉虚高处，天风笑语吹坠。

清濯缁尘，快展旷眼，傍危阑醉倚。面屏障、一一莺花，薜萝浮动金翠。惯朝昏、晴光雨色，燕泥动、红香流水。步新梯，藐视年华，顿非尘世。

麟翁衮舄，领客登临，座有诵鱼美。翁笑起、离席而语，敢诧京兆，以役为功，落成奇事。明良庆会，赓歌熙载，隆都观国多闲暇，遣丹青、雅饰繁华地。平瞻太极，天街润纳璇题，露床夜沈秋纬。

清风观阙、丽日罽罽，正午长漏迟。为洗尽、脂痕茸唾，净卷曲尘，永昼低垂，绣帘十二。高轩驷马，峨冠鸣佩，班回花底修禊饮，御炉香、分惹朝衣袂。碧桃数点飞花，涌出宫沟，溯春万里。

又

残寒正欺病酒，掩沈香绣户。燕来晚、飞入西城，似说春事迟暮。画船载、清明过却，晴烟冉冉吴宫树，念羁情游荡，随风化为轻絮。

十载西湖，傍柳系马，趁娇尘软雾。溯红渐、招入仙溪，锦儿偷寄幽素。倚银屏、春宽梦窄，断红湿、歌纨金缕。暝堤空，轻

把斜阳，总还鸥鹭。

幽兰旋老，杜若还生，水乡尚寄旅。别后访、六桥无信，事往花委，瘞玉埋香，几番风雨。长波妒盼，遥山羞黛，渔灯分影春江宿，记当时、短楫桃根渡。青楼仿佛，临分败壁题诗，泪墨惨澹尘土。

危亭望极，草色天涯，叹鬓侵半苾。暗点检、离痕欢唾，尚染蛟绡，骀凤迷归，破鸾慵舞。殷勤待写，书中长恨，蓝霞辽海沈过雁，漫相思、弹入哀筝柱。伤心千里江南，怨曲重招，断魂在否。

又 荷和赵修全韵

横塘棹穿艳锦，引鸳鸯弄水。断霞晚、笑折花归，绀纱低护灯蕊。润玉瘦、冰轻倦浴，斜拖凤股盘云坠。听银床声细。梧桐渐搅凉思。

窗隙流光，冉冉迅羽，诉空梁燕子。误惊起、风竹敲门，故人还又不至。记琅玕、新诗细掐，早陈迹、香痕纤指。怕因循，罗扇恩疏，又生秋意。

西湖旧日，画舸频移，叹几萦梦寐。霞佩冷，叠澜不定，麝霏飞雨，乍湿蛟绡，暗盛红泪。练单夜共，波心宿处，琼箫吹月霓裳舞，向明朝、未觉花容悴。嫣香易落，回头澹碧销烟，镜空画罗屏里。

残蝉度曲，唱彻西园，也感红怨翠。念省惯、吴宫幽憩。暗柳追凉，晓岸参斜，露零沓起。丝萦寸藕，留连欢事。桃笙平展湘浪影，有昭华、秣李冰相倚。如今鬓点凄霜，半篋秋词，恨盈蠹纸。

天香 熏衣香

珠络玲珑，罗囊闲斗，酥怀暖麝相倚。
百和花须，十分风韵，半袭凤箱重绮。茜垂
四角，慵未揭、流苏春睡。熏度红薇院落，
烟销画屏沈水。

温泉绡绡乍试。露华侵、透肌兰炷。漫
省浅溪月夜，暗浮花气。荀令如今老矣。但
未减、韩郎旧风味。远寄相思，余熏梦里。

又 蜡梅

蟬叶黏霜，蝇苞缀冻，生香远带风峭。
岭上寒多，溪头月冷，北枝瘦、南枝小。玉
奴有姊，先占立、墙阴春早。初试宫黄澹薄，
偷分寿阳纤巧。

银烛泪深未晓。酒钟慳、贮愁多少。记
得短亭归马，暮衙蜂闹。豆蔻钗梁恨袅。但
怅望、天涯岁华老。远信难封，吴云雁杳。

玉漏迟 夷则商 瓜泾度中秋夕赋

雁边风讯小，飞琼望杳，碧云先晚。露
冷阑干，定怯藕丝冰腕。净洗浮空片玉，胜
花影、春灯相乱。秦镜满。素娥未肯，分秋
一半。

每圆处即良宵，甚此夕偏饶，对歌临怨。
万里婵娟，几许雾屏云幔。孤兔凄凉照水，
晓风起、银河西转。摩泪眼。瑶台梦回人远。

金盏子 夹钟商 赋秋壑西湖小筑

卜筑西湖，种翠萝犹傍，软红尘里。来往载清吟，为偏爱吾庐，画船频繁。笑携雨色晴光，入春明朝市。石桥锁，烟霞五百名仙，第一人是。

临酒论深意。流光转、莺花任乱委，冷然九秋肺腑，应多梦、岩扃冷云空翠。漱流枕石幽情，写猗兰绿绮。专城处，他山小队登临，待西风起。

又

吴城连日赏桂，一夕风雨，悉已零落。独寓窗晚花方作小蕾，未及见开，有新邑之役。困来西馆，篱落间嫣然一枝可爱，见似人而喜。为赋此解

赏月梧园，恨广寒宫树，晓风摇落，莓砌扫珠尘，空肠断、熏炉尽销残萼。殿秋尚有余花，锁烟窗云幄。新雁又、无端送人江上，短亭初泊。

篱角。梦依约，人一笑，惺忪翠袖薄。悠然醉魂唤醒，幽丛畔、凄香雾雨漠漠。晚吹乍颤秋声，早屏空金雀。明朝想，犹有数点蜂黄，伴我斟酌。

永遇乐

林钟商 过李氏晚妆阁，见壁间旧所题词，遂再赋

春酌沈沈，晚妆的的，仙梦游惯。锦淑

维舟，青门倚盖，还被笼莺唤。裴郎归后，
崔娘沈恨，漫客请传芳卷。联题在，频经翠
袖，胜隔绀纱尘幔。

桃根杏叶，胶黏缃缥，几回凭阑人换。
峨眉愁云，兰香膩粉，都为多情褪。离巾拭
泪，征袍染醉，强作酒朋花伴。留连怕，风
姨浪妒，又吹雨断。

又 乙巳中秋风雨

风拂尘徽，雨侵凉榻，才动秋思。缓酒
销更，移灯傍影，净洗芭蕉耳。铜华沧海，
愁霾重嶂，燕北雁南天外。算阴晴，浑似几
番，渭城故人离会。

青楼旧日，高歌取醉，唤出玉人梳洗。
红叶流光，苹花两鬓，心事成秋水。白凝虚
晓，香吹轻烬，倚窗小瓶疏桂。问深宫。姮
娥正在，妒云第几。

又 探梅次时斋韵

阁雪云低，卷沙风急，惊雁失序。户掩
寒宵，屏闲冷梦，灯飏唇似语。堪怜窗景，
都闲刺绣，但续旧愁一缕。邻歌散，罗襟印
粉，袖湿茜桃红露。

西湖旧日，留连清夜，爱酒几将花误。
遗袜尘销，题裙墨黯，天远吹笙路。吴台直
下，绀梅无限，未放野桥香度。重谋醉，揉
香弄影，水清浅处。

玉胡蝶 夷则商

角断签鸣疏点，倦萤透隙，低弄书光。

一寸悲秋，生动万种凄凉。旧衫染、唾凝花碧，别泪想、妆洗蜂黄。楚魂伤。雁汀沙冷，来信微茫。

都忘。孤山旧赏，水沈熨露。岸锦宜霜。败叶题诗，御沟应不到流湘。数客路，又随淮月，羨故人、还买吴航。两凝望。满城风雨，催送重阳。

绛都春

夷则羽，俗名仙吕调为郭清华内子寿

香深雾暖。正人在、锦瑟华年深院。旧日汉宫，分得红兰滋吴苑。临池羞落梅花片。弄水月、初匀妆面。紫烟笼处，双鸾共跨，洞箫低按。

歌管。红围翠袖，冻云外，似觉东风先转。绣畔昼迟，花底天宽春无限。仙郎骄马琼林宴。待卷上、珠帘教看。更传莺入新年，宝钗梦燕。

又 钱李太博赴括苍别驾

羈云旅雁。敛倦羽、寄栖墙阴年晚。问字翠尊，刻烛红笺慳曾展。冰滩鸣佩舟如箭。笑乌帻、临风重岸。傍邻垂柳，清霜万缕，送将人远。

吴苑。千金未惜，买新赋、共赏文园词翰。流水翠微，明月清风平分半。梅深驿路香不断。万玉舞、罌罍东畔。料应花底春多，软红雾暖。

又 题蓬莱阁灯屏，履翁帅越

螺屏暖翠。正雾卷暮色，星河浮霁。路

幕递香，街马冲尘东风细。梅槎凌海横鳌背。倩稳载、蓬莱云气。宝阶斜转，冰娥素影，夜清如水。

应记。千秋化鹤，旧华表、认得山川犹是。暗解绣囊，争掷金钱游人醉。笙歌晓度晴霞外。又上苑、春生一萼。便教接宴莺花，万红镜里。

又 为李笈房量珠贺

情黏舞线。怅驻马灞桥，天寒人远。旋翦露痕，移得春娇栽琼苑。流莺常语烟中怨。恨三月、飞花零乱。艳阳归后，红藏翠掩，小坊幽院。

谁见。新腔按彻，背灯暗、共倚笈屏葱茜。绣被梦轻，金屋妆深沈香换。梅花重洗春风面。正溪上、参横月转。并禽飞上金沙，瑞香雾暖。

又 燕亡久矣，京□适见似人，怅怨有感

南楼坠燕。又灯晕夜凉，疏帘空卷。叶吹暮喧，花露晨曦秋光短。当时明月娉婷伴。怅客路、幽局俱远。雾鬟依约，除非照影，镜空不见。

别馆。秋娘乍识，似人处、最在双波凝盼。旧色旧香，闲雨闲云情终浅。丹青谁画真真面。便只作、梅花频看。更愁花变梨霰，又随梦散。

又

余往来清华池馆六年，赋咏屡矣，感昔伤今，益不堪怀，乃复作此解

春来雁渚。弄艳冶、又入垂杨如许。困舞瘦腰，啼湿宫黄池塘雨。碧沿苍藓云根路。尚追想、凌波微步。小楼重上，凭谁为唱，旧时金缕。

凝伫。烟萝翠竹，欠罗袖、为倚天寒日暮。强醉梅边，招得花奴来尊俎。东风须惹春云住。□莫把、飞琼吹去。便教移取熏笼，夜温绣户。

惜秋华 夹钟商 重九

细响残蛩，傍灯前、似说深秋怀抱。怕上翠微，伤心乱烟残照。西湖镜掩尘沙，翳晓影，秦鬟云扰。新鸿，唤凄凉、渐入红萸乌帽。

江上故人老。视东篱秀色，依然娟好。晚梦趁、邻杵断，乍将愁到。秋娘泪湿黄昏，又满城、雨轻风小。闲了。看芙蓉、画船多少。

又 八日飞翼楼登高

思渺西风，怅行踪、浪逐南飞高雁。怯上翠微，危楼更堪凭晚。蓬莱对起幽云，澹野色山容愁卷。清浅。瞰沧波、静衔秋痕一线。

十载寄吴苑。惯东篱深把，露黄偷翦。移暮影、照越镜，意销香断。秋娥赋得闲情，倚翠尊、小眉初展。深劝。待明朝、醉巾重岸。

又 七夕

露罥蛛丝，小楼阴堕月，秋惊华鬢。宫漏未央，当时细钗遗恨。人间梦隔西风，算天上、年华一瞬。相逢，纵相疏、胜却巫阳无准。

何处动凉讯。听露井梧桐，楚骚成韵。彩云断、翠羽散，此情难问。银河万古秋声，但望中、婺星清润。轻俊。度金针、漫牵方寸。

又 七夕前一日送人归盐官

数日西风，打秋林枣熟，还催人去。瓜果夜深，斜河拟看星度。匆匆便倒离尊，怅遇合、云销萍聚。留连、有残蝉韵晚，时歌金缕。

绿水暂如许。奈南墙冷落，竹烟槐雨。此去杜曲，已近紫霄尺五。扁舟夜宿吴江，正水佩霓裳无数。眉妩。问别来、解相思否。

又 木芙蓉

路远仙城，自王郎去后，芳卿憔悴。锦段镜空，重铺步障新绮。凡花瘦不禁秋，幻腻玉、腴红鲜丽。相携。试新妆乍毕，交扶轻醉。

长记断桥外。骤玉骢过处，千娇凝睇。昨梦顿醒，依约旧时眉翠。愁边暮合碧云，倩唱入、六幺声里。风起。舞斜阳、阑于十二。

惜黄花慢 夷则羽 菊

粉靥金裳。映绣屏认得，旧日萧娘。翠

微高处，故人帽底，一年最好，偏是重阳。避春只怕春不远，望幽径、偷理秋妆。殢醉乡。寸心似翦，飘荡愁觞。

潮腮笑入清霜。斗万花样巧，深染蜂黄。露痕千点，自怜旧色，寒泉半掬，百感幽香。雁声不到东篱畔，满城但、风雨凄凉。最断肠。夜深怨蝶飞狂。

又

次吴江小泊，夜饮僧窗惜别，邦人赵簿携小妓侑尊，连歌数阕，皆清真词。酒尽，已四鼓，赋此词饯尹梅津

送客吴皋。正试霜夜冷，枫落长桥。望天不尽，背城渐杳，离亭黯黯，恨水迢迢。翠香零落红衣老，暮愁锁、残柳眉梢。念瘦腰。沈郎旧日，曾系兰桡。

仙人凤咽琼箫。怅断魂送远，九辩难招。醉鬟留盼，小窗翦烛，歌云载恨，飞上银霄。素秋不解随船去，败红趁、一叶寒涛。梦翠翘。怨鸿料过南谯。

十二郎 垂虹桥 上有垂虹亭，属吴江

素天际水，浪拍碎、冻云不凝。记晓叶题霜，秋灯吟雨，曾系长桥过艇。又是宾鸿重来后，猛赋得、归期才定。嗟绣鸭解言，香鲈堪钓，尚庐人境。

幽兴。争如共载，越娥妆镜。念倦客依前，貂裘茸帽，重向淞江照影。酹酒苍茫，倚歌平远，亭上玉虹腰冷。迎醉面，暮雪飞花，几点黛愁山暝。

醉蓬莱 夷则商 七夕和方南山

望碧天书断，宝枕香留，泪痕盈袖。谁识秋娘，比行云纤瘦。象尺熏炉，翠针金缕，记倚床同绣。月弹琼梳，冰销粉汗，南花熏透。

尽是当时，少年清梦，臂约痕深，帕绡红皱。凭鹊传音，恨语多轻漏。润玉留情，沈郎无奈，向柳阴期候。数曲催阑，双铺深掩，风环鸣兽。

烛影摇红

黄钟商 毛荷塘生日，留京不归，赋以寄意

西子西湖，赋情合载鸱夷棹。断桥直去是孤山，应为梅花到。几度吟昏醉晓。背东风、偷闲斗草。乱鸦啼后，解佩归来，春怀多少。

千里婵娟，茂园今夜同清照。樱脂茸唾听吟诗，争似还家好。昵昵西窗语笑。凤云深、琼箫缥缈。愿春如旧，柳带同心，花枝压帽。

又 麓翁夜宴园堂

新月侵阶，彩云林外笙箫透。银台双引绕花行，红坠香沾袖。不管签声转漏。更明朝、棋消永昼。静中闲看，倦羽飞还，游云出岫。

随处春光，翠阴那只西湖柳。去年溪上

牡丹时，还试长安酒。都把愁怀抖擞。笑流莺、啼春漫瘦。晓风恶尽，妒雪寒销，青梅如豆。

又 钱冯深居，翼日，其初度。

飞盖西园，晚秋却胜春天气。霜花开尽锦屏空，红叶新装缀。时放清杯泛水。暗凄凉、东风旧事。夜吟不绝，松影阑干，月笼寒翠。

莫唱阳关，但凭彩袖歌千岁。秋星入梦隔明朝，十载吴宫会。一棹回潮度苇。正西窗、灯花报喜。柳蛮樱素，试酒争怜，不教不醉。

又 元夕雨

碧澹山姿，暮寒愁沁歌眉浅。障泥南陌润轻酥，灯火深深院。入夜笙歌暖。彩旗翻、宜男舞遍。恣游不怕，素袜尘生，行裙红溅。

银烛笼纱，翠屏不照残梅怨。洗妆清靥湿春风，宜带啼痕看。楚梦留情未散。素娥愁、天深信远。晓窗移枕，酒困香残，春阴帘卷。

又 寿嗣荣王

天桂飞香，御花簇座千秋宴。笑从王母摘仙桃，琼醴双金盏。掌上龙珠照眼。映萝图、星晖海润。浮槎远到，水浅蓬莱，秋明河汉。

宝月将弦。晚钩斜挂西帘卷。未须十日便中秋，争看清光满。净洗红尘障面。贺朝霖、催班正殿。喜回天上，紫府开筵，瑶池

宣劝。

又 赋德清县圃古红梅

莓锁虹梁，稽山祠下当时见。横斜无分照溪光，珠网空凝遍。姑射青春对面。驾飞虬、罗浮路远。千年春在，新月苔池，黄昏山馆。

花满河阳。为君羞褪晨妆茜。云根直下是银河，客老秋槎变。雨外红铅洗断。又晴霞、惊飞暮管。倚阑只怕，弄水鳞生，乘东风便。

又 越上霖雨应祷

秋入灯花，夜深檐影琵琶语。越娥青镜洗红埃，山斗秦眉妩。相间金茸翠亩。认城阴、春耕旧处。晚春相应，新稻炊香，疏烟林莽。

清磬风前，海沈宿袅芙蓉炷。阿香秋梦起娇啼，玉女传幽素。人驾梅槎未渡。试梧桐、聊分宴俎。采菱别调，留取蓬莱，霎时云住。

丑奴儿慢 黄钟商 麓翁飞翼楼观雪

东风未起，花上纤尘无影。峭云湿，凝酥深坞，乍洗梅清。钓卷愁丝，冷浮虹气海空明。若耶门闭，扁舟去懒，客思鸥轻。

几度问春，倡红冶翠，空媚阴晴。看真色、千岸一素，天澹无情。醒眼重开，玉钩帘外晓峰青。相扶轻醉，越王台上，更最高层。

又 双清楼 在钱塘门外

空蒙乍敛，波影帘花晴乱。正西子、梳妆楼上，镜舞青鸾。润逼风襟，满湖山色入阑干。天虚鸣籁，云多易雨，长带秋寒。

遥望翠凹，隔江时见，越女低鬟。算堪羨、烟沙白鹭，暮往朝还。歌管重城，醉花春梦半香残。乘风邀月，持杯对影，云海人闲。

木兰花慢

虎丘陪仓幕游。时魏益斋已被亲擢，陈芬窟、李方庵皆将满秩

紫骝嘶冻草，晓云锁、岫眉颦。正蕙雪初销，松腰玉瘦，憔悴真真。轻藜渐穿险磴，步荒苔、犹认瘞花痕。千古兴亡旧恨，半丘残日孤云。

开尊。重吊吴魂。岚翠冷、洗微醺。问几曾夜宿，月明起看，剑水星纹。登临总成去客，更软红、先有探芳人。回首沧波故苑，落梅烟雨黄昏。

又 重游虎丘

步层丘翠莽，□□处、更春寒。渐晚色催阴，风花弄雨，愁起阑干。惊翰。带云去杳。任红尘、一片落人间。青冢麒麟有恨，卧听萧鼓游山。

年年。叶外花前。腰艳楚、鬢成潘。叹宝奁瘞久。青萍共化，裂石空磐。尘缘。酒沾粉污，问何人、从此濯清泉。一笑掀髯付

与，寒松瘦倚苍峦。

又 送翁五峰游江陵

送秋云万里，算舒卷、总何心。叹路转羊肠，人营燕垒，霜满蓬簪。愁侵。庾尘满袖，便封侯、那羨汉淮阴。一醉莼丝脍玉，忍教菊老松深。

离音。又听西风，金井树、动秋吟。向暮江目断，鸿飞渺渺，天色沈沈。沾襟。四弦夜语，问杨琼、往事到寒砧。争似湖山岁晚，静梅香底同斟。

又 重泊垂虹

酌清杯问水，惯曾见、几逢迎。自越棹轻飞，秋莼归后，杞菊荒荆。孤鸣。舞鸥惯下，又渔歌、忽断晚烟生。雪浪闲销钓石，冷枫频落江汀。

长亭。春恨何穷，目易尽、酒微醒。怅断魂西子，凌波去杳，环佩无声。阴晴。最无定处，被浮云、多翳镜华明。向晓东风霁色，绿杨楼外山青。

又 饯韩似斋赴江东鹺幕

润寒梅细雨，卷灯火、暗尘香。正万里胥涛，流花涨腻，春共东江。云樯。未传燕语，过罟罟、垂柳舞鹅黄。留取行人系马，软红深处闻莺。

悠扬。霁月清风，凝望久、鄮山苍。又紫箫一曲，还吹别调，楚际吴旁。仙方。袖中秘宝，遣蓬莱、弱水变飞霜。寒食春城秀句，趁花飞入宫墙。

又 钱赵山台

指罽罽晓月，动凉信、又催归。正玉涨松波，花穿画舫，无限红衣。青丝。傍桥浅系，问笛中、谁奏鹤南飞。西子冰绡冷处，素娥宝镜圆时。

清奇。好借秋光，临水色、写瑶卮。向醉中织就，天孙云锦，一杼新诗。依稀。数声禁漏，又东华、尘染帽檐缁。争似西风小队，便乘鲈脍秋肥。

又

施芸隐随绣节过浙东，作词留别，用其韵以饯
几临流送远，渐荒落、旧邮亭。念西子初来，当时望眼，啼雨难晴。娉婷。素红共载，到越吟、翻调倚吴声。得意东风去掉，怎怜会重离轻。

云零。梦绕浮觞，流水畔、叙幽情。恨赋笔分携，江山委秀，桃李荒荆。经行。问春在否，过汀洲、暗忆百花名。莺缕争堪细折。御黄堤上重盟。

喜迁莺

太簇宫，俗名中管高宫 同丁基仲过希道家看牡丹

凡尘流水。正春在、绛阙瑶阶十二。暖日明霞，天香盘锦，低映晓光梳洗。故苑浣花沈恨，化作妖红斜紫。因无力，倚阑干，还倩东风扶起。

公子。留意处，罗盖牙签，一一花名字。

小扇翻歌，密围留客，云叶翠温罗绮。艳波
紫金杯重，人倚妆台微醉。夜和露，翦残枝，
点点花心清泪。

又 吴江与闲堂王臞庵家

烟空白鹭。乍飞下、似呼行人相语。细
縠春波，微痕秋月，曾认片帆来去。万顷素
云遮断，十二红帘钩处。黯愁远，向虹腰，
时送斜阳凝伫。

轻许。孤梦到，海上玳宫，玉冷深窗户。
遥指人间，隔江烟火，漠漠水蘋摇暮。看葺
断矶残钓，替却珠歌雪舞。吟未了，去匆匆，
清晓一阑烟雨。

又 福山萧寺岁除

江亭年暮。趁飞雁、又听，数声柔橹。
蓝尾杯单，胶牙饧澹，重省旧时羁旅。雪舞
野梅篱落，寒拥渔家门户。晚风峭，作初番
花讯，春还知否。

何处。围艳冶、红烛画堂，博籥良宵午。
谁念行人，愁先芳草，轻送年华如羽。自剔
短檠不睡，空索彩桃新句。便归好，料鹅黄，
已染西池千缕。

又 甲辰冬至寓越，儿辈尚留瓜泾萧寺

冬分人别。渡倦客晚潮，伤头俱雪。雁
影秋空，蝶情春荡，几处路穷车绝。把酒共
温寒夜，倚绣添慵时节。又底事，对愁云江
国，离心还折。

吴越。重会面，点检旧吟，同看灯花结。
儿女相思，年华轻送，邻户断箫声噎。待移

杖藜雪后，犹怯蓬莱寒阔。最起晚，任鸦林催晓，梅窗沈月。

探芳信

夹钟羽 与李方庵联舟入杭，时方庵至嘉兴，索旧燕同载。是夕，雪大作，林麓洲渚皆琼瑶。方庵驰小序求词，且约访蔡公甫。

夜寒重。见羽葆将迎。飞琼入梦。整素妆归处，中宵按瑶凤。舞春歌夜棠梨岸，月冷和云冻。画船中、太白仙人，锦袍初拥。

应过语溪否，试笑挹中郎，还叩清弄。粉黛湖山，欠携酒、共飞鞚。洗杯时换铜觚水，待作梅花供。问何时、带雨锄烟自种。

又

丙申岁，吴灯市盛常年。余借宅幽坊，一时名胜遇合，置杯酒，接殷勤之欢，甚盛事也。分镜字韵

暖风定。正卖花吟春，去年曾听。旋自洗幽兰，银瓶钓金井。斗窗香暖悭留客，街鼓还催暝。调雏莺、试遣深杯，唤将愁醒。

灯市又重整。待醉勒游缰，缓穿斜径。暗忆芳盟，绡帕泪犹凝。吴宫十里吹笙路，桃李都羞靓。绣帘人、怕惹飞梅翳镜。

又

为春瘦。更瘦如梅花，花应知否。任枕函云坠，离怀半中酒。雨声楼阁春寒里，寂寞收灯后。甚年年。斗草心期，探花时候。

娇懒强拈绣。暗背里相思，闲供晴昼。

玉合罗囊，兰膏渍红豆。舞衣叠损金泥凤，
妒折阑干柳。几多愁、两点天涯远岫。

又 麓翁小园早饮，客供棋事琴事

转芳径。见雾卷晴漪，鱼弄游影。旋解
纓濯翠，临流抚菱镜。半林竹色花香处，意
足多新咏。试衣单、雁欲来时，旧寒才定。

门巷对深静。但酒敌春浓，棋消日永。
旧曲猗兰，待留向、月中听。藻池不通 原
注去声 宫沟水，任泛流红冷。小阑干、笑
拍东风醉醒。

又 贺麓翁秘阁满月

探春到。见彩花钗头，玉燕来早。正紫
龙眠重，明月弄清晓。夜尘不浸银河水，金
盃供新澡。镇帷犀、护紧东风。秀藏芝草。

星斗粲怀抱。问雾暖蓝田。玉长多少。
禁苑传香，柳边语、听莺报。片云飞趁春潮
去，红软长安道。试回头、一点蓬莱翠小。

声声慢 咏桂花

蓝云笼晓，玉树是秋，交加金钿霞枝。
人起昭阳，禁寒粉粟生机。浓香最无著处，
渐冷香、风露成霏。绣茵展，怕空阶惊坠，
化作萤飞。

三十六宫愁重，问谁持金钿，和月都移。
掣锁西厢，清尊素手重携。秋来鬓华多少，
任乌纱、醉压花低。正摇落，叹淹留、客又
未归。

又

友人以梅、兰、瑞香、水仙供客，曰四香，分韵得风字

云深山坞，烟冷江皋，人生未易相逢。一笑灯前，钗行两两春容。清芳夜争真态，引生香、撩乱东风。探花手，与安排金属，懊恼司空。

憔悴敲翘委佩，恨玉奴销瘦，飞趁轻鸿。试问知心，尊前谁最情浓。连呼紫云伴醉，小丁香、才吐微红。还解语，待携归、行雨梦中。

又

陪幕中饯孙无怀于郭希道池亭，闰重九前一日

檀栾金碧，婀娜蓬莱，游云不蘸芳洲。露柳霜莲，十分点缀成秋。新弯画眉未稳，似含羞、低护墙头。愁送远，驻西台车马，共惜临流。

知道池亭多宴，掩庭花、长是惊落秦讴。腻粉阑干，犹闻凭袖香留。输他翠涟拍甃，瞰新妆、时浸明眸。帘半卷，带黄花、人在小楼。

又 饮时贵家，即席三姬求词

春星当户，眉月分心，罗屏绣幕围香。歌缓□□，轻尘暗簌文梁。秋桐泛商丝丽，恨未回、飘雪垂杨。连宝镜，更一家姊妹，曾入昭阳。

莺燕堂深谁到，为殷勤、须放醉客疏狂。量减离怀，孤负蘸甲清觞。曲中倚娇佯误，算只图、一顾周郎。花镇好，驻年华、长在

琐窗。

又

宏庵宴席，客有持桐子侑俎者，白云其姬亲剥之

寒宵惊坠，香豆初收，银床一夜霜深。乱泻明珠，金盘来荐清斟。绿窗细剥檀皱，料水晶、微损春簪。风韵处，惹手香酥润，樱口脂侵。

重省追凉前事，正风吟莎井，月碎苔阴。颗颗相思，无情漫搅秋心。银台翦花杯散，梦阿娇、金屋沈沈。甚时见，露十香、钗燕坠金。

又 畿漕廨建新楼，上尹梅津

清漪衔苑，御水分流，阿阶西北青红。朱簃浮云，碧窗宿雾濛濛。璇题净横秋影，笑南飞、不过新鸿。延桂影，见素娥梳洗，微步琼空。

城外湖山十里，想无时长敞，罨画帘栊。暗柳回堤，何须系马金狨。莺花翰林千首，彩毫飞、海雨天风。凤池上，又相思、春夜梦中。

又 赠藕花洲尼

六铢衣细，一叶舟轻，黄芦堪笑浮槎。何处汀洲，云澜锦浪无涯。秋姿澹凝水色，艳真香、不染春华。笑归去，傍金波开户，翠屋为家。

回施红妆青镜，与一川平绿，五月晴霞。赧玉杯中，西风不到窗纱。端的旧莲深惹，

料彩菱、新曲羞夸。秋潋潋，对年年、人胜似花。

又 寿魏方泉

莺团橙径，鲈跃莼波，重来两过中秋。酒市渔乡，西风胜似春柔。宿春去年村墅，看黄云、还委西畴。凤池去，信吴人有分，借与迟留。

应是香山续梦，又凝香追咏，重到苏州。青鬓江山，足成千岁风流。围腰御仙花底，衬月中、金粟香浮。夜宴久，揽秋云、平倚画楼。

又 饯魏绣使泊吴江，为友人赋

旋移轻鹢，浅傍垂虹，还因送客迟留。泪雨横波，遥山眉上新愁。行人倚阑心事，问谁知、只有沙鸥。念聚散，几枫丹霜渚，莼绿春洲。

渐近香菰炊黍，想红丝织字，未远青楼。寂寞渔乡，争如连醉温柔。西窗夜深翦烛，梦频生、不放云收。共怅望，认孤烟、起处是州。

高阳台 丰乐楼分韵得如字

修竹凝妆，垂杨驻马，凭阑浅画成图。山色谁题，楼前有雁斜书。东风紧送斜阳下，弄旧寒、晚酒醒余。自销凝，能几花前，顿老相如。

伤春不在高楼上，在灯前敲枕，雨外熏炉。怕舫游船，临流可奈清臞。飞红若到西

湖底，搅翠澜、总是愁鱼。莫重来，吹尽香绵，泪满平芜。

又 落梅

宫粉雕痕，仙云堕影，无人野水荒湾。古石埋香，金沙锁骨连环。南楼不恨吹横笛，恨晓风、千里关山。半飘零，庭上黄昏，月冷阑干。

寿阳空理愁鸾。问谁调玉髓，暗补香瘢。细雨归鸿，孤山无限春寒。离魂难倩招清些，梦缟衣、解佩溪边。最愁人，啼鸟晴明，叶底青圆。

又 送王历阳以右曹赴阙

淝水秋寒，淮堤柳色，别来几换年光，紫马行迟，才生梦草池塘。便乘丹凤天边去，禁漏催、春殿称觞。过松江，雪弄飞花，冰解鸣珰。

芳洲酒社词场。赋高台陈迹，曾醉吴王。重上逋山，诗清月瘦昏黄。春风侍女衣篝畔，早鹤袍、已暖天香。到东园，应费新题，千树苔苍。

又 寿毛荷塘

风袅垂杨，雪销蕙草，何如清润潘郎。风月襟怀，挥毫倚马成章。仙都观里桃千树，映曲尘、十里荷塘。未归来，应恋花洲，醉玉吟香。

东风晴昼浓如酒，正十分皓月，一半春光。燕子重来，明朝传梦西窗。朝寒几暖金炉烬，料洞天、日月偏长。杏园诗，应待先

题，嘶马平康。

又 过种山 即越文种墓

帆落回潮，人归故国，山椒感慨重游。弓折霜寒，机心已堕沙鸥。灯前宝剑清风断，正五湖、雨笠扁舟。最无情，岩上闲花，腥染春愁。

当时白石苍松路，解勒回玉辇，雾掩山羞。木客歌阑，青春一梦荒丘。年年古苑西风到，雁怨啼、绿水蒹秋。莫登临，几树残烟，西北高楼。

倦寻芳

林钟羽 花翁遇旧欢吴门老妓李怜，邀分韵同赋此词

坠瓶恨井，分镜迷楼，空闭孤燕。寄别崔徽，清瘦画图春面。不约舟移杨柳系，有缘人映桃花见。叙分携，悔香瘢漫爇，绿鬟轻翦。

听细语、琵琶幽怨。客鬓苍华，衫袖湿遍。渐老芙蓉，犹自带霜宜看。一缕情深朱户掩，两痕愁起青山远。被西风，又惊吹、梦云分散。

又 上元

海霞倒影，空雾飞香，天市催晚。暮靄宫梅，相对画楼帘卷。罗袜轻尘花笑语，宝钗争艳春心眼。乱箫声，正风柔柳弱，舞肩交燕。

念窈窕、东邻深巷，灯外歌沈，月上花

浅。梦雨离云，点点漏壶清怨。珠络香销空念往，纱窗人老羞相见。渐铜壶，闭春阴、晓寒人倦。

又 钱周纠定夫

暮帆挂雨，冰岸飞梅，春思零乱。送客将归，偏是故宫离苑。醉酒曾同凉月舞，寻芳还隔红尘面。去难留，怅芙蓉路窄，绿杨天远。

便系马、莺边清晓，烟草晴花，沙润香软。烂锦年华，谁念故人游倦。寒食相思堤上路，行云应在孤山畔。寄新吟，莫空回、五湖春雁。

三姝媚 夷则商

吹笙池上道。为王孙重来，旋生芳草。水石清寒，过半春犹自，燕沈莺悄。稚柳阑干，晴荡漾、禁烟残照。往事依然，争忍重听，怨红凄调。

曲榭方亭初扫。印藓迹双鸳，记穿林窈。顿隔年华，似梦回花上，露晞平晓。恨逐孤鸿，客又去、清明还到。便鞚墙头归骑，青梅已老。

又 过都城旧居有感

湖山经醉惯。渍春衫、啼痕酒痕无限。又客长安，叹断襟零袂，浣尘谁浣。紫曲门荒，沿败井、风摇青蔓。对话东邻，犹是曾巢，谢堂双燕。

春梦人间须断。但怪得、当年梦缘能短。

绣屋秦筝，傍海棠偏爱，夜深开宴。舞歇歌沈，花未灭、红颜先变。伫久河桥欲去，斜阳泪满。

又

姜石帚馆水磨方氏，会饮总宜堂，即事寄毛荷塘

酣春青镜里。照晴波明眸，暮云愁髻。半绿垂丝，正楚腰纤瘦，舞衣初试。燕客飘零，烟树冷、青骢曾系。画馆朱楼，还把清尊，慰春憔悴。

离苑幽芳深闭。恨浅薄东风，褪花销腻。彩笺翻歌，最赋情、偏在笑红颦翠。暗拍阑干，看散尽、斜阳船市。付与金衣清晓，花深未起。

昼锦堂 中吕商

舞影灯前，箫声酒外，独鹤华表重归。旧雨残云仍在，门巷都非。愁结春情迷醉眼，老怜秋鬓倚蛾眉。难忘处，犹恨绣笼，无端误放莺飞。

当时。征路远，欢事差，十年轻负心期。楚梦秦楼相遇，共叹相违。泪香沾湿孤山雨，瘦腰折损六桥丝。何时向，窗下翦残红烛，夜杪参移。

汉宫春 夹钟商 追和尹梅津赋俞园牡丹

花姥来时，带天香国艳，羞掩名姝。日

长半娇半困，宿酒微苏。沈香槛北，比人间、风异烟殊。春恨重，盘云坠髻，碧花翻吐琼盂。

洛苑旧移仙谱，向吴娃深馆，曾奉君娱。猩唇露红未洗，客鬓霜铺。兰词沁壁，过西园、重载双壶。休漫道，花扶人醉，醉花却要人扶。

又 寿梅津

名压年芳，倚竹根新影，独照清漪。千年禹梁蘚碧，重发南枝。冰凝素质，遣凡桃、羞濯尘姿。寒正峭，东风似海，香浮夜雪春霏。

练鹊锦袍仙使，有青娥传梦，月转参移。逋山傍莺系马，玉翦新辞。宫妆镜里，笑人间、花信都迟。春未了，红盐荐鼎，江南烟雨黄时。

又 寿王虔州

怀得银符，卷朝衣归袖，犹惹天香。星移太微几度，飞出西江。吴城驻马，趁鲈肥、腊蚁初尝。红雾底，金门候晓，争如小队春行。

何用倚楼看镜，算橘中深趣，日月偏长。江山待吟秀句，梅靥催妆。东风水暖，弄烟娇、语燕飞樯。来岁醉，鹊楼胜处，红围舞袖歌裳。

秋霁 云麓园长桥

一水盈盈，汉影隔游尘，净洗寒绿。秋

沐平烟，日回西照，乍惊饮虹天北。彩阑翠馥。锦云直下花成屋。试纵目。空际、醉乘风露跨黄鹄。

追想缥缈，钓雪松江，恍然烟蓑，秋梦重续。问何如、临池脍玉，扁舟空舫洞庭宿。也胜饮湘然楚竹。夜久人悄，玉妃唤月归来，桂笙声里，水宫六六。

花心动 郭清华新轩

入眼青红，小玲珑、飞檐度云微湿。绣槛展春，金屋宽花，谁管采菱波狭。翠深知是深多少，不都放、夕阳红入。待装缀，新漪涨翠，小园荷叶。

此去春风满筐。应时锁蛛丝，浅虚尘榻。夜雨试灯，晴雪吹梅，趁取玳簪重盃。卷帘不解招新燕，春须笑、酒慳歌涩。半窗掩，日长困生翠睫。

又 柳

十里东风，袅垂杨、长似舞时腰瘦。翠馆朱楼，紫陌青门，处处燕莺晴昼。乍看摇曳金丝细，春浅映、鹅黄如酒。嫩阴里，烟滋露染，翠娇红溜。

此际雕鞍去久。空追念邮亭，短枝盈首。海角天涯，寒食清明，泪点絮花沾袖。去年折赠行人远，今年恨、依然纤手。断肠也，羞眉画应未就。

龙山会

夷则商 陪毗陵幕府诸名胜载酒双清赏芙蓉

石径幽云冷，步障深深，艳锦青红亚。
小桥和梦过，仙佩杳、烟水茫茫城下。何处
不秋阴，问谁借、东风艳冶。最娇娆，愁侵
醉颊，泪绡红洒。

摇落翠莽平沙，竞挽斜阳，驻短亭车马。
晓妆羞未堕。沈恨起、金谷魂飞深夜。惊雁
落清歌，酹花倩、觥船快泻。去未舍。待月
向井梧梢上挂。

八声甘州 陪庾幕诸公游灵岩

渺空烟四远，是何年、青天坠长星。幻
苍崖云树，名娃金屋，残霸宫城。箭径酸风
射眼，膩水染花腥。时鞞双鸳响，廊叶秋声。

宫里吴王沈醉，倩五湖倦客，独钓醒醒。
问苍波无语，华发奈山青。水涵空、阑干高
处，送乱鸦、斜日落渔汀。连呼酒，上琴台
去，秋与云平。

又 姑苏台和施芸隐韵

步晴霞倒影，洗闲愁、深杯滟风漪。望
越来清浅，吴歛杳霭，江雁初飞。辇路凌空
九险，粉冷濯妆池。歌舞烟霄顶，乐景沈晖。

别是青红阑槛，对女墙山色，碧澹宫眉。
问当时游鹿，应笑古台非。有谁招、扁舟渔
隐，但寄情、西子却题诗。闲风月，暗销磨
尽，浪打鸥矶。

又 和梅津

记行云梦影，步凌波、仙衣翦芙蓉。念
杯前烛下，十香搵袖，玉暖屏风。分种寒花

旧奩，藓土蚀吴蛩。人远云槎渺，烟海沈蓬。
重访樊姬邻里，怕等闲易别，那忍相逢。
试潜行幽曲，心荡□匆匆。井梧雕、铜铺低亚，
映小眉、瞥见立惊鸿。空惆怅，醉秋香畔，
往事朦胧。

新雁过妆楼 夹钟羽

梦醒芙蓉。风檐近、浑疑佩玉丁东。翠
微流水，都是惜别行踪。宋玉秋花相比瘦，
赋情更苦似秋浓。小黄昏，绀云暮合，不见
征鸿。

宜城当时放客，认燕泥旧迹，返照楼空。
夜阑心事，灯外败壁哀蛩。江寒夜枫怨落，
怕流作题情肠断红。行云远，料澹蛾人在，
秋香月中。

又

中秋后一夕，李方庵月庭延客，命小妓过新水
令，坐间赋词

阆苑高寒。金枢动、冰宫桂树年年。翦
秋一半，难破万户连环。织锦相思楼影下，
钿钗暗约小帘间。共无眠。素娥惯得，西坠
阑干。

谁知壶中自乐，正醉围夜玉，浅斗娟婵。
雁风自劲，云气不上凉天。红牙润沾素手，
听一曲清歌双雾鬟。徐郎老，恨断肠声在，
离镜孤鸾。

凄凉犯

夷则羽，俗名仙吕调，犯双调重台水仙

空江浪阔。清尘凝、层层刻碎冰叶。水边照影，华裾曳翠，露搔泪湿。湘烟暮合。□尘袜、凌波半涉。怕临风、□欺瘦骨，护冷素衣叠。

樊姊玉奴恨，小钿疏唇，洗妆轻怯。汜人最苦，粉痕深、几重愁靥。花隘香浓，猛熏透、霜绡细摺。倚瑶台，十二金钱晕半掐。

尾犯 黄钟宫 赠陈浪翁重客吴门

翠被落红妆，流水腻香，犹共吴越。十载江枫，冷霜波成缣。灯院静、凉花乍翦，桂园深、幽香旋折。醉云吹散，晚树细蝉，时替离歌咽。

长亭曾送客，为偷赋、锦雁留别。泪接孤城，渺平芜烟阔。半菱镜、青门重售，采香堤、秋兰共结。故人憔悴，远梦越来溪畔月。

又 甲辰中秋

绀海掣微云，金井暮凉，梧韵风急。何处楼高，想清光先得。江汜冷、冰绡乍洗，素娥恹，菱花再拭。影留人去，忍向夜深，帘户照陈迹。

竹房苔径小，对日暮、数尽烟碧。露蓼香泾，记年时相识。二十五、声声秋点，梦不认、屏山路窄。醉魂幽扬，满地桂阴无人惜。

东风第一枝 黄钟商

倾国倾城，非花非雾，春风十里独步。

胜如西子妖娆，更比太真澹泞。铅华不御。漫道有、巫山洛浦。似恁地、标格无双，镇锁画楼深处。

曾被风、容易送去。曾被月、等闲留住。似花翻使花羞，似柳任从柳妒。不教歌舞。恐化作、彩云轻举。信下蔡、阳城俱迷，看取宋玉词赋。

夜合花 黄钟商 自鹤江入京泊葑门外有感

柳暝河桥，莺晴台苑，短策频惹春香。当时夜泊，温柔便入深乡。词韵窄，酒杯长。翦蜡花、壶箭催忙。共追游处，凌波翠陌，连棹横塘。

十年一梦凄凉。似西湖燕去，吴馆巢荒。重来万感，依前唤酒银罍。溪雨急，岸花狂。趁残鸦、飞过苍茫。故人楼上，凭谁指与，芳草斜阳。

探春慢 龟翁下世后登研意

径苔深，念断无故人，轻敲幽户。细草春回，目送流光一羽。重云冷，哀雁断，翠微空，愁蝶舞。荡鸣渐，游蓬小，梦枕残云惊寤。

还识西湖醉路。向柳下并鞍，银袍吹絮。事影难追，那负灯床闻雨。冰溪凭谁照影，有明月、乘兴去。暗相思，梅孤瘦、共江亭暮。

柳梢青

与龟翁登研意观雪，怀癸卯岁腊朝断桥并马之游

断梦游轮。孤山路杳，越树阴新。流水凝酥，征衫沾泪，都是离痕。

玉屏风冷愁人。醉烂漫、梅花翠云。傍夜船回，惜春门掩，一镜香尘。

生查子 稽山对雪有感

暮云千万重，寒梦家乡远。愁见越溪娘，镜里梅花面。

醉情啼枕冰，往事分钗燕。三月灞陵桥，心翦东风乱。

一翦梅 赠友人

远目伤心楼上山。愁里长眉，别后蛾鬟。暮云低压小阑干。教问孤鸿，因甚先还。

瘦倚溪桥梅夜寒。雪欲消时，泪不禁弹。翦成钗胜待归看。春在西窗，灯火更阑。

点绛唇 越山见梅

春未来时，酒携不到千岩路。瘦还如许。晚色天寒处。

无限新愁，难对风前语。行人去。暗消

春素。横笛空山暮。

西江月 赋瑶圃青梅枝上晚花

枝袅一痕雪在，叶藏几豆春浓。玉奴最晚嫁东风。来结梨花幽梦。

香力添熏罗被，瘦肌犹怯冰绡。绿阴青子老溪桥。羞见东邻娇小。

桃源忆故人

越山青断西陵浦。一片密阴疏雨。潮带旧愁生暮。曾折垂杨处。

桃根桃叶当时渡。呜咽风前柔橹。燕子不留春住。空寄离檣语。

木兰花慢 寿秋壑

记琼林宴起，软红路、几西风。想汉影千年，荆江万顷，槎信长通。金猊。锦鞬赐马，又霜横、汉节枣仍红。细柳春阴喜色，四郊秋事年丰。

从容。岁晚玉关，长不闭、静边鸿。访武昌旧垒，山川相缪，日费诗筒。兰宫。系书翠羽，带天香、飞下玉芙蓉。明月瑶笙奏彻，倚楼黄鹤声中。

夜行船 赠赵梅壑

碧甃清漪方镜小。绮疏净、半尘不到。

全宋词 吴文英

古鬲香深，宫壶花换，留取四时春好。

楼上眉山云窈窕。香衾梦、镇疏清晓。
并蒂莲开，合欢屏暖，玉漏又催朝早。

朝中措 赠赵梅壑

吴山相对越山青。湘水一春平。粉字情深题叶，红波香染浮萍。

朝云暮雨，玉壶尘世，金屋瑶京。晚雨西陵潮讯，沙鸥不似身轻。

风入松 寿梅壑

一帆江上暮潮平。骑鹤过瑶京。湘波山色青天外，红香荡、玉佩东丁。西圃仍圆夜月，南风微弄秋声。

阿咸才俊玉壶冰。王母最怜生。万年枝上千年叶，垂杨鬢、春共青青。连唤碧筒传酒，云回一曲双成。

西江月 登蓬莱阁看桂

清梦重游天上，古香吹下云头。箫声三十六宫愁。高处花惊风骤。

客路羁情不断，阑干晚色先收。千山浓绿未成秋。谁见月中人瘦。

朝中措 题陆桂山诗集

殷云雕叶晚晴初。篱落认奚奴。才近西

窗灯火，旋收残夜琴书。

秋深露重，天空海阔，玉界香浮。木落秦山清瘦，西风几许工夫。

声声慢 和沈时斋八日登高韵

凭高入梦，摇落关情，寒香吹尽空岩。坠叶消红，欲题秋讯难缄。重阳正隔残照，趁西风、不响云尖。乘半暝、看残山濯翠，剩水开奩。

暗省长安年少，几传杯吊甫，把菊招潜。身老江湖，心随飞雁天南。乌纱倩谁重整，映风林、钩玉纤纤。漏声起，乱星河、入影画檐。

点绛唇 和吴见山韵

金井空阴，枕痕历尽秋声闹。梦长难晓。月树愁鸦悄。

梅压檐梢，寒蝶寻香到。窗黏了。翠池春小。波冷鸳鸯觉。

又 有怀苏州

明月茫然，夜来应照南桥路。梦游熟处，一枕啼秋雨。

可惜人生，不向吴城住。心期误。雁将秋去。天远青山暮。

玉楼春 和吴见山韵

阑干独倚天涯客。心影暗随风叶寂。千

山秋入雨中青，一雁暮随云去急。

霜花强弄春颜色。相吊年光浇大白。海
烟沈处倒残霞，一杼鲛绡和泪织。

柳梢青 题钱得闲四时图画

翠嶂围屏。留连迅景，花外油亭。澹色
烟昏，浓光清晓，一幅闲情。

辋川落日渔罾。写不尽、人间四并。亭
上秋声，莺笼春语，难入丹青。

浣溪沙 陈少逸席上用联句韵有赠

秦黛横愁送暮云。越波秋浅暗啼昏。空
庭春草绿如裙。

彩扇不歌原上酒，青门频返月中魂。花
开空忆倚阑人。

又

一曲鸾箫别彩云。燕钗尘涩镜华昏。灞
桥舞色褪蓝裙。

湖上醉迷西子梦，江头春断倩离魂。旋
緘红泪寄行人。

一翦梅 赋处静以梅花枝见赠

老色频生玉镜尘。雪澹春姿，越看精神。
溪桥人去几黄昏。流水泠泠，都是啼痕。

烟雨轻寒暮掩门。萼绿灯前，酒带香温。
风情谁道不因春。春到一分，花瘦一分。

燕归梁 对雪醒坐上云麓先生

一片游尘拂镜湾。素影护梅残。行人无语看春山。背东风、两苍颜。

梦飞不到梨花外，孤馆闭、五更寒。谁怜消渴老文园。听溪声、泻冰泉。

乌夜啼 题赵三畏舍馆海棠

醉痕深晕潮红。睡初浓。寒食来时池馆，旧东风。

银烛换。月西转。梦魂中。明日春和人去，绣屏空。

浪淘沙 有得越中故人赠杨梅者，为赋赠

绿树越溪湾。过雨云殷。西陵人去暮潮还。铅泪结成红粟颗，封寄长安。

别味带生酸。愁忆眉山。小楼灯外楝花寒。衫袖醉痕花睡在，犹染微丹。

蹋莎行

润玉笼绡，檀樱倚扇。绣圈犹带脂香浅。榴心空叠舞裙红，艾枝应压愁鬟乱。

午梦千山，窗阴一箭。香瘢新褪红丝腕。隔江人在雨声中，晚风孤叶生秋怨。

浪淘沙 九日从吴见山觅酒

山远翠眉长。高处凄凉。菊花清瘦杜秋娘。净洗绿杯牵露井，聊荐幽香。

乌帽压吴霜。风力偏狂。一年佳节过西厢。秋色雁声愁几许，都在斜阳。

思佳客 赋半面女髑髅

钗燕拢云睡起时。隔墙折得杏花枝。青春半面妆如画，细雨三更花又飞。

轻爱别，旧相知。断肠青冢几斜晖。断红一任风吹起，给习空时不点衣。

满江红 饯方蕙岩赴阙

竹下门敲，又呼起、胡蝶梦清。闲里看、邻墙梅子，几度仁生。灯外江湖多夜雨，月边河汉独晨星。向草堂、清晓卷琴书，猿鹤惊。

宫漏静，朝马鸣。西风起，已关情。料希音不在，女瑟娲笙。莲荡折花香未晚，野舟横渡水初晴。看高鸿、飞上碧云中，秋一声。

极相思 题陈藏一水月梅扇

玉纤风透秋痕。凉与素怀分。乘鸾归后，

全宋词 吴文英

生绡净翦，一片冰云。

心事孤山春梦在，到思量、犹断诗魂。
水清月冷，香消影瘦，人立黄昏。

思佳客 闰中秋

丹桂花开第二番。东篱展却宴期宽。人
间宝镜离仍合，海上仙槎去复还。

分不尽，半凉天。可怜闲剩此婵娟。素
娥未隔三秋梦，赢得今宵又倚阑。

醉落魄 题藕花洲尼扇

春温红玉。纤衣学翦娇鸦绿。夜香烧短
银屏烛。偷掷金钱，重把寸心卜。

翠深不碍鸳鸯宿。采菱谁记当时曲。青
山南畔红云北。一叶波心，明灭澹妆束。

朝中措 题兰室道女扇

楚皋相遇笑盈盈。江碧远山青。露重寒
香有恨，月明秋佩无声。

银灯炙了，金炉烬暖，真色罗屏。病起
十分清瘦，梦阑一寸春情。

杏花天 咏汤

蛮姜豆蔻相思味。算却在、春风舌底。
江清爱与消残醉。悴憔文圆病起。

全宋词 吴文英

停嘶骑、歌眉送意。记晓色，东城梦里。
紫檀晕浅香波细。肠断垂杨小市。

满江红 刘朔斋赋菊和韵

露浥初英，早遗恨、参差九日。还却笑、
萸随节过，桂雕无色。杯面寒香蜂共泛，篱
根秋讯蛩催织。爱玲珑、筛月水屏风，千枝
结。

芳草韵，寒泉咽。霜著处，微红湿。共
评花索句，看谁先得。好漉乌巾连夜醉，莫
愁金钿无人拾。算遗踪、犹有枕囊留，相思
物。

朝中措 闻桂香

海东明月锁云阴。花在月中心。天外幽
香轻漏，人间仙影难寻。

并刀剪叶，一枝晓露，绿鬓曾簪。惟有
别时难忘，冷烟疏雨秋深。

梦行云 原注：“即六么花十八”和赵修全韵

簟波皱纤縠。朝炊熟。眠未足。青奴细
膩，未拌真珠斛。素莲幽怨风前影，搔头斜
坠玉。

画阑枕水，垂杨梳雨，青丝乱、如乍沐。
娇笙微韵，晚蝉理秋曲。翠阴明月胜花夜，
那愁春去速。

天香 寿筠塘内子

碧藕藏丝，红莲并蒂，荷塘水暖香斗。
窈窕文窗，深沉画幔，锦瑟岁华依旧。洞箫韵里，同跨鹤、青田碧岫。菱镜妆台挂玉，芙蓉艳褥锦绣。

西邻障蓬澡手。共华朝、梦兰分秀。未冷绮帘犹卷，浅冬时候。秋到霜黄半亩。便准拟、携花就君酒。花酒年华，天长地久。

谒金门 和勿斋韵

鸡唱晚。斜照西窗白暖。一沉午醒幽梦远。素衾春絮软。

紫燕红楼歌断。锦瑟华年一箭。偷果风流输曼倩。昼际生绣线。

点绛唇

香泛罗屏，夜寒著酒宜偎倚。翠偏红坠。唤起芙蓉睡。

一曲伊州，秋色芭蕉里。娇和醉。眼情心事。愁隔湘江水。

夜游宫

人去西楼雁杳。叙别梦、扬州一觉。云澹星疏楚山晓。听啼鸟，立河桥，话未了。

寸外蛩声早。细织就、霜丝多少。说与萧娘未知道。向长安，对秋灯，几人老。

瑶华 分韵得作字，戏虞宜兴

秋风采石，羽扇挥兵，认紫骝飞跃。江
籬塞草，应笑春、空锁凌烟高阁。胡歌秦陇，
问铙鼓、新词谁作。有秀荪、来染吴香，瘦
马青刍南陌。

冰澌细响长桥，荡波底蛟腥，不浣霜锸。
乌丝醉墨，红袖暖、十里湖山行乐。老仙何
处，算洞府、光阴如昨。想地宽、多种桃花，
艳锦东风成幄。

思佳客 癸卯除夜

自唱新词送岁华。鬓丝添得老生涯。十
年旧梦无寻处，几度新春不在家。

夜懒换、酒难赊。可怜此夕看梅华。隔
年昨夜青灯在，无限妆楼尽醉讹。

六丑 壬寅岁吴门元夕风雨

渐新鹅映柳，茂苑锁、东风初掣。馆娃
旧游，罗襦香未灭。玉夜花节。记向留连处，
看街临晚，放小帘低揭。星河潋艳春云热。
笑靥敲梅，仙衣舞缣。澄澄素娥宫阙。醉西
楼十二，铜漏催彻。

红消翠歇。叹霜簪练发。过眼年光，旧

全宋词 吴文英

情尽别。泥深厌听啼鸪。恨愁霏润沁，陌头尘袜。青鸾杳、钿车音绝。却因甚、不把欢期，付与少年华月。残梅瘦、飞趁风雪。向夜永，更说长安梦，灯花正结。

青玉案 重游溪葵园

东风客雁溪边道。带春去、随春到。认得踏青香径小。伤高怀远，乱云深处，目断湖山杳。

梅花似惜行人老。不忍轻飞送残照。一曲秦娥春态少。幽香谁采，旧寒犹在，归梦啼莺晓。

采桑子 瑞香

茜罗结就丁香颗，颗颗相思。犹记年时。一曲春风酒一卮。

彩鸾依旧乘云到，不负心期。清睡浓时。香趁银屏胡蝶飞。

水龙吟 云麓新葺北墅园池

好山都在西湖，斗城转北多流水。屋边五亩，桥通双沼，平烟蘸翠。旋叠云根，半开竹径，鸥来须避，四时长把酒，临花傍月，无一日、不春意。

独乐当时高致。醉吟篇、如今还继。举头见日，葵心倾□，□□归计。浮碧亭□，

全宋词 吴文英

泛红波迥，桃源人世。待天香□□，开时又胜，翠阴青子。

望江南

三月暮，花落更情浓。人去秋千闲挂月，马停杨柳倦嘶风。堤畔画船空。

恹恹醉，长日小帘栊。宿燕夜归银烛外，啼莺声在绿荫中。无处觅残红。

采桑子

水亭花上三更月，扇与人闲。弄影栏干。玉燕重抽拢坠簪。

心期偷卜新莲子，秋入眉山。翠破红残。半篔湘波生晓寒。

清平乐 书梳子扇

柔柯剪翠。胡蝶双飞起。谁堕玉钿花径里。香带薰风临水。

露红滴□秋枝。金泥不染禅衣。结得同心成了，任教春去多时。

燕归梁 书水仙扇

白玉搔头坠髻松。怯冷翠裙重。当时离佩解丁东。澹云低、暮江空。

青丝结带鸳鸯盏，岁华晚，又相逢。绿

全宋词 吴文英

尘湘水避春风。步归来、月宫中。

西江月

江上桃花流水，天涯芳草青山。楼台春锁碧云湾。都入行人望眼。

一镜波平鸥去，千林日落鸦还。天风袅袅送轻帆。暮过星槎银汉。

满江红

翠幕深庭，露红晚、闲花自发。春不断、亭台成趣，翠阴蒙密。紫燕雏飞帘额静，金鳞影转池心阔。有花香、竹色赋闲情，供吟笔。

闲问字，评风月。时载酒，调冰雪。似初秋入夜，浅凉期葛。人境不教车马近，醉乡莫放笙歌歇。倩双成、一曲紫云回，红莲折。

夜行船 寓化度寺

鸦带斜阳归远树。无人听、数声钟暮。日与愁长，心灰香断，月冷竹房扃户。

画扇青山吴苑路。傍怀袖、梦飞不去。忆别西池，红绡盛泪，肠断粉莲啼路。

好事近 僧房听琴

翠冷石床云，海上偷传新曲。弹作一檐

全宋词 吴文英

风雨，碎芭蕉寒绿。

冰泉轻泻翠筒香，林果荐红玉。早是一分秋意，到临窗修竹。

鹧鸪天 化度寺作

池上红衣伴倚阑。栖鸦常带夕阳还。殷云度雨疏桐落，明月生凉宝扇闲。

乡梦窄，水天宽。小窗愁黛澹秋山。吴鸿好为传归信，杨柳阊门屋数间。

虞美人影 咏香橙

黄包先著风霜劲。独占一年佳景。点点吴盐雪凝。玉脍和齏冷。

洋园谁识黄金径。一棹洞庭秋兴。香荐兰皋汤鼎。残酒西窗醒。

花上月令

文园消渴爱江清。酒肠怯、怕深觥。玉舟曾洗芙蓉水，泻清冰。秋梦浅，醉云轻。

庭竹不收帘影去，人睡起，月空明。瓦瓶汲井和秋叶，荐吟醒。夜深重，怨遥更。

卜算子

凉挂晓云轻，声度西风小。井上梧桐应未知，一叶云鬟袅。

全宋词 吴文英

来雁带书迟，别燕归程早。频探秋香开未开，恰似春来了。

凤栖梧 甲辰七夕

开过南枝花满院。新月西楼，相约同针线。高树数声蝉送晚。归家梦向斜阳断。

夜色银河情一片。轻帐偷欢，银烛罗屏怨。陈迹晚风吹雾散。帘钩空带蛛丝卷。

霜天晓角 题胭脂岭陶氏门

烟林褪叶。红藉游人屐。十里秋声松路，岚云重、翠涛涉。

伫立。闲素箎。画屏萝嶂叠。明月双成归去，天风里、凤笙泫

乌夜啼 桂花

西风先到岩扃。月笼明。金露啼珠滴翠，小银屏。

一颗颗，一星星。是秋情。香裂碧窗烟破，醉魂醒。

夜行船

逗晓栏干沾露水。归期杳、画檐鹊喜。粉汗余香，伤秋中酒，月落桂花影里。

屏曲巫山和梦倚。行云重、梦飞不起。

全宋词 吴文英

红叶中庭，绿尘斜□，应是宝箏慵理。

凤栖梧 化度寺池莲一花最晚有感

湘水烟中相见早。罗盖低笼，红拂犹娇小。妆镜明星争晚照。西风日送凌波杳。
惆怅来迟羞窈窕。一霎留连，相伴栏干悄。今夜西池明月到。余香翠被空秋晓。

生查子 秋社

当楼月半奁，曾买菱花处。愁影背栏干，素发残风露。

神前鸡酒盟，歌断秋香户。泥落画梁空，梦想青春语。

霜天晓角

香莓幽径滑。萦绕秋曲折。帘额红摇波影，鱼惊坠、暗吹沫。

浪阔。轻棹拨。武陵曾话别。一点烟红春小，桃花梦、半林月。

西江月 丙午冬至

添线绣床人倦，翻香罗幕烟斜。五更箫鼓贵人家。门外晓寒嘶马。

帽压半檐朝雪，镜开千靛春霞。小帘沽酒看梅花。梦到林逋山下。

恋绣衾

频摩书眼怯细文。小窗阴、天气似昏。
兽炉暖、慵添困，带茶烟、微润宝薰。

少年娇马西风冷，旧春衫、犹浣酒痕。
梦不到、梨花路，断长桥、无限暮云。

杏花天

鬢棱初剪玉纤弱。早春入、屏山四角。
少年买困成欢谑。人在浓香绣幄。

霜丝换、梅残梦觉。夜寒重、长安紫陌。
东风入户先情薄。吹老灯花半萼。

醉桃源 元日

五更枥马静无声。邻鸡犹怕惊。日华平
晓弄春明。暮寒愁翳生。

新岁梦，去年情。残宵半酒醒。春风无
定落梅轻。断鸿长短亭。

唐多令 惜别

何处合成愁。离人心上秋。纵芭蕉、不
雨也飕飕。都道晚凉天气好，有明月、怕登
楼。

年事梦中休。花空烟水流。燕辞归、客
尚淹留。垂柳不萦裙带住，漫长是、系行舟。

好事近 秋饮

雁外雨丝丝，将恨和愁都织。玉骨西风添瘦，减尊前歌力。

袖香曾枕醉红腮，依约唾痕碧。花下凌波入梦，引春雏双鬣。

忆旧游 别黄澹翁

送人犹未苦，苦送春、随人去天涯。片红都飞尽，正阴阴润绿，暗里啼鸦。赋情顿雪双鬓，飞梦逐尘沙。叹病渴凄凉，分香瘦减，两地看花。

西湖断桥路，想系马垂杨，依旧欹斜。葵麦迷烟处，问离巢孤燕，飞过谁家。故人为写深怨，空壁扫秋蛇。但醉上吴台，残阳草色归思赊。

宴清都

病渴文园久。梨花月，梦残春故人旧。愁弹枕雨，衰翻帽雪，为情僝僽。千金醉跃骄骢，试问取、朱桥翠柳。痛恨不、买断斜阳，西湖酝入春酒。

吴宫乱水斜烟，留连倦客，慵更回首。幽蛩韵苦，哀鸿叫绝，断音难偶。题红泛叶零乱，想夜冷、江枫暗瘦。付与谁、一半悲秋，行云在否。

金缕歌 陪履斋先生沧浪看梅

乔木生云气。访中兴、英雄陈迹，暗追前事。战舰东风慳借便，梦断神州故里。旋小筑、吴宫闲地。华表月明归夜鹤，叹当时、花竹今如此。枝上露，溅清泪。

遨头小簇行春队。步苍苔、寻幽别坞，问梅开未。重唱梅边新度曲，催发寒梢冻蕊。此心与、东君同意。后不如今今非昔，两无言、相对沧浪水。怀此恨，寄残醉。

醉落魄 院姬□主出为戍妇

柔怀难托。老天如水人情薄。烛痕犹刻西窗约。歌断梨云，留梦绕罗幕。

寒更唱遍吹梅角。香消臂趁弓弰削。主家衣在羞重著。独掩营门，春尽柳花落。

朝中措

晚妆慵理瑞云盘。针线傍灯前。燕子不归帘卷，海棠一夜孤眠。

踏青人散，遗钿满路，雨打秋千。尚有落花寒在，绿杨未褪春绵。

青玉案

短亭芳草长亭柳。记桃叶，烟江口。今

日江村重载酒。残杯不到，乱红青冢，满地闲春绣。

翠阴曾摘梅枝嗅。还忆秋千玉葱手。红索倦将春去后。蔷薇花落，故园胡蝶，粉薄残香瘦。

又

新腔一唱双金斗。正霜落、分甘手。已是红窗人倦绣。春词裁烛，夜香温被，怕减银壶漏。

吴天雁晓云飞后。百感情怀顿疏酒。彩扇何时翻翠袖。歌边拌取，醉魂和梦，化作梅边瘦。

好事近

飞露洒银床，叶叶怨梧啼碧。蕲竹粉连香汗，是秋来陈迹。

藕丝空缆宿湖船，梦阔水云窄。还系鸳鸯不住，老红香月白。

杏花天 重午

幽欢一梦成炊黍。知绿暗、汀菰几度。竹西歌断芳尘去。宽尽经年臂缕。

梅黄后、林梢更雨。小池面、啼红怨暮。当时明月重生处。楼上宫眉在否。

浪淘沙

灯火雨中船。客思绵绵。离亭春草又秋

烟。似与轻鸥盟未了，来去年年。
往事一潸然。莫过西园。凌波香断绿苔钱。
燕子不知春事改，时立秋千。

思佳客

迷蝶无踪晓梦沈。寒香深闭小庭心。欲知湖上春多少，但看楼前柳浅深。
愁自遣，酒孤斟。一帘芳景燕同吟。杏花宜带斜阳看，几阵东风晚又阴。

采桑子慢 九日

桐敲露井，残照西窗人起。怅玉手、曾携乌纱，笑整风敲。水叶沈红，翠微云冷雁慵飞。楼高莫上，魂消正在，摇落江蓠。
走马断桥，玉台妆榭，罗帕香遗。叹人老、长安灯外，愁换秋衣。醉把茱萸，细看清泪湿芳枝。重阳重处，寒花怨蝶，新月东篱。

古香慢

自度腔 夷则商犯无射宫赋沧浪看桂
怨娥坠柳，离佩摇蕙，霜讯南圃。漫忆桥扉，倚竹袖寒日暮。还问月中游，梦飞过、金风翠羽。把残云、剩水万顷，暗熏冷麝凄苦。
渐浩渺、凌山高处。秋澹无光，残照谁

全宋词 吴文英

主。露粟侵肌，夜约羽林轻误。翦碎惜秋心，更肠断、珠尘藓路。怕重阳，又催近、满城细雨。

蹋莎行 敬赋草窗绝妙词

杨柳风流，蕙花清润。苹□未数张三影。
沈香倚醉调清平，新辞□□□□□。
蛟室裁绡，□□□□。□□白雪争歌郢。
西湖同结杏花盟，东风休赋丁香恨。

失调名

霜杵敲寒，风灯摇梦。

浣溪沙 春情

手卷珠帘上玉钩。依前春恨锁重楼。风里落花谁是主，思悠悠。
青鸟不传云外信、丁香空结雨中愁。回首绿波三峡暮，接天流。